

# **THEOLOGIA MORALIS DECALOGALIS PER MODUM...**

---

Benjamin Elbel, Josè  
Maria Fonseca de Evora











# THEOLOGIÆ MORALIS DECALOGALIS

Per modum Conferentiarum  
**CASIBUS PRACTICIS**  
ILLUSTRATÆ ET APPLICATÆ  
AD USUM

Tum Curatorum, tum etiam pro  
animarum Cura Examinandorum

## *PARS II.*

DE  
**FIDE, SPE, ET CHARITATE**

Nec non  
IN PRIMUM PRÆCEPTUM DECALOGI  
DE VIRTUTE RELIGIONIS,  
Vitiisque iisdem Virtutibus oppositis.

AUTHORE

P. Fr. BENJAMIN ELBEL,  
Ordinis FF. Minorum Recollectorum,  
Almæ Provinciæ nostræ Argentinæ seu Super-  
ioris Germaniæ SS. Theologiæ Lectore  
Jubilato.


*Editio secunda.*

---

AUGUSTÆ VINDEL.  
Sumptibus MATHIÆ WOLFF, Bibliopolæ.  
MDCGXXXV.







*Licentia Ordinis.*

**E**Go infrascriptus totius Ordinis Sera-  
phici Definitor, ac Nationis Ger-  
mano-Belgicæ Commissarius Genera-  
lis &c. virtute præsentium facultatem fa-  
cio Rever. Pat. Fr. BENJAMIN ELBEL  
SS. Theologiæ Lectori Jubilato, ac Pro-  
vincia Nostræ Germaniæ Superioris sive  
Argentinæ Ord. Fratrum Minorum Re-  
collect. Custodi, Tractatum Theolo-  
gico-Moralem de Fide, Spe & Chari-  
tate &c. à se compositum, & à duobus  
Sacerdotibus Ordinis nostri Theologis;  
ad id specialiter deputatis, revisum ac  
approbatum, servatis aliàs de jure ser-  
vandis typo publico committendi. In  
quorum fidem &c. signatum sub meo  
Chirographo Officiique Sigillo. Mo-  
nasterii Westphaliæ die 2. Febr. Anno  
1734.

*Fr. Godefridus Stüve, mppr.*



# FACULTAS

Admodum Rev. P. Ministri  
Provincialis.

**E**GO Fr. Bonifacius Schmid Ord. FF.  
Min. S. Francisci Recollectorum Pro-  
vinciae Argentinae, seu superioris Germa-  
niae Minister Provincialis, hisce, quan-  
tum in me est, facultatem concedo, ut  
*Conferentiae Theologico-Morales, seu Tra-  
ctatus secundus in Decalogum, de Fide,  
Spe, & Charitate, nec non de Virtute Re-  
ligionis &c.* à R. P. Benjamin Elbel, SS.  
Theologiae Lectore Jubilato, & Provin-  
ciae nostrae Custodem Custode compo-  
situs, atque à Theologis ad id deputatis  
lectus, & censuratus, praelo dari possit.  
In cuius fidem has Officii mei sigillo mu-  
nitas, & propria manu subscriptas dedi  
in Praesidentia nostra Fomerispergenfi  
die 5. Martii, Anno 1734.

*Fr. Bonifacius Schmid,*  
*qui supra mppr.*




## *Privilegium Cæsareum.*

Cùm S. Cæsareæ Majestatis Privilegio cautum sit omnibus, & singulis Typographis, & Bibliopolis, ne libros à nostri Ordinis Patribus editos, vel imposterum edendos imprimant, recudant, aut alibi recusos intra S. R. Imperii, Regnorumque ac Ditionum hæreditariarum Domûs Austriacæ fines adducant, vendant, vel distrahant absque assensu vel facultate dictorum Patrum sub gravissima multa &c. Hinc ego F. Bonifacius Schmid p. t. FF. Min. Recoll. Provinciæ Argentinæ, seu Superioris Germaniæ Minister Provincialis D. Mathiæ Wolff, Bibliopolæ Augustano facultatem concedo, in impressione *Conferentiarum Theologico-Moralium*, seu Tractatûs secundi in *Decalogum*, de *Fide*, *Spe*, & *Charitate*, nec non de *Virtute Religionis* &c. à R. P. Benjamin Elbel, SS. Theologiæ Lectore Jubilato, & Provinciæ nostræ Custodum Custode, compositi, dictô Privilegio utendi. In quorum fidem has manu meâ subscriptas, & officii mei sigillo munitas dedi in Præsentia nostra Fermerspergensî die 5. Martii Anno 1734.

*Fr. Bonifacius Schmid,*  
*qui supra mppr.*

X 3

*Appro-*




## *Approbatio Theologica I.*

**D**E mandato A. R. P. M. Provincialis hunc  
Tractatum Theologico-Moralem de *Fide*,  
*Spe*, & *Charitate* à Reverendo P. BENJAMIN  
ELBEL, SS. Theologiæ Lectore Jubilato,  
ac Provinc. Argent. seu German. super. Cu-  
stode actuali compositum pari studio, animi-  
que attentione legi, in eoque nihil, quod bo-  
nis moribus, aut Fidei Orthodoxæ contrarium  
esset, inveni: quin etiam attestor, præsentem  
Tractatum doctrinæ soliditate, ac dictionis  
perspicuitate superiores Tractatus eodem Au-  
thore in lucem editos (habito respectu mate-  
riarum) per omnia exæquare: dignissimum  
proinde censeo, qui publicæ utilitatis gratiâ  
in lucem publicam prodeat. Dabam in Con-  
ventu nostro Salisburgensi ad B. Virginem in  
Cælos assumptam die 18. Mens. Jan. 1734.

*Fr. Victorianus Steidle,*  
*ejusdem Ord. ac Provinc.*  
*SS. Theologiæ Lector Emer. ac*  
*p. t. Conventus Salisburg. Guar-*  
*dianus.*

*Appro-*






## *Approbatio Theologica II.*

**T**Ractatum hunc de Virtutibus Theologicis, & primo Decalogi Præcepto, à Rev. P. BENJAMIN ELBEL, SS. Theologiae Lectore Jubilato, & Almæ nostræ Provinciæ Germaniæ superioris Custode actuali elaboratum, pro debito Commissionis meæ perlegi accuratè, nec in eo quidquam, nisi commendatione, & typo dignumprehendi. Si enim materiam spectes, nedum est utilissima, sed & omnibus, iis præsertim, quibus aliorum in doctrina christiana incumbit institutio, summè necessaria. Si dicendi, docendique rationem peneses, solida est, & nervosa: si methodum, facilis ac ordinata; si denique normam, ubique & in omnibus Fidei Orthodoxæ, ac bonis moribus est admensurata. Unde ex illo non tantum ipsi præclaro Authori ulteriorem pro meritis famam, verum etiam studiosè perlecturis plurimam utilitatem præfatio. Datum in Conventu nostro Salisburgensi ad Virginem assumptam die 21. Januar. 1734.

*F. Cherubinus Mayr,  
SS. Theol. Lector Ordinarius.*




### *Approbatio Censoris.*

**T**Ractatus iste Theologicus de Fide,  
Spe, & Charitate &c. prioribus jam  
editis in claritate, utilitate, eruditione  
& doctrinæ soliditate per omnia similli-  
mus est, hinc etiam prælo & luce pu-  
blica dignissimum censeo.    Augustæ  
28. Martii 1734.

Imprimatur H. S.  
**Jo. Adam. Nieber-**  
lein, Suffragan. Ey-  
stett. Can. Cath. Ec-  
cles. Aug. & Vicar.  
Generalis mppr.

**Franc. Jos. de Handl,**  
SS. Theol. Lic. Rev. &  
Seren. Princ. & Episc.  
Aug. Consil. Eccles. Maj.  
Pœnit. & Libr. Censor.  
nec non insig. Eccles. ad  
S. Mauritium Canonic.  
& Parochus.

**Bene-**



## Benevole Lector!

**P**Osteaquam in primo Tractatu præliminari Actuum humanorum naturam, eorundemque principia ac regulas pro modulo nostro explanavimus, & casibus practicis illustravimus; progredimur jam ad explanandum eadem methodo Decalogum, id est, decem præcepta, Dei digitò, vel Angelicis manibus in tabulis lapideis descripta, & Moyfi in monte Sinay tradita; è quibus, juxta D. Augustini aliorumque Theologorum receptissimam opinionem, tria priora (utputa 1. *Non habebis Deo alienos &c.* 2. *Non assumes nomen Domini in vanum* 3. *Memento ut diem Sabbati sanctifices* &c. vocari solent præcepta primæ tabulæ; eò quòd hominem in sanctitate ad Deum ordinent: reliqua septem appellantur præcepta secundæ tabulæ, eò quòd hominem ordinent ad proximum in justitia.

) ( 5

Hujus

Hujus igitur Decalogi explanandum suscipimus primum præceptum sequentis tenoris: *Non habebis Deos alienos coram me, non facies tibi sculptile, neque omnem similitudinem - - non adorabis ea, neque coles &c. Exod. 20. v. 3. 4. & 5.* Liquet autem ex ipso tenore verborum, hoc præceptum primario esse negativum utpote quò interdicitur semel & pro semper cultus cujuscunque demum Idoli; secundariò autem esse affirmativum, in quantum nos adstringit, ut solum DEum verum colamus & adoremus, veluti Magister noster cœlestis clariùs explicuit *Matth. 4. v. 10.* dicendo: *Dominum Deum tuum adorabis, & illi soli servies.*

Cùm verò cultus veri Dei necessariò præsupponat Fidem, Spem, & Charitatem; *nemo enim* (inquit S. Augustinus *lib. 1 Enchirid.*) *colit DEum, nisi credens in DEum, sperans ab Eo bonum, Eumque diligens;* hinc ordo doctrinæ nos constringit, ut aliorum more Doctòrum ea, quæ de his cuivis fidelium, & vel maxime etiam animarum Curatoribus seu Pastoribus scitu necessaria videbuntur, priùs examinemus, vel etiam resolvamus.

Ita-




Itaque in hac secunda parte per diversas Conferentias discutiemus *1mò* naturam, necessitatem & obligationem Fidei divinæ: *2dò* Spei, & *3tò* Charitatis theologicæ; postea etiam, virtutem Religionis inter morales præstantissimam, quippe quæ tota quanta circa cultum DEO debitum, primò præcepto Decalogi nobis singulariter inculcatum occupatur, pertractaturi.

Porro post singulas virtutes mox recensitas singula vitia iisdem virtutibus contraria examinabimus; præmissis semper principiis practicis per casus practicos eadem ventilando, & tandem corollaria inde deducendo. Majoris verò claritatis gratiâ præmittendum duxi Elenchum, qui singularum conferentiarum ordinem, materiam & casus practicos repræsentet in compendio, veluti è proxima pagella patebit.


Id unum benevole Lector te obsecro quàm humillimè, ut errores, quos  
in



in hoc opusculo fortassis legendo de-  
prehenderis, pro tua discretionē ac  
prudētia excuses vel corrigas, labo-  
ribus autem meis eo, quo tibi eos-  
dem nunquam non consecratos volui,  
animo ac fine utaris, scilicet tum ad  
propriam, tum ad aliorum etiam sa-  
lutem, nec non ultimatō ad maiorem  
DEI gloriam in omnibus & per omnia  
quomodocumque demum pro-  
movendam, Vale.



ELEN-



# ELENCHUS CONFERENTIARUM, ET CASUUM.

## *Conferentia I.*

De natura Fidei divinæ, ejusdémque necessitate. Pag. i.

### C A S U S.

I. Cujusdam personæ acatholicæ, quæ, licet apprehenderit Fidem Catholicam esse verosimiliorem, nihilominus in sua secta constans perseveravit. 31.

II. Cujusdam Confessarii, qui pœnitentem de sufficientia doctrinæ christianæ suspectum, ob confluxum populi sine ulteriori examine absolvit. 34.

III. Alterius cujusdam Confessarii, qui ad personam acatholicam moribundam vocatus, præscidit omnino ab articulis fidei controversis, eandémque ad contritionem dispositam sub conditione absolvit. 37.

## *Conferentia II.*

De obligatione Fidem exterius profitendi. 49.

### C A S U S.

I. De quodam Sacerdote Catholico à Consistorio Anglicano examinato de sua fide &c. 69.

II. De

II. De quodam Chalcographo catholico, qui sua servitia addixerat cuidam alteri acatholico, dissimulans prorsus fidem catholicam. 74.

III. De quodam Præcone Ariano, qui imminente sibi mortis periculo petit Sacerdotem catholicum, in vestibus tamen sæcularibus compariturum. 78.

*Conferentia III.*

De Infidelitate. 86.

C A S U S.

I. Cujusdam Catholici, qui animò explorandi fidem alterius de hæresi sibi suspecti, dixit, se velle amplecti fidem Lutheranam. 99.

II. Cujusdam acatholici, petentis à quodam R. D. Parocho unà cum filio suo duodenni instrui in fide catholica. 103.

III. Cujusdam Subdiaconi, nolentis credere, quòd omnes Consodales Sanctæ Ursulæ fuerint Virgines. 107.

*Conferentia IV.*

De Communicatione fidelium cum infidelibus, & de lectione librorum hæreticorum &c. 121.

C A S U S.

I. Cujusdam Uxoratæ Catholicæ, quæ ignoranter sortita fuit Maritum hæresi Lutherana infectum. 141.

II. Cujusdam Bibliopegæ catholici, dubitantis, an non peccet compingendo libros hæreticos. 146.

III. Cu-



III. Cujusdam alterius personæ acatholicæ, quæ ob evitandum periculum gravis infamiæ cogebatur sæpius cuidam Rustico illiterato, & hæresi Lutherana infecto prælegere biblia Lutheri, & alios libros hæreticos.

149.

*Conferentia V.*

De Pœnis hæreticorum, nec non de potestate absolvendi ab iisdem.

161.

C A S U S.

I. De quodam Religioso Apostata, qui post simulatam aliquoties hæresin inter Lutheranos, tandem miseris pressus rediit ad suum Monasterium.

184.

II. De quadam vetula, quæ multis argumentis & rationibus vix tandem persuasa fuit, ut abjuraret suam hæresin.

189.

III. De quodam Pastore, qui noluit excipere confessionem fœminæ prægnantis, eo quod hæc de hæresi sin minus convicta saltem violenter suspecta fuerit.

193.

*Conferentia VI.*

De virtute Spei theologicæ, vitiisque eidem oppositis.

201.

C A S U S.

I. De quodam concubinario, qui meretricem suam non nihil tergiversantem tandem ad consensum permovit sequenti epiphonemate: *jam sumus perdit: ad quid ergo temperemus voluptatibus nostris.*

221.

II. De quadam vetula Marito suo exosa, quæ licet gravissimè decumbens, renuit tamen su-



sumere medicinam, soli patrocinio B. Virginis Mariæ confisa. 225.

III. De quodam desperabundo, qui à Principe suo officio orbatus, delatorem provocavit ad duellum. 229.

*Conferentia VII.*

De Virtute Charitatis tum DEO, tum etiam proximo debitæ. 242.

C A S U S.

I. Cujusdam Personæ, quæ, ut mortem in manibus Carnificis subeundam sibi conciliaret, proprio motu occidit infantem innocentissimum. 263.

II. Cujusdam honestissimæ puellæ, quæ à quodam lascivo homine stupri causâ obruta, lamentabiliter imploravit opem cujusdam alterius. 267.

III. Cujusdam pœnitentis, interrogantis, Confessarium, an cum periculo vitæ teneatur succurrere proximo suo in extremo vitæ periculo constituto. 272.

*Conferentia VIII.*


De Dilectione inimicorum. 284.

C A S U S.

I. Cujusdam Conjugatæ, quæ odium implacabile conceperat erga quandam puellam à se educatam, novissimè verò in flagranti adulterio deprehensam. 300.

II. De quadam Vetula, quæ gravissimè tulit, quòd ab alia fœmina ter fuerit amore DEI interpellata, ut dissolveret maleficium. 305.

De



# CONFERENTIA PRIMA.

De

Natura Fidei Divinæ, ejus-  
dèmq̃ue necessitate.

## SUMMARIUM.

1. Virtus ùt sic rectè dicitur : habitus perficiens substantiam rationalem.
2. Dividitur communiter ex triplici capite, scilicet 1. ex parte subjecti. 2. ex parte objecti, & 3. ex parte causæ efficientis.
3. Virtus Theologica est habitus supernaturalis, à Deo infusus.
4. Eàque triplex, scilicet 1. fides, 2. spes, 3. charitas.
5. Quas ob causas virtutes Theologicæ deperire soleant.
6. Nomine fidei ùt sic intelligitur assensus ob auctoritatem dicentis præstitus. Unde
7. Fides Divina illa dicitur, quæ innititur auctoritati Divinæ :
8. Et hæc rursus subdividi solet in habituales, & actuales.

*R. P. Elbel, Pars II. de Fide &c.* A 9.

9. Objectum materiale Fidei est omnis veritas à DEO revelata.
10. Objectum verò formale motivum est infinita Dei veracitas, falli & fallere nescia.
11. Notatur breviter duplex necessitas ad salutem scilicet *medii*, & *præcepti*.
12. Fides habitualis omnibus omnino hominibus, tam parvulis, quàm adultis, est simpliciter necessaria ad salutem : fides verò actualis adultis ad justificationem ;
13. Non verò simpliciter ad salutem, prout multi asserunt.
14. Satisfit cuidam instantiæ.
15. Quid sit fides explicita, & quid implicita ?
16. Omnibus omnino adultis ratione præditis ad justificationem obtinendam est simpliciter necessaria fides actualis explicita, & quidem supernaturalis in D E U M, & Remuneratorem.
17. Et juxta multos etiam in Sanctissimam Trinitatem, nec non in Christum Dominum.
18. Insuper quivis adultus rationis compos necessitate præcepti tenetur saltem quoad substantiam scire, & explicitè credere articulos fidei in symbolo Apostolorum contentos.
19. In Pastoribus verò animarum meritò requiritur major notitia credendorum.
20. Præterea quivis Christianus tenetur scire 1. orationem Dominicam. 2. præcepta Decalogi & Ecclesiæ, nec non 3. Sacramenta ad salutem necessaria.
21. Sufficit tamen ea nôsse quoad substantiam.
22. Symbolum Apostolorum vel orationem Dominicam non addiscere memoriter, an, vel quale peccatum sit ?
23. Omnes adulti ratione pollentes tenentur per

per se & directè ad præstandum internum assensum fidei, quamprimùm hujus mysteria eisdem sunt satis proposita.

24. Quandònam hæc satis proposita censeantur.
25. Et quid de pueris ac puellis usum rationis primò adeptis circa hoc tenendum?
26. Multi Doctores existimant, præceptum fidei per se non obligare ad sæpius eliciendum actum fidei;
27. Oppositum tamen velut verosimilius hodie est tenendum.
28. Certum insuper est, quòd sæpius per accidens saltem teneamur ad eliciendos actus fidei.
29. Resolvitur Casus I. cujusdam personæ A Catholicæ, quæ, licet apprehenderit fidem Catholicam esse verosimiliorem, nihilominus in sua secta perseveravit.
30. Quomodo tali personæ à Confessario sit occurrendum?
31. Resolvitur casus II. Cujusdam Confessarii, qui pœnitentem de sufficientia doctrinæ Christianæ suspectum ob confluum populi absque ulteriori examine absolvit;
32. Altera verò vice reversum velut hominem salutis incurium increpando dimisit sine absolutione.
33. Quomodo Confessario practicè procedendum cum talibus?
34. Resolvitur Casus III. alterius cujusdam Confessarii, qui ad personam acatholicam moribundam vocatus præscidit ab articulis controversis, eandemque ad contritionem dispositam sub conditione absolvit.

35. Occurritur cuidam instantiæ contra resolutionem hujus casus factæ.
36. An licuerit, hanc personam sepelire in loco Sacro ?
37. Præcepto fidei non satisfit, per hoc præcisè, quòd quis generaliter credat, quidquid à Deo fuit revelatum.
38. Quivis fidelium post adeptum rationis usum tenetur addiscere articulos fidei juxta suam capacitatem.
39. Parentibus incumbit gravis obligatio instruendi suas proles in rebus fidei ad salutem necessariis.
40. Idipsum à fortiori dicendum est de Pastoribus animarum.
41. Hæreticus, cui fides Catholica videtur minus probabilis, vel omnino probabilior suâ secta, non tenetur illico eidem assentiri.
42. Satisfit cuidam instantiæ in contrarium factæ.
43. Quidnam Confessario specialiter sit observandum circa pueros ac puellas, de quibus dubitare licet, an unquam satisfecerint præcepto fidei ?

## §. I.

Præmittuntur, & breviter resolvuntur quæsitæ, scitu necessaria ad resolvendos casus practicos circa naturam & necessitatem fidei

**Q**Uæres primò, quid & quotuplex sit virtus ut sic ?

- I. ad primam partem hujus quæsitæ. Virtus ut sic rectè describitur, quòd sit habitus

De Natura fidei Divina, ejusdemque &c. §

bitus perficiens substantiam rationalem, & ad bonam operationem inclinans. Ita ex *communi DD. Reiffenstuel Theolog. mor. tr. 4. dist. 1. n. 3.* Bonitas autem & convenientia hujus descriptionis vel inde haud difficulter colligi potest; nam virtus hic sumitur, prout opponitur vitio: ergo quemadmodum vitium malum reddit hominem, ejusdemque opus vitiosum, ita & virtus rectè dicitur habitus *perficiens substantiam intellectualem &c.* Et licet virtus non rarò sumi soleat pro actu virtutis v. g. humilitatis patientiæ &c. meliùs tamen, & magis propriè describitur nomine habitus inclinantis ad actus virtuosos; neque enim illico virtuosus appellari solet, qui unum vel alterum duntaxat actum virtutis v. g. patientiæ aut humilitatis exercet, sed qui ex hujusmodi actibus frequentatis jamjam acquisivit habitum sive promptitudinem sic operandi, veluti etiam constat de artificibus virtuosis, utputa Musicis, pictoribus &c. &c.

¶. ad secundam partem hujus quæsit. 2. Virtus ut sic, mox descripta convenienter ex triplici capite dividi potest & solet; scilicet 1. *ex parte subjecti.* in moralem & intellectualem. 2. *ex parte objecti* in Theologicam & moralem, & 3. *ex parte causæ efficientis* in acquisitam & infusam. Ita rursus cùm *communi DD. Reiffenstuel. loc.*

*cit. n. 5.* Explico breviter singula membra per inductionem.

I. Itaque Virtus intellectualis dicitur illa, quæ intellectum, in quo subiectatur, perficit: tales secundum Aristotelem 6. *Ethic.* 3. c. Sunt quinque, videlicet intellectus, scientia, sapientia, ars, & prudentia; quibus à Theologis meritò superaddi solet fides infusa & Theologica, quam Philosophus utpote gentilis, ignoravit. Virtus moralis illa dicitur, quæ subiectatur in appetitu rationali, id est, in voluntate, & versatur circa dirigendos mores juxta dictamen rectæ rationis, uti sunt justitia, misericordia, temperantia, fortitudo, Religio &c.

II. Virtus Theologica illa nuncupatur, quæ versatur immediatè circa Deum, rectè propterea dicta Theologica, quia Theologis principaliter incumbit de his virtutibus tractare. Ex quo liquet, virtutes Theologicas ex parte objecti rectè distingui à virtutibus moralibus proximè descriptis; quia hæ non versantur immediatè circa DEUM, sed potius circa mores, seu etiam circa hominem in suis operationibus moralibus dirigendum.

III. Denique virtus infusa meritò appellatur illa, quæ nobis à Deo immediatè infunditur, uti revera vi baptismatis nobis infundi solent Fides, Spes, Charitas. juxta



juxta Concilium Tridentinum, & communem Theologorum. Acquisita verò dicitur illa, quæ nostrâ industria & conatu, seu etiam actibus virtuosis sæpius frequentatis obtineri solet, uti experientia probat de virtutibus moralibus & intellectualibus. Verum pro meliori intellectu

Quæres jam 2dò. quid & quotuplex sit virtus Theologica?

R. ad primum, virtus Theologica est habitus supernaturalis à Deo infusus, elevans animam, ut immediate feratur in Deum. Ita in re communis DD. nominatim Henno tract. 2. de virt. quæst. proem. conclus. 1. Bene autem asseritur, quòd sit habitus; tum ob rationem mox suprâ n. 1. datam; tum etiam, quia certum esse debet ex c. *Majores. de baptismo*, quòd virtutes Theologicæ reperiantur in parvulis baptizatis: at, non minus certum est, quòd in iisdem non dentur actus virtutum, quarumcunque demum: ergo &c.

R. jam ad 2dum. Virtus Theologica 4. ut sic rectè dividitur in tria membra, scilicet in Fidem, Spem & Charitatem. Ita omnes. Ratio est: quia hisce duntaxat tribus propriè convenit descriptio virtutis Theologicæ proximè data. Fatendum nihilominus est, quòd mox enumeratæ virtutes à Theologis rursus distinguantur in habituales & actuales, quo nomine intelligunt

actus, seu actuale exercitium dictarum virtutum, scilicet fidei, spei, & charitatis.

Quæres 3tò, quomodo dictæ virtutes Theologicæ cessare soleant in subiecto, vel quas ob causas depereant?

5. R. Cum distinctione; nam virtus charitatis perditur, per quodvis peccatum mortale, ècontra tamen virtus fidei non nisi per peccatum infidelitatis, & virtus spei per peccatum desperationis depereunt. Ita cum *communissima DD.* Reiffenstuel *tr. 4. dist. 1. n. 14.* Ratio est: quia ex ordinatione divina habitus virtutum supernaturalium infusarum non destruuntur, nisi per actus sibi respectivè oppositos: atqui charitati Theologicæ (saltem ex ordinatione Divina) opponitur simpliciter omne peccatum mortale, ècontra verò fidei duntaxat opponitur peccatum infidelitatis, & spei peccatum desperationis: ergo charitas perditur &c.

Quæres 4tò, quid sit fides, & quotuplex?

6. R. Nomine fidei communiter intelligitur assensus alicui propositioni datus ob auctoritatem dicentis. Et quia subin assensum præbemus vel propter auctoritatem Divinam (quæ, utpote simpliciter summa & infallibilis, de jure meretur assensum firmissimum, prout paulò post videbimus) vel

vel etiam propter auctoritatem hominis duntaxat ; hinc fides generatim sumpta & mox descripta communissimè dividi solet in humanam , & Divinam. Verùm fide humana , utpotè nimiùm quantum fallibili relicta in suo esse , ad solam fidem Divinam , quippe quæ nostri fori est , convertimur, Unde

Quæres 5tò, quid sit fides Divina?

7. Fides Divina velut virtus Theologica rectè describitur, quòd sit virtus supernaturalis Theologica, inclinans intellectum ad firmiter assentiendum omnibus à Deo revelatis, idque propter auctoritatem revelantis. Ita in re *communissima* DD. Bonacina *de fide disp. 3. q. 2. punct. 1.* Babenstuber *tr. 5. disp. 1. art. 1. n. 1.* Ratio hujus descriptionis facile constabit ex dictis hætenus ; de jure enim meretur nomen virtutis ; quia substantiam rationalem mirum in modum perficit : rectè etiam dicitur supernaturalis ; quia fides Divina est donum Dei excedens vires naturæ , non acquisitum , sed à Deo infusum, veluti jam constat ex hætenus dictis , & amplius constabit ex dicendis.

8. Quocirca tamen rursus notandum venit, etiam hanc virtutem seu fidem communissimè à Doctoribus dividi in habituales , & actuales. Nomine habitualis intelligitur illa qualitas supernaturalis , quæ juxta Tri-

A 5

den-

dentinum mox infra allegandum etiam parvulis in baptismo infunditur, vi cuius inclinamur ad firmiter assentiendum omnibus à Deo revelatis. Nomine autem fidei actualis intelligitur assensus firmus & certus, etsi propter obscuritatem ipsius rei revelatæ obscurus, datus alicui veritati à Deo revelatæ, prout diffusius explicat Sporer *tr. 2. c. 1. sect. 1. n. 3.* Reiffenstuel, Castropalao & alii.

Quæres 6tò, quodnam sit objectum materiale, & quodnam formale fidei Divinæ?

9. R. Objectum fidei materiale est omne id, quod velut à Deo revelatum fide Divina creditur: & hoc rursus secernitur in complexum, & incomplexum. Objectum incomplexum (seu etiam subjectum) dicitur illud, de quo aliquid creditur: & quia de Deo ipso principales fidei articuli sunt credendi, hinc Deus dicitur objectum incomplexum principale & primum fidei Divinæ: Objectum verò materiale complexum dicitur omnis veritas seu propositio à Deo revelata & fide Divina credenda. Ex.gr. in hac propositione. *Verbum Divinum, seu Deus fuit incarnatus*; ly Deus est objectum incomplexum & simplex: tota autem propositio simul sumpta est objectum materiale fidei complexum,
- &

& quasi compositum, prout bene explicant Castropalao, Filliucius, & alii.

¶ Jam ad 2dam hujus quæsitæ partem. 10.  
Objectum formale motivum fidei Divinæ est infinita veracitas Dei, falli & fallere nescia. Itapost S. Thomam 2. 2. q. 1. art. 1. & Scotum. 3. dist. 23. q. un. cum communi DD. tenet Tannerus tom 3. disp. 1. q. 1. dub. 3. n. 31. Ratio est: quia objectum formale motivum fidei Divinæ rectè dicitur illud, quod hominem prudentem potest, ac debet movere ad præbendum assensum veritatibus à Deo revelatis: atqui veracitas Dei infallibilis, vi cujus Deus nec falli potest in cognoscendo verum, neque etiam fallere in dicendo seu revelando verum, potest ac debet hominem prudentem movere ad præbendum assensum veritatibus à Deo revelatis; nam interrogatus v. g. cur credat Deum esse in Essentia unum, in Personis autem trinum? prudentissimè respondet, se ideò hoc credere: quia Deus infinite verax, falli & fallere nescius hoc revelavit: ergo pro objecto formali motivo fidei Divinæ rectè statuitur infinita Dei veracitas, nedum in cognoscendo, verum insuper in revelando; non quòd ipsa revelatio se habeat per modum motivi, sed potius per modum conditionis sine qua non cognosceremus myster-

ste

sterium revelatum, & hōc ipso nec possemus eidem præbere assensum.

Quæres 7timò, quomodo Fides sit necessaria ad salutem?

II

Ante responsionem breviter advertendum, hanc quæstionem intelligendam esse  
1. tam de fide habituali, quàm actuali.  
Item 2. tam de necessitate medii, quàm de necessitate præcepti; pro cuius majori dilucidatione supponendum est, illud dici necessarium necessitate medii in ordine ad aliquem finem v. gr. ad obtinendam æternam salutem, sine quo, sive culpabiliter, sive etiam inculpabiliter non obtento aut applicato, salus æterna absolutè obtineri nequit: hōc modo Sacramentum pœnitentiæ in re vel voto susceptum, post baptismum relapsis; Itemque baptismus in re susceptus parvulis, adultis verò in re vel saltem voto susceptus est necessarius ad salutem æternam.

Econtra necessitate præcepti ad salutem necessarium dicitur illud, quod sine gravi culpa negligi vel omitti non potest, uti est v. g. restitutio boni alieni &c. nisi ignorantia inculpabilis, vel impotentia ab hoc excuset; in hoc enim præcipuè differre noscuntur necessitas præcepti & medii, quòd ab hac necessitate, medii scilicet nulla prorsus excuset impotentia vel ignorantia, bene verò ab illa. h. n.

R. Jam

R. Jam ad præsens quæsitum. Fides 12  
habitualis omnibus omnino hominibus,  
tam parvulis, quàm adultis est simpliciter  
necessaria ad salutem. 2. Fides verò actua-  
lis adultis nondum justificatis eodem mo-  
dô, simpliciter scilicet, necessaria est in  
ordine ad obtinendam justificationem, &  
per consequens ad salutem. Hæc resolu-  
tio quoad primam partem est recepta ab  
omnibus: quoad 2dam verò tenetur à Ca-  
stropalao *part. 1. tr. 4. disp. 1. punct. 8. n. 3.*  
Herincx *part 3. tr. 1. disp. 7. n. 32.* Illung  
*tr. 3. disp. un. n. 30.*

Ratio prioris desumitur tum ex illo Apo-  
stoli ad *Hebr. 11, sine fide impossibile est  
placere Deo*: tum etiam inde: quia nullus  
salvatur, nisi sit justus: at, quicumque ju-  
stus est, necessario debet habere fidem ha-  
bitualem; nam juxta Concilium Trident.  
*ss. 6. de justif. c. 7. in ipsa justificatione cum  
remissione peccatorum hac omnia simul infusa  
accipit homo per Jesum Christum, cui inse-  
ritur, fidem, spem, & charitatem, scilicet  
habitualement.* Ratio autem posterioris est  
hæc: quia omnis adultus ad justificationis  
gratiam obtinendam tenetur sese dispo-  
nere ad eandem meditantibus actibus super-  
naturalibus fidei, & spei, & charitatis; ne-  
mo quippe adultus & ratione utens, juxta  
Tridentinum *mox cit. cap. 7. & 8. conse-  
quitur justificationis gratiam, nisi hanc spe-*  
ret,

ret, & de peccatis doleat, Deumque super omnia saltem virtualiter diligat: at hoc fieri nequit, nisi adultus justificari volens credat, & Deum esse, & posse omnia hæc bona sibi conferre, veluti satis clarè innuit Apostolus *loc. cit.* dicens: *Accedentem ad Deum oportet credere, quia est, & inquirentibus se Remunerator sit*: ergo omnibus adultis ratione utentibus in ordine ad justificationis gratiam obtinendam absolute simpliciter, seu necessitate medii necessaria est fides actualis & supernaturalis.

- 13 Dixi: *Adultis in ordine ad justificationis gratiam obtinendam &c.* Minus enim verisimile mihi videtur id, quod multi sine hæsitatioue asserunt, scilicet, fidem actualem omnibus adultis ratione pollentibus esse simpliciter, absolute & necessitate medii necessariam ad salutem: minus, inquam verosimile, & nimis generaliter hoc dictum mihi videtur; nam si infans baptizatus paulò post adeptum ulum rationis moriatur, vel si baptizatus jam grandævus à nativitate cæcus, surdus & mutus invincibiliter ignoret Dei existentiam, & sine peccato mortali commissio decedat ex hac vita, procul dubio velut amicus & filius Dei adoptivus ob baptismi gratiam consequatur beatitudinem æternam, velut jure hæreditario sibi debitam, esto supponatur nunquam elicuisse actum fidei: ergo hic dici non



non debet simpliciter & absolute necessarius ad salutem. Dicere autem, quòd impossibile sit, ut adultus moriatur sine actu fidei, vel quòd Deus hujusmodi hominem perpetuò surdum & mutum &c. ante mortem teneatur miraculoso modò illustrare, &c. videtur paradoxum: licet Sanctus Thomas, aliique magni nominis Theologi bene & sapienter omnino asserant, quòd, si homo rationis usu præditus etiam in sylvis aut inter bestias educatus legem naturæ observaret, procul dubio à Deo ulterius illuminaretur, & duceretur in cognitionem sui auctoris & ultimi finis, scilicet Dei, quippe qui solet illuminare *omnem hominem venientem in hunc mundum.* Joan. 1. 6.

Dices contra hoc. Innocentius XI. inter alias etiam damnavit sequentem n. 22. *dam* propositionem: *non nisi fides unius Dei necessaria videtur necessitate medii, non autem explicita Remuneratoris*: ergo necessario cogimur fateri, fidem explicitam Remuneratoris esse simpliciter necessariam ad salutem.

¶ *Distinguendo conseq.* cogimur fateri, fidem explicitam Remuneratoris esse ad salutem necessariam illis, qui nondum sunt justificati, idque in ordine ad justificationis gratiam obtinendam, *concedo*, illis, qui jam supponuntur justificati, *nego conseq.*  
Eo.

Eoipsô enim, quôd hi velut justificati habeant gratiam sanctificantem, non amplius indigent alio medio simpliciter ad salutem necessario, veluti rem benè ponderanti de facili constabit.

Cæterum illa propositio in terminis generalibus, prout jacet, sumpta & intellecta, meritò velut falsa & erronea fuit damnata, eòquòd (ut ex hæcenus dictis constat, & amplius constabit ex dicendis *n. 16.*) neget fidem explicitam in Remunratorem justificandis in ordine ad assequendam justificationis gratiam esse simpliciter necessariam: quemadmodum bene damneretur sequens propositio: *Sacramentum pœnitentiæ non est simpliciter necessarium ad salutem.* Videatur Cardenas in *Crisi Theolog.* dissert. 15. ad dictam propositionem c. 1. à *n. 2.*

Quæres 8tavò, quænam mysteria necessario sint credenda explicitè necessitate medii & quænam necessitate præcepti?

15. Ante responsionem rursus supponendum est, quodvis mysterium credi posse vel *ex-* vel *implicitè.* Explicitè creditur, dum intellectus assentiendò immediatè fertur in tale mysterium, illud in particulari, & in se ipso credendo: ut si quis dicat: credo, verbum D. fuisse incarnatum: credo Deum esse unum in Essentia, & in Personis trinum, talis dicitur explicitè credere my-

mysterium Incarnationis, & SS. Trinitatis. Implicitè verò creditur, dum aliquod mysterium non in seipso distinctè & particulariter attingitur, sed solum in aliquo alio, in quo implicitè continetur. Ex. gr. qui credit, *quidquid Ecclesia Catholica credit, vel credendum proponit*, implicitè credit omnia mysteria fidei. Porro in ipsa quoque fide explicita dantur quidam gradus, prout sapienter advertit Herincx noster *part. 3. disp. 7. n. 41.* nam alia est confusa, alia distincta, una quoque est confusior vel generalior altera, una distinctior altera. Hòc notato

R. Jam ad quæsitum 1. necessitate medi 16  
dii (in ordine scilicet ad obtinendam justificationis gratiam) quivis adultus ratione præditus tenetur credere hæc duo saltem, scilicet, quòd *Deus sit, & quòd inquirentibus se Remunerator sit.* Ita teste Illsung *tr. 3. disp. un. n. 31. omnes Theologi.* Ratio est: quia quisquis ad justificationis gratiam obtinendam tenetur se per proprios actus disponere, eò ipso quibusdam mentis quasi passibus, tenetur Deum accedere: atqui juxta effatum Apostoli *ad Hebr. 11. accedentem ad Deum oportet credere, quia est, & quòd inquirentibus se Remunerator sit:* ergo &c. Certum insuper & exploratum habetur, quòd quivis adultus ratione pollens teneatur, quamprimum in Dei cognitio-  
*R. P. Elbel, Pars II. de Fide &c. B. nem*

nem venerit, in eundem tendere per Fidem, Spem, & Charitatem: at, implicat absolutè, ut quis per Spem & Charitatem tendat in DEUM ceu ultimum finem nostrum, nisi credat & Deum esse, & esse Remuneratorem: ergo &c. Nec abs re Deus id à nobis exigit; sublata enim Fide & Spe præmiorum, tolleretur prorsus nedum omnis cogitatio de immortalitate animæ, verùm insuper omnis sollicitudo æternæ vitæ; per consequens nemo Deum ex toto corde quæreret, nemo vitam suam, ut oportet, componeret in ordine ad salutem obtinendam: meritò proin saltem hæc duo jubemur credere.

17

Dixi: *saltem hæc duo*; etenim quamplures etiam, insignissimi DD. uti D. Thomas, S. Bonavent. Scotus &c. existimant, defacto post promulgatum Evangelium quemlibet adultum insuper necessitate mediæ teneri credere, & quidem explicitè, mysterium SS. Trinitatis, nec non mysterium Incarnationis; idque satis clarè convinci existimant tum ex Symbolo S. Athanasii, ubi absolutè dicitur: *Quicumque vult salvus esse, ante omnia opus est, ut teneat Catholicam Fidem. - Fides autem Catholica hæc est, ut unum Deum in Trinitate, & Trinitatem in unitate veneremur &c.* Et post pauca in eodem Symbolo habetur: *sed necessarium est ad æternam salutem, ut Incarnationem*  
quo-

*quoque Domini nostri JESU Christi fideliter credat &c.* Tum etiam ex illo, quia Christus Dominus *Marci ultimo* legitur, præcipisse suis Apostolis, *ut euntes in universum Mundum prædicarent Evangelium* (consequenter etiam mysterium SS. Trinitatis & Incarnationis) *omni creaturæ*, & absolute subiungit: *qui non crediderit, condemnabitur*; ex quo nonnulli volunt inferre, Fidem actualem in Sanctissimam Trinitatem, nec non in Christum, esse simpliciter & absolute omnibus adultis necessariam ad salutem; His tamen non obstantibus censeo, cum Patre Laymann, Sporer & aliis probatis Doctoribus, ex allegatis textibus plus non convinci, quàm, Fidem explicitam in SS. Trinitatem & Christum necessariam esse necessitate præcepti post satis promulgatum Evangelium, sicut ex illo: *Si vis ad vitam ingredi, serva mandata &c.* non rectè inferretur observantiam mandatorum esse necessariam necessitate mediæ ad salutem. Cùmque aliunde certum sit, Fidem actualem explicitam in SS. Trinitatem & in Christum non esse medium simpliciter necessarium ex natura rei in ordine ad justificationem & salutem consequendam; hinc mihi videtur satis probabile, hanc Fidem explicitam non esse simpliciter necessariam necessitate mediæ, sed necessitate præcepti duntaxat. Et ita hodiedum tenent insignes Doctores quarumvis Scholarum, nominatim Paulus

Mezger, Reding, Pettschacher, Babenstuber, Vega, Herincx, Sporer, Reiffenstuel, Suarez, Lugo, Laymann, Illung, Castropalao *part. 1. tr. 4. disp. 1. punct. 9. n. 7.* Viva *ad proposit. 64. ab Innocent. XI. damnatam n. 10. & alii plures.*

18

R. Jam 2dò. Quilibet adultus, & rationis compos necessitate præcepti Divini tenetur scire, & explicitè credere articulos Fidei, in Symbolo Apostolorum contentos, saltem quoad substantiam, ita, ut eos vero aliquo conceptu, licet imperfecto apprehendat. Ita *communis & receptissima DD. Sententia cum S. Thoma 2. 2. q. 1. art. 8. & S. August. Serm. 181. de temp.* quos refert, & sequitur P. Babenstuber *tr. 5. disp. 1. art. 1. n. 17.* Ratio hujus deducenda est tum ex praxi & consuetudine Ecclesiæ, quæ omnibus fidelibus articulos Fidei in Symbolo Apostolorum contentos nedum proponit, sed etiam inculcat velut necessariò credendos; tum ex eo etiam: quia in Ecclesia admittenda est aliqua Scripta Regula, per quam populus Christianus dirigatur in iis, quæ Fide Divina sunt credenda: atqui nulla brevior aut magis accommodata assignari potest, quam Symbolum Apostolorum, quippe quod juxta S. Leonem Papam *serm. 11. de passione D.* est brevis quidem, sed & perfecta Fidei Christianæ Confessio: ergo quivis adultus ratio-

nis.

nis compos tenetur explicitè illos articulos credere & scire saltem quoad substantiam. Et licèt nonnulli Doctores excipiant articulum de communione Sanctorum, eò quòd hic hominibus rudioribus saltem videatur captu nimium difficilis; nihilominus huic etiam exceptioni meritò sese opponunt Castropalao *tract.* 4. *disp.* 1. *punct.* 10. *n.* 5. Sporer *tr.* 2. *c.* 2. *sect.* 2. *n.* 12. Babenstuber, aliique satis communiter; quia hic articulus nihil aliud innuit, quàm quòd in Ecclesia inter fideles detur communicatio bonorum spiritualium, utputa meritorum, orationum, suffragiorum &c. atqui hanc communicationem ne rudioribus quidem incognitam esse, vel exinde haud obscure colligi potest, quòd ipsimet aliorum precibus & suffragiis sese recommendare assueverint: ergo &c.



Dixi: tenetur scire saltem *quoad substantiam* &c. pro cujus pleniori intellectu notes velim ex Filliucio *tr.* 22. *cap.* 2. *n.* 35. memoratos Fidei articulos tripliciter sciri posse, scilicet 1. quoad substantiam. 2. quoad modum, & 3. quoad difficultates etiam, seu controversias circa eosdem agitari solitas: primò modo illos scit, qui simpliciter apprehendit, quidnam vocibus illis significetur v. g. quòd nomine Sanctissimæ Trinitatis intelligatur Deus in Essentia unus & trinus in Personis, 2dò modo

19

B 3

illos

illos scit, qui novit communem eorum declarationem seu expositionem, quam habent communiter adjectam præsertim in Catechismo Romano. 3tiò modo illos scit, qui potest solvere difficultates ab hæreticis moveri solitas. Itaque fidelibus quà talibus, præsertim rudioribus, sufficit nōsse articulos Fidei quoad substantiam: è contra in Pastoribus animarum, utputa Episcopis, Parochis, Confessariis & Concionatoribus meritò requiritur Scientia prædictorum articulorum etiam quoad secundum & 3. modum. Ratio est: quia ipsis vi officii sui incumbit alios fideles instruere, nec non hæreticorum fundamenta refutare, ubi opus fuerit: at, hoc certè nunquam poterunt præstare, nisi in articulis Fidei sint versati etiam secundo & tertio modo: ergo &c.

Ergonè, inquires fortassis, sufficit, quòd quilibet fidelis quà talis sciat, & credat ea duntaxat, quæ in Symbolo Apostolorum continentur?

20

R. Fideli quà tali sufficeret, quia ex præcepto Fidei non tenetur plura scire; nihilominus vi aliarum virtutum, utputa Spei, Charitatis, Pœnitentiæ, Religionis, &c. quarum exercitium sæpius nobis incumbit, tenetur præterea quilibet fidelium explicite scire 1. orationem Dominicam. 2. præcepta Decalogi & Ecclesiæ, & 3.

Sa-



Sacramenta illa, quæ jure Divino sunt necessaria ad salutem, utputa baptismum, pœnitentiam, & Eucharistiam. Ita cum communi Theologorum Castropalao *tract. 4. diss. 1. pu, 10. à n. 3.* Sanchez *lib. 2. in decalog. c. 3. n. 6. & seqq.* Tamburinus *lib. 2. in decalog. c. 1. §. 1. à n. 5.*

Ratio est: quia quilibet vi suæ professionis nôsse debet ea, quæ pertinent ad ipsius statum, aut officium: atqui omnia mox commemorata pertinent ad statum & officium hominis Christiani: quomodo enim præcepta Decalogi vel Ecclesiæ observaret? quomodo ad pœnitentiam, vel Eucharistiam sese disponderet, nisi ea cognosceret? &c. ergo &c.

Quocirca tamen rursus proximè allegati Doctores aliique communiter observant, quòd non quilibet fidelium teneatur hæc omnia scire memoriter, multò minùs quoad modum, & difficultates: sed sufficit, quòd illa sciant quoad substantiam, ita, ut desuper interrogati vel examinati sciant commodè & aptè respondere, tametsi hoc non sufficeret in Pastoribus animarum, veluti proximè dictum fuit. 21

Nihilominus etiam plebeios (nisi hebetudo ingenii, vel labilitas memoriæ illos excuset) qui Symbolum Apostolorum, & orationem Dominicam non addiscunt memoriter, noxæ venialis, & crassioris quidem, 22

dem, meritò condemnant Doctores citati: eo quòd tales salutis suæ, rerumque Divinarum nimis incurii & negligentes debeant argui: profectò qui quantumvis exiguum Christianè vivendi, salutemque æternam assequendi desiderium foveant in animo, vel à puero similia addiscere, memoriæque commendare satagunt, prout praxis recepta fidelium docet.

Quæres 9nò, quandonam tum fideles, tum infideles etiam per se teneantur ad præbendum assensum internum Fidei articulis sibi propositis ad credendum?

23

R. Omnes adulti, tam infideles, quam fideles per se & directè (id est, obligatione hac immediatè orta ex præcepto Fidei Divinæ) tenentur ad præbendum assensum internum Fidei, quàm primum mysteria Fidei nostræ salvificæ iisdem fuere sufficienter proposita velut à Deo revelata. Ita *communis* & certa omnium Theologorum habet sententia. Ratio est: quia assensus Fidei est quidam cultus, & reverentia Divinæ auctoritati exhibenda: atqui sana ratio suadet, hanc reverentiam Divinæ auctoritati utpote infallibili illico esse exhibendam; quemadmodum vi legum civilium tenemur v. g. alicui Regi & Principi nobis præsentì exhibere reverentiam politicam: ergo similiter dicendum, quòd quivis fidelium teneatur præbere assensum verita-

ritatibus à DEO revelatis, quamprimum agnoscit, illas à Deo revelatas.

At, inquires rursus, quandonam igitur cui-  
piam vera Fides satis proposita censeretur de-  
bet?

24. Adultis infidelibus (idem tenendum  
est de fidelibus baptizatis, semper tamen in-  
ter infideles educatis) tunc vera Fides cen-  
seri debet sufficienter proposita, quando  
hujus mysteria rationibus desumptis, seu  
etiam desumendis ex notis veræ Ecclesiæ,  
utputa ex antiquitate, & Sanctitate doctri-  
næ & morum, ex innumeris miraculis à  
Deo in hujus veritatis confirmationem fa-  
ctis, ex innumerabili quasi multitudine San-  
ctorum Confessorum & Martyrum, hujus  
doctrinæ veritatem effusione proprii San-  
guinis obliterantium &c. quando, inquam  
ex hujuscemodi motivis, accedente præ-  
sertim interiori Spiritûs S. illustratione, ita  
proponuntur velut vera & credibilia, ut  
recta & sana ratio dicat nostram Fidem es-  
se veram, contrariam verò sectam, qualis-  
cunque demum illa sit, esse falsam. Ita  
Sanchez lib. 2. in decalog. c. 1. n. 6. Bo-  
nacina, Reiffenstuel & alii. Ratio est:  
quia tunc censeretur debent sufficienter propo-  
sita, quando proponuntur cum tot, tan-  
tisque motivis, ut hominem prudentem  
merito debeant movere ad assensum: at,  
si mysteria Fidei proponuntur ex motivis

B 5

mox

mox allegatis profectò hominem prudentem, non præoccupatum sinistra aliqua passione, aversione, vel obstinatione, debent movere ad assensum, prout multiplex experientia docuit : ergo &c.

25. Cæterum puellæ ac pueri inter fideles nati & educati, tenentur assensum internum Fidei præbere, quamprimùm usum rationis affecuti à suis Parentibus, vel Parochis, aliisvè instructoribus intelligunt, hæc mysteria fuisse à Deo revelata, & ab Ecclesia proponi velut credenda ; secus enim ( nisi juvenilis imprudentia, levitas, inadvertentia seu etiam ignorantia illos excuset ) impingerent in præceptum Fidei, veluti hætenus dicta perpendenti de facili constabit. Quocirca tamen Doctores communiter notant, in praxi cum pueris ac puellis in hoc puncto non nimis scrupulizandum ; nam si hanc obligationem ( assentiendi scilicet ) advertunt, absque mora assentiri solent : sin autem illam non apprehendant, eò ipso à peccato possunt & debent excusari. Adde insuper, quòd homines usu rationis pollentes huic obligationi satisfaciant per actus Fidei, occasione aliarum virtutum, utputa Spei, Charitatis, Pœnitentiæ, Religionis &c. exercitos, prout bene adverterunt Tamburinus, Sanchez, Castropalao, Sporer, & Herincx *part. 3. disp. 7. de Fide n. 76.*

Er-

Ergone, inquires præceptum Fidei per se non obligat, sæpius ad præbendum internum assensum ?

R. Equidem multi insignes Doctores existimant, hoc præceptum elicitō semel assensu deinceps per se non obligare sæpius, eò præsertim, quòd nequeat assignari certum tempus hujus obligationis, prout vel inde haud obscurè colligere fas est, quòd nonnulli putent, hoc præceptum per se obligare saltem semel in anno; alii diebus Dominicis & Festis; alii aliter, prout refert Sanchez *lib. 2. in decalog. cap. 1. num. 3.* Neque huic doctrinæ quidquam præjudicari autumant ex eo, quòd Innocentius XI. damnaverit sequentes propositiones, quarum prior, *num. 17.* ita habet: *Satis est, actum Fidei semel in vita elicere*, posterior verò: quæ est ultima ita sonat: *sufficit illa Mystèria* (scilicet SS. Trinitatis & Incarnationis) *semel credidisse*; quia (inquiunt,) cùm juxta communem Theologorum teneamur saltem per accidens sæpius elicere actus Fidei; hinc dictæ propositiones justissimè fuerunt damnatæ. Et ita hodie dum tenent Tamburinus *lib. 2. in decalog. c. 1. §. 1. n. 9.* Lugo & alii, quos sequitur Babenstuber *tr. 5. disp. 1. art. 1. num. 39.*

Nihilominus censeo probabilius, & verosimilius, quemlibet fidelium per se & directè, id est, obligatione immediate or-

ta

ta ex præcepto D. Fidei sæpius teneri ad eliciendum actum internum Fidei. Ita communior & procul dubio tutior habet sententia, quam tenent Cardenas in 2. crisi Theolog. diff. 11. n. 46. & dissert. 42. c. 2. n. 5. Viva ad 1. propos. ab Alexandro VII. damnatam. n. 7. La Croix lib. 2. n. 10. Illsungen tract. 3. disp. un. n. 37. Henno tr. de virtut. disp. 3. q. 7. concl. 3. Matthæucci in cautela Confessarii lib. 1. c. 1. n. 5. & rursus lib. 2. c. 11. n. 3. Ratio nostra est: quia homo vi obligationis naturalis tenetur diversis temporibus, potissimum verò in principio vitæ post adeptum scilicet usum rationis & in illius fine in Deum ceu ultimum finem tendere: at, nequit aliter in Eundem tendere, nisi per actus Theologicales, scilicet Fidei, Spei, & Charitatis, quibus deficientibus impossibile est, ut homo vitam suam rectè instituat, aliàque salutis media fructuose usurpet: concludendum proin est, quòd quivis fidelium per se teneatur ad eliciendos actus Fidei, esto hujus obligationis certius tempus assignari non possit, quàm illud diluculum, quò primò recipit sufficiens lumen rationis in ordine ad dignoscendas Fidei veritates, item occasus vitæ, quò scilicet ad suum Creatorem habet pergere, & per consequens mediantibus actibus Fidei, Spei & Charitatis eidem sese specialiter conjungere: ex quibus

bus insuper liquet, jure meritissimo ab Alexandro VII. damnatam fuisse sequentem propositionem num. 1. *homo nullo unquam tempore vita sua tenetur elicere actum Fidei, Spei, & Charitatis, ex vi praeceptorum Divinorum ad eas virtutes pertinentium.* Ab Innocentio verò XI. sequentem n. 16. *Fides non censetur cadere sub praeceptum speciale & secundum se.*

Quæres tandem decimò, an, vel quoties teneamur saltem per accidens & indirectè ad eliciendum actum Fidei?

R. Toties ad hoc tenemur, quoties adstringimur ad ponendum actum alterius virtutis, qui sine prævio actu Fidei poni non potest. Ita rursus *communissima* & certa DD. sententia. Ratio est: quia quisquis tenetur ad aliquem finem, eodem præcepto tenetur ad ponenda media in eundem finem necessaria: atqui actus Fidei sæpissime est necessarius ad ponendos aliarum virtutum actus, utputa amoris, spei, contritionis &c. impossibile enim est, ut quis sperat in Deum, Eundem amet, vel propter offensam Dei de suis peccatis doleat, nisi credat, & Deum esse, summo amore dignum, & hoc ipso non esse offendendum. Perbene autem Theologi asserunt, in hisce casibus nos per accidens & indirectè duntaxat obligari ad actum Fidei; quia scilicet talis obligatio non proficiscitur immediate

ex

ex præcepto Fidei, sed ex obligatione aliarum virtutum, uti visum est. Inde fit, quòd is, qui neglexit v.g. Confessionem, aut Communionem Paschalem &c. in Confessione postea non teneatur se singulariter accusare ob neglectum actum Fidei (nisi ex infidelitate, seu etiam incredulitate ad huiusmodi neglectum fuisset inductus) sed satisfaciat dicendo: neglexi voluntariè Confessionem, seu etiam Communionem Paschalem, veluti ex *communi DD.* Sententia tradunt Reiffenstuel *tract. 4. dist. 2. n. 37. & Sporer tr. 2. in decal. c. 2. sect. 3. num. 20.* ubi mox à *n. 21.* recenset alios quatuor casus, in quibus per accidens adstringimur ad ponendum actum Fidei, scilicet 1. quando homo tenetur aut vult recuperare justificationis gratiam. 2. Quando vult suscipere aliquod Sacramentum. 3. Quando urgetur gravi tentatione contra quamcumque virtutem, quam putat se vincere non posse, nisi fortiter resistat in Fide. 4<sup>to</sup>, Denique quando quis exterius tenetur profiteri Fidem v.g. coram tyranno, qui conatur à vera Fide divertere, ita scilicet, ut fidelis revera existimet se in periculo negandi veram Fidem, nisi per actus Fidei fortiter resistat; quo casu tamen non tam vi præcepti affirmativi, quàm negativi, de non neganda Fide, adstringitur ad actum Fidei eliciendum.

§. II.



§. II.

Proponuntur & breviter resolvuntur Casus practici de natura, necessitate, & obligatione Fidei.

CASUS PRIMUS.

**T**itia à Parentibus acatholicis nata & educata, posteaquam ad usum rationis pervenit, Catholicorum mores, ritus, & devotiones accuratius notare cœpit, & de iisdem non modicè sibi complacuit, eò præsertim, quòd hinc inde intellexerit eandem Fidem Catholicam multis miraculis à Deo fuisse confirmatam. Verùm cum non minùs multiplici experientia didicisset, illas, qui Parentum suorum Fidem, quâ semel imbuti fuere, abnegant, ab aliis etiam melioris notæ hominibus passim despici ac vilipendi, simulque sine gravissima Parentum suorum, immò totius illustris familiæ suæ offensa id facere non potuisset, tandem secum ratiocinando ita conclusit: video sanè meliora apud Catholicos, proboque, verùm cum in articulis fundamentalibus conveniamus, simulque sine graviori offensa Parentum &c. eandem fidem amplecti non liceat: hinc deteriora sequor, manesque in mea Fide semel suscepta: si Deo placuisset aliud, potuisset procul dubio aequè faciliter facere, me à Catholicis Parentibus prognasce. Quæritur jam 1.

jam 1. quid de hac resolutione censendum? &  
 2. quomodo Titia occurrendum, casu quo postea consilii causâ veniret ad Sacerdotem vel Confessarium Catholicum?

29

R. Ad primum quæsitum hujus casus, hanc resolutionem nullatenus esse probandam, nec dubitandum, quin Titia perseverando in sua secta per se loquendo peccaverit, imò vixerit in continuo statu peccati mortalis. Ratio est: quia cum habuerit tot ac tanta motiva credibilitatis, interioresque stimulos, ut Religio Catholica eidem fuerit visa longè melior, procul dubio eidem pariter visa fuerit verosimilior, ac probabilior: esto proin fortassis hætenus nondum fuerit convicta de falsitate suæ sectæ, neque plenariè informata de mysteriis Fidei Catholicæ, proptereaque non illico obligata ad abjurandam suam sectam; nihilominus certum esse debet, eam jam fuisse obligatam ad inquirendam omnimodam veritatem; quòd, cum nondum fecerit, procul dubio saltem per se loquendo (nisi scilicet ignorantia vel inadvertentia hujus obligationis, de qua in praxi specialiter foret examinanda, laboraverit) graviter deliquit, veluti haud obscurè colligere fas est ex illa *num. 4ta* propositione ab Innocentio XI. damnata: *ab infidelitate excusabitur infidelis non credens, ductus opinione minus probabili* (suæ sectæ scilicet)

R. Jam

R. jam ad 2dum. Titia in tali casu persuadendum, & à Confessario remonstrandum fore, hanc in articulis fundamentalibus (ut ipsi loquuntur) convenientiam cum Catholicis non esse sufficientem ad salutem, immò esse nullam, & meram inanem persuasionem acatholicorum; quia cum pro omnibus fidei articulis militet idem motivum formale, scilicet infinita Dei veracitas falli & fallere nescia, secundum dicta n. 10. consequens profectò est, quòd is, qui pertinaciter negat unum, hòc ipso neget infinitam Dei veracitatem, neque hoc motivo credat vel credere possit alium, veluti pluribus rationibus & argumentis id probat R. P. Pichler in sua *theolog. polem. part. 1. contra Indifferentist. art. 9. n. 15. & seqq.*

Estò etiam durum sit relinquere Parentes, amicos, offendere familiam Illustrem, & fortassis ingentem bonorum temporalium jacturam subire; quia tamen & sana ratio & fides vera docet, hæc bona temporalia esse postponenda æternis, juxta illud infallibile Christi Domini effatum apud *Matthæ. 10. c. v. 37. Qui amat Patrem aut Matrem plus quàm me, non est me dignus, & qui amat filium aut filiam super me, non est me dignus*; hinc minimè eximi potest ab hac obligatione.

*R. P. Elbel, Pars II. de Fide &c.* C CA.

## CASUS SECUNDUS.

**S**Empronius Sacerdos bene advertit, quendam pœnitentem plebeum sua peccata valde rudi & imperfecto modo, immò sine distinctione numerica & specifica, & sine ulla prorsus mentione de dolore ac proposito emendandi &c. expressisse; quia tamen ea die fuerat ingens populi confluxus, hinc ut se brevius expediret, prorsus nil aliud interrogavit, quàm: utrum doleat de suis peccatis? & an nolit ea deinceps committere? quo respondente: ita Domine, eundem non sine remorsu conscientia absolvit, hac de causa alio tempore reversum, velut suspectum de sufficientia doctrina christiana paulò accuratius examinavit, & illico deprehendit eum ne mediocriter quidem tinctum in materia fidei, aliisque ad pœnitentia valorem necessariis, quam ob rem eundem velut hominem salutis suæ nimis incurium objurgando & increpando repulit, negata eidem absolutione usque dum ea, quæ ad salutem scitu sunt necessaria, melius didicisset. Quaritur jam, an Confessarius iste bene processerit?

**R.** Nequaquam bene, certè non quoad primum, dum scilicet illum nuper absolvit, esto nec numerum expresserit, neque speciem (si tamen supponatur attulisse peccata mortalia) Ratio est: quia Confessario sub gravi culpa incumbit in materia necessaria supplere defectum pœnitentis, eundem

dem examinando de numero & specie peccatorum, nec non de dolore ac proposito &c. ne scilicet Sacramentum exponat periculo Sacrilegæ nullitatis, veluti diximus *in theol. Sacram. part. 2. confer. 17. n. 432. ex cap. omnis utriusque sexus de pœnit. & remis.* Neque excusari potest ex eo, quòd fuerit ingens concursus; tum quia concursus non excusat ab integritate materiali confessionis, veluti liquet ex propositione 59. ab Innocentio XI. damnata, quæ dicebat, quòd ratione magni concursus pœnitentiam liceat dimidiatè tantum confessos absolvere Sacramentaliter; tum etiam, quia præstat paucioribus ritè tamen dispositis hoc Sacramentum administrare cum fructu, quàm plures sed indispositos absolvere sine fructu & sacrilegè.

Dixi etiam Sempronium non bene fecisse *quoad primum*; quoad secundum enim æquè malè processisse mihi videtur; nam si pœnitens ea, quæ necessariò scire debuisset & credere, ignoravit ex labilitate memoriæ, vel naturali inadvertentia, commiseratione potius, quàm increpatione dignus fuit, ut de se patet. Si autem supponatur illorum notitiam neglexisse ex mera desidia & incuria salutis, tunc potius ad adhibendam majorem diligentiam blandè fuit exhortandus & adjuvandus pro possibili, quàm severiore animadversione re-

32

C 2

pel-

ligionis exercitium toleraretur, emigrare. Verum vix patriam egressa (nescio quò fato) in alieno territorio seu Pago merùm Catholico incidit morbum lethalem: hinc sponsus Cajæ, qui cateroquin bonus Catholicus caco duntaxat amore eandem fuerat comitatus, de salute animæ non minùs, quàm corporis sollicitus, accessit R. Dominum Parochum loci, ubi Caja decubuit, ab eo humiliter petens, quatenus dignaretur Cajam invisere, eamque ad bonam seu Christianam mortem disponere, ita tamen, ut de purgatorio, de indulgentiis, de confessione auriculari &c. utpote nunquam persuadendis Cajæ, omnino præscinderet. R. D. Parochus tum animæ, tum etiam divini honoris zelo ductus illico secutus est sponsum, cùmque Cajam invenisset jamjam cum morte luctantem, elicitò prius actû Fidei in Deum unum & trinum, nec non in JESUM Christum &c. eandem ad dolorem universalem de peccatis concipiendum disposuit, quò obtento Cajam sub conditione absolvit. Quæritur jam, an R. D. Parochus bene egerit?

34

R. Omnino bene & laudabiliter. Ratio est: quia conatus fuit modo meliori, quò in his circumstantiis fieri poterat, procurare animæ salutem, disponendo scilicet infirmam tum ad verum dolorem supernaturalem de peccatis, tum etiam ad assentiendum fidei mysteriis simpliciter ad salutem creditu necessariis. Bene proin egit, par-

partim quòd eam absolverit , ne fortassis cum sola attritione decedens ex hac vita incurreret æternam damnationem, quæ accedente simul beneficio absolutionis fortassis obtinuit salutem æternam ; partim etiam , quòd non absolute , sed sub conditione duntaxat illam absolverit ; quia quotiescunque ex una parte affulget probabilis spes valoris hujus Sacramenti , ex altera verò timendum est periculum frustrationis , tunc urgente casu necessitatis potest , immò & debet administrari non absolute , sed sub conditione ad consulendum tum animæ saluti , tum etiam reverentiæ Sacramenti , veluti diximus *in theolog. Sacram. part. 2. Conf. 8. n. 200. & seqq.* atqui in hoc casu revera erat summum periculum animæ : ex altera verò parte nonnulla spes valoris Sacramentalis apparuit , etsi periculum irreverentiæ & nullitatis Sacramenti ob pertinaciam Cajæ utpote educatæ in partibus Catholicorum procul dubio fuerit majus : ergo R. D. Parochus bene egit , eam sub conditione absolvendo.

At , inquires , Caja in facie Ecclesiæ fuit hæretica , simulque pertinax , veluti liquet ex relatione sponsi , neque erat parata corrigi ab Ecclesia : ergo nullatenus debuisset absolvi , nequidem sub conditione.

¶ Negando conseq. Ex hoc enim plus non convincitur , quàm , quòd non debue-

rit absolvi absolute; enim verò multi procul dubio reperiuntur hæretici, pertinacissime contradicentes S. Pontifici, vel Ecclesiæ Romanæ, eò quòd de hac nil, nisi Scabiosum & infamatorium unquam audiverint, qui, si agnoscerent veritatem fidei Catholicæ, procul dubio incunctanter eandem amplecterentur: & licet Caja, utpote nata & educata in partibus Catholicorum procul dubio videatur minùs excusabilis ab hæresi & culpa formali, potuit nihilominus ob instantissimum animæ periculum sub conditione absolvi. Sapienter proin ait La Croix *lib. 6. part. 2. n. 1866.* quòd si Sacerdos Catholicus intelligat, hominem acatholicum ad extrema deductum, prudenter faciat (nisi quid aliud obstet) eum accedendo: cumque eodem actus Fidei, Spei, & Charitatis eliciendo, manendo in illis, quæ nobis communia sunt cum hæreticis: si tamen circumstantiæ patiuntur (pergit idem) potest postea rogare, an non vellet amplecti Fidem salvificam & veram, si sciret, se non esse in vera Fide? Item an non vellet amplecti omnia ad salutem necessaria, confiteri, & absolvi? &c. Monet tamen rectè Vindex Gobati *ad propos. 4.* quòd, si spes sit de amplectenda Religione Catholica, simulque tempus & circumstantiæ patiantur, hanc debere proponi infirmo. Videatur La Croix *loc. cit. vel*  
ca,



ea, quæ diximus *part. 2. Theolog. Sacram. Confer. 8. n. 213.*

Ergone, inquires, Caja sepeliri potuit in loco Sacro ?

✱ Potuit sine dubio, modò abfuerit scandalum. Ratio est; quia supponitur in mortis articulo dedisse signa Pœnitentiæ, & à censura sicut & à peccatis saltem probabiliter validè fuit absoluta. Et licèt videatur ingens dubium, an non fuerit hæretica formalis potius, quàm materialis; nihilominus stante dubio videtur potius inclinandum in partem benigniorem pro favore defunctæ, ait rectè La Croix *lib. 7. n. 263.* Addo insuper, ab Henriquez, Suarezio *de censur. disp. 12. sect. 4. num. 2. in fine*, & à Laymanno *lib. 1. tr. 5. part. 2. c. 4. n. 9.* velut probabile sustineri, quòd excommunicatos non vitandos (qualis etiam erat Caja) modò ante mortem manifesta signa dederint, tametsi ab hæresi absoluti non fuerint, liceat sepelire in loco Sacro, quemadmodum pro iisdem licet offerre orationes publicas, & Sacrosanctæ Missæ Sacrificia. Nihilominus cùm in tali casu de facili natum sit oriri scandalum, & alia plura incommoda in plebe, præsertim in loco merè Catholico; hinc sapienter monet Laymann *loc. cit.* Episcopum prius hac de re esse admonendum, qui si

C. 5

velit,

velit, etiam post mortem absolutionem ab excommunicatione potest impendere.

### §. III.

## Corollaria ex dictis inferenda.

37. **C**olliges ex hactenus dictis primò, non satis esse, quòd homo rudior seu de communi plebe credat articulos Fidei implicitè duntaxat, id est, in genere præcisè credendo, *quidquid credit S. Mater Ecclesia*, vel, *quidquid Deus revelavit &c.* Ratio est: quia status & professio hominis Christiani haud dubiè exigit, ut præcipua Fidei Divinæ mysteria seu articulos & cognoscat, & credat: atqui hoc non præstat, qui in genere duntaxat credit, quidquid DEUS revelavit, vel Ecclesia proponit &c. ergo. Hac de causa teste Reding apud Babenstuber tract. 5. disp. 1. art. 1. n. 20. Gregorius XI. in direct. inquisit. 1. p. q. 10. hæres. 8. damnavit sequentem propositionem: *Laici non tenentur ad aliquem articulum Fidei explicitè credendum, sed sufficit illis ista conclusio in genere, quòd credunt omne illud, quod Sancta Dei Ecclesia credit.*

38. Colliges 2dò, Fideles quamprimum pervenerunt ad usum rationis, teneri juxta capacitatem & statum suum talem ac tantam adhi-

adhibere diligentiam in ordine ad addiscendos Fidei articulos, qualem quisque prudentum adhibere solet in addiscenda revel arte sibi multum utili ac proficua. Ratio de se liquet : quia scilicet cognitio præcipuorum Fidei mysteriorum cuivis fidelium nedum proficua, sed omnino necessaria est ad salutem secundum hæcenus dicta. Tenentur proin frequentare Parochiam, seu etiam catechesin, quatenus in rebus Fidei ad salutem necessariis instruantur, secus enim juxta qualitatem desidii graviter vel leviter peccabunt, uti bene observat Matthæucci *in caut. Confess. lib. 2. c. 14. n. 12.* Atque hinc ulterius.

Colliges 3<sup>ti</sup>o, Parentibus incumbere obligationem gravissimam instruendi (sive dein per se ipsos immediate, sive per alios, utputa Præceptores, Ludimagistros &c.) suas proles in rebus Fidei ad salutem necessariis, adeò, ut si eos impedian, vel commoditatem non procurent, vel instructionem prorsus negligant, gravissime peccent. Ratio est : quia hoc modo deficiunt in puncto gravi ab eo, quod iisdem tam jure naturæ, quam Divino etiam & humano incumbit. Adde insuper, quod ex tali neglectu sequatur in prolibus haud exiguum salutis præjudicium : id, quod vel maxime inculcandum est hominibus aggressibus, qui proles suas, dum vix incipiunt ratio-

ratione uti, applicant pascendis pecoribus, & rarò permittunt eas templum adire, ac rariùs conciones, neque easdem domi instruere solent, prout multiplex experientia docuit. Ulteriùs

40. Colliges 4tò, Pastores animarum, quibus cura pascendi commissa est, sub gravi culpa adstringi ad erudiendos subditos suæ curæ commissos in Fide, aliisque ad salutem necessariis, ita ut secus facientes pro gravitate incuriæ aut desidiæ peccent mortaliter, sicut & illi, ait Sporer *tr. 2. in decalog. c. 2. n. 14.* qui scienter promovent Pastores ignaros, aut quos sciunt suos subditos non instruere in necessariis ad salutem. Ratio est: quia hi nedum ex charitate vel pietate, uti parentes, sed insuper ex justitia tenentur procurare salutem spiritualem suorum subditorum: ergo si id culpabiliter negligant, graviter peccant, possuntque censuris Ecclesiasticis eo compelli, uti bene docent Sanchez *lib. 2. c. 3. num. 15.* Laymann, Filliucius & alii. Videatur La Croix *lib. 2. n. 29.*

41. Colliges 5tò, hæreticum non teneri ad deserendam suam sectam (& consequenter eam non deserendo non peccare) quàm diu judicat, eam esse verosimiliorem & credibiliorem Fide Catholica. Ratio est: quia quamdiu hoc eidem videtur, primum est colligere, vel quòd fundamenta Fidei  
no-

nostræ eidem nondum fuerint satis proposita, vel certè quòd ea hæctenus nondum satis penetraverit : at, quamdiu hæreticus non agnoscit fundamenta Fidei Catholicæ, tamdiu non tenetur, imò nec potest iisdem præbere assensum Fidei, quippe qui debet esse firmissimus. Quin imò, tametsi existimaret, Fidem nostram Catholicam esse probabilius veram, si tamen stante tali opinione adhuc quodammodo formidet, ne non sit vera, nondum tenetur, immò nec potest præbere assensum Fidei divinæ ; quia hæc niti debet motivo infallibili, quò præciso prudenter nequit dari assensus firmissimus : ergo quamdiu hæreticus non agnoscit, vel certè non penetrat motiva infallibilia Fidei Catholicæ, tamdiu non potest præbere verum assensum Fidei, prout ulterius haud obscure colligere fas est ex illa propositione num. 21. ab Innocentio XI. damnata ; *assensus Fidei supernaturalis & utilis ad salutem stat cum notitia solum probabili revelationis, immò formidine, quâ quis formidet, ne non sit locutus Deus.*

Atqui, inquires, idem Innocentius XI. damnavit etiam sequentem propositionem num. 41am : *ab infidelitate excusabitur infidelis non credens, ductus opinione minus probabili* : ergo quamprimum apprehendit Catholicam Fidem esse magis probabilem & verosimiliorem suâ secta, tenetur immedi-

diatè præbere assensum dogmatibus Catholicis.


42. R. Neg. consequ. quia ex hoc solum erui valet, quod post adeptam semel notitiam de majori probabilitate & veritate Fidei Catholicæ culpabiliter perseveret in sua secta sibi visa minus probabili. Et meritò; quamprimum enim advertit, se probabilius versari in errore Fidei (quæ utique est materia gravissima concernens Dei gloriam & animæ salutem) tenetur ulterius invocare Spiritus S. gratiam, & pro possibili indagare in omnimodam veritatem, quò facto procul dubio Deus illum diriget ad talem, à quo accedente Spiritus Sancti gratia plenariè illustrabitur, & omnimodam veritatem deprehendet, veluti plura de hoc nobis exstant exempla: quodsi autem neglexerit ulteriorem inquisitionem, absque dubio culpabiliter perseverabit in suis erroribus, nec excusari potest ab infidelitate adhærendo suæ sectæ, ductus opinionē minus probabili. Videatur Cardenas in 2. Crisi Theolog. dissert. 5. c. 2. Vel la Croix lib. 2. num. 48.

43. Colliges denique 6to, in praxi non esse necessarium, ut Confessarius Pœnitentem interroget, vel ut pœnitens seipsum examinet, utrum satisfecerit præcepto affirmativo de eliciendo actu seu assensu interno Fidei. Ratio est: quia moraliter loquendo

do ferè semper & infallibiliter quasi contingere solet, ut homo Christianus fidem Christi semel ex corde amplexus ac confessus nedum per annum, sed etiam per diem aut certè per mensem plures exerceat actus fidei, utputa dum missam audit, confitetur, aut concioni interest, tametsi non ita reflexè attendat ad eosdem actus fidei. Fatendum nihilominus est, quòd neque confessarii suo bene fungantur officio, qui dum à pueris vel puellis hac super re generaliter examinatis, an omnia credant, quidquid S. Mater Ecclesia credit, vel credendum proponit? &c. audiunt frigidum *ita*, illico contenti aquiescunt & absolvunt; sæpiùs enim quàm par est respondendo asserere solent, se credere, qui tamen ulterius examinati *cur credant?* nesciunt dare ullam prorsus rationem: quemadmodum examinati & interrogati *an doleant de suis peccatis?* promptissimè quidem respondere solent: *ita Domine*; Qui tamen ulterius examinati motivum, *cur doleant?* prorsus ignorareprehenduntur, cur de peccatis sit dolendum: sicut proin talis dolor, utpote motivo supernaturali destitutus prorsus insufficiens est ad valorem Sacramenti; ita sanè fides destituta motivo supernaturali, auctoritatis divinæ scilicet, prorsus est insufficiens ad salutem. Inculcandum proin in praxi est hujusmodi hominibus motivum formale fidei,

fidei, cumque illis eliciendus actus supernaturalis fidei v. g. hoc aut simili modo : credo, DEum esse unum in essentia, & trinum in personis &c. quia ipse velut infinite verax hoc revelavit &c. aut : credo, Verbum divinum fuisse incarnatum, eò quòd S. Mater Ecclesia hoc velut à DEO infinite veraci revelatum proponit &c. Videatur de hoc la Croix lib 2. n.

30. & seqq.



CON-





# CONFIDENTIA SECUNDA.

De Obligatione fidem exte-  
riùs profitendi.

## SUMMARIUM.

44. Datur obligatio fidem veram exteriùs profitendi.
45. Idque toties, quoties vel 1. honor DEI & Christi, vel 2. salus propria, aut 3. salus proximi id exigit.
46. 47. & 48. Breviter declaratur, quando illud honor Dei, vel salus propria, aut proximi censetur exigere.
49. Quenam sit differentia inter dissimulare fidem propriam, & inter simulare fidem alienam.
50. Ob gravem causam quandoque licite dissimulatur fides vera, modò non instet præceptum vel obligatio hanc exteriùs profitendi.
51. Recensentur breviter nonnulli casus, in quibus vi juris Pontificii datur obligatio deponendi professionem fidei.
52. Nunquam prorsus licet negare fidem veram seu Catholicam; quæ
53. Tripliciter, scilicet vel verbis, vel factis, vel denique signis negari potest.
54. Quandonam quis censetur fidem negare verbis?

R. P. Elbel, Pars II. de Fide &c. D 55.

55. Quandonam factis ; Et  
 56. Quando signis: breviter declaratur.  
 57. Quidnam hic nomine signorum veniat intelligendum ?  
 58. Signis aut vestimentis distinctivis Nationis duntaxat à Natione, vel etiam Religionis à Religione ex gravi causa probabiliter licitum est uti, non item signis protestativis falsæ sectæ.  
 59. & 60. Satisfit duabus instantiis in contrarium factis.  
 61. Resolvitur Casus I. de quodam Sacerdote Catholico à Consistorio Anglicano examinato de sua fide &c.  
 62. Qui nullatenus tenebatur fateri conditionem sui status.  
 63. Quin etiam tutâ conscientia utendo restrictione mentali negare potuit, se quidpiam scivisse de constitutione anglicana prohibitiva &c. &c.  
 64. Resolvitur Casus II. de quodam chalcographo Catholico, qui sua servitia addixerat cuidam alteri Acatholico, dissimulans fidem propriam.  
 65. An peccaverit negligendo divina, vel ob-servantiam præceptorum Ecclesiasticorum ?  
 66. Et undenam practicè loquendo species vel numerus peccatorum ab eo commissorum colligendus sit ?  
 67. Resolvitur Casus III. de quodam Præcone Ariano, qui imminente sibi mortis periculo petiit sacerdotem Catholicum, in vestibus secularibus compariturum.  
 68. Quidsi talis nulla ratione eò adduci possit, ut fidem Catholicam per se ipsum ante obitum publicè profiteatur ?  
 69. Quidsi persona privata tantum id recusaret ?

*De Obligatione fidem exterius profitendi. §. I.*

70. An Præco Arianus post recuperatam valetudinem potuerit diutius dissimulare externam professionem fidei ?
71. Universim omnia illa verba vel facta, quæ significant abnegationem fidei, à Catholico vitari omnimodis debent.
72. Interrogatus à persona privata per se loquendo non tenetur respondere, sed potest eludere interrogantem.
73. Catholicus, cernens SS. Eucharistiam, vel Crucifixum ab hæretico indignè tractari, tenetur se opponere, modò id possit utiliter.
74. An, vel quando permissum sit fugere tempore persecutionis, præsertim Pastoribus animarum ?
75. Per se loquendo non impingit in præcepta fidei, qui profert talia verba aut gesta, ex quibus alii possunt colligere, quòd non proferantur animò abnegandi veram fidem.

*§. I.*

Præmittuntur, & breviter resolvuntur quæsitæ, scitu necessaria ad debite resolvendos casus practicos circa externam professionem fidei.

**Q**Uæres primò, deturnè obligatio seu præceptum de fide exterius profitenda ?

R. Datur sine dubio obligatio seu præceptum, & quidem duplex, unum affirmativum, vi cujus jubemur fidem veram exterius profiteri, prout insinuat Aposto-

lus *Rom 10. Corde enim (inquiens) creditur ad justitiam, ore autem Confessio fit ad salutem*: alterum est negativum, quô jubemur fidem nunquam negare, id, quod Christus Servator noster innuit *Matth. 10. dicens: qui me negaverit coram hominibus, negabo & ego eum coram Patre meo. Idipsum rursus innuit Doctor Gentium 2. Timoth. 2. si negaverimus eum (ait) & ille negabit nos.* Ex quo liquet, hoc præceptum graviter obligare; sicut negari à Christo gravis est pœna secundum omnes.

Quæres 2dò, quandonam, vel quoties teneamur fidem nostram exterius profiteri?

45. R. Jure naturali ac divino per se teneamur ad hoc toties, quoties id exigit vel 1. honor Dei aut Christi, vel 2. salus propria animæ, vel denique 3. salus proximi. Ita D. Thomas 2. 2. q. 3. art. 2. quem sequuntur alii DD. communiter Sanchez in decal. lib. 2. c. 4. n. 2. & seqq. Sporer tr. 2. decal. c. 2. sect. 4. n. 23. Reiffenstuel theol. mor. tr. 4. dist. 2. n. 43. Ratio est: quia cùm juxta Apostolum 1. ad Timot. 1. *finis præcepti sit Charitas*; hinc dicendum, quamlibet virtutem obligare tunc, quando charitas, vel erga Deum, vel erga nos ipsos, vel erga proximum postulat exercitium talis virtutis: at, in casibus mox specificatis charitas supponitur postulare professionem.

De Obligatione fidem externam profitendi. § 3

nem externam Fidei : ergo hæc cadit sub præceptum.

At, inquires fortassis : quandonam igitur honor erga Deum aut Christum, & quando salus propria vel proximi censerī debent exigere hanc professionem externam Fidei ?

¶. Ad hoc 1. Tunc honor Dei & Christi 46.  
fiti exigit à nobis externam professionem Fidei, quando alioquin ex nostra taciturnitate Deo aut Christo vel subtraheretur magnus honor, vel iisdem, aut Sanctis, Religionive Catholicæ inferretur blasphemia vel injuria &c. quô casu tenemur nos manifestare tanquam Catholicos & verè Fideles Christo, ac Sanctæ Religioni, utpote hanc, commendando, laudando, pro viribus defendendo, injuriāque impediendo &c. idque etiam cum periculo vitæ. Ita ex communi DD. tenet Suarez *disp. 14. de Fide sect. 2.* Eūque secutus D. August. Michel *Theolog. Canon-moral. Tom. 2. p. 1. q. 1. §. 3. n. 3.* Ratio est : quia ratio naturalis dicitur, cuilibet Vasallo incumbere, ut pro viribus defendat honorem sui Principis vel Principalis : quidni ergo id ipsum teneatur facere Christianus, ubi periclitatur honor Dei & Christi ? profectò id ipsum nos docuere innumera Sanctorum Martyrum exempla, qui pro defensione Divini honoris & Fidei Catholicæ sanguinem

nem & vitam dederunt. Ex quo Doctores communissimè inferunt, quòd quivis Catholicus auctoritate publica (quantumvis in odium Fidei) examinatus, teneatur, non obstante periculo vitæ, suam Fidem publicè profiteri, exemplo Petri & Joannis *Astor.* 4. Verè etenim magnus honor Deo, Christo, Fideique Catholicæ accrescit ex eo, quòd Christianus coram Principibus & Magistratibus hujus sæculi, quantumvis oblatrantibus & contradicentibus, Fidem suam publicè profiteatur; quia hòc modo ejusdem Fidei veritas mirum in modum confirmatur, imò & propagatur.

Secus dicendum, si quis ab homine privato, nullam habente auctoritatem, examinaretur: quò casu tametsi nefas foret Fidem negare, nihilominus licebit Fidem veram dissimulare, vel interrogantem illudere v. g. dicendo: *quid ad te?* aut: *sum addictus illi Fidei, in qua me salvari posse existimo &c.* Excipiunt tamen Doctores: nisi vir interrogatus esset permagnæ Auctoritatis, ita, ut ex hujus taciturnitate alii scandalizarentur, aut dubitare inciperent de firmitate Fidei Catholicæ. Videatur de hoc Tamburinus *lib. 2. decalog. cap. 1. §. 2. num. 3.* Sporer *ubi supra n. 24.* Filliuc. *tr. 22. num. 63.* Mezger *tr. 10. disp. 19. art. 3. n. 15.* Babenstuber *tract. 5. disp. 1. art. 1. n. 63. & seqq.*

2. 2dò,

De Obligatione fidem exterius profitendi. § 5

¶. 2dò, Salus propria tunc exigit pro- 47.  
fessionem externam Fidei, quando ex hu-  
jus dissimulatione quispiam se advertit ex-  
positum periculo abnegandæ Fidei, aut cer-  
tò cogeretur multa agere contra conscien-  
tiam propriam, & legem Dei, utputa fre-  
quentare acatholicorum Ecclesias, conven-  
ticula, eorum Cœnæ communicare &c.  
Ita Suarez *l. cit. n. 8.* Castropalao *part. 1.*  
*tr. 4. disp. 1. punct. 13. n. 7.*

¶. Jam 3tiò. Tunc salus proximi exi- 48.  
git à nobis externam Fidei professionem,  
quando alioquin ex nostra dissimulatione  
periclitaretur; vel quia proximus ab hære-  
ticis seductus fidem veram omnino abne-  
garet; vel quia scandalizaretur, utpote exi-  
stimans, ob nostram taciturnitatem vel dis-  
simulationem professionis, veram Fidem  
sat solidis destitui fundamentis; vel quia  
hæretici in sua secta amplius confirmaren-  
tur &c. in his ac similibus casibus quivis fi-  
delium tenetur Fidem suam manifestare,  
hæreticorum fundamenta, vel potius ob-  
literationes minùs fundatas, pro viribus  
confutare, vacillantes in vera Fide confir-  
mare, errantes reducere vel instruere &c.  
modò utiliter & prudenter id possit; idque  
non solùm ex virtute Charitatis, sed etiam ex  
virtute seu præcepto Fidei; quia virtute  
hujus non solùm obligamur ad præben-  
dum assensum mysteriis Fidei, sed insuper

etiam ad procurandum pro viribus, ut proximus noster firmiter assentiatur, veluti bene tradunt Sporer *l. cit. n. 27.* Castropalao *cit. n. 8.* Michel ubi supra *n. 4.* Cardenas *in Crisi Theolog. ad propos. 18. ab Innocent XI. damnatam. Dissertat 12. cap. 2. n. 19.*

Quæres 3tio, sitne aliquando licitum Fidem veram dissimulare?

42. Anteresponsionem ad hoc quæsitum dandam notandum est & bene advertendum, longè aliud esse *dissimulare seu occultare veram Fidem*, & aliud *factis simulare Fidem seu sectam falsam*. Simulatio falsæ Fidei tunc fit, quando quis verbis aut gestis significat, se profiteri illam sectam v. g. Zwinglianam &c. Dissimulatio autem veræ Fidei tunc censetur fieri, quando Catholicus in factis & gestis suis ita se exhibet, ut alii colligere nequaquam possint; sitne Catholicus, nec ne? Omnis itaque, qui verbis aut factis Fidem veram exterius negat, eam pariter, etsi fortassis in mente adhucdum retentam, occultat, non tamen vicissim omnis, qui Fidem veram occultat vel dissimulat, censendus est eam negare, ait sapienter Herincx *disp. 8. n. 33. h. not.*

50. R. Jam ad quæsitum. Per se loquendo licitum est dissimulare veram Fidem idque toties, quoties nec honor Christi aut Dei, neque salus propria vel proximi postu-



*De Obligatione fidem exterius profitendi. §7*

stulat externam Fidei professionem. Ita ex communi DD. Herincx *part. 3. tract. 1. disp. 8. n. 34.* Reiffenstuel *Theolog. mor. tr. 4. dist. 2. n. 45.* Ratio est: quia extra casus mox specificatos præcepto Fidei Divinæ non tenemur Fidem nostram exterius profiteri: ergo hujus professionem licite dissimulamus. Quin etiam hujusmodi dissimulatio potest subinde esse multum proficua, imò ad Dei gloriam & animarum salutem necessaria, utputa ad confortandos Catholicos in medio hæreticorum degentes: ergo in simili casu prudenter omnino dissimulatur Fides Catholica, sive fugiendo aut declinando examen, sive utendo vestibus aut signis alienæ nationis vel conditionis seu etiam statûs hominum, veluti amplius patebit ex proximè dicendis.

Dixi: *per se loquendo* licitum est dissimulare &c. fatendum quippe est, quandoque per accidens (vi scilicet juris humani positivi) dari obligationem professionem Fidei exterius deponendi: nam 1. Concilium Tridentinum *ss. 24. c. 12. de Reform.* præscribit professionem juratam Fidei omnibus provisis de beneficiis curatis, aut de Canonicatibus & dignitatibus in Ecclesiis Cathedralibus, nec non promotis ad Episcopatum vel Archi - Episcopatum &c. Quòd Pius IV. Motu proprio *Injunctum Nobis* extendit ad Prælatos Monasteriorum

D 5                      seu

seu locorum Regularium, & insuper Motu proprio. *In Sacrosancta &c.* ad omnes Doctores, Magistros, Regentes, & alios quoscunque cujuscunque artis & facultatis Professores, idque sub gravissimis pœnis. Ex quibus Rodriquez *tom. 22. qq. Regul. q. 73. art. 2.* aliique Doctores communiter inferunt, hanc obligationem esse gravem, licet in pluribus Religionibus hæc constitutio non videatur recepta quoad Prælatos, ait Herincx *cit. n. 5.* De quo utiliter videri potest Sanchez *moral. lib. 2. c. 5. per tot.* vel Michel *Theolog. Canon-moral. tom. 2. q. 1. §. 3. n. 13.*

Quæres 4tò, sitne etiam aliquando licitum Fidem Catholicam exterius negare?

- § 2. R. In nullo prorsus casu, ne quidem mortis evadendæ causâ fas est Fidem veram seu Catholicam negare, sive verbis, sive etiam factis, aut signis. Ita Omnes Orthodoxi contra Gnosticos, Samseitas, Prileilianistas, Anabaptistas, aliósque sat multos hæreticos & politicos, vel potius libertinos hujus temporis, existimantes, satis esse, quòd Fidem veram retineant in pectore, licet in foro externo eandem negent. Ratio autem hujus est: quia præceptum de *nunquam neganda Fide* est negativum: atqui ea est natura præceptorum negativorum, quòd semper ac pro semper soleant obligare &c.

Et

Et certè talis negatio est mendacium non minùs perniciosum Fidei , quàm injuriosum Christo , quasi verò is non esset tantæ auctoritatis vel veritatis, ut mereatur publicam coram hominibus professionem. Quamobrem ipsemet Christus posteaquam *Matth. 10.* præcepit , ne timeamus Tyrannos , qui in odium Fidei ac doctrinæ Catholicæ occiderent corpus &c. illico subjunxit : *qui autem negaverit me coram hominibus , negabo & ego eum coram Patre meo &c.* at , hæc negatio procul dubio supponit gravem culpam : ergo &c.

Dixi notanter, nunquam prorsus licitum esse Fidem veram negare, sive *verbis*, sive etiam *factis* aut *signis*: pro cujus pleniori intellectu sciendum rursus est, Fidem dupliciter negari posse , scilicet 1. *directè* seu etiam *explicitè*. 2. *indirectè*, vel , ut alii loquuntur, *implicitè*. *Directè* Fidem negat, & negando mortaliter peccat (per se loquendo) quisquis apertis verbis sive seriò, sive fictè quidem, sed ita, ut nemo advertat fictionem , prolatis, dicit, se non esse Christianum, vel non esse Catholicum, Papistam &c. vel qui dicit se non credere hunc vel illum articulum Fidei Catholicæ v. g. de existentia purgatorii, veri Sacrificii Missæ &c. de existentia Christi sub speciebus Eucharisticis &c. vel qui dicit, se esse Lutheranum, Calvinistam, Turcam &c. In-

di.

directè autem & interpretativè Fidem veram negare censetur, & negando mortaliter peccare, qui vel veram Fidem eò tempore, quò urget præceptum Confessionis externæ dissimulat, vel sectam falsam signis, operibusvè simulat. Verùm pro majori dilucidatione hujus responsi ulterius

Quæres 5<sup>to</sup>, quisnam implicitè saltem censendus sit negasse veram fidem verbis?

54. R. Ad hoc, illum censendum esse implicitè saltem negasse fidem verbis, qui de sua fide interrogatus vel examinatus, præsertim publica auctoritate, respondet verbis ambiguis & æquivocis, ita, ut ab audientibus judicari debeat fidem Catholicam negasse, utputa si à Magistratu Lutherano examinatus, an sit Evangelicus? in partibus, ubi nomine Evangelicorum ab omnibus communiter intelliguntur Lutherani, prout fit in Imperio, qui, inquam responderet, se esse Evangelicum esto subintelligeret, verum Evangelium Christi, & non aliud, quod Lutherus corruptit; vel qui v. g. in Anglia interrogatus an sit fidei Regiæ (quò nomine defacto communiter intelligunt fidem acatholicam) responderet se esse fidei regiæ, subintelligendo, quòd profiteatur fidem antiquorum Regum Angliæ, quæ fuit Catholica, & salvifica. Ita Sporer

*n. 31. & Tamburinus lib. 2. c. 1. §. 2. n. 4. & alii DD.*

Quæres 6to, quinam cenſeantur negare veram fidem factis?

¶ Facto veram fidem negare convincitur, quisquis voluntariè exercet opus seu actionem, quæ vel ex natura ſua, vel ex institutione hominum, vel certè ex circumſtantiis loci, temporis, perſonarum &c. profeſſionem falſæ ſectæ ſignificat; uti ſunt

• 1. thus Idolo incendere, coram eo venerationis cauſâ genuflectere, peſtus tundere &c. 2. Profanæ hæreticorum Cœnæ communicare, aliavè miniſteria ad eorum ſectam ſpectantia exercere, utputa cantare cum Lutheranis in eorum templis, præſertim tales cantus, quibus Religioni noſtræ Catholicæ, aut Eccleſiæ Catholicæ vel quòd idem eſt, Papiftis aut Papæ malè imprecarì ſolent &c. 3. Sectariorum Conventus, Conciones vel templa ordinariè frequentare, ita ſcilicet, ut à reliquis ſectariis meritò credatur quaſi unus ex illis, ſcilicet hæreticis; idque præſertim in caſu, quò Rex, Princeps, aut Magiſtratus Acatholicus in odium Religionis Catholicæ mandaret, ut omnes in proteſtationem ſectæ illius frequentent Eccleſiam, & communibus exercitiis Religionis Acatholicæ interſint, prout olim in Anglia factum fuiſſe conſtat: quò caſu nulli Catholicorum liceret

ret obedire ejusmodi edicto , ne quidem sub prætextu vel cum protestatione, quòd nolit intrare illam Ecclesiam animò protestandi alienam sectam, sed præcisè animò obtemperandi mandato Regis &c. cùm enim Rex edictum fecerit in odium Religionis Catholicæ , atque ideo frequentatio Ecclesiæ Anglicanæ saltem ex institutione humana habuerit rationem signi protestativi sectæ Calvinisticæ, hinc protestatio privati hominis utpote contraria facto ingredientis scilicet Ecclesiam &c. minimè cohonestare potuit talem ingressum, prout in hoc ipso casu declarasse legitur Paulus V. apud Sanchez *lib. 2. moral. c. 4. num. 27* & Filiuc. *tr. 22. num. 87.* Atò, Denique ipso facto fidem negare meritò præsumitur, qui diebus ab Ecclesia interdictis sine justa causa aliis cognita ordinariè comederet carnes cum hæreticis, vel more hæreticorum, vel qui semel duntaxat illas manducaret, sed in iis circumstantiis, in quibus ab hæretico fuissent appositæ in odium Papæ, vel Ecclesiæ Romano-Catholicæ &c. Videantur de his Sanchez *loc. cit.* Michel *ubi supra num. 22. & seqq.* vel Sporer *tract. 2. in decalog. c. 2. sect. 4. à n. 37.*

Quæres denique 7timò, quandonam quis censeatur fidem veram abnegare signis ?

R. Omnis

¶. Omnis ille meritò præsumitur fidem veram signis interpretativè saltem negare, qui tametsi non iñstet præceptum de fide externè profitenda, utitur signo aliquo directè vel indirectè manifestativo hæresis, seu etiam infidelitatis. Ratio est: quia ipso facto vel signo, utpote infidelitatis manifestativo seu protestativo supponitur, imò debet supponi, quòd velit hæresin aut infidelitatem protestari, prout amplius constabit ex proximè dicendis; unde pro majori dilucidatione hujus resolutionis ulterius

Advertendum est, nomine signorum prout à factis distinguuntur, hic potissimum intelligi vestimenta, aut certum modum vestiendi, seu etiam ornandi corpus: hac de causa Doctores communissimè distinguere solent triplex signorum seu etiam vestimentorum genus. Primò namque dantur signa seu etiam vestimenta distinctiva Nationis à Natione vel Gentis à Gente non tamen sectæ, uti sunt vestitus Turcicus, Persicus, & Anglicus &c. 2dò, alia reperiuntur signa vel vestimenta: quæ ex primaria institutione ad naturalem usum, utputa corporis vestiendi, tegendi, vel etiam ornandi sunt destinata, postea verò, sive ex consuetudine, sive etiam ex pacto & lege vel institutione politica obtinuère vim distinguendi infideles à fidelibus, prout de facto

56.

57.

facto habent Romæ, flavus pileus Judæorum, & alibi fascia seu tobalia alba Turcarum, item habitus Prædicantium &c. Denique 3. alia dantur signa seu etiam vestimenta merè instituta ad falsum cultum, qualia sunt illa, quibus utuntur Sacrificuli Idolorum in suis Sacrificiis & superstitiosis ritibus. Insuper sapienter advertunt Sanchez *lib. 2. decalog. c. 4. n. 16.* & Sporer ubi supra *n. 35.* dari nonnulla signa, quæ non solum sunt distinctiva sectæ à Secta, sed insuper protestativa sectæ vel hæreseos, ita quidem, ut quicumque demum tale signum portat, intelligatur se manifestare velut sectatorem ejusdem hæreseos.

At, inquires, quibusnam ergo signis uti fas est absque præjudicio fidei, & quibus non?

18. *R.* Ad hoc quæsitum cum distinctione; enimverò signis primi generis ex mox recensitis uti fas est ex quacunque rationali causa: similiter ex gravi & verè ponderante causa licitum est uti signis 2di generis, modò NB. absit scandalum, & non urgeat vel obliget præceptum profitendi fidem exterius: at verò signis 3tii generis uti quacunque demum de causa, probabilius nefas est. Hæc responsio quoad primum membrum est communiter recepta, quoad 2dum verò & 3tium multos patitur Adversarios.

Ratio



De Obligatione fidem exterius profitendi. 65

Ratio autem nostræ resolutionis in praxi verè probabilis hæc est : quia, tametsi nunquam liceat exterius profiteri fidem aut sectam falsam, nihilominus ob gravem & verè rationabilem causam fas est dissimulare fidem veram : at, qui utitur signis aut vestibus merè distinctivis Nationis à Natione, aut infidelium quidem à fidelibus, sed ex fine duntaxat politico, uti est flavus pileus Judæorum Romæ, vel flavus annulus Francofurti, per hoc minimè censeri debet velle profiteri Judæismum, vel aliam sectam falsam, benè verò is, qui utitur signis protestativis falsæ Religionis : ergo prioribus uti fas est ex motivo rationabili v. g. occultandi fidem vel statum ob bonum animarum, &c. non item posterioribus. Neque propterea quòd v. g. Sacerdos Catholicus se induat vestibus sæcularibus eo fine, ut securius in partibus merùm A catholicis v. g. in Anglia &c. degat, censeri debet fingere, aut mentiri voluisse ; non enim eo fine utitur vestitu Laicorum, ut alii credant se esse laicum, sed utitur eo fine, quatenus is, primariò deservit ad tegendum corpus, secundariò autem ad occultandum suum statum, quem non tenetur aliis hic & nunc pandere, ac denique ad evadenda alia pericula vel incommoda. Verùm contra hoc

Dices : si licet uti vestibus infidelium di-  
*R. P. Elbel, Pars II. de Fide &c. E* stin-

stinctivis à fidelibus, eò quòd deserviant tum ad tegendum corpus, tum etiam ad occultandum statum vel evadendum periculum, permissa interim deceptione aliorum existimantium hunc hominem (qui Sacerdos est) esse laicum, vel esse infidelem &c. ergo ex eodem fine licebit uti vestimentis nedum distinctivis, sed etiam protestativis falsæ sectæ; siquidem & hæc vestimenta deserviant ad tegendum corpus &c. &c.

- §9. R. Equidem ob hanc rationem à Sanchezio, Lugone, Sporer, aliisque multis & permagni nominis Doctoribus permitti usum similium vestimentorum aut signorum, modo præter vim protestativam insuper habeant alium usum indifferentem, prout revera habere videntur vestimenta :

Nihilominus contraria opinio & resolutio mox data, quam hodie dum mordicus tenent Henno *tr. de virtut. disp. 4. q. 1. Resolut. 5. ad Dices 4to. Castropalao part 1, de fide tr. 4. disp. 1. pu. 17. n. 17. Toletus, Navarrus, Lopez aliique plures ab eodem relati, nedum tutior, sed & probabilior, immò propè certa, ideoque omnimodis tenenda mihi videtur hac ratione : quia gestatio talis vestis, utpote protestativæ (ut supponitur) importat, actualem cultum & honorem falsæ sectæ; qui honor & cultus superstitiosus probabilissimè separari nequit à gestatione: ergo quicumque utitur hujusmodi veste, peccat*

pec-

De Obligatione fidem exterius profitendi. 67

peccato infidelitatis, quantumvis intrinsecè protestetur, se nolle uti tali habitu, nisi in quantum deservit ad honestè tegendum corpus : ferè quemadmodum is, qui Idolothus incenderet, in fidei leges impingeret, esto non haberet alium animum incendiendi seu adolendi thus, quàm caput per hujusmodi incensum confortandi. Aliud longè est de eo, qui portat vestimentum merè politicè distinctivum infidelis à infidelibus ; quia cùm hæc signa aut vestimenta instituta sint ex fine merùm politico (v, g. ut sciat ubinam habitare, vel quantum tributum aut pedagium pendere debeat, qui illud portat) profectò ex hujusmodi portatione minimè arguere aut inferre licet, quòd per tale vestimentum vel signum intendat particularem cultum aut honorem exhibere falsæ sectæ.

At, replicabis adhuc. Qui verbis diceret : *Ego sum Turca*, vel : *Ego sum Judæus* &c. procul dubio peccaret contra externam professionem Fidei : ergo similiter peccat, qui verbis, aut qui vestimentis id ipsum dicit.

¶. Negando suppositum conseq. & paritatem ; cùm enim verba non habeant alium finem, quàm expressionem mentis, seu conceptum mentalium ; hinc fit, quòd quicumque demum assertivè dicit, se esse Judæum &c. nisi aliunde ex circumstantiis

constet, quòd non loquatur seriò & ex mente, judicari debeat esse Judæus &c. Econtra cùm juxta dicta vestimenta habent duplicem finem, scilicet primarium, qui est *regere corpus* & secundarium, qui est distinguere Nationem à Natione vel infidelem à fidei: hinc qui utitur tali signo aut vestimento, quod non est simul protestativum alienæ sectæ, non illico à videntibus argui vel judicari potest, quòd hoc faciat in ordine ad profitendam alienam seu falsam sectam. Nunquid enim (ait rectè D. Michel *part. 1. q. 1. §. 3. n. 22.*) qui Romæ patratò homicidio, ut fugeret tutius, assumpsisset habitum proprium Judæorum, & fuisset deprehensus tanquam à fide Apostata puniretur? minimè. Nunquid qui ejusmodi vel aliud grave delictum Augustæ commisisset, & ad evadendum arripuisset habitum alicujus Prædicantis, propterea reus ageretur hæresis Lutheranæ? minimè gentium: consequenter (subdit idem) evidens signum est, talia, licèt vel lege vel usu sint accessoriè discretiva infidelium à fidelibus, posse gravi de causa usurpari à fidelibus sine læsione fidei.

§. II.

Proponuntur & breviter resolvuntur Casus practici circa  
externam professionem fidei.

CASUS PRIMUS.

**T**itius Religiosus & Sacerdos Londoni in Anglia in cujusdam praeivitae Mercatoris domo clam ad aram stetit Deoque litavit : paulò post verò à quodam Apostata proditus, mox altera die ad Consistorium (uti vocabant) Anglicanum citatus fuit, ibidemque in pleno confessu à quodam Cancellario sequentia interrogatus. 1. quod ei nomen ? 2. quae Patria ? 3. an sit Catholicus ? 4. an etiam Sacerdos ? 5. an, vel quoties praesumpserit legere missam, & quibus in locis ? 6. an non sciverit, hoc vi constitutionum Anglicarum gravissimè esse prohibitum ? Sacerdos ad hæc liberrima voce respondit : vocor Titius : Patria mea Italia, & nedum Catholicus, sed & Sacerdos. Missam hinc inde jam sæpius celebravi, ubicunque demum occasionem commodam nactus fui, & hodie demum celebrarem, modò mihi offerretur occasio. De cætero, ut jam audistis, Anglus ego non sum, nec intelligo linguam anglicanam, unde nec mirum, quòd de vestra tam gravi prohibitione divinorum hæctenus nihil audiverim. Cancellarius post modicam deliberationem, &

rium Anglicanum non habuit legitimam potestatem examinandi Sacerdotem Catholicum, præsertim in odium fidei veræ: partim etiam, quia per hoc, quòd negaverit suum statum, minimè cenferi debet negasse fidem veram; secus enim & laicus negando se esse Sacerdotem, dici deberet, negare fidem. Accedit insuper, quòd Consistorium Anglicanum quartum & quintum interrogatorium non posuerit in ordine ad explorandam fidem Titii, quippe quam ex responsione ad 3tium jamiam habuit exploratam, sed potius ad dignoscendum crimen (quale tamen non commisit) seu etiam transgressionem constitutionis anglicanæ, ad quam pariter in conscientia non fuit obligatus. Et datò etiam, non concessò, quòd per 4tum & 5tum interrogatorium voluisset explorare fidem Titii, nihilominus negando se esse Sacerdotem, aut se unquam celebrasse, per hoc non negasset fidem, sed potius aliquid accessoriè & merùm per accidens se habens ad veram fidem. Insuper rectè advertit Sporer *tr. 2. c. 2. sect. 4. n. 24.* quòd quavis demum auctoritate examinatus; an sit Sacerdos? an Monachus? an Sacerum legerit? an jejundet diebus ab Ecclesia Catholica interdictis? &c. etiamsi advertat, ex mente interrogantis idem esse ac quærere, an sit Catholicus? nihilominus sine præjudicio fidei & tuta quidem conscientia, modò

modô utatur debita restrictione mentali, negare possit, se esse Sacerdotem &c. quia multi dantur non Sacerdotes, non Monachi, non legentes Sacrum, non servantes jejunium, &c. qui tamen sunt boni Catholici. Secus dicendum foret, casu quis interrogatur, an sit Papista? quia hæc interrogatio æquivalet huic: an sit Catholicus: quemadmodum igitur nunquam licet negare, se esse Catholicum, ita nec licet negare, se esse Papistam. Videantur de his Tamburinus *lib. 2. Decalog. c. 1. §. 3. num. 3.* Matthæucci *ubi supra c. 12. n. 8.* Henno *loc. cit. Resol. 8.* Vel Kresslinger *in addit. post. n. 52. ad tr. 4. dist. 2. R. P. Reiffenstuel.*

¶ Jam ad 3<sup>ium</sup>. Esto Titius non ignoraverit Constitutionem Anglicanam, vi cuius Catholicis interdicitur exercitium Religionis, potuit nihilominus utendo debita restrictione mentali negare se quidpiam scivisse, intelligendo scilicet de constitutione justa & obligante, de qua Iudex interrogasse censendus est. Ratio est: quia dicta constitutio, utpote in odium Christianæ Religionis & in perniciem animarum facta, re ipsa coram Deo non est justa, neque habet vim obligandi, æque parum ac illa Principum Synagoga *Actor. 4. v. 18.* vi cuius prohibuere Apostolis, ne evangelizando gentibus Christum annuntiarent: pro-

E s

ut

ut jam diximus *tract. pralim. confer. 9. num. 253.* Et certè Cancellarius ille Anglicus respectu Titii nostri ceu Sacerdotis Catholici non fuit Judex legitimus: atqui Judici non legitimo vel non legitime interroganti, nullus tenetur respondere. Adde insuper, quòd quicumque demum & quantumcunque reus possit Judici probabiliter cum restrictione non purè mentali respondere, si prævideat, se aliter non evasurum imminens sibi periculum mortis, exilii, carceris perpetui, aliudvè consimile grave malum, veluti docet Palavicinus *de fide. c. 2.* eundemque secutus la Croix *lib. 3. part. 1. n. 287.* at, Titius alia via in his circumstantiis non potuit declinare carcerem &c. ergo.

## CASUS SECUNDUS.

**S**Empronius Chalcographus Catholicus dissimulata fide sua servitia Augusta locavit cuidam Chalcographo Acatolico in hac arte Magistro; tum quia Artificem Catholicum, cui sua locasset servitia, invenire non potuit; tum etiam quia ab illo Acatolico se in hac arte amplius perfectum iri sperat; hac de causa jam ab aliquot mensibus egit quasi unus ex illis, id est, Lutheranis; nam 1. nullam prorsus hactenus fecit crucem. 2. Ecclesias Eorundem regulariter frequentavit. 3. Diebus ab Ecclesia interdictis comedit carnes. 4. Diebus festivis

*Missam*



*Missam non audivit. §. Denique dum subinde fidem Papisticam (utè appellare solent) ejusdemque ritus traduci audivit, ne dum non contradixit, verum etiam ut fidem suam protinus dissimularet, iisdem corripit. Quæritur jam, an Sempronius peccarit vel quomodo?*

R. Sempronium hæc & similia facitendo peccasse procul dubio graviter nedum contra præceptum affirmativum de fide Catholica exterius profitenda, sed etiam contra præceptum negativum de fide non neganda. Ratio hujus evidenter colligi potest ex dictis n. §. §. quisquis enim ordinariè frequentat Sectariorum Ecclesias, Conciones &c. ita, ut videatur, & ab omnibus quasi habeatur, aut certè haberi debeat quasi unus ex illis, præsertim si fidem Catholicam traducentibus corripit &c. non solum hanc minimè profitetur, sed potius negasse censendus est: at, hoc fecit Sempronius, veluti constat ex specie facti hujus: ergo.

Nec dubitandum, quin Sempronius ex ulteriori cohabitatione & conversatione cum hæreticis foret expositus periculo omnimodis abnegandi fidem; nam corridendo traducentibus ritus, fidemque Catholicam satis videtur ostendere, quòd hanc exiguo habeat in pretio, & quasi pudeat, esse se Catholicum. Quin etiamsi suppo-

nere-

neretur hæc & similia non fecisse animo abnegandi vel spernendi suam fidem, sed præcisè occultandi, proptereaquo perfectius addiscendi suum artificium, quia tamen in hoc loco cogitur se gerere quasi unum ex illis, profanando dies festos, non servando jejunium, imò Eorundem Ecclesiam & conventicula seu etiam Conciones frequentando, cum maximo detrimento bonorum spiritualium, hinc à Confessario tutâ conscientia absolvi non potest, nisi sanctè adpromittat, se quamprimum moraliter potuerit, deserturum hanc conditionem, suâque servitia alteri Catholico locaturum, ubi habuerit occasionem Catholicè vivendi, Deoque modò debito serviendi. Videatur Gobat *Theolog. experim. tr. 5. n. 321. & 337.* Vel noster A. R. P. Kazenberger in *Supplemento I. P. Sargar, conf. 24. n. 24.*

Ergone, inquires, judicandum aut concludendum est, Sempronium toties peccasse mortaliter, quoties sacrum neglexit, vel jejunium Ecclesiasticum non observavit?

65. R. Minimè gentium; certum quippe esse debet, dari multas causas excusantes tum ab auditione sacri, tum etiam ab observantia festorum, prout apud omnes etiam catholicè sentientes in confesso est. Profetò R. P. Gobat insignis Auctor & Moralium Professor in *sua Theolog. experim. tr. 5.*

n. 441.

n. 441. conformiter ad mentem aliorum quos ibi à. num. 437. refert & citat, docet, ab auditione sacri excusare saltem medio-crem incommoditatem in bonis animi, corporis, famæ vel fortunæ: at, minimè dubitandum est, quin Sempronius interim deserendo hanc conditionem debuisset subire haud modicam fortunæ suæ jacturam; cum supponatur, non potuisse invenire alium Dominum, cui sua locasset servitia: ergo intuitu hujus incommodi declinandi potuisset una alteravè vice dissimulare auditionem Sacri vel observantiam jejunii, eo quòd Ecclesia ceu pia & Sapientissima Mater ex similibus motivis velit filiis suis condescendere, uti benè advertit Sanchez in *Consil. moral. lib. 7. c. 2. dub. 45.* Cogen-  
dus nihilominus est Sempronius ad deserendam quantocyùs hanc conditionem, ob rationes mox datas.

Et quia secundum dicta *de actib. hum.* 66  
*Confer. 3. n. 62.* bonitas & malitia actuum humanorum vel maximè dependent à judicio practico prudentiali; hinc ad practice in hoc casu colligendum tum numerum, tum etiam speciem peccatorum vel maximè juvabit examinare Sempronium, quamente, quavè fide aut conscientia frequentaverit Lutheranorum Ecclesias, Conciones &c. carnes comederit, & Sacrum neglexerit? an nunquam, vel quoties de peccato

cato mortali sibi timuerit? &c. & ex responsis ejusdem facile erit colligere numerum ac speciem peccatorum.

## CASUS TERTIUS.

**C**ajus Præco Arianus dignatione superna tum ex lectione Scripturarum, tum etiam ex interiori Spiritûs Sancti illustratione satîs clarè cognovit secta sua falsitatem; quam ob rem tempore gravis infirmitatis, quâ decubuit, postulavit ad se vocari Sacerdotem Catholicum, & quidem in vestibus secularibus compariturum, quatenus hîc modo declinaret coram suis omnem suspicionem abjurandæ hæreseos. Sacerdoti verò coram aparenti aperuit illico suam mentem, petens humiliter baptizari, sed cum duabus exceptionibus expressis, scilicet 1. ut si ex hoc morbo decederet, sibi liceret dissimulare fidem Catholicam & baptismum susceptum. 2. Ut si denuo reconvalesceret, permetteretur expectare occasionem magis commodam, quâ Fidem Catholicam sine ulteriori periculo fortunæ bonorumque temporalium posset exterius profiteri. Queritur jam, an hæc à Sacerdote Catholico potuerint licitè permitti Cajo?

67 R. Ad primam conditionem, eam Cajo neutiquam potuisse accordari, quippe qui ante mortem saltem tenebatur hæresin damnare Arianam, erroresque, quos publicè docue-

docuerat revocare, tum ad gloriam Dei, tum ad aliorum etiam salutem; secus tutâ conscientia velut indispositus baptizari non potuisset. Ratio hujus resolutionis petenda est ex dictis paulò superius n. 24. quia quivis fidelium tenetur Fidem suam exterius profiteri (non obstante quacunque demùm jactura) casu quo id exigit honor Dei ac Christi, vel salus proximorum: atqui in his circumstantiis nedum honor Dei & Christi, sed etiam salus proximorum exigebat à Cajo professionem publicam Fidei Catholicæ; secus enim alii à Cajo vel seducti, vel certè in erroribus suis confirmati procul dubio ulterius perseverassent in suis erroribus, utique non sine evidentissimo animarum & salutis dispendio, Divinique honoris detrimento: ergo &c.

At quid, inquires; si Cajo nullis rationibus potuisset persuaderi, ut ante mortem suam coram plebe ariana revocaret suos errores, & publicè profiteretur fidem Catholicam?

¶. Huic tam facile non esse condescendum, sed potius omnimodis inducendum esse, ut per seipsum vel vocaliter vel scriptotenus revocet: si tamen ad hoc tentatis omnibus persuaderi non valeat, ultimi remedii loco pro salute animarum eidem persuadendum putarem, ut si tempus vel  
ita.

status infirmitatis id permittant, coram duobus aut tribus testibus protestetur, se huic homini (sacerdoti scilicet Catholico) aliquid Religionem & animarum salutem concernens concredidisse, quod post obitum suum ipsis velit seriò inculcatum, moxque in præsentia Arianorum roget Sacerdotem Catholicum, quatenus post suum (Caji scilicet) obitum velit illud secretum reliquis Arianis suo nomine efficaciter proponere & inculcare; hoc enim modo probabiliter suæ satisfaciet obligationi, evadétque subiectum capax baptismi, prout in casu haud multùm absimili cum Laymanno *lib. 3. T. 6. c. 5. §. un. n. 25. & A. R. P. Kazenberger in supplem. decal. P. Sporer c. 2. n. 233. diximus tr. de Restit. conf. 9. n. 249. de quadam malefactorice, quæ ob timorem gravioris supplicii incurrendi non vult per se ipsam & ante, sed post mortem primum per Confessarium retractare falsam calumniam alteri innocenti impositam.*

- 69 A fortiori hoc consilium practicari potuisset, si Cajus non fuisset Præco Arianus, sed communi de plebe homo, qui neminem unquam seduxisset aut confirmasset in sua falsa secta; quia cùm in tali homine nec honor Dei, neque salus animarum periclitetur, neque aliunde urgeat præceptum de fide Catholica exterius profitenda, hinc ob verè rationabilem & gravem causam posset

*De Obligatione fidem exterius profitendi. 31*

set facilius in tali homine dissimulari externa professio fidei. Nec refert, quod propterea fortassis crederetur, ab aliis decessisse ex hac vita in secta Ariana, & tanquam infidelis: non, inquam refert: quia ob verè gravem causam possumus permittere hanc falsam & erroneam existimationem ab aliis conceptam, modo absit scandalum, & præceptum confessionis fidei non urgeat, prout præter alios bene docent Sanchez *lib. 2. de alog. c. 4. n. 29.* & Filiucius *tr. 22. c. 3. n. 90.*

Ex quibus ulterius

¶ Jam ad alteram conditionem à Cajo 70  
propositam, Cajo scilicet tutâ conscientia potuisse permitti, ut recuperata valetudine ad aliquod tempus dissimularet professionem externam fidei Catholicæ, exercendo interim actus vel actiones communes Ariani cum Catholicis, usque dum occasionem magis commodam sibi, suisque prospiciendi invenisset: nullatenus tamen eidem permittendum fuit, ut exerceret actus protestativos sectæ Arianae, utputa exercendo officium Pastoris Ariani, Sacramenta ipsorum more administrando, vel sermonibus, operibusvè in illorum secta eos confortando &c. Ratio hujus petenda est ex dictis *n. 52.* quia in nullo casu fas est falsam sectam profiteri, aut fidem veram negare, bene tamen ob verè rationabilem causam fidem veram dissimulare, at, Cajo exercen-  
*R. P. Elbel. Pars II. de Fide &c. F do*

do actus protestativos sectæ Arianae fidem veram negaret, non item exercendo actus communes Arianis cum Catholicis: ergo hoc posterius licite facit, non item illud prius. Videatur de hoc Tamburinus *lib. 2. in decalog. c. 1. §. 3. n. 12.*

## §. III.

## Corollaria ex dictis inferenda.

71. **C**olliges ex hætenus dictis 1. vi præcepti divini nobis esse vitanda omnia illa verba, actiones vel opera, quæ vel ex se & natura sua, vel certe ex circumstantiis significant internam abnegationem fidei: e contra illa, quæ vel ex se, vel certe ex circumstantiis non significant internam fidei abnegationem ob rationabilem causam licite exercemus. Hanc velut Regulam universalem vix non iisdem terminis tradit Tamburinus *loc. cit. §. 3. n. 2.* eumque secutus Sporer *tr. 2. c. 2. sect. 4. n. 30.* Ratio hujus est: quia ex præcepto divino tenemur fidem veram nunquam negare, licet fas sit, eandem in certis circumstantiis dissimulare, veluti constat ex hætenus dictis: at, qui observaverit mox traditam regulam, fidem veram non negat &c. ergo non peccat.

Col.



Colliges 2dò, interrogatum à Persona privata, quæ scilicet nullam præfert auctoritatem publicam, non teneri respondere, cujus sit fidei, sed posse interrogantem illudere v. g. dicendo: *quid ad te?* vel *teneo fidem semel susceptam* &c. quia secundum dicta per hoc non periclitatur honor Dei, vel Christi, neque salus propria aut proximi, uti supponi debet. Supponendum insuper est, quòd ex tali dissimulatione fidei vel taciturnitate ad interrogationem factam cesset scandalum; nam quòd subinde tacens de sua fide etiam dum publicè examinatur, argui non possit eandem abnegare, quin potius profiteri, sapienter advertunt Cardenas *in crisi theolog. dissert. 12. n. 15.* eumque secutus la Croix *lib. 2. c. 2. n. 56. & 57.*

Colliges 3tib, quemvis Catholicum, casu quo videret SS. Eucharistiæ Sacramentum, Crucifixum, aliàsve SS. imagines &c. indignè & sacrilegè ab hæreticis, vel alio quocunque demum tractari, fore obligatum nedum ad fidem Catholicam exterius publicè profitendam, verum insuper ad impediendam pro viribus hujusmodi injuriam, quia in tali casu urget honor Dei & Christi, ut de se liquet. Si tamen prævideres in his vel illis circumstantiis tuam protestationem vel conatum nihil profuturum, non erit, unde obligeris, inquit Sporer *loc. cit. n. 25.*

74.

Colliges 4<sup>to</sup>, Eum, qui tempore persecutionis instantis fugit, minimè arguendum esse, quòd velit fidem negare: quin potius hujusmodi fuga signum est, quòd velit potius alia, quæcunque demum hætenus possedit, deserere, quàm veram fidem. Quare per se loquendo (ubi scilicet salus animarum, vel honor Dei aliud non requirit) haud quaquam illicitum erit fugere, quin potius aliquando consultum, v. g. in casu, quò Pastor prævideret, hujusmodi fugam conducturam ad aliorum plurium salutem, præsertim, si alium locò sui substitueret, qui animarum curam interim ageret: quod tamen cautè, & non nisi cum consensu, Reverendissimi Ordinarii saltem rationabiliter præsumpto attentandum est. Videantur de hoc Tamburinus *loc. cit. n. 6.* Sporer *n. 28.* Henno *ubi supra q. 1. Resol. 5.* vel Herincx *cit. disp. 8. n. 15. & seqq.* ubi hoc punctum accuratè examinat, & sapientissimè resolvit.

75.

Colliges tandem 5<sup>to</sup>, etiam Catholicis ex gravi & rationabili causa absque præjudicio fidei permitti posse sequentia 1. in Comœdiis agere Personam Sacrificuli vel Idololatæ, & coram Idolo thus immolare. 2. ingredi templa hæreticorum unâ alteravè vice, animò videndi illa, seu etiam explorandi, quidnam ibi agatur. 3. Insuper in nostra præsertim Germania haud illicitum est

est assistere, vel etiam comitari funus hæretici, ex mera policia vel civilitate, uti passim fieri solet etiam reciprocè ab A Catholicis. • 4. Etiam in locis merùm A Catholicis ubi sponsi Catholici morari tenentur &c. coram Magistratu civili, vel etiam ministro hæretico velut testibus præcisè inire matrimonium tanquam contractum civilem &c. Ratio est: quia hæc & similia vel non sunt signa protestativa alienæ sectæ, vel si quidem talia sunt ex se, uti est incensatio Idoli &c. nihilominus ex circumstantiis loci, personarum &c. satis evidenter datur intelligi, quòd non fiant animò alienam seu falsam Religionem vel Sectam protestandi, sed potiùs animò repræsentandi id, quod Sectarii seu etiam Idololatræ faciunt, aut facere consueverunt. Ita re ipsa fert communis Doctorum opinio. Henno *tr. de virtut. disp. 4. q. 1. conclus. 1. Resolut. 1. & seqq.* Herincx noster *part. 3. tract. 1. disp. 8. n. 29. & seqq.* Babenstuber *tract. 5. disp. 1. artic. 1. à n. 54.*



# CONFERENTIA TERTIA

## De Infidelitate.

### SUMMARIUM.

76. Infidelitas ut sic importat defectum contra fidem.
77. Alia dicitur merum negativa, alia verò positiva.
78. Hæc posterior rursus subdividitur in tres species, scilicet 1. in paganismum, 2. judaismum, & 3. hæresin.
79. Breviter declaratur quid sit Paganismus; &
80. Quid Judaismus; & denique
81. Quid formaliter importet hæresis.
82. Hæresis alia dicitur materialis, alia formalis.
83. Pertinacia hæreticum formalem constituens consistit in obstinatione voluntatis, vel potiùs judicii contra judicium Ecclesiæ.
84. Quale, & quàm grave peccatum sit infidelitas?
85. An, vel quando dubitans de aliqua veritate fidei habendus sit pro hæretico?
86. Quid, & quotuplex sit Apostasia?
87. Quid Schisma, vel, esse schismaticum?
88. Resolvitur Casus I. Cujusdam Catholici, qui animò explorandi fidem alterius de hæresi

- refi sibi suspecti dixit, se velle amplecti fidem Lutheranam.
89. Quà de causa Confessarius eidem postea negavit beneficium absolutionis, sed malé.
90. Satisfit cuidam instantiæ in contrarium.
91. Resolvitur Casus II. Cujusdam acatholici, penitentis à quodam R. D. Parocho unà cum suo filio duodenni instrui in fide Catholica.
92. Undenam colligendum, an fuerit hæreticus materialis duntaxat vel verò formalis, ideoque absolvendus vel non?
93. Et quid tenendum de eo, qui à Patre Catholico, Matre verò acatholica natus asserit, se credere quidquid parentes sui credunt?
94. Resolvitur Casus III. Cujusdam Subdiaconi, nolentis credere, quòd omnes consodales S. Ursulæ fuerint Virgines;
95. Insuperque asseruit, se hoc nunquam crediturum, tametsi à S. Pontifice è Cathedra proponerentur ut tales, id est, Virgines.
96. Quidsi hujus facti pœnitens ex post facto dicat, se suspensurum suum judicium de hac re?
97. Minimè dubitandum videtur, quin hodie dum dentur multi hæretici merùm materiales.
98. Enimverò multi etiam vincibiliter ignorantes mysteria nostræ fidei, vel suæ sectæ adhærentes, non semper reputari debent hæretici formales.
99. Habendus tamen est pro hæretico, qui negat veritatem, quam agnoscit à Deo certè, licet privatim sibi revelatam.
100. Idem ferendum judicium de iis, qui decisiones in materia fidei & morum à SS. Pontificibus è cathedra nolunt admittere in eo sensu, quò intelligendæ proponuntur; quod

101. Breviter magis dilucidatur.  
 102. Quid iudicii de iis, qui negant Summum Pontificem esse supra Concilium?  
 103. Fides habitualis non amittitur pro quodcumque peccatum infidelitatis.  
 104. Infideles tamen, quicumque demum, exactè sunt instruendi in rebus fidei, priùsquàm ad hujus professionem publicam admittantur.

## §. I.

Præmittuntur & breviter resolvuntur Quæsitæ scitu necessaria ad debite resolvendos Casus practicos de infidelitate.

**Q**Uæres primò, quid, & quotuplex sit infidelitas?

76. R. ad primum. Infidelitas ut sic est peccatum, seu etiam defectus contra fidem. Ita ex communi DD. tradit Sporer tract. 2. in decalog. c. 3. sect. 1. assert. 1. Ratio hujus descriptionis de se patet; nam infidelitas impræsentiarum sumitur, prout opponitur fidei divinæ: atqui peccatum vel defectus contra fidem opponitur fidei, ut de se liquet: ergo infidelitas haud ineptè describitur per defectum &c. &c.
77. R. jam ad 2dum. Infidelitas ut sic rectè partitur immediatè in positivam & negativam. Ita rursus communis DD. Et ratio est: quia omnis infidelis vel ignorat, mysteria fidei, vel positivè aliquid fidei
- con,

contrarium sibi habet persuasum : at , si ignorat , dicitur meritò infidelis negativè , in quantum habet vel carentiam vel etiam negationem fidei : si verò aliquid veræ fidei contrarium credat , dicitur infidelis positivè , id est , imbutus errore positivo sanæ & salvificæ fidei contrario. Cæterum utraque hæc infidelitas meritò à Theologis solet distingui in culpabilem , & inculpabilem ; experientia quippe constat , dari nonnullos homines , qui inculpabiliter ignorant mysteria fidei , vel quia nondum sunt capaces talis scientiæ , veluti sunt infantes ( qui propterea appellantur infideles negativè ) vel tametsi fuissent capaces , nihil tamen unquam audierunt de fide vera , vel certè de uno alterovè mysterio ( & hi rectè dicuntur infideles privativè tales ) denique etiam reperire est alios , qui defectu sufficientis instructionis credunt aliquid fidei positivè contrarium : hi omnes dicuntur infideles inculpabiliter tales. Econtra alios reperire est , qui culpabiliter mysteria fidei ignorant , vel contrarium sibi persuasum habent , eò quòd scilicet nunquam studuerint addiscere ea , quæ sunt necessariò Fide Divina credenda , vel pro mero arbitrio credant , quidquid demum arridet , aut eorundem genio placet : qui proin haud immeritò dicuntur infideles culpabiliter tales , *juxta communissimam DD. quam tenet Reif-*

fenstuel *Theolog. moral. tractat. 4. dist. 4. num. 3.*

Quæres 2dò, quot de facto dentur species infidelitatis?

78. R. Tres hodie communiter recensentur species infidelitatis positivæ, scilicet 1. Paganismus. 2. Judaismus. & 3. Hæresis, Ita Doctor Angelicus 2. 2. q. 10. art. 1. *communiter à Theologis receptus.* Ratio est: quia universim tot species vitii rectè assignantur, quot modis contingit ipsum repugnare virtuti sibi oppositæ: atqui vitium infidelitatis vel repugnat veræ fidei simpliciter, id est per omnia, quia scilicet talis infidelis fidem prorsus nunquam suscepit, & tunc dicitur Paganismus; vel repugnat solum quantum ad Novum Testamentum, ita ut veram fidem semel in figuris quidem suscepit, & etiamnum protestetur saltem quoad Vetus Testamentum, & tunc dicitur Judaismus; Vel denique repugnat fidei habitualiter saltem reipsa vi baptismatis susceptæ, & tunc talis infidelis appellatur hæreticus, prout mox ampliùs patebit ex dicendis. Interim pro majori claritate.

Quæres jam 3tò, quid sit Paganismus, & quid Judaismus?

79. R. Ad primum. Paganismus est infidelitas ante susceptam Fidem veritatibus Fidei Catholicæ universaliter contradicens. Ita  
post



post alios Sporer *l. cit. cap. 3. n. 9*: Re-  
cté autem paganismus per hoc discrimina-  
tur à Judaismo & hæresi, quòd universa-  
liter dicatur contradicere Fidei Catholicæ;  
esto enim Turcæ (qui habentur pro Paga-  
nis) nobiscum conveniant in eo, quòd cre-  
dant Deum esse unum, vel esse futurum  
judicium &c. hæc tamen convenientia ma-  
terialis potius, quàm formalis dicenda est;  
quia idem objectum materiale non credunt  
nobiscum ex eodem motivo formali, scili-  
cet revelationis Divinæ, sed quatenus pro-  
positum ab ipsorum falso Propheta, scili-  
cet Machomete.

R. Jam ad 2dam partem hujus quæsit. 80.  
Judaismus est infidelitas admittens quidem  
fidem susceptam in typo & figuris Veteris  
Testamenti repugnans tamen fidei nostræ  
quantum ad Novum Testamentum. Ratio  
est: quia Judæi per hoc à nobis differunt,  
quòd Vetus quidem Testamentum nobis-  
cum admittant, non tamen novum; firmi-  
ter enim sibi persuasum habent, nondum  
advenisse verum Messiam in lege promissum,  
sed primùm adventurum in Mundum cum  
potestate magna &c. Ex quo liquet, eos  
meritò haberi pro infidelibus.

Quæres 4tò, quid sit Hæresis, & quo-  
tuplex?

R. Ad primum. Hæresis ut sic est ho- 81.  
minis Christianam Religionem professi er-  
ror

ror intellectualis contra aliquam fidei veritatem. Ita *communis Theologorum*. Perbene autem dicitur error, non qualiscunque, sed intellectualis; nam sicut fides in intellectu ceu principali parte hominis residet; ita & hæresis utpote fidei veræ è diametro opposita in eadem potentia suum figit domicilium, ac proin rectè dicitur error intellectualis.

82. 8. Ad 2dam partem hujus quæsit. Hæresis ut sic duplex est, alia scilicet merum materialis, alia etiam formalis. Ita rursus Doctores *communissimè* cum Sancto Thoma 2. 2. q. 11. art. 1. Prior, hæresis scilicet materialis, importat quidem errorem, sed ex ignorantia proveniente, & absque pertinacia perseverandi in tali errore; ut si quis ex mera simplicitate, vel etiam defectu sufficientis instructionis credat, non dari nisi duo aut tria Sacramenta, vel Deum non esse nisi unum &c.

Posterior autem, hæresis scilicet formalis rectè describitur, quod sit *voluntarius & pertinax error intellectus contra aliquam vel plures fidei veritates in homine Christianam Religionem professo*. Error voluntarius ideò dicitur; quia quemadmodum ad verum actum meritorium fidei requiritur pia quædam voluntatis affectio, ita ad hæresin formalem ceu actum demeritorium necessaria est quædam prava affectio voluntatis: Dein-

Deinde hæresis formalis est peccatum: omne autem peccatum dependet ab arbitrio humano: ergo &c. Dicitur insuper error contra *aliquam* vel *plures*: ad hæresin enim sufficit, quòd quis contradicat saltem uni seu alicui veritati; quia talis revera errat à via veritatis infallibilis: contra plures etiam veritates hæreticus errare potest. absque eo, quòd evadat Paganus aut Judæus, veluti liquet de Lutheranis, Calvinistis &c. Insuper dicitur *in homine Christianam Religionem professo &c.* Qui enim hanc nunquam professi fuere sive in baptismo sive alio modo, simulque aberrant à vera fide, potius gentilibus vel Judæis, quàm hæreticis annumerari merentur. Illud verò singulari nota dignum est, quòd dicatur error *pertinax*; quia pertinacia est formale constitutivum & distinctivum hæreseos formalis ab hæresi merùm materiali proximè descripta.

Ast in quo ergo (inquies fortassis) propriè consistit hæc nota characteristica hæreticorum, scilicet pertinacia?

¶ Pertinacia consistit in eo, quòd quis 83. articulo seu etiam pluribus articulis fidei sibi sufficienter propositis (ita scilicet, ut de illorum veritate non ampliùs dubitare possit prudenter) nihilominus teneat contrarium, idque nolit relinquere, nequidem propter auctoritatem Ecclesiæ vel aliam quam-

quamcunque , nisi fortè manifestè convi-  
ctus. Unde ad hanc pertinaciam minimè  
necessaria est longior mora , sed sufficit ad  
formalem hæresin incurrendam voluntaria  
& obstinata oppositio iudicii proprii veri-  
tati satis propositæ. Et licèt intellectus  
ceu potentia naturalis veritati satis sibi pro-  
positæ & agnitæ nequeat resistere contradi-  
cendo ; nihilominus hæretici formales  
(quales meritò præsumi possunt ac debent  
Præcones , seu , ut vocant , Pastores Aca-  
tholicorum , illi saltem , qui veritati , inda-  
gandæ seriò incumbunt aut incumbere vo-  
lunt ) communiter id faciunt hac de causa :  
quia sinistra affectione , vel aliis motivis  
temporalibus absteriti nolunt impendere  
aciem intellectûs ad agnitionem veritatis ,  
quin potius illico sese convertunt ad alia  
motiva quantumvis futilia , quæ sibi suis-  
que persuadeant errores contrarios : sicut  
ex similibus motivis Principes Synagogæ  
noluerunt agnoscere innocentiam Christi ,  
tametsi eandem potuissent satis evidenter  
agnoscere , modò voluissent. Videatur de  
hoc Herincx *disp. 9. n. 22.* vel Babenstu-  
ber *tr. 5. disp. 1. art. 2. n. 14.*

Quæres 5tò , quale peccatum sit infide-  
litas ?

84. R. Infidelitas formalis est peccatum com-  
missionis , & quidem 2. gravius reliquis  
omnibus , quæ contra virtutes morales com-  
mit-

mittuntur, licet 3. non sit gravissimum simpliciter, seu gravius iis, quæ pugnant contra virtutes Theologicas. Ita rursus satis communiter Doctores, nominatim Herincx noster *part. 3. tr. 1. disp. 9. num. 11.* Castropalao *tr. 4. disp. 2. punct. 1. n. 11.* & alii satis communiter.

Ratio primi est: quia infidelitas formalis secundum dicta consistit in erroneo, eoque voluntario iudicio contra fidem: at, hoc importat commissionem, non omissionem; hinc fit quod omittens actum fidei eo tempore, quod urget præceptum, peccet quidem, sed non peccato infidelitatis, quemadmodum omittens actum dilectionis tempore debito, non propterea peccat peccato odii. Ratio 2di est: quia peccatum tantò est gravius, quantò magis hominem à Deo avertit: atqui peccatum infidelitatis vel maximè avertit hominem à Deo, quippe per quod vera Dei cognitio aufertur: ergo infidelitas est gravius peccatum, quàm illa, quæ committuntur contra virtutes morales. Ratio autem 3tii hæc est: quia peccatum odii erga Deum, quod Charitati Theologicæ adversatur, omnium confessione excedit in gravitate reliqua peccata repugnantia virtutibus Fidei & Spei Theologicæ: ergo peccatum infidelitatis nequit dici simpliciter gravius omnibus peccatis,

catis, etiam iis, quæ committuntur contra virtutes Theologicas.

Quæres 6to. an etiam ille dicendus sit infidelis vel hæreticus, qui solum dubitat de aliqua veritate fidei?

85. R. Affirmativè, loquendo de dubitante post veritatem fidei satis propositam (secus enim dicendum est de dubitantibus ante veritatem fidei satis sibi propositam; talibus enim dubia vitio verti nequeunt, ut de se liquet)

Ratio autem nostræ resolutionis (quam contra Sanchez, Malderum, Canum, & paucos alios) tenent Castropalaus *tract. 4. disp. 3. punct. 2. n. 9.* Coninck *disp. 18. dub. 7. conclus. 6. n. n. 102.* Suarez & alii plures, quos sequitur Michel *Theol. canon. mor. part. 1. q. 1. punct. 1. n. 5. pag. 353.* est: quia dubitans de aliquo articulo fidei v. g. de reali præsentia Christi in Sacrosancto Eucharistiæ Sacramento, licet per hoc quod dubitet, realem præsentiam seu veritatem fidei non neget, nihilominus dubitando de ea satis manifestat, se non credere infallibilitatem: at, qui hanc non credit vel in dubium revocat, meritò habetur pro hæretico. Hac de causa *cap. 1. X. de hæreticis.* dicitur: *dubius in fide est infidelis.*

Quæres 7timò, quid & quotuplex sit Apostasia?

R. No.

8. Nomine Apostasiæ ut sic communi-86.  
ter intelligitur *discessio quædam*, seu etiam  
*defectio*, & hæc ab aliis dicitur triplex, ab  
aliis omnino quadruplex, scilicet 1. Apo-  
stasia à Religione. 2. ab Ordine Sacro. 3. ab  
Obedientia, & 4. à Fide. Ita in terminis  
Sporer *tr. 2. c. 3. sect. 1. n. 11.* Explico  
breviter singulas species. Apostasia à *Re-*  
*ligione* definitur, quod sit criminosa & mor-  
tifera discessio à Religiosi Ordinis instituto  
sine animo revertendi: ita *jus commune*, li-  
cèt in nostra (fortassis etiam aliis pluribus  
Religionibus) pro Apostatis habeantur, &  
ut tales puniri soleant, qui sub alio prætextu  
Religionem aut monasterium sine legitimi  
sui Prælati obedientia vel licentia deserunt,  
esto habeant animum denuo revertendi.  
Apostasia à *Sacro Ordine* dicitur, dum Cle-  
ricus in Ordinibus majoribus constitutus ad  
statum laicalem vel matrimonialem propria  
auctoritate se transferre præsumit. Apo-  
stasia *ab obedientia* appellatur, dum quis ab  
obedientia legitimi sui Superioris sese sub-  
trahere nititur. Denique Apostasia à fide  
dicitur, dum quis à vera fide in baptismo  
suscepta & explicitè professâ deficit, assu-  
mendo aliam Religionem vel sectam falsam.  
Ex qua descriptione liquet 1. neque paga-  
nos, neque Judæos, neque etiam hæreticos  
semper in hæresi natos & educatos dici posse  
apostasas; quia hi omnes nunquam fuere.

*R. P. Elbel, Pars II. de Fide &c.* G ex-

explicitè professi veram seu Catholicam fidem. Liqueat insuper 2. Apostatas à fide mox descriptos incurrere pœnas in hæreticos decretas, prout etiam statuitur *cap. contra Christianos. 13. de Hæreticis in 6to.* Liqueat insuper 3. ab Apostatis explicandum esse in confessione, ad quam falsam Religionem deflexerint: quia infidelitates mox suprâ relatæ procul dubio specie morali differunt, consequenter etiam peccata quæ committuntur pro diversitate Religionum vel potius infidelitatum diversarum, Videatur Sporer *loc. cit.* vel Laymann *lib. 2. tr. 1. c. 16. per totum.*

Quæres tandem 8tavò, quid sit Schisma, & quid esse Schismaticum?

87. R. Schisma est peccatum, quò quis se separat ab unitate Ecclesiæ, quatenus hæc est unum quoddam corpus mysticum ex diversarum conditionum fidelibus tamquam membris tum inter se, tum etiam cum capite summo scilicet Póntifice connexis constitutum. Ita post Valentiam Laymann *lib. 2. tr. 3. c. 11. n. 4.* quem sequitur Babenstuber *tr. 5. disp. 1. a. 2. n. 34.* Ex qua descriptione facile liqueat, illum merito dici schismaticum, qui à corpore Ecclesiæ sese sequestrat, eò quòd renuat se gerere ut membrum hujus corporis, vel subesse capiti. Quodsi admissis quidem omnibus fidei articulis solum nitatur se sequestrare à reli-



reliquo corpore Ecclesiæ, dicetur purus schismaticus: è contra si se separet, simulque neget unum vel plures fidei articulos, dicitur schismaticus simul & hæreticus, proptereaque incurrit omnes pœnas hæreticorum, quamprimum suum schisma hæreticum exterius manifestat, uti bene docent Laymann *loc. cit. n. 5.* & Tamburinus *in decalog. lib. 2. c. 1. ff. 5. n. 3.* Buberstuber *loc. cit. n. 36.* aliique plures ab iisdem Doctõribus relati.

## §. II.

Proponuntur & breviter resolvuntur Casus practici de infidelitate.

## CASUS PRIMUS.

**T**itus in hospitio Cujusdam pagi merum Catholici offendit hominem, quem ex diversis indiciis suspicabatur esse Praconem Lutheranum; quare ut omnimodam rei veritatem exploraret, eidem sese jungendo propius, familiariter, occultè tamen & clanculo quasi quasivit, an non esset Præco Lutheranus? sciscitanti verò, quam ob causam id quæreretur? ulterius respondit Titus noster, sibi jam pridem displicuisse fidem Catholicam; proptereaque cogitare de amplectenda fide Lutherana. Hoc postea (quod totum joci causâ fecerat)

G 2

Tr

*Titius in confessione aperuit : moxque à Confessario repulsam absolutionis tulit, jussus alium quarere, qui se ab hæresi vel potius ab excommunicatione ob hæresin incursum, absolveret. Jam ad nostrum propositum quaritur 1. quid de hoc facto Titii? quid de responso Confessarii tenendum sit?*

88. R. ad primum, Titium malè fecisse : esto enim hoc totum non fecerit animo serio, & fortassis nil minùs intenderit, quàm abnegare veram fidem, quia tamen in foro externo simulavit se seriò loqui, asserendo sibi fidem Catholicam jam pridem displicuisse, proptereaque velle amplecti Lutheranam; hinc sine dubio saltem per se loquendo (nisi scilicet simplicitas aut levitas animi, quâ hujusmodi homines subinde sibi persuadent similia non esse graviter peccaminosa, modò in animo non ita sentiant) graviter peccasse censendus est; quia si minùs corde, saltem ore contempsit fidem Catholicam, quod sine gravi injuria in Christum per se loquendo fieri neutiquam potest. Quia tamen fatetur se non fuisse locutum ex animo, nec unquam in mente ita sensisse, hinc nec potest, nec debet dici hæreticus; quia secundùm dicta *n. 81.* hæresis necessariò importat errorem in intellectu contra aliquam veritatem fidei, simulque pertinaciam in voluntate, prout ex *communi DD.* tradit Reiffenstuel *theolog. mor. tr. 4. dist. 4. n. 11.*

Ex

Ex quibus ulterius

℞. jam ad 2dum quæsitum, Confessa- 89.  
rium similiter malè fecisse, negando bene-  
ficiū absolutionis Titio, eundemque able-  
gando ad alium gaudentem potestate absol-  
vendi ab hæresi. Ratio patet: quia Titius  
nullam incurrit hæresin, neque excommu-  
nicationem vel reservationem &c. ergo nec  
indiguit absolutione ab excommunicatione,  
per consequens imprudenter & sine justa  
causa beneficio absolutionis fuit fraudatus;  
immo injustè gravatus onere, sua peccata  
iteratò alteri confitendi; ad quod revera mi-  
nimè tenebatur

At, inquires, Titius in foro saltem externo  
videbatur seriò contestari, quòd fides catho-  
lica sibi displiciat, proptereaque cogitet am-  
plecti fidem Lutheranorum: ergo in foro  
externo saltem incurrit excommunicatio-  
nem in hæreticos latam, quidquid demum  
sit de foro interno, in quo supponitur aliter  
sensisse: Ecclesia enim judicat de externis;  
non verò de occultis, ut habetur *c. Erube-  
scant. dist. 32. & c. sicut tuis. de simonia*:  
ergo Titius non potuit absolvi à quolibet  
Confessario.

℞. negando conseq. Nam in primis Ti- 90.  
tius non postulavit absolvi pro foro ex-  
terno, neque indiguit absolutione in hoc fo-  
ro; cum ab omnibus semper fuerit repu-  
tatus tanquam bonus catholicus: sed

G 3

postu-

postulavit duntaxat absolvi in foro conscientie de culpa ex illo joco minus utique laudabili contracta : atqui in foro conscientie non fuit noxius hæreseos, neque incurrit excommunicationem vel reservationem : ergo malè fecit confessarius eundem sine absolutione dimittendo ad alium. Profecto juxta communissimam Doctorum, ut quis in foro externo seu facie Ecclesie incurrat culpam vel poenam hæreticorum, omnino necessum est, ut hæresin mente conceptam exterius clarè & distinctè manifestet : atqui per allegata verba Titius non satis manifestavit hæresin mente conceptam ; etenim dicendo quòd velit amplecti fidem Lutheranam, non eò ipso dicendus est asseruisse, se actu credere, quod Lutherani credunt, vel actu esse talem : quemadmodum is, qui dicit se velle amplecti statum Religiosum, nondum intelligitur actu esse Religiosus, Esto insuper dixerit, fidem Catholicam jam pridem sibi displicuisse, proptereaue cuiuspiam potuisset videri suspectus de hæresi ; nihilominus si rem velimus maturius perpendere, deprehendimus, quòd hæc verba non clarè significant, seu manifestent hæresin, nam & Catholico potest displicere fides, non quidem simpliciter, vel quasi suspecta de veritate, sed quia post se trahit diversa onera, utputa jejunium Ecclesiasticum, abstinentiam à carnibus, confessionem  
auri-

auricularem & similia. Cum proin aliunde constet in dubio potius in mitiorem partem inclinandum esse, Reoque favendum, vel ut dicitur *c. 49. de R. J. in 6to: in pœnis benignior interpretatio est facienda*; hinc dicendum, quod Titius ne quidem in foro externo fuerit habendus pro hæretico vel excommunicato. Videatur de hoc Filliucius *tr. 22. n. 185.* Vel Reiffenstuel *cit. dist. 4. n. 12.*

## CASUS SECUNDUS.

**S**empronius homo cateroquin satis prudens, nec de infima plebe unâcum filio suo duodenni venit ad quendam Parochum Catholicum, postulans ab eodem amplius erudiri & imbui dogmatibus Catholicis; fatetur autem candidè jam pridem sibi præplacuisse fidem Catholicam, nihilominus tamen hæctenus semper perseverâsse in sua secta Lutherana, eò quod de nonnullis articulis fidei nostræ nondum fuerit satis convictus, præsertim de existentia purgatorii, de invocatione Sanctorum, de reali præsentia Christi in Sacramento Eucharistiæ, & denique de communione sub una tantum specie laicis danda &c. Quæritur jam 1. an Sempronius censendus sit hæreticus formalis? 2. an nedum ipse, sed etiam filius duodennis debuerint, aut potuerint à R. D. Parcho absolvi ab excommunicatione in hæreticos lata? Quid iudicii?

G 4

R. ad

91.

R. ad primum quæsitum, Sempronium probabilius nedum infidelem, sed & hæreticum formalem hætenus fuisse; enimvero ad hanc incurrendam minimè opus est, ut quis de veritatibus fidei Catholicæ jam sit plenè convictus, sed sufficit, eas fuisse sufficienter propositas & agnitas; ita scilicet, ut perpensis omnibus credibilitatis notis non ampliùs relinquatur dubium prudens: hoc autem probabilius contigit respectu Sempronii. Nihilominus ad plenius dignoscendum peccatum infidelitatis, vel potiùs hæresis formalis, juvabit ulteriùs Sempronium examinare 1. utrum agnoverit obligationem inquirendi omnimodam fidei veritatem; 2. an studuerit etiam illam addiscere? 3. an fuerit etiam paratus eam amplecti, quàmprimùm hæc sibi fuerit satis proposita? Si dicat, se non apprehendisse hanc obligationem, vel ea quidem apprehensa studuisse deprehendere omnimodam veritatem, non tamen habuisse hominem, à quo erudiretur, & præsertim si fuit semper paratus corrigi post sufficientem informationem, habendus erit pro hæretico merè materiali, per consequens nedum ipse, sed etiam filius duodennis (de quo faciliùs prælumi potest, errasse inculpabiliter, & hætenus defectu sufficientis iudicii fuisse hæreticum merè materiale) tuta conscientia posset absolvi à

R. D.

R. D. Parocho, imò à quolibet Sacerdote approbato, nisi quid aliud exigat consuetudo Diœceleos, prout sapienter limitat Laymann *lib. 2. tract. 1. c. 13. n. 4.* Ratio est: quia ex hac suppositione non fuissent hæretici formales, consequenter nec obnoxii aut irretiti vinculo excommunicationis. Ex quo patet quid ad 2dam partem quæsitæ sit respondendum.

At verò, si Sempronius fateatur, se quidem apprehendisse obligationem indagandi veritatem, imò sæpius disceptasse cum Catholicis rem intelligentibus, noluisse tamen acquiescere, quousque plenariè *convinceretur* circa articulos in casu relato specificatos, tametsi non ignoraverit ab Ecclesia Romano-Catholica contrarium doceri, præsumendus erit hæreticus formalis, proindeque minimè præsumendum à quocunque demum Sacerdote non gaudente potestate absolvendi ab hæresi, ut talem absolvat, præsertim in hisce partibus nostris, ubi consuetudine jam antiquata receptum fuit, ut A catholici revertentes ad ovile & gremium S. Matris Ecclesiæ, non nisi ab habentibus Auctoritatem publicam, vel specialem potestatem à Reverendissimo Ordinario, vel ipso Summo Pontifice Romæ obtentam, ab hæresi absolvantur, & Communioni fidelium restituantur. Videantur de hoc Sanchez *lib. 2. in Decalog. c. 7.*

n. 29. Sporer *tr. 2. Decalog. c. 3. n. 16.*  
 Vel Babenstuber *tract. 5. disp. 1. art. 2.*  
*num. 3.*

Sed quid iudicii (inquies) formandum de illo, qui à Patre Catholico, Matre verò Acatholica natus & educatus, posteaquam usum rationis videbatur adeptus, de sua fide examinatus respondit, se credere id, quod sui Parentes credunt?

93. R. Concludendum est de tali, quòd sit vel stultus, vel certè idiota & simplex homo; nam si scivit, Parentes suos credere articulos sibi contradictorios, utputa dari purgatorium, & non dari, solam fidem in Christum & non solam fidem justificare, item bona opera justorum esse meritoria (uti Pater Catholicus) & non esse meritoria (uti Mater Acatholica) sibi persuasum habet; si, inquam similia scivit, non potuit prudenter credere utrumque, ut de se facile liquet: Si autem ignoravit, quidnam Pater credat, & quidnam Mater, vel in quo fides unius differat à fide alterius, habendus est potius pro simplici, Idiota, & hæretico materiali, quàm pro formali, ac proin absolvi potest à quolibet Confessario, modò paratus sit soli Patri, vel potius soli fidei Catholicæ deinceps acquiescere.

CA-



## CASUS TERTIUS.

**C**Ajus Subdiaconus fatetur se novissimè recitando Breviarium pro Festo S. Ursulæ incidisse in illam historiam, quòd omnes consodales Sanctæ Ursulæ fuerint Virgines, seu, ut habet Breviarium in terminis, agmen Virgineum, proptereaque vehementer dubitasse, an inter tot (undecim mille scilicet) omnes fuerint Virgines, tandèmq. post maturam & multam deliberationem ita conclusisse, se scilicet hoc nunquam crediturum, tametsi Summus Pontifex ex Cathedra id ipsum definiret: nihilo secius (subjungit idem Cajus) si in hoc quamcumque demum culpam infidelitatis incurrissem; jam hujus pœnitens factus me desuper aceuso, adpromittoque, quòd circa hoc dubium deinceps meum judicium velim suspendere. Jam ad nostrum propositum circa hanc facti speciem dubitare licet 1. an Cajus peccatum infidelitatis vel hæreseos inciderit deliberatè dubitando, an omnes S. Ursulæ consodales fuerint Virgines, prout Breviarium Romanum innuit? 2. Quid judicii de eo, quòd asseruerit, sed id nunquam crediturum, tametsi S. Pontifex hoc ex Cathedra credendum proponeret? 3. An præcepta Fidei satisfaciat per hoc, quòd modò pœnitens dicat, se circa hoc dubium deinceps suspensurum suum judicium?

¶ Ad

94. R. Ad primum punctum hujus Casus, Cajum ex eo præcisè, quòd dubitaverit, an integrum agmen S. Ursulæ fuerit Virgineum; imò & negaverit, omnes fuisse Virgines, non incidisse peccatum infidelitatis neque hæreseos. Ratio est: quia S. Mater Ecclesia non omnia, quæ in Breviario continentur, præsertim quoad Legendas seu vitas Sanctorum, velut de fide infallibiliter credenda proponit, sed potius legenda velut verosimilia fide humana duntaxat credenda, & imitanda: & certè multa, quæ in Breviario continentur, ab aliis Catholicis Auctoribus in dubium revocantur prout videre licet apud Mr. Godeau *Tom. 2. Hist. Ecclesiast. ad Annum Christi 324. lib. 4. §. 17. Eusebium Casariensem & alios;*

Nec refert, quòd cuiquam fortassis videri posset, ne quidem verosimile, quòd omnes ex Sodalitio S. Ursulæ fuerint Virgines; nam potuerunt esse & haberi Virgines saltem in facie Ecclesiæ, quidquid demum sit de hoc, an etiam omnes ac singulæ fuerint tales mente & corpore: hoc enim in lectionibus ab Ecclesia ad orandum præscriptis nullatenus continetur.

95. R. Jam ad 2dum dubium, Cajum nedum incidisse peccatum infidelitatis, sed etiam saltem per se loquendo pœnam Excommunicationis in hæreticos latæ, ex eo, quòd

quòd protestatus sit, se hoc nunquam crediturum, tametsi S. Pontifex è Cathedra idipsum definiret.

Ratio est: quia per hoc satis innuit, se non credere infallibilitatem Ecclesiæ, seu etiam Pontificis è Cathedra loquentis in materia fidei, ideoque suum iudicium pertinaciter præferre iudicio Ecclesiæ, minimè paratus ab ea corrigi: quod propriè hæreticorum est. Neque verò ea duntaxat credere tenemur, quæ Pontifex universali Ecclesiæ in individuo velut de fide credenda proponit, sed insuper hoc, quod nihil à parte rei non verum possit è Cathedra velut fide Divina credendum proponere, & proponendo errare. Hac de causa Sanchez *lib. 2. in decalog. c. 7. n. 30.* Filliucius *tract. 22. n. 177.* Herincx noster *disp. 9. n. 26.* aliique plures rectè docent, eum, qui falsò existimat, Ecclesiam aliquid velut de fide credendum definivisse; vel, qui tam pertinaciter adhæret alicui opinioni, quam existimat esse fide Divina credendum &c. ut, etiamsi Ecclesia contrarium decerneret, tamen non esset paratus acquiescere huiusmodi decisione, habendum fore pro hæretico formali excommunicationi in hæreticos latæ obnoxio.

¶ Jam ad 3tium dubium cum distinctione. Si enim iudicium suum Cajus suspens-

96.

spendat de hoc, an omnes fuerint Virgines à parte rei? &c. non impingit in præcepta fidei; quia secundum dicta n. 94. non jubemur hoc credere fide Divina: at verò si animo supponatur ita comparatus, ut vellet suum iudicium suspendere, tametsi Ecclesia vel Summus Pontifex hoc definiret ex Cathedra tanquam fidei articulum &c. minimè satisfaciet præcepto fidei, sed potius habendus erit pro hæretico; non quidem ex eo præcisè capite, quòd suum iudicium suspendat, sed quia hanc suspensionem iudicii contestando satis manifestat, se non credere Ecclesiam, vel S. Pontificem è Cathedra loquentem infallibilem, aut suo dignum assensu. Adde insuper, quòd secundum dicta n. 23. quilibet fidelium teneatur præbere positivum assensum mysteriis fidei ab Ecclesia ad credendum satis propositis: atqui per declarationem Summi Pontificis è Cathedra loquentis (seu, quòd idem est: universali Ecclesiæ aliquid velut honestum &c. vel etiam ut à Deo revelatum proponentis &c.) satis censentur proposita huiusmodi mysteria, modò talis locutio fidelibus innotescat: ergo quisquis se pertinaciter opponit, nolens audire Ecclesiam &c. habendus est pro infideli, imò pro hæretico.

## §. III.

## Corollaria ex dictis inferenda.

**C**olliges ex hæcenus dictis primò: ne- 97.  
dum esse possibiles, sed probabilius  
hodieum reperiri multos hæreticos me-  
rùm materialiter tales: imò tales meritò  
præsumuntur illi, qui, sive à Catholico, si-  
ve etiam ab hæretico ministro baptizati,  
postea inter infideles, aut etiam hæreticos  
educantur; apud quos de fide nostra seu  
Religione Romano-Catholica vel nihil, vel  
non nisi diffamatoria, nefanda & abomi-  
nanda audiunt, utputa Papam esse Anti-  
christum, Bestiam, à Catholicis pro  
Deo cultam, & nos omnes esse idolola-  
tras &c.

Ratio est: quia infidelitas formalis de-  
bet esse voluntaria, conjuncta cum perti-  
nacia post veritatem satis agnitam: at, ho-  
mines hujus infaustæ sortis nunquam sa-  
tis agnoverunt fidei Catholicæ veritatem,  
quippe quæ iisdem nunquam supponitur  
fuisse proposita: ergo non possunt dici  
hæretici formales. Ex quo rectè infert  
*Laymann lib. 2. tract. 1. c. 12. circa fin.*  
fieri posse, ut hujusmodi homines, utpote  
ignorantia invincibili laborantes, habitum  
fidel

fidei in baptismo sibi infusum retineant, simulque illa mysteria ad salutem necessaria, scilicet SS. Trinitatis, Incarnationis, Passionis &c. nobiscum velut communia credentes salvi fiant. Videatur Doct. cit.

98.

Colliges 2dò, vincibilem ignorantiam, etiam crassam posse subinde excusare à pertinacia, & consequenter ab hæresi formali, modò (quod bene notandum) taliter errans paratus sit corrigi, & aliter sentire, casu quo fuerit melius instructus in fundamentis fidei. Ita Herincx noster *part. 3. tit. 1. disp. 9. n. 20.* Ratio est: quia etiam vincibiliter errans potest esse animo ita affectus, ut velit credere, quidquid noverit à Deo revelatum, & ab Ecclesia propositum ut tale, quam primum sibi fuerit ut tale satis propositum: imò verò talis potest credere, & actu credit veritatem, circa quam errat, cum non habeat voluntatem pertinaciter renuentem credere, quidquid velut à Deo revelatum noverit. Hac de causa superius *Confer. 1. n. 34.* diximus, in mortis articulo absolvi potuisse illam personam emigrantem, quæ probabilius laboravit ignorantia vincibili, utpote educata in patria Catholica, simulque videbatur pertinax ita, ut nihil voluerit audire de purgatorio &c. his enim non obstantibus potuit contingere, ut de similibus nunquam satis fuerit instructa, licet ex  
pro-

propria culpa : & quia simul institit evidens periculum animæ , casu quo non obtinisset beneficium absolutionis , hinc sub conditione saltem potuit absolvi.

Colliges 3tio, cum qui negat aliquam 99. veritatem , quam certò agnoscit à Deo , licet privatim sibi revelatam , habendum esse pro hæretico formali. Ita Sanchez *lib. 2. in Decalog. c. 7. n. 32.* Castropalao *tr. 4. disp. 3. pu. 2. n. 14.* Laymann *lib. 2. tr. 1. c. 13. num. 6.* Sporer *ubi supra c. 3. Sect. 2. n. 19.* licet hi duo posteriores existiment , talem in rigore loquendo non esse hæreticum , nec obnoxium pœnis in hæreticos latis , eò quòd negando aliquam veritatem privatim sibi revelatam non se opponat pertinaciter alicui dogmati ab universali Ecclesia proposito & acceptato. Ratio autem nostræ resolutionis mox datæ hæc est : quia quisquis negat verum esse id , quod à Deo revelatum esse certò agnoscit , ipso factò convincitur negare summam & infinitam Dei veracitatem : sed qui hanc negat , negat unum è principalioribus Fidei articulis , ab universali Ecclesia receptum : ergo nedum infidelis , sed etiam hæreticus formalis dici meretur. Nec dici valet , quòd talis homo non neget Deum esse summè veracem , sed neget duntaxat , suam revelationem fuisse à Deo summè veraci factam ; supponi enim debet in hoc dubio , *R. P. Elbel. Pars II. de Fide &c.* H quòd

quòd talis homo certitudinaliter agnoscat revelationem fuisse à Deo factam ; secus quippe non posset mysterio revelato præbere assensum fidei, prout dictum fuit supra *Confer. 1. n. 41.* atqui revelationem certitudinaliter agnitam prudenter negare non potest : ergo convincitur negare ipsam Dei veracitatem, & per consequens esse hæreticus formalis.

100. Colliges 4to, idemnet judicium esse formandum de iis, qui decisiones è Cathedra in materia fidei & morum à Summis Pontificibus factas v. g. circa propositiones damnatas, vel canonizationem Sanctorum aut beatificationem &c nolunt admittere in eo sensu, quò proponuntur ab Ecclesia. Ita *Viva in quest. prodroma ad Thes. damnat. n. 18.* La Croix *lib. 1. n. 202.* Malderus *q. 11. de fide art. 1. membr. 5.* S. Antoninus *3. part tit 12. c. 8. §. 2.* Matthæucci *in Cautel. Confess. lib. 3. cap. 3. n. 103* & noster P. Cherubinus Mayr *in suo Trismegisto dist. 1. c. 3. n. 93.* Ratio est : quia Ecclesia semper censuit, Summum Pontificem in materia fidei ac morum è Cathedra (id est, pro universali Ecclesia infallibiliter tenendum) aliquid proponentem, loqui velut Organum Spiritus Sancti, & ex hujus infallibili assistentia Ecclesiæ promissa : at, qui contradicit universali Ecclesiæ, habendus est velut hæreticus ; non enim vult au-  
dire



dire Ecclesiam, imò nec ipsum Spiritum Sanctum, cui se pertinaciter opponit: ergo &c. Et hac, aliisque pluribus rationibus præter jam allegatos DD. noster A. R. P. Kazenberger in *Supplem. I. Conferent. P. Sargar. Confer. 23.* & Pichler in *sua Theolog. Polem. part. 1. cap. 4. art. 2. n. 14. & art. 3. n. 11.* tenent, pariter illos, qui negant modernum Pontificem, utpote ab universalis Ecclesia propositum & agnitum, esse legitimum Christi Vicarium in terris, item qui negant, illum in materia fidei & morum è Cathedra loquentem, esse infallibilem, habendos esse pro hæreticis; enimverò si è Cathedra loquens posset errare in materia fidei & morum, utpote approbando turpia vel reprobando honesta &c. tunc etiam posset errare, imò actu erraret universalis Ecclesia credendo talia tanquam de fide: atqui hoc posterius nullatenus dici valet, secus enim Ecclesia non amplius esset *columna & firmamentum veritatis*, ut eam appellat Apostolus 1. *Timoth. 3.* Et *porti inferi* adversus eam jam actu prævaluissent, contra infallibilem Christi promissionem Ecclesiæ factam *Matth 16. v. 18.* ergo quisquis pertinaciter hoc negat, convincitur esse hæreticus formalis.

Diximus tamen notanter: qui nolunt 101.  
admittere *decisiones in eo sensu, quò proponuntur ab Ecclesia.* Pro cuius ampliori no-

H 2

titia

titia præsertim propositiones damnatas concernente sciendum est, non omnes propositiones eò ipso quòd damnatæ sint, habendas esse velut hæreticas, sed pro diversa exigentia materiarum diversis censuris fuisse affectas, prout ex Bullis SS. Pontificum (videndis apud Reiffenstuel in frontispicio, & apud La Croix) constat: aliæ enim damnantur velut *hæretica*, id est, formaliter oppositæ alicui articulo fidei: aliæ ut *suspecta de hæresi*, quæ scilicet ex circumstantiis videntur innuere seu etiam continere latentem hæresin: aliæ *hæresi proxima*, id est tales, quæ à plerisque habentur velut contrariæ fidei saltem indirectè & deductivæ: aliæ ut *Scandalosa*, id est, præbentes occasionem ruinæ spiritualis: aliæ *laxa*, quæ in materia morum nimis relaxant fræna libertati: *alia temeraria*; quæ vel nullo, vel levi & inani fundamento nituntur: aliæ autem ut *temeraria*, quæ scilicet nullam pro se verè gravem, contra se verò gravissimas habent rationes &c. aliæ *erroneæ*, id est, contradicentes conclusioni Theologicæ deductæ ex duabus præmissis, quarum una est de fide, altera verò evidens. Aliæ rursus damnantur velut *blasphema*, id est, continentes verbum contumeliosum contra Deum, B. Virginem, vel alios Sanctos &c. Vel *impia*, id est, repugnantes cultui DEO, B. Virgini vel

vel aliis Sanctis debito &c. Dicimus itaque omnes fideles teneri ad acceptandas seu etiam profitendas propositiones ab Ecclesia damnatas in eo sensu, quò damnatæ fuere scilicet hæreticas, ut hæreticas, scandalosas, ut scandalosas &c. secus enim contradicendo S. Pontifici è Cathedra loquenti, imò & Ecclesiæ universali, præter notam hæreseos incurrerent peccatum mortale, imò & excommunicationem latæ sententiæ, prout cernere licet ex Bullis Summorum Pontificum, & ex communi DD. tradit La Croix *lib 1. n. 225. & 226.*

At, inquires adhuc quid tenendum de illis, qui negant Summum Pontificem esse suprâ Concilium, id est, majoris potestatis vel Auctoritatis, quàm Concilium universale?

R. Etiam tales habendos esse pro hæreticis 102. nedum asserunt, sed & mordicus defendunt Matthæucci, Kazenberger, & Pichler *locis mox suprâ cit.* quin imò hanc veritatem à diversis Conciliis, scil. Nicæno I. *can. 39.* Calcedonensi, Lateranensi, Sinuessano &c. fuisse decisam, satis clarè demonstrat idem R. P. Pichler *l. c. art. 2. n. 16.*

Placet nihilominus quoad hoc judicium nostri V. P. Cherubini Mayr, *loc. cit. num. 98.* respondentis cum distinctione, scilicet, quòd illi habendi sint pro hæreticis, qui pu-

tant Concilium esse suprà Papam ita, ut possit revocare, vel etiam immutare decreta fidei priùs ab eodem condita; quia tales revera negant infallibilitatem S. Pontificis &c. illos è contra, qui solum afferunt, Pontificem Concilio subesse quoad disquisitionem factorum Personalium, non attingentium ipsam fidei vel morum doctrinam; probabiliter non esse hæreticos; eò quòd oppositum hujus asserti non sit expresse definitum: hoc ipsum tamen assertum esse erroneum, vel saltem errori proximum, temerarium & scandalosum, utpote parum distans ab illa propositione per Alexandrum VIII. damnata ordine 29, *futiles, & torres convulsa est assertio de Pontificis Romani suprà Concilium Oecumenicum Auctoritate, atque in fidei quæstionibus decernendis infallibilitate.*


103. Colliges 5to, Fidem habitualement seu habitum fidei supernaturalis non amitti per quodcunque peccatum contra fidem. Ratio est: quia culpabiliter ignorans mysteria fidei, vel exponens se periculo incidendi hæresin, esto hanc non incidat, peccat contra præceptum fidei: id ipsum tenendum est de eo, qui fidem exterius sive ex timore sive ex alio motivo humano negat, quam tamen in mente firmissimè retinet: at, hi omnes non amittunt habitum fidei, hic enim solum deperditur propter periculum in-

infidelitatis positivæ, id est, per errorem positivum fidei contrarium. Vid. Herincx ubi suprâ *disp. 9. num. 29.* Lugo *disp. 17. sect. 5. num. 28.* Vel Babenstuber *tr. 5. disp. 1. art. 2. n. 2.*


Colliges denique 6tò, infideles quoscunque, sive hæretici materiales sive formales exstiterint, priusquam ad fidei professionem vel ad Confessionem admittantur; esse bene instruendos & examinandos de necessariis tum ad salutem, tum præsertim ad Sacramentum Pœnitentiæ. Ita bene monet Laymann *lib. 2. tract. 1. cap. 13. n. 4.* Ratio est: quia meritò timendum, ne, si secus fiat, multi vel ficti, vel certe minus instructi accedant, quo fiet, ut multi inconstantes vel dubitantes in fide Catholica diuturno tempore permaneant, vel aperte etiam ad pristinos errores revertantur. Quare ante omnia Confessarius quærat ex ejusmodi conversis, vel converti volentibus, & primò consentientibus, utrum firmiter, & ex animo quidem, seu toto corde credant ea, quæ Sancta Mater Ecclesia Romano-Catholica credenda proponit, & utrum in hac fide semper perseverare, ac mori parati sint? Ita Laymann *loc. cit.* Singulariter insuper, quamprimum veniunt postulantes instrui in Fide Catholica, examinandos esse arbitror, quæ

104.

sine, vel quibus motivis ducti cogitent  
suam deferere sectam: sæpe sæpius enim al-  
legare solent motiva nullius prorsus mo-  
menti, vel vana, reipsa nil aliud intenden-  
tes, quàm ut sibi necessaria quoad victum  
& vestitum præstentur aut procurentur:  
cautè proin cum similibus procedendum  
est, prout sapienter monet noster A. R. P.  
Kazenberger in *Supplemento I. Conferent*  
*P. Sargar confer. 33. n. 33.* nec dicendum  
aliquid vel faciendum à Confessario, quod  
is dictum aut factum nolle, casu quo hu-  
jusmodi conversus ad vomitum  
rediret &c. &c.



CON-



# CONFERENTIA QUARTA.

De Communicatione fidelium cum infidelibus, & de  
lectione librorum hæretico-  
rum.

## SUMMARIUM.

- 105. Quænam communicatio cum infidelibus seu non baptizatis fidelibus sit prohibita ?
- 106. Quænam sit prohibita fidelibus cum Judæis ?
- 107. An Judæi à Principibus Christianis sint tolerandi inter fideles ?
- 108. Quænam communicatio cum hæreticis sit interdicta fidelibus ?
- 109. Sintne hæretici inter Catholicos tolerandi ?
- 110. An fidelibus permittendum, ut famulentur hæreticis ?
- 111. Fidelibus simpliciter, & justissimè quidem fuit sub pœna excommunicationis latæ Sententiæ prohibitum 1. legere libros hæreticos. 2. eos retinere. 3. eos imprimere, vel 4. eosdem quovis modò defendere.
- 112. Nihilominus ad hanc excommunicationem ratione lecturæ incurrendam sex conditiones interveniant, necessum est.

113. Quanam quantitas materiæ ratione lecturæ censeatur gravis, vel non gravis?
114. Quidnam requiratur ad incurrendam hanc censuram præcisè ratione retentionis?
115. Quinam veniant nomine imprimentium;  
&
116. Quinam nomine defendentium librum hæreticum?
117. Præter libros hæreticos in Bulla Cœnæ prohibitos insuper exstant permulti alii libri in Indice Romano prohibiti;
118. Qui index hodie communiter dividi solet in tres classes.
119. Quarum lectio sub diversis pœnis fuit prohibita.
120. An, vel qualiter obligent pœnæ tum in Bulla Cœnæ, tum etiam in præfato indice Romano latæ contra legentes hujusmodi libros?
121. Resolvitur Casus I. cujusdam Uxoratæ, quæ ignoranter sortita fuit Maritum hæresi Lutherana infectum.
122. Proptereaque dubitat, an non teneatur illum denunciare Reverendissimo Officio, eò quòd multos libros hæreticos in suo tugurio teneat absconditos, & ex iisdem nitatur etiam proles subvertere.
123. Quid consilii huic mulieri à Confessario sit suggerendum?
124. Resolvitur Casus II. cujusdam Bibliopegæ Catholici, dubitantis, an non peccet compingendo libros hæreticos.
125. Quid, si tales libros diu penes se retineat, prius, quàm illos compingat.
126. An Civis Catholicus, qui præter omnem expectationem coactus fuit acceptare præfatos libros hæreticos in compensationem debiti,

tuta



tuta conscientia potuerit eosdem alteri vendere?

127. Resolvitur Casus III. Cujusdam personæ Catholicæ, quæ ob evitandum periculum gravis infamiae cogebatur sæpius cuidam Rustico illiterato & hæresi Lutherana infecto prælegere Biblia Lutheri, & alios libros hæreticos.

128. An, vel quomodo propterea peccaverit?

129. An comitando eundem Rusticum sponte emigrantem peccaverit, vel excommunicationem inciderit?

130. An paulò post reversa in suam patriam indiguerit absolutione ab excommunicatione Bullæ Cœnæ?

131. Non omnis, qui legit librum hæreticum, illico habendus est pro excommunicato.

132. Qui in authore aliunde sibi ignoto reperit unam alteramve hæresin, tenetur inquirere, sitne Catholicus vel hæreticus, & interim ab ulteriori lectione abstinere.

133. Legens controversias hoc tempore agitari solitas, & ab auctore Catholico scriptas, laude potius, quam vituperio dignus videtur.

134. Legens librum hæreticum in eodem volumine cum auctore seu etiam antagonista Catholico compactum, incurrit censuram Bullæ Cœnæ.

135. Legens quemcumque librum perniciosum, esto non hæreticum, per se loquendo peccat.

136. Et quid tenendum de legentibus Sacra Biblia?

## §. I.

**Proponuntur & breviter resolvuntur quæsitæ scitu necessaria ad debitè resolvendos Casus practicos de Communicatione cum infidelibus, & lectione librorum hæreticorum &c.**

**Q**Uæres primò, an vel qualis Communicatio Fidelibus cum Infidelibus sit prohibita?

105. **R.** Jure naturæ & Divino prohibitum est fidelibus communicare cum infidelibus, id est, non baptizatis, in ipsorum cultu seu ritibus superstitionis, utpotè intrinsecè malis. Eodem jure 2. interdicta censerì debet omnis communicatio, ex qua fidei imminet periculum subversionis. 3. Eodem jure D. fidei prohibetur inire connubium cum infideli, prout innuit Apostolus 2. Cor. 6. 4. Insuper jure Ecclesiastico fidelibus prohibetur admittere infidelem ad participationem aliorum Sacramentorum, imò etiam ad SS. Missæ Sacrificium *per can. Episcopus 67. de consecrat. dist. 1.* Denique 5to, jure Ecclesiastico per X 1. *inter com. de Judais*, nec non per Bullam Cœnæ §. 7. interdicitur fidelibus sub pœna excommunicationis latæ Sent. Summo Pontifici reservatæ, ne infidelibus ceu hostibus Christiani

ni nominis arma, aliave belli instrumenta & materialia deferant, aut vendant, nevé in Christianorum perniciem & damnum ipsos Turcas & Christiana Religionis inimicos, nec non hæreticos in damnum Catholica Religionis certiores faciant, illisque ad id auxilium, consilium vel favorem quomodolibet præstent. Videantur de hoc Palao tract. 4. disp. 2. pu. 9. Sanchez lib. 2. mor. cap. 31. Schmalzgrueber ad Tit. de Judais, vel Babenstuber tr. 5. disp. 1. art. 2. n. 14.

Quæres 2dò, quænam Communicatio fidelibus cum Judæis sit interdicta?

R. Præter illam in Divinis, vel cum periculo subversionis (quam jure naturæ ac Divino interdictam diximus) insuper jure Ecclesiastico cap. Judai, & alibi sæpiùs prohibetur fidelibus familiaritas cum Judæis. Præterea interdicuntur sequentes modi communicandi cum ipsis 1. cum eis habitare, in eadem scilicet domo. 2. Judæum Medicum adhibere vel ejus operâ uti. 3. Ab iisdem præparatas medicinas recipere (quæ tamen intelligi debent extra casum necessitatis, quo lex Ecclesiastica non obligat. 4. Eorum azyma comedere vel 5. eidem cum iisdem convivio interesse, aut 6. eodem balneo uti (scilicet ex condicção; nam secus dicendum, sit fidelis cum Judæo per accidens & præter intentionem in eodem hospitio aut balneo conveniat) 7. Nefas itidem

106.

dem est in eorum domibus agere nutricem infantium, vel 8. agere famulum, aut 9. iisdem servitute subjici. 10. Non licet ipsis in Testamento legata relinquere, neque 11. publica officia inter Christianos iisdem committere.

Ratio horum est: quia ex his & similibus timendum est periculum subversionis, aut certè dignitas Christianæ Religionis quodammodo vilipenderetur. Cæterum si caveatur familiaritas, haudquaquam nefas erit suas operas Judæo sive in sive extra domum locare, modò Judæus non supponatur assidue præsens: insuper non prohibetur cum iisdem negotiari, modò præcindatur à familiaritate, uti jam dictum. Vid. Palao tr. 4. disp. 2. punct. 9. n. 6. & seqq. Sanchez ubi suprà num. 13. & seqq. Filiuc. tr. 22. c. 5. à n. 126. Tamburin. lib. 2. decal. c. 1. §. 10. n. 6.

Quæres 3tio, an Judæi inter fideles sint tolerandi à Principibus Christianis?

107. R. Possunt Principes Christiani in suis territoriis tolerare Judæos, eisdemque permittere, ut suas Synagogas restaurent, non autem novas ædificent. Ita Cap. consuluit de Judæis. Item possunt iisdem permittere, ut titus Judaicos exercent, libros edant, quibus Vetus Testamentum exponitur, non autem quibus Christiana Fides oppugnatur, Ita S. Thomas q. 10. art. 11. S. August. lib.

*lib. 18. de civit. c. 46.* quos refert, & sequitur Laymann *lib. 2. tr. 1. c. 17. n. 5.*

Ratio est: quia ritus Judaici evangelicam veritatem figurâ abumbrant, eidemque Testimonium præbent, quæ causa est, cur Deus Gentem Judaicam non penitus deleri voluerit, sed tanquam veritatis ac justitiæ exemplum toto orbe dispergi: convenit proin (inquit Laymann *loc. cit.*) Judæos tali immunitate gaudere: tametsi hodie plures existent Principes Catholici, qui justissimas ob causas coegere Judæos suis exulare territorii.

Quæres 4to, qualis Communicatio fidelibus cum hæreticis sit interdicta?

¶ *¶.* Nedum jure naturali & Divino, verum insuper humano nefas est communicare cum hæreticis vel 1. in crimine hæreseos, utputa credendo, favendo, recipiendo aut defendendo; vel 2. in profanis eorum sacris seu ritibus ac ceremoniis propriis. Ita ex *communi DD. Sporer tract. 2. in decalog. c. 3. sect. 3. aff. 4.* Ratio est: quia quicumque consentit, vel quomodolibet favet peccanti mortaliter in causa peccati, vel se exponit evidenti periculo salutis æternæ, peccat mortaliter: at, hoc facit, quisquis communicat cum hæreticis in crimine hæreseos, sive credendo, id est, eorum erroribus assentiendo; sive favendo, id est, favorem ad liberius diffundendum venenum hæreseos sub quocunque demum præ-

108 .

tex-

textu, etiam necessitatis &c. præstando, sive eos recipiendo, id est, domo seu hospitio illos excipiendo, ne ob hæresin capiantur vel puniantur &c. sive denique defendendo, id est, in vel extra judicium assistendo, ut evadant in hac causa. Qui vero cum periculo perversionis communicat cum hæreticis, in eorum Sacris præsertim, utputa cum iisdem cantando, vel Communionem profanam participando, infantem ad baptismum offerendo, vel denique matrimonium coram ministro hæretico contrahendo &c. præter injuriam Religioni Catholicæ illatam insuper se procul dubio exponit evidenti periculo subversionis & æternæ salutis: ergo tales peccant mortaliter saltem per se loquendo, nisi scilicet eos excuset ignorantia, simplicitas, vel etiam levitas animi.

Quæres 5to, Sintne hæretici inter Catholicos tolerandi?

109. R. Neque hæretici, neque ipsorum exercitia in territoriis Catholicorum Principum toleranda sunt, nisi omnibus perpensis id necessum sit vel ob pacis fœdera, vel ad majora mala in Republica impedienda, vel ad majus bonum, utputa conversionis &c. promovendum. Ita post Div. Thomam, Cajetanum, Valent. Becanum & alios plures Laymann *prox. cit. c. 17. n. 4.* & fusissimè nec minùs fundatè P. Reiffenstuel *l. 5.*

*decret.*

*decret. tit. 7. §. 4.* ubi id à n. 139. & seqq. probat nedum auctoritate SS. Canonum verum etiam rationibus ; tum scilicet quia hæresis nedum summè injuriosa est Deo, verum etiam quia ex cohabitatione cum hæreticis fidelibus imminet majus periculum scandali & subversionis, quàm ex cohabitatione cum Judæis vel paganis ; tum etiam quia pax & tranquillitas publica id exigunt summopere ; ubi enim animarum & fidei dissensio reperitur, ibi vera & firma pax vel concordia stare non potest, uti bene advertit S. Ambrosius 3. *offic.* ubi ait ; *vix firma esse possunt pacis jura, inter quos est fidei bellum.* id, quod experientia passim oculis oberrans hisce temporibus comprobatur.

Quæres 6tò, sitnè fidelibus prohibita communicatio cum hæreticis in famulatio, eisdem scilicet serviendo, vel propriam operam locando ?

2. Talis communicatio certè non licet, 110. casu quo famulus aut famula ex hujusmodi servitio advertit sibi imminere periculum subversionis. Et dato etiam, quòd non habeat timere hoc periculum, si tamen propterea frequenter vel omnino regulariter impediatur in observatione præceptorum Ecclesiasticorum, ut si debeat diebus vetitis comedere carnes, diebus festivis laborare serviliter, vel negligere Missæ. *R. P. Elbel. Pars II. de Fide &c.* I sam

sam &c. hujusmodi servitium per se loquendo est illicitum, & hoc ipsô à Confessario interdicendum, nisi scilicet excuset notabile incommodum. Ita Navarrus, Bonacina, Laymann, la Croix *lib. 2. n. 102.* & fusissimè Gobat in *Quin. tr. 5. c. 33. a n. 93.* & in *Theol. experim. tr. 5. a n. 319.* Ratio hujus resolutionis est, quia præcepta Ecclesiæ ad sui observantiam obligant, nisi excuset grave damnum: tunc autem esset grave damnum respectu talis famuli aut famulæ, si vel deberet amittere suum salarium, vel non posset invenire dominum Catholicum, à quo acciperet ultra dimidium illius, quod ab hæretico accipit. Videantur *DD. cit.*

Quæres 7ptimò, sitnè fidelibus permis-  
sum legere libros hæreticos?

- III. R. Nequaquam; enimverò in Bullæ Cœ-  
næ §. 1. ipsô facto excommunicationi sub-  
jiciuntur omnes, qui *hæreticorum libros, hæ-  
resin continentes, vel de Religione tractantes  
sine auctoritate Sedis Apostolicæ scienter le-  
gunt, aut retinent, imprimunt, seu quomodo-  
libet defendunt, ex quavis causa, publicè vel  
occultè, quòvis ingenio vel colore &c.* Ex  
quo liquet, vi hujus constitutionis fidelibus  
severissimè interdicti hæc quatuor scilicet 1.  
legere. 2. retinere. 3. imprimere, vel 4. de-  
fendere libros hæreticos. Verùm pro plen-  
iori horum intellectu.

No-



Notandum hic venit, ad incurrendam hanc censuram ratione lectionis à Doctōribus communiter desiderari sex conditiones. 112.  
Primò scilicet, ut talis liber legatur *scienter*, id est, sine ignorantia *juris* prohibentis lectionem, & simul sine ignorantia *facti*, quâ scilicet nescitur hunc librum esse hæreticum, ut proin ab hac censura incurrenda probabilissimè excuset ignorantia etiam crassa, modò hæc non sit cum ingenti temeritate conjuncta, prout tenent Sanchez, Palao, Kazenberger, Tambur. *lib. 2. in decalog. c. 1. §. 7. n. 27.* & alii plures. 2. necessum est, ut legatur *sine facultate Sedis Apostolicæ*, prout expresse continet Bulla Cœnæ *loc. cit.* Quocirca sapienter advertunt Marchantius noster *Trib. Tom. 2. tr. 2. sect. 4. q. 3. dub. 1.* & Laymann *lib. 2. tr. 1. c. 15. n. 5.* quantum ad hoc dari posse locum Episcopi v. g. in Episcopo, vel alio viro prudente, si scilicet legat hujusmodi librum, vel locum contradictionis in hæretico contentum eo fine, ut alium convincere, vel ad agnitionem veritatis perducere valeat. 3tio. Requiritur ut legatur *liber*, id est, opus vel opusculum in ea quantitate compositum, ut in morali hominum existimatione verè censeatur liber, sive dein sit magnus, sive etiam parvus, id est, ut aliqui autumant, ad minus decem foliorum; nec refert, sitne compactus vel non impressus aut manuscriptus &c. prout post

Suarezium *disput. 30. de fide. sect. 2.* Sanchez. *lib. 2. mor. c. 10. n. 35.* tenet Sporer *ubi supra c. 3. sect. 4. n. 39.* 4to, Requiritur, ut sit liber *hæreticus*, id est, ab hæretico auctore compositus, esto is nunquam fuerit denunciatus. Ex quo Doctores communissimè inferunt, hanc excommunicationem Bullæ Cœnæ in legentes latam non incurri à legentibus Hebræorum Thalmud, vel Alcoranum Machometis, quia revera isti non sunt libri hæretici seu hæreticorum, sed potius infidelium; Nihilominus qui hujusmodi libros legunt, peccant graviter, & incurrunt excommunicationem non reservatam, sicut & illi, qui legunt libros theologiæ judiciariæ, vel scripta de arte Geomantiæ, Hydromantiæ, Aeromantiæ, aut de arte Cabalistica. Similiter ii, qui legunt librum ab auctore Catholico compositum, esto hæreses contineat vel etiam referat, uti faciunt Bellarminus, Becanus & alii, non incurrit excommunicationem in Bulla Cœnæ in legentes libros hæreticos latam; quia de talibus dici non valet, quòd legerint librum hæreticum, esto adhuc graviter peccare possint, casu quo adverterent, sibi ex tali lectura imminere periculum subversionis, vel, si lectis hujusmodi dogmatibus hæreticorum assensum præbeant, quem, si exterius manifestent, insuper incidunt excommunicationem Bullæ Cœnæ, prout pate-

patebit ex dicendis in proxima confer. à n. 139. 5<sup>to</sup> necessum omnino est, ut talis liber hæresin contineat, vel de Religione tractet. Quò fit, quòd vi hujus non censeatur prohibitum legere libros hæreticorum merè historicos, philosophicos, medicos, aut juridicos, modò nullam hæresin in se contineant. Quia etiamsi talis liber hæreticus, ex instituto non tractans de Religione, obiter aliquam hæresin, vel etiam Scommata contra Romanam Ecclesiam vel Summum Pontificem (more hæreticis valde familiari) contineat, proptereaque in rigore loquendo censeri deberet prohibitus vi Bullæ Cœnæ, nihilominus in nostris saktē partibus septentrionalibus, utpote in quibus Bulla Cœnæ cum tanto rigore non videtur recepta, secluso ulteriori periculo subversionis impunè legi posse probabiliter hodieum tenent Laymann *ubi supra* c. 15. n. 4. Sporer n. 40. Stoz l. 2. p. 3. n. 534. Dicastillo n. 1177. Busenbaum, Michel, eosque secutus la Croix lib. 7. 332. id, quod praxis fermè quotidiana confirmare videtur; - tum quia hujusmodi libri passim asservantur in Bibliothecis; tum etiam quia à timoratis sine scrupulo legi solent. 6<sup>to</sup> tandem ad incurrendam hanc excommunicationem Bullæ Cœnæ sufficit librum ab hæretico fuisse compositum, simulque de fide aut vel de Religione tractare, esto nullam prorsus hæresin

in se contineat. Ratio est; quia Pontifex voluit excommunicationi subiectos, qui legunt librum hæreticum hæresin continentem, vel (NB. sub disjunctiōe loquentem) de Religione tractantem, utputa interpretando Scripturam Sacram, quæstiones theologicæ circa Deum, Sanctos, vel circa fidem resolvendo. Ratio est; quia Ecclesia non vult filios suos ex fonte tam turbido haurire aquas salutis, vel ex luto putrido colligere margarittas, inquit Sporer *tr. 2. c. 3. sect. 4. num. 41.* ideoque iustissime hoc interdicit, partim in odium hæreticorum; partim etiam ad avertendum à fidelibus quodcunque subversionis periculum,

At, inquires, quænam materiæ quantitas legi debet ad incurrendam præfatam censuram?

113. R. ad hoc quæsitum breviter (omissis aliorum placitis, qui vel nimium rigidi, vel nimis laxi videntur) in hac re attendendam esse materiam non tam secundum se, quam secundum finem prohibentis, qui principaliter voluit excludere periculum subversionis. Itaque si aperiendo librum hæreticum incidas in doctrinam, quæ directè est contra fidem, poteris paucas etiam lineas legendo peccare mortaliter & incidere excommunicationem; quia te periculo exponis, & agis contra totum finem legis. Econtra si advertas, materiam esse indifferentem, etiam paginam legendo non peccabis mortaliter, neque

neque censuræ eris obnoxius. Ita Sanchez, Sporer & la Croix *l. 7. n. 340.*

Notandum jam 2dò est; ad incurrendam 114.  
hanc excommunicationem ratione retentionis, satis esse, quòd quis librum hæreticum (hæresin scilicet continentem, vel de Religione tractantem scienter per notabile tempus retineat,) sive dein suò, sive alieno nomine sive in propria, sive etiam in aliena domo eundem conservet. Contra hanc constitutionem vel maximè impingere possunt Bibliopolæ, retinendo hujusmodi libros eò animo, ut rursus vendant aliis; quia, ut bene advertit Lessius *in auctario V. Hæreticor. lib. cas. 17.* per hoc moraliter disseminant hæresin.

Quin insuper librarios, aromatarios & mercatores utentes ejusmodi libris aut foliis hæreticorum ad involvenda aromata, merces & alios libros possunt incurrere hanc censuram, juxta multorum opinionem, quos citat la Croix *suprà n. 348.* ubi is sapienter monet, ad discernendum peccatum grave aut leve ratione retentionis commissum considerandam esse tum quantitatem temporis, tum etiam intentionem retinentis, qui, si una ulteravè duntaxat die retineat talem librum eo fine, ut postea commodius possit tradere ad manus Inquisitionis, vel Episcopi &c. nullatenus peccabit, neque censuræ obnoxius fiet. Ita etiam Sanchez, Castropalao, Pignatellus, Sporer, alique videndi apud la Croix *loc. cit.*

115. Notandum 3tiò, nomine imprimen-  
tium illos venire, qui ad impressionem libri  
hæretici scienter, & quidem propinque  
cooperantur; quales merito reputantur  
1. Dominus officinæ, in qua fit impressio.  
2. qui librum imprimendum tradit. 3. qui  
typum seu characteres ordinat. 4. qui  
chartam seu papyrum humectant, vel atra-  
mentum seu colorem, uti vocant impo-  
nunt, aut prælum premunt, & 5. proba-  
biliter etiam is, qui corrigit impressio-  
nem; cum ad hanc saltem correctè impri-  
mendam proximè concurrat. Et certum  
omnino videtur, quòd tam Corrector,  
quàm etiam ille, qui facit expensas pro im-  
pressionem hujusmodi libri, incidant hanc  
excommunicationem, saltem ex eo capite,  
quòd faveant hæreticis. Ita Pignatell. pag.  
484. & Krimer n. 753. relati à la Croix lib.  
7. n. 356.

116. Notandum denique 4to, nomine defen-  
dentium illos intelligi, qui librum hæreti-  
cum ut talem commendant, laudant, aliove  
modo, sive verbis, sive scriptis, sive etiam  
factis tuentur v. g. ne in manus Inquisitio-  
nis tradatur, aut comburatur &c. Ita Kri-  
mer n. 754. & 755. Tamburinus lib. 2.  
c. 1. §. 7, n. 54. Sporer ubi supra n. 47.

Quæres octavò, utrum præter libros hæ-  
reticorum, quos diximus vi Bullæ Cœnæ in-  
terdictos, dentur etiam alii libri prohibiti?

117. R. Dantur sine dubio, & quidem plu-  
rimi

rimi, ut videre licet in Indice Romano librorum prohibitorum, quem Pius IV. juxta decretum Concilii Tridentini primitus curavit confici, postea verò alii Pontifices, nominatim Pius V. Clemens VIII. & Alexander VII. alique Successores continuare, seu etiam augere assueverunt; Quocirca

Observandum rursus venit, hunc Indi- 118.  
cem hodie communiter dividi in tres classes, ita quidem, ut in prima collocentur Auctores hæretici, qui vel tractant de Religione, vel ex professo hæresin continent. In eadem classe prima porro collocantur omnes Hæresiarchæ, id est, Capita & inventores hæresum, quales fuere Arius, Calvinus, Lutherus, Zwinglius: quorum opera, esto fortassis aliqua non tractent de Religione, neque hæresin contineant, nihilominus sub excommunicatione fuere prohibita; nam damnato Auctore aliquo etiam censentur damnari ejusdem libri, Scripturæ, & opera, veluti communissimè habent DD. Sporer Reiffenstuel *hoc. cit. §. 3. num. 100.* & habetur in *summario cap. fraternitatis 4. de hæreticis.*

Porro ad 2dam classem referuntur libri illi, qui fuere prohibiti propter doctrinam non sanam, suspectam, scandalosam, bonis moribus seu honestati repugnantem, veluti sunt libri de arte magica &c de rebus

superstitiosis, seu etiam obscænis & lascivis tractantes. Quô pariter revocandi sunt libri Philosophici, Medici, Juridici &c. ab hæreticis scripti cum hæresibus hinc inde sparsis, etsi non, nisi obiter probatis.

Ad 3tiam denique classem pertinent libri, ob doctrinam sive Religioni sive bonis moribus contrariam damnati, quorum auctores ignorantur, sitnè hæretici vel Catholici &c. qui libri, ut rectè advertit S. Pontifex Alexander VII. in sua constit. *speculatores Domûs Israel &c.* plerique multò peiores sunt, quàm in prima & 2da classe recensiti, utpote maximè inverecundi, & hóc ipso pestilentissimi.

Sub quibus ergo pœnis, inquires, interdictur lectio dictorum librorum?

119. R. Ad hoc breviter. I. Librorum ad primam classem pertinentium lectio prohibetur sub pœna excommunicationis ipso factô incurrendæ, non tamen summo Pontifici reservatæ, nisi de Religione tractent, vel hæresin contineant: tunc enim vi Bullæ Cœnæ sunt prohibiti.

II. Libri verò 2dæ & 3tæ classis, si ob hæreseos aut falsi dogmatis suspensionem fuere interdicti, cujusvis demum Auctoris, etiam incogniti sint, pariter sunt prohibiti sub pœna excommunicationis, at non reservatæ. At verò, si non ob hæreseos aut falsi dogmatis suspensionem, sed præcisè ob doctri-



doctrinam minùs sanam, seu etiam honestati & bonis moribus repugnantiem fuere prohibiti, legentes peccant quidem mortaliter, nullam tamen propterea excommunicationem incidunt ipsò facto, sed solum jubentur ob reatum peccati mortalis iudiciò Episcopi severe puniri, prout habet *Regula X Indicis circa finem*, & P. Reiffenstuel *loc. cit* n. 103. & *seqq.*

Quæres denique 9nò, utrum prædictæ poenæ etiam in nostra Germania, ubi Catholici cum hæreticis permixti habitant, uti Augustæ, Ulmæ, Memmingæ &c. à legentibus præfatos libros incurrantur?

R. Probabilissimè incurrantur. Ita moralicus tenet R. P. Reiffenstuel *lib. 5. decret. tit. 7. §. 3. num. 80. & seqq.* ubi hanc sententiam præsertim quoad pœnas in Bulla Cœnæ contentas acriter propugnat; eò potissimùm, quòd S. Sedes Apostolica iustissimè potuerit, & nunquam non voluerit quoscunque etiam Germanos obligare; cùmque aliunde, præsertim *ex proposit. n. 18.* ab Alexandro VII. damnata certò constet, legis acceptationem non dependere ab arbitrio populi, neque etiam in Germania nostra videatur posse occurrere causa sufficiens, hanc constitutionem utpote iustissimam non acceptandi; hinc dicendum videtur, quòd poenæ Bullæ Cœnæ etiam in nostra Germania à quocunque demum non pri-

privilegiato incurrantur. Nec dubium, quin hæc opinio nedum tutior, verum etiam oppositâ probabilior sit, utpote validissimis rationibus, nec minori auctoritate suffulta;

Nihilominus non desunt Doctores, præsertim Germani, qui hodieum probabile censent, neque Indicem librorum prohibitorum, neque etiam Bullam Cœnæ quoad dictas pœnas in legentes seu etiam retinentes libros hæreticos latas in hisce partibus nostris septentrionalibus esse cum tanto rigore receptam. Ita præter Laymannum, Sporer, Stoz & alios DD. jam supra n. 112. citatos, tenent P. Engel in *manuali part. 3. cap. 2. de pœnit. in catalog. excommunic.* Michel Theolog Canon *Moral part. 1. tom. 2. q. 1. §. 7. n. 9.* Becanus *Tom 2, tract. 1. de fide. cap. 15. q. 80. num 5.* quibus novissimè subscripsit R. P. Pichler in *suo compendio Jurisprudēt lib. 5. tit. 7. num. 7.* ubi fatetur, se planè existimare cum Laymanno „ Bullam Cœnæ non ubique in „ nostra Germania in omni rigore receptam „ esse, nec ubique observantiam ejus in toto „ rigore, & quoad pœnas urgeri à Summo „ Pontifice, qui prudenter præsumitur „ consentire in non observantiam, ubi contraria consuetudo nimium quantum invaluit, & tales sunt circumstantiæ, in quibus observantia rigida urgeretur sine fructu

„ Etu, immò cum animarum graviori detri-  
„ mento. Haëtenus Doëtor laudatus.

Ego hanc posteriorem Sententiam  
dixi intimandam, non quòd eam velim  
consulere, præsertim cùm aliunde constet  
pœnitentibus tutiora esse consulenda saltem  
per se loquendo ; sed ideò duntaxat, ut  
Confessario innuerem, quidnam in praxi  
cum tali pœnitente debeat, vel possit age-  
re, præsertim ex post facto ; id est, post  
jam lectum vel retentum librum hæreti-  
cum.

## §. II.

Præmittuntur & breviter re-  
solvuntur Casus practici de Com-  
muni- catione cum hæreticis, nec non de  
lectione libròrum hæretico-  
rum &c. &c.

## CASUS PRIMUS.

**T**Itia lamentabunda conqueritur, quòd for-  
tita fuerit maritum, qui in foro exte-  
riori se quidem simulat Catholicum, revera  
autem interiùs pertinacissimè fovet Lutheranis-  
mum, multosque libros A catholicos in quo-  
dam angustissimo tugurii sui latibulo asservat,  
ex quibus & proles haëtenus susceptas tempore  
noëturno potissimùm instruere vel potiùs per-  
ver-

vertere nititur; nec permittit, ut Titia vel in minimo sese opponat, quin potius eandem tum verbis, tum verberibus etiam dirissimè tractat: quodque caput rei est (pergit Titia) non audeo, neque possum eundem denuntiare Judici secus enim in hisce partibus nostris illico cogeretur more aliorum exulare seu emigrare: quid enim tunc cum prolibus mihi incipiendum, qui aliunde depauperati pane arcto & aqua brevi miserè sustentamur: profectò si unquam scivissem, quòd maritus meus non sit Catholicus, nunquam prorsus eidem nupsissem. Hactenus Titia. Jam ad nostrum propositum circa hanc speciem facti dubitare licet 1. an Matrimonium Titia valeat? 2. an stantibus etiam præfatis difficultatibus non peccet, dissimulando manifestationem hæreseos, & librorum A Catholicorum, quos scit à Marito asservari? 3. Denique, quid consilii à Confessario Titia sit suggerendum?

121. R. Ad primum quæsitum hujus Casus, de valore hujus matrimonii minimè dubitandum esse; licet enim secundum dicta part. 3. Theolog. Sacram. Confer. 8. n. 180. & seqq. Diversis juribus & Conciliis matrimonium Catholici cum hæretica vel vicissim justissimas ob causas fuerit prohibitum; nulla tamen lex, nullum jus Divinum aut humanum exstare noscitur, vi cujus hujusmodi matrimonia irritarentur, prout ex communissima DD. tradunt Bellar-
- mi.

minus & Sporer : ergo si in hoc casu nulum aliud impedimentum, jure Divino, vel naturali vel certè Ecclesiastico dirimens intercessit, dicendum, quòd Matrimonium subsistat. Nec refert, quòd Titia asserat, se nunquam fuisse consensuram in Matrimonium, si scivisset sponsum esse infectum hæresi &c. Non, inquam refert : quia in contractu matrimoniali non attenditur, id, quòd sponsus aut sponsa fecisset, sed quod actu fecit, prout rursus diximus eadem *part. 3. conf. 4. n. 95.* atqui Titia supponitur actu consensisse in Matrimonium, simulque potuit validè consentire : ergo &c.

¶. Ad 2dum quæsitum. Nisi supponatur 122. imminere periculum toti Communitati, Titia probabiliter non peccabit, tametsi ob rationes allegatas dissimulet denunciationem mariti hæretici, seu etiam librorum-

Ratio est : quia juxta probabilissimam Sententiam Farrinacii *de hæresi, q. 198. n. 49. fin.* Uxor non tenetur denunciare maritum hæreticum, etiam in illis locis ubi hæresis impunè non toleratur. Ratio est : quia Uxor reputatur una caro, & quasi una persona cum marito : ergo sicut nullus se ipsum prodere obligatur, ita ob eandem rationem probabiliter Uxor non tenetur prodere maritum in puncto hæreseos : hanc eandem Sententiam veram existimant Castro-  
pa-

palao part. 1. tr. 4. disp. 3. punct. 4 n. 16. saltem in casu, quo Uxor ex tali revelatione timeret sibi à marito mortem parari, aut aliud grave damnum eventurum, prout in hac ipsa specie facti eventurum timet.

Scio equidem oppositum absolutè doceri à Matthæuccio in *cautel. Confess. lib. 1. c. 4. n. 9.* Verùm La Croix *lib. 2. num. 215.* Sapienter ait, quòd plures viri prudentes & eximie docti censeant., Bullas Pontificias, quibus denuntiatio hæreticorum præcipitur, in hisce partibus, Germaniæ scilicet, quoad hoc non esse usu receptas. Dixi, Titiam probabiliter non teneri &c. Unde

123. R. Jam ad 3tium quæsitum, Titiam nedum posse tuta conscientia, si velit, sed & prudenter acturam denunciando apud Judicem legitimum maritum suum hæreticum, ejusdemque libros hæreticos manifestando; id quòd & Titia omnimodis videtur consulendum, ob rationes mox dandas.

Ratio prioris, quòd scilicet possit, si velit, hæc est: quia aliunde nedum jure Divino & naturali, verùm etiam humano hæretici in illis locis, ubi non tolerantur, jubentur manifestari; eò quòd summopere sint perniciosi bono animarum & Reipublicæ Christianæ nedum quoad salutem animæ, sed & quoad bonum pacis, prout Titia nostra hæctenus satis superque fuit exper-

perta; neque aliunde ex parte mariti hujus occurrit rationabilis causa dissimulandi manifestationem: ergo licite eundem prodit.

Quod insuper in hac nostra Archi-Diœcesi, ubi casus contigit, id ipsum Titiae sit concessum, cuivis prudentum de facili suaderi posse arbitror sequentibus de causis, primò: quia ex ulteriori cohabitatione ne dum Titia sola, sed insuper etiam proles manebunt semper expositæ evidenti periculo subversionis & æternæ salutis; qua de causa 2. jura ob hæresin matrimonio ex alterutra parte supervenientem concedunt divortium. *cap. Quasivit. cap. de illa. cap. Quanto. de divortiis*, item *cap. ult. de convers. conjugat.* & alibi: ergo Titiae licet præterdere & quærere divortium à marito hæretico ob ejusdem hæresin & perversam voluntatem prius quidem ignoratam, modò autem satis superque agnitam; nam in jure paria censentur, *aliquid supervenire & præcedens fuisse ignoratum seu incognitum; vel non esse, & non apparere, L. in lege ff. de contrahend. empt.* Hinc ulterius 3tiò, cùm periculum animæ ex ulteriori cohabitatione Titiae, ejusdemque pauperculis prolibus imminens sit verè ingens, è contra verò emolumentum temporale, miseræ scilicet sustentationis hæctenus à marito obtentæ, valde sit exiguum, aliunde verò fides nos

*R. P. Elbel, Pars II. de Fide &c.* K do-

doceat, in pari periculo semper præferendam esse salutem animæ saluti corporis, profectò à confessario consulendum videtur Titia, ut postposito quocunque demum emolumento corporis sese divinæ providentiæ totaliter unacum misellis prolibus confidat, & prodendo maritum suum hæreticum ab eodem divortiarum quærat; quod procul dubio hic loci de facili impetrabit, prout de hoc plura nobis exstant exempla recentissima. Videatur de hoc Gobat in *Quinar. tr. 6. c. 33. n. 6. & seqq.*

## CASUS SECUNDUS.

**S**empronius civis catholicus cujusdam civitatis orthodoxæ fidei addictissimæ alicui Bibliopola acatholico locaverat certam Cameram per conservandis libris venalibus in nundinis suo tempore exponendis, tandem verò eodem Bibliopola ad incitas redactò, Sempronius locò census jam per complurium annorum curricula sibi debiti cogebatur acceptare haud exiguam partem librorum depositorum, è quibus dum unum alterumvè Bibliopegæ tradidisset compingendum, ab eodem mox inaudit, libros esse hæreticos. Dubitat jam Bibliopega, an tanta conscientia possit ejusmodi libros compingere. Dubitat insuper Sempronius & sciscitatur è confessario, an non sibi liceat hujusmodi libros hæreticos aliis saltem hæreticis vendere, ad se indemnem servandum? Quid ad hæc confessarius?

¶. ad



¶. ad primum quæsitum. Bibliopegæ, præcisè compingendo libros hæreticos non peccat, neque incurrit censuram Bullæ Cœnæ. Ratio est: tum quia in dicta Bulla non comprehenduntur compactores librorum hæreticorum seu Bibliopegæ; tum etiam, quia libri hæretici non compacti legi possunt, ideòque compingens per se loquendo non reddit causam Catholicorum deteriore, præsertim si casus contingeret, prout revera sæpius contingere natus est in locis, ubi Catholici vivunt mixti cum acatholicis in eadem civitate v. g. Augustæ, proptereaque iidem libri facile compingerentur ab alio Bibliopega acatholico. 124.

Certum insuper esse debet, Bibliopegam non peccare compingendo librum hæreticum pro tali, qui gaudet potestate legendi eundem librum, vel pro aliqua Communitate Religiosa, in quibus similes libri nedum asservari solent, inclusi carceribus Bibliothecarum, sed insuper regulariter saltem loquendo, semper reperiuntur tales, qui præditi sunt potestate legendi libros hæreticos, & ab hæresi absolvendi. Ita tenent Lessius, *Cas. 18.* Pignatellus *pag. 482.* Oviedo & alii plures, quos referens sequitur la Croix *lib. 7. n. 353.*

Dixi tamen, Bibliopegam præcisè compingendo librum hæreticum probabiliter non peccare; secus enim dicendum existima-

K a

rem

rem, casu quo ejusmodi librum diu, v. g. per aliquot septimanas penes se retineret, esto non proprio, sed alieno nomine; tunc enim *vi retentionis* incurreret censuram Bullæ Cœnæ, quemadmodum etiam, si librum hæreticum compingeret animô favendi hæreticis, eorumvê sectam hac viâ promovendi: si tamen per unum præcisè alterumvê diem librum penes se retineat usque dum compingat, vel compactum Domino restituat, non peccat graviter ne quidem ratione retentionis; quia talis mora retentionis censenda est respectivè levis, prout rectè docent Sanchez, Pignatellus, Castro-palao, Sporer & alii, videndi apud la Croix *cit. n. 348.*

126. *n.* Jam ad secundum quæsitum hujus casus cum distinctione; Nam, si Sempronius supponatur obtinuisse multos libros, vel certè libros hæreticos magni pretii (quod tamen in civitate mèrum Catholica, ubi à Reverendissimo Officio accuratè solet inquiri) vix, aut ne vix quidem supponi potest aut debet, posset illos probabiliter tutâ conscientia vendere Bibliopolæ acatholico, vel pro libris Catholicis commutare; tum quia Ecclesia velut pia Mater præsumitur, nolle cum tanto onere fideles obligare, saltem in hisce partibus nostris; tum præsertim, quia si aliunde apud Hæreticos habeatur talium librorum copia, causa Catholicorum

rum inde non sit multum immò nihilò deterior. Ita velut probabile tenent Lessius, la Croix, *l. cit. n. 354.* quos sequitur noster A. R. P. Kazenberger in *Supplement. I. R. P. Sargat Conferent. 45.* Fateor nihilominus, oppositum & rationi & menti Ecclesiæ mihi videri conformius, & hoc ipso probabilius, præsertim si damnum ex combustione talium librorum imminens non sit adeò considerabile seu grave, vel si libri sint tales, qui nequidem ab ipsismet hæreticis de facili amplius comparari possint. His enim suppositis S. M. Ecclesia in abominationem pestiferi veneni hæretici justissimè præcipit fidelibus, ut satagant hujusmodi libros vel tradere ad manus inquisitionis (ubi hæc viget) vel ubi non viget, comburendo eliminare ex universo, vel certè (quod in tali casu consultissimum putarem) eosdem dare alicui Communitati Religiosæ, perpetuis carceribus Bibliothecæ (quales semper in iisdem reperire est) includendos.

### CASUS TERTIUS.

**C**Aja ex incastu gravida, ad tegendum scelus & evadendum periculum infamiæ sibi imminens aliquot mensibus delituit in domo cujusdam Rustici Pinzgoiensis hæresi infecti, cui, utpote prorsus illiterato cogebatur sapius pralergere Biblia Lutheri, aliòsque, quos clam in suo

*tugurio asservavit absconditos; quin etiam pauld post sponte emigrantem, unacum prole jamiam in lucem edita, comitata fuit, licet nunquam habuerit animum vel hæresi assentiendi, vel eandem profitendi, sed præcisè infamiam vel periculum ex incaſtu commiſſo in Patria ſibi imminens hac viâ deſtinandi. Hinc cùm poſt exiguum itineris ſpatium emenſum proles ſpuria obriſſet, Caja, utpote exiſtimans ſe jamiam evaſiſſe periculum, rediit in Patriam, in qua, ut denuo recipereſtur, obtulit ſe ad deponendam profeſſionem publicam fidei. Jam ad noſtrum propoſitum dubitare licet 1. Utrum Caja ex præſato timore Ruſtico prælegendo Biblia & alios libros hæreticos peccaverit, & cenſuram Bulla Cana incurrerit? 2. An tutâ conſcientia potuerit comitari Ruſticum emigrantem? denique, an redux in Patriam indiguerit abſolutione à Cenſura vel nova profeſſione fidei?*

127. *R. ad primum quæſitum hujus Caſus, Cajam probabilius peccâſſe mortaliter toties, quoties præſata Biblia Lutheri alioſvè libros hæreticos Ruſtico prælegit.*

*Ratio eſt: quia prælegendo proximè concurrit ad peccatum formale Ruſtici, utpote libros hæreticos in morali hominum exiſtimatione legentis per Cajam: at, quisquis ad formale peccatum alterius proximè concurrit, peccat graviter aut leviter pro qualitate delicti: ergo &c. Et licet Caja merùm permiſſivè ſe habuerit in ordine ad*  
aſſen-

assensum hæreticum à Rustico præstitum doctrinæ sibi prælectæ, dici tamen minimè potest, quòd merùm permissivè se habuerit in ordine ad lectionem librorum, quandoquidem hujus causa proxima extiterit, veluti rem perpendenti facilè constabit. Nihilominus censeo, quòd si Caja ex verè gravi metu timore incurrendi infamiam, & alia majora incommoda, Rustico prælegit, probabiliter propterea non inciderit censuram Bullæ Cœnæ.

Ducor ad hoc asserendum hac ratione: quia juxta *communissimam DD.* quam amplectitur la Croix *lib. 7. n. 98.* à censura incurrenda excusat metus verè gravis, esto is fortassis non excuset à peccato, modò metus non supponatur incussus in contemptum fidei vel Religionis: at si Caja non potuit alià via evadere periculum infamiæ &c. sibi imminens, nisi prælegendo, revera fuit adacta & compulsa gravi metu, veluti liquet ex ipsa specie facti: ergo probabilissimè propter hanc lectionem non incidit censuram.

At, inquires contra hoc. Per Bullam Cœnæ excommunicantur omnes, quicunque sine licentia sedis Apostolicæ *ex quavis causa* libros hæreticos legunt vel retinent: ergo Cajam ne quidem metus gravis, eximit à censura.

128. R. Neg. Conseq. & dicendo, per *ty quavis causa* intelligendam esse causam non justam, non sufficientem &c. prout innuere videntur verba mox sublequentia: *quovis ingenio, vel colore*, non item intelligi debet causa justa, gravis, uti erat infamia hoc modo declinanda &c. &c. & hoc ipsô sufficiens, prout à pari colligere licet de retentione; nam qui ex verè rationabili & gravi causa librum hæreticum penes seretinet v. g. eo fine, ut postea eundem commodius possit extradere inquisitioni &c. non peccat, neque fit obnoxius excommunicationi secundum dicta n. 114.
129. R. jam ad 2dum quæsitum cum distinctione. Nam si Caja Rusticum fuit comitata sub prætextu eandem hæresin Lutheranam alibi profitendi, peccavit mortaliter contra præceptum negativum, scilicet de non neganda fide, quia hoc modo fidem minus ex-saltem implicitè negavit in foro externo. Similiter si supponatur habuisse animum comitandi Rusticum usque ad partes A catholicorum cum prævisio periculo abnegandi veram fidem, sicut revera prævidere potuit ac debuit, rursus peccasset mortaliter, eò quòd sese exposuerit periculo abnegandi veram fidem. Econtra tamen, si Caja dogmatibus Lutheri nunquam præbuit assensum nec se Lutheranam in foro externo, seu etiam coram Judice professâ fuit, neque etiam

etiam habuit animum comitandi Rusticum usque ad partes A catholicorum &c. sed prae-  
cisè emigrandi extra Patriam ad tegendum  
scelus commissum, & ad conservandum suum  
honorem, per se loquendo non peccavit ;  
tum quia comitiva sola emigrantibus prae-  
stita non fuit signum abnegatae fidei ; cum  
revera multi famuli Catholici heros Acat-  
holicos, sponsi sponfas, Uxores Maritos fue-  
rint comitati, nescio quibus è motivis pro-  
fanis, qui tamen publicè protestati fuère, se  
id minimè facere animò abnegandi veram  
fidem, vel falsam profitendi ; tum etiam  
quia Caja habuit causam verè prægnantem  
quærendi modum evadendi extra Patriam,  
& infamiam sibi imminentem declinandi.

Ex quibus

8. jam ad 3tium quæsitum pari cum di-130.  
stinctione. Enimverò si Caja supponatur  
(id quod ex ipsius mente colligendum erit)  
absque ullo assensu, & ex mero timore  
prælegisse Biblia Lutheri, & alios libros hæ-  
reticos, neque etiam fidem veram in foro ex-  
terno negasse, nec sese Lutheranam professam  
fuisse, nullam prorsus incurrit censuram ob  
rationes jam datas. Secus dicendum pro-  
cul dubio foret, si assensum dogmatibus Lu-  
theri semel aut sæpius etiam præstitum exte-  
rius manifestasset, vel se Lutheranam in  
foro externo saltem seriò professam fuisset,  
tunc enim vi prioris incidisset excommuni-

K 5

catio.

cationem, vi posterioris autem indignisset absolutione saltem in foro externo, utpote in quo supponeretur incidisse excommunicationem. Quinam autem ab ista excommunicatione valeant absolvere, constabit ex dicendis in *Conferentia proxima* à n. 146.

## §. III.

## Corollaria ex dictis inferenda.

131. **C**olliges ex hactenus dictis primò, non omnem, qui librum hæreticum legit, illico habendum esse pro excommunicato, aut propterea sine omni ulteriori indagine beneficio absolutionis privandum, vel ad alium Confessarium potestate in casus Bullæ Cœnæ præditum mittendum vel ablegandum, prout nonnulli assueverunt minùs, quàm oporteret discreti. Ratio hujus corollarii seu etiam illationis est: quia sæpiùs usuvenit, ut legentes vel laborent ignorantia juris, utpote non scientes lectionem hujus libri esse de jure prohibitam, vel certè ignorantia facti, utpote non scientes, hunc vel illum librum esse hæreticum, aut ab hæretico compositum: atqui secundum dicta *num. 112.* ab hac censura incurrenda excusat tam ignorantia juris, quàm facti: ergo &c. Itaque Confessarius ex tali pœ-
- niten-



nitente graviter inquirat 1. an sciverit, librum esse hæreticum, & 2. talem lectionem sub pœna excommunicationis fuisse prohibitam? Si dicat, quod utrumque, vel alterutrum saltem ignoraverit, minimè tractandus est velut excommunicatus, neque indiget absolutione ab hac censura. Secus concludendum erit, casu quo pœnitens respondit se nulla laborasse ignorantia, utpote præviè informatum vel admonitum à Confessario, vel alio Viro, cui fidem tenebatur adhibere. Sanchez *lib. 2. moral. c. 10. n. 38.* Laymann *lib. 2. tr. 1. c. 14. n. 4.* Reiffenstuel *lib. 5. decret. tit. 7. ff. 3. num. 55.*

Colliges 2dò, quodsi in aliquo Auctore 132.  
legendo, unam alteramvè hæresin reperiās,  
nec aliunde tibi constet, eundem Auctorem esse Catholicum, sub gravi peccato tenearis inquirere Auctorem libri, & interim abstinere ab ulteriori lectione: Secus enim faciendo te exponeres periculo transgrediendi legem Ecclesiasticam graviter obligantem. Nihilominus si stante tali dubio pergas ulteriùs legere, probabiliùs non incurres excommunicationem, tametsi ex post facto certò deprehendas librum fuisse ab hæretico compositum. Ita noster A. R. P. Kazenberger in *Supplement. I. P. Sargar Confer. 43.* Secutus Sanchezium *lib. 2. cap. 10. n. 38. & alios.* Ratio est: quia de te dici

dicinon potest, quòd *scienter* legeris librum hæreticum.

Nec verum est, quod sibi persuadet Matthæucci, in hoc puncto nimis rigorosus, videlicet, in tali casu legenti jam constare de Auctore hæretico, esto non constet de Auctore certo; falsum quippe est omnem librum, qui hæresin continet, esse ab auctore hæretico compositum, neque hoc indiget ulterioři proba.

133. Colliges 3tio, legentem controversias hisce temporibus Catholicos inter & hæreticos agitari solitas, & ab Auctore Catholico scriptas, non incurrere excommunicationem Bullæ Cœnæ. Ratio est: quia talis liber non est hæreticus, sed Catholicus, esto etiam hæreses aliorum referat. Et licet Regula VI. Indicis Romani caveatur, ne hujusmodi Authores Controversistici in vulgari idiomate passim permittantur: nihilominus in hisce partibus nostris ubi Catholici juncti hæreticis, ab his non raro impugnari solent, vel saltem tentari; & passim orthodoxam doctrinam taxari, imò diversis scommatibus proscindi audire coguntur, profecto minimè carpendum, sed laudandum potius arbitror, qui hujusmodi controversias legit eo fine, ut in contingencia facti hæreticis occurrere, eorūque perviciaciam & impudentiam frangere possit. Nolim tamen hac resolutione com-
- pre-

prehendere illos, qui de hæreticorum falsis dogmatibus nihil unquam audiérunt, proptereaque ex similium lectione utpote sibi insufficientes, varia dubia, scrupulos &c. possent incurrere: tales enim sine dubio tutius & melius agunt abstinendo, quàm legendo, idque propter periculum animæ ipsis imminens.

At, inquires, quid de illo tenendum, qui duos Antagonistas Catholicum unum, alterum hæreticum, utrumque in 8vo impressum, sive majoris commoditatis gratia, sive alio ex fine, curavit sibi unà simul compingi?

R. Ad hoc dubium breviter, quòd si <sup>134</sup> materia illa ab hæretico scripta sit in ea quantitate, ut secundum se sumpta verè liber reputari possit & debeat, legens hunc librum incurreret excommunicationem.

Ratio est: quia revera *scienter legit* librum hæreticum, & quidem (uti supponi debet) sine Auctoritate vel facultate Sedis Apostolicæ: neque enim compactura facit, ut desinat esse talis, seu ut evadat Auctor Catholicus. Non tamen fieret obnoxius censuræ legendo præcisè librum Catholici Antagonistæ quantumvis compactum cum hæretico; quia non legit librum hæreticum: quemadmodum enim secundum mox dicta compactura non facit, ut auctor hæreticus evadat Catholicus, ita sanè ex Aucto-

Auctore Catholico facere nequit hæreticum. Hac de causa Sanchez, Bonacina, Lugo de fide *disp. 21. num. 79.* eòsque secutus La Croix *lib. 7. n. 338.* rectè tenent, quòd si in una compactura contineantur plures partes libri hæretici, quarum aliquæ non habent hæresin, nec tractant de Religione, ut proin NB. tales partes habeant aliquo modò rationem *libri distincti*, eum, qui talem partem de Religione non tractantem, neque hæresin continentem legit, non fieri obnoxium censuræ, licèt totus liber seu volumen ita compactum nec legi, neque etiam tutà conscientia retineri possit, uti bene advertit Pignatelli apud la Croix *loc. cit.*

135. Colliges 4tò, legentem quoscunque demum libros scandalosos, esto non hæreticos, v. g. de magia, divinationibus superstitiosis, Astrologia judiciaria, vel aliàs lasciva &c. peccare mortaliter contra prohibitionem Indicis Romani Regula VI. VIII. & X. licèt propterea excommunicationis censuram non contrahat teste Laymann *l. 2. tr. 1. c. 15. n. 8.* Ratio gravis peccati de se liquet: quia legentes hujusmodi libros sese exponunt periculo animæ cum gravi offensa Dei, & inobedientia erga Ecclesiam. Nihilominus si omnibus perpensis dubitetur, sitnè talis liber hæreticus, perniciosus, vel prohibitus in Indice, nec aliunde possit deprehendi omnimoda

veri-


veritas, legens talem nec reatum culpæ neque censuram incurreret, modò aliunde non sentiat lectionem illius sibi esse perniciosam.

Ratio est: quia cuilibet fas est legere quemlibet librum aliunde non prohibitum nec sibi perniciosum: ergo quamdiu non constat de prohibitione, manet quisque in possessione suæ libertatis, veluti constare potest ex dictis *in tract. pralim. Confer. 6. n. 151. & 152.*

Dices adhuc. Sed quid tenendum de iis, qui Biblia Sacra vulgari idiomate edita legunt, prout in nostra Germania frequenter fieri assolet?

R. Per Regulam IV. Indicis jam sæpius 136. allegati Sapienter omnino caveri, ne Biblia vulgari lingua passim sine discrimine permittantur, idque partim quia S. Scripturæ sensus & intellectus multis in locis est satis obscurus, intellectu, & captu difficilis, ideoque simpliciores inde de facili possent conjici in diversa dubia, animi perplexitates, & pericula temerè errandi etiam in iis, quæ sunt de fide, partim etiam quia, si passim sine examine permitteretur vernacula lectio scripturæ, facile in manus fidelium venire possent versiones corruptæ, utpote Lutherana, Calviniana, Genevensis, Wicleffiana &c. quarum lectio procul dubio fidelibus foret perniciosa, aut certè periculosa. Sapient-

pietissimè proin mox allegata Regula ait, hac in parte iudicio Episcopi aut Inquisitoris esse standum, ut cum consilio Parochi vel Confessarii Bibliorum à Catholicis auctoribus verforum lectionem in vulgari lingua eis concedere possint, quos intellexerunt ex huiusmodi lectione non damnum, sed fidei & pietatis augmentum capere posse. . Et si praxis Germaniæ non ferat, ut fideles hanc licentiam seriptotenus petant, Parochi itaque aut Confessarii erit disquirere, an Biblia sint authentica: tunc autem erunt talia, quando fuerint fideliter translata juxta normam & Exemplar latinæ veteris Editionis, quæ alio nomine *vulgata* appellatur, de qua sola Concilium Tridentinum ss. 4. decret. 1. & 2. testatur, quòd quoad omnes libros, omnèsque librorum partes sit habenda pro Sacra, Canonica, & authentica. Videatur de hoc la Croix lib. 7. n. 378.



CON-



# CONFERENTIA QUINTA

De Pœnis hæreticorum, nec  
non de potestate absolvendi ab  
iisdem.

## SUMMARIUM.

- 137. Recensentur brevissimè hæreticorum Pœnæ  
tum Canonice, tum etiam civiles.
  - 138. Ad quas incurrendas requiritur hæresis for-  
malis;
  - 139. Et quidem exterius manifestata per actionem  
mortaliter peccaminosam.
  - 140. Prædictæ pœnæ civiles ab hæreticis tolera-  
tis in Germania non incurruntur, bene tamen  
pœnæ Canonice.
  - 141. A Clerico autem tam civiles quàm Canonice  
(paucis exceptis) incurrerentur.
  - 142. Quoad pœnam irregularitatis tamen cum  
hæreticus in hisce partibus nostris nonnihil mi-  
tius proceditur.
  - 143. Quibusnam pœnis subjiciantur Apostatæ à  
fide, & Schismatici?
  - 144. In ordine ad absolutionem gnaviter distin-
- R. P. Elbel. Pars II. de Fide &c. L. gui*

- qui debet inter hæresin occultam & notoriam seu ad forum contentiosum deductam;
145. Nec non inter forum in- & externum, Sacramentale, & non Sacramentale.
146. Episcopi Germaniæ hodieum possunt absolute hæreticos pro foro externo: pro interno autem possunt per accidens.
147. An per se etiam id valeant pro foro interno? permulti probabiliter asserunt.
148. De Prælati Regularibus respectu suorum (Regularium scilicet) idem videtur tenendum, quod de Episcopis respectu suorum mox dictum fuit.
149. Quantum in ordine ad absolutionem ab hæresi valeant privilegiati, id est illi, qui Romæ obtinere quinquennalem licentiam?
150. Quidnam circa hoc valeant Confessarii non privilegiati?
151. Utrum Episcopi dispensare valeant in irregularitate ob hæresin incursa?
152. Utrum etiam Prælati Regulares in hac pœna dispensare valeant cum suis subditis?
153. Resolvitur Casus I. de quodam Religioso apostata, qui post aliquoties simulatam hæresin, immò & participatam Communionem cum iisdem tandem miseriis pressus reversus fuit ad suum monasterium.
154. An propterea unam, vel plures excommunicationes incurrit?
155. Utrum à suo Prælato potuerit absolvi?
156. Præsertim in casu, quo noluisse absolvi, vel contra fuisset protestatus.
157. Resolvitur Casus II. de quadam Vetula, quæ multis argumentis vix tandem persuasa fuit, ut abjuraret suam hæresin:



158. Paulo pōst tamen in eandem pejus fuit relapsa.
159. An denuo respiscens potuerit absolvi saltem ab Episcopo, vel alio privilegiato?
160. Resolvitur Casus III. de quodam Pastore, qui noluit excipere Confessionem scēminæ prægnantis, eò quòd hæc de hæresi sin minùs convicta, saltem violenter suspecta fuerit.
161. Verùm proterea procul dubio graviter peccavit.
162. Expenditur ejusdem inepta responsio vel excusatio.
163. Confessarius bene debet distinguere inter hæreticum materiale & formale, nec non inter in- & externum.
164. Qui hæresin mente conceptam exterius manifestant quidem; sed non per actionem mortaliter malam, immunes habendi sunt à pœna excommunicationis.
165. Nihilominus in Germania hæretici etiam materiales volentes fidem veram amplecti, rectè jubentur abjurare hæresin, & ab hac sub conditione laudabiliter absolvuntur.
166. Minùs tamen verosimile est, quòd in Germania nostra quilibet Confessarius valeat absolvere hæreticos natos, dum volunt amplecti fidem salvificam.
167. & 168. Occurritur breviter duobus præcipuis fundamentis ejusdam Adversarii.

## §. I.

Proponuntur & breviter resolvuntur quæsitæ scitu necessaria ad debite resolvendos Casus practicos circa pœnas hæreticorum, eorundemque absoluti-  
nem.

Quæres primò, quænam sint hæreticorum pœnæ?

137. R. Sunt diversæ tum spirituales seu Canonice, tum etiam temporales seu civiles, quibus utroque jure hæretici formales & externi afficiuntur. Canonice sunt sequentes sex. Excommunicatio latæ Sententiæ, quæ in Bulla Cœnæ soli Summo Pontifici reservatur. 2. Irregularitas & inhabilitas ad ordines clericales, Beneficia, & officia Ecclesiastica. 3. Privatio Beneficiorum, Officiorum & Dignitatum Ecclesiasticarum, imò & degradatio. 4. Privatio exercitii Ordinum & jurisdictionis spiritualis. 5. Privatio sepulturæ in loco Sacro. 6. Divortium, quod conjugi Innocenti permittitur ob alterius lapsum in hæresin. Quæ omnia videri possunt in c. 8. 9. 13. *X de hæretic. cap. 2. 12. & 15. eod. tit. in 6. juncta Bulla Cœna can. fin. Caus. 24. q. 2. cap. 6. & 7. de divortiiis*. Porro civiles & temporales sunt sequentes octo. 1. Infamia

mia *juris & facti*: juris tamen requirit sententiam declaratoriam criminis. 2. Instabilitas tam activa, quàm passiva, vi cuius hæretici nec Testamentum, neque etiam Codicillum facere possunt, neque in hæreditate alterius succedere. 3. Inhabilitas ad omnes actus civiles, ita, ut in iudicio Actores, Testes, Notarios, Advocatos, Iudices agere, vel officium publicum gerere non valeant. 4. Confiscatio omnium bonorum. 5. Amissio patris potestatis in liberos. 6. Amissio omnis privilegii & Beneficii à jure quibusdam specialiter concessi, uti est privilegium dotis, beneficium S. C. Maced. S. C. Velleiani, &c. 7. Liberatio Subditorum & Vassallorum ab omni debito obedientiæ, fidelitatis & obsequii, etiam juramentò promissi. 8. Denique ultimum supplicium; quia hæresis non solum Religionis Christianæ ac salutis æternæ fundamentum tollit, atque in spiritualibus habetur eo loco, quò in politicis crimen læsæ Majestatis, sed etiam summopere turbat tranquillitatem politicam Regnorum & Provinciarum. Habentur hæc c. 9. 13. & fin. X c. 2. 8. 14. 19. in 6. de hæret. lib. 4. 5. & 8. & *Auth. Credentes. Author. Gazayos. C. eod.* Fusior horum explicatio videri potest apud Reiffenstuel lib. 5. tit. 7. §. 5. & 6. per totum. Et apud Pichler in *Compend. J. C. lib. 5. tit. 7. n. 2.*

138. Quocirca notandum est in primis, præfatas pœnas statui duntaxat *pro hæreticis formalibus*; mens quippe Ecclesiæ fuit, punire crimen hæreseos propriè dictæ: atqui hæresis propriè dicta consistit in errore intellectuali, juncto cum pertinacia, vi cujus hæreticus etiam post veritatem satis sibi propositam rennuit acquiescere Ecclesiæ.

Inde fit, quòd hæreticus merè materialis, qui scilicet sine pertinacia, vel ex mera ignorantia licet culpabili errat, non incurrat excommunicationem Bullæ Cœnæ; consequenter si agnita veritate velit amplecti fidem salvificam, non indigeat absolutione ab hac censura, sed possit absolvi à quolibet, prout bene advertunt Laymann *lib. 2. tr. 1. c. 13. n. 4.* Pirhing *tit. de hæreticis n. 16.* Reiffenstuel *loc. cit. n. 239.*

139. Notandum insuper est 2dò, ad hanc excommunicationem Bullæ Cœnæ incurrendam insuper necessariò requiri, ut hæreticus formalis hæresin internam, id est, mente conceptam *exterius manifestet*, & quidem assertivè ac distinctè, *per actionem mortaliter malam* eandem profitendo, sive dein verbis, sive factis, sive aliis signis &c.

Ratio est: quia hæc excommunicatio fuit lata ad puniendum peccatum externum hæreseos: atqui tale non committitur, quamdiu hæreticus suam hæresin non manifestat per actionem externam mortaliter

ma-

malam: ergo talis actio necessariò debet supponi. Et ita tenent Sanchez *lib. 2. mor. c. 8. n. 7. & 17.* Laymann *lib. 2. tract. 1. cap. 14. n. 3.* Sporer *tr. 2. in decalog. cap. 3. sect. 2. n. 23.* Reiffenstuel *lib. 5. Decret. tit. 7. n. 242.*

Quæres 2dò, utrum præfatæ poenæ tam spirituales, quàm temporales à Laicis & Clericis æqualiter incurrantur in nostra Germania?

R. Poenas temporales seu civiles non 140.  
æqualiter ab utrisque incurri, bene verò  
2. Poenas Canonicas. Ratio prioris est:  
quia Lutherani & Calvinistæ vi pacificatio-  
num in Comitibus Augustæ 1555. & Osnabrugis 1648. Obtinuère liberam potesta-  
tem exercendi suas respectivè Religiones:  
ergo ob harum exercitium nullas incurrunt  
poenas civiles. Contrarium nihilominus  
etiam quoad hoc tenendum est de hæreticis  
in Imperio non toleratis, quales sunt  
Zwingliani, Hussitæ, Anabaptistæ, & alii  
omnes præter Lutheranos (qui alio nomi-  
ne Evangelici) & Calvinistas (qui Refor-  
mati appellari volunt, potiùs tamen mére-  
rentur dici deformati) quibus cum nihil  
prorsus faveant mox allegata pacta, nequa-  
quam liberi sunt à poenis civilibus mox re-  
censitis, tametsi cum his etiam mitiùs plo-  
rumquè procedi soleat in hisce partibus no-  
stris. Videatur P. Pichler ubi *suprà n. 3.*

141. Ratio autem 2di hæc est: quia pœnæ Canonice non dependent ab arbitrio potestatis civilis, sed ab arbitrio Summi Pontificis: atqui Summi Pontifices nunquam approbârunt allegatas pacificationes, utpote nimis favorabiles hæreticis & præjudiciosas juribus Ecclesiasticis: imò verò Innocentius X. in Bulla *Zelo domus DEI* pacem Westphalicam nempe Osnabrugis & Monasterii initam expresse reprobavit. Quocirca Sanchez lib. 2. moral. c. 10. num. 9. Laymann lib. 2. tr. 1. c. 14. n. 5. fin. alii-que plures rectè advertunt, easdem pœnas extendi quidem ad credentes, receptatores, defensores & fautores hæreticorum, ab his tamen probabilius non incurri, nisi ex tali favore aut receptione sequatur malus effectus: quia (inquit Sanchez) ubi aliquis principaliter excommunicetur, & accessorie mandantes, consulentes vel faventes &c. juxta communem Doctorum hi non incurrunt eandem pœnam, nisi effectu secuto: atqui vi Bullæ Cœnæ jam sæpius allegatæ primariò feriuntur hæretici, & in horum odium ac detestationem secundariò etiam Eorundem fautores ac receptatores: ergo &c.

Ergonè, inquires, etiam in Germania nostra hæretici, eorundemque filii habendi sunt velut irregulares?

¶ Pro-

n. Probabiliter non sunt habendi tales; 142.  
nisi ipsorum hæresis, & quidem formalis  
notoria sit notorietate juris vel facti, & pro-  
pterea reputentur infames. Ita contra Reif-  
senstuel, Azorium, Sanchez & alios plures  
tenent Laymann *lib. 1. tr. 5. part. 5. c. 4.*  
*num. 12.* Castropalao *tract. 4. disp. 4. punct.*  
*4. 4.* La Croix *lib. 6. part. 2. num. 2218.*  
Pichler in *Compend. Jurispr. lib. 5. tit. 7. n.*  
*3.* & noster P. Cherubinus Mayr in *suo*  
*Trismegisto dist. 1. c. 3. num. 109.*

Ratio est: quia hæc irregularitas (uti &  
inhabilitas ad beneficia & officia Ecclesia-  
stica) videtur fundari in infamia, quam in  
conversis ad fidem Catholicam, & in filiis  
hæreticorum generalis consuetudo Germa-  
niæ sustulisse videtur, inquit P. Pichler *loc.*  
*cit.* id quod & praxis Germaniæ confirmat.  
in qua teste Laymanno *l. cit.* hæretici con-  
versi, eorumvè filii circa omnem dispen-  
sationem irregularitatis non raro ordinantur.  
Illud autem extra omnem controversiam  
esse debet, hanc pœnam irregularitatis mi-  
nimè incurri ob hæresin non notoriam; in-  
famia quippe est plurium prava opinio cir-  
ca aliquem: ergo hæresis debet esse noto-  
ria ad hoc, ut hominem reddere possit in-  
famem: ad hæresin autem notoriam teste  
Cl. P. Böken *tit. de hæret. n. 20.* non suf-  
ficit constare, aliquem vixisse v. g. infecta  
Lutherana, sed debet esse publicè noto-

L. 5

rium.

rium, cum fuisse hæreticum *formalem*, & probabilissimè insuper accedat sententia saltem declaratoria criminis, necessum est.

Quæres 3tiò, quænam sint pœnæ Schismaticorum, & Apostatarum à fide?

143. R. Apostatæ à fide, utpote veri & formales hæretici, iisdem cum hæreticis pœnis subjacent: quemadmodum tamen secundum dicta ad incurrendam hanc excommunicationem non sufficit hæresis merè mentalis, sed requiritur externa, id est ad extra manifestata; ita pariter ad eandem incurrendam non sufficit Apostasia merè mentalis, sed debet esse exterius actu quodam mortaliter peccaminoso manifestata. Porro Schismatici, esto sint puri, id est, non simul hæretici, nihilominus ipso factò incurrunt excommunicationem Bullæ Cœnæ Summo Pontifici reservatam: & si crimen sit publicum, insuper incurrunt infamiam, eique annexam irregularitatem, nec non privationem beneficiorum & officiorum Ecclesiasticorum cum inhabilitate ad alia consequenda, prout diversis juribus allegatis probat Reiffenstuel *lib. 5. decret. tit. 8. n. 9.*

Quæres 4tò, quinam præter S. Pontificem possint absolvere ab hæresi, & excommunicatione eidem annexa?

144. Ante resolutionem hujus quæsi adverto breviter cum nostro V. P. Cherubino Mayr

110X



*mox supra cit. dist. 1. cap. 3. §. 1. punct. 14.* in ordine ad absolutionem distinguendum esse inter crimen hæresis occultum, & ad forum contentiosum nondum deductum, & inter publicum, atque ad forum contentiosum deductum. Occultum dicitur, quòd licet uni vel alteri, vel etiam pluribus constet, ita, ut etiam per testes probari potest, nondum tamen famâ in aliquo Collegio, vel civitate percrebuit, aut certè ad iudicium delatum nondum fuit.

Publicum è contra appellatur illud, de quo majori parti vicinæ vel alicujus communitatis jam constat: quin immo, cum versetur in materia odiosa, multi Doctores (nominatim Palao *tr. 4. disp. 4. pu. 3. §. 2. n. 15.*) existimant ad hoc, ut delictum dicatur publicum, insuper requiri nedum denuntiationem & citationem rei, sed etiam contestationem litis coram legitimo Judice factam, licet hoc alii negent. Illud tamen mihi videtur satis certum, etiam in hisce partibus nostris, nominatim in hac Archiepiscopatu Salisburgensi, ubi specialiter solet inquiri in hæreticos, illum dicendum esse hæreticum publicum, qui in hoc puncto Reverendissimo Consistorio seu Officio Ecclesiastico nedum denuntiatus, sed etiam confessus, aut certè convictus est de crimine.

Ad.

145. Adverto insuper 2dò, absolutionem hanc dari posse vel pro foro externo duntaxat, vel pro ex- & interno simul. Pro externo censetur dari, quando quis abjurata hæresi & injuncta salutarî pœnitentiâ auctoritate sedis Apostolicæ reconciliatur Ecclesiæ *coram Ecclesia*, in ordine ad recuperandam cum ipsa communionem externam tam publicam, quàm privatam immunitatêmque à pœnis in foro externo infligendis.

Pro foro autem interno duntaxat tunc censetur dari absolutio, quando quis *coram Deo* reconciliatur Ecclesiæ in ordine ad recuperandam participationem bonorum spiritualium animæ, quibus vi excommunicationis exstitit privatus: quò non obstante adhuc in foro publico & coram facie Ecclesiæ possit puniri à Judice. Porro hoc forum internum à Doctoribus solet distinguì in *forum pœnitentiæ*, & in *forum conscientiæ*. Forum pœnitentiæ est ipsum forum Sacramentale, primariò ac per se institutum à Christo ad absolutionem à peccatis; in quo proin solus Sacerdos potest agere Judicem. Forum conscientiæ autem est illud, in quo præcisè in bonum animarum sine strepitu judiciali exercetur spiritualis potestas sive absolvendi, sive etiam dispensandi, ita, ut hæc valeat coram Deo, sive dein id fiat intra, sive extra confessionem, sive publicè coram aliis, sive privatim. Ita vix non  
in

in iisdem terminis noster Cherubin Mayr l. cit. Secutus Rodriquez qq. *RR. tom. 1. q. 61. art. 10. Sanchez lib. 8. de matr. disp. 34. n. 29. Palaum & alios.* His prænotatis jam resolvendum est 1. quidnam Episcopi? 2. quidnam Superiores Regulares respectu suorum? & denique quidnam alii Confessarii tum privilegiati, tum etiam non privilegiati valeant? intelligendo igitur quæstionem de Episcopis

¶ Episcopi in locis, ubi non viget inquisitio hæreticæ pravitatis (utî revera in hisce partibus nostris non viget) possunt hodie dum tanquam delegati sedis Apostolicæ absolvere hæreticos ab excommunicatione pro foro externo, modò non sint Hæresiarchæ, id est, inventores hæresum, aut Relapsi. 2dò. Insuper pro foro interno Episcopi in Regionibus ab Urbe remotioribus (veluti sunt Episcopi Germaniæ, Belgicæ &c.) regulariter loquendo ratione impedimenti perpetui vel diuturni adeundi Summum Pontificem, possunt ab eadem hæresi, & excommunicatione ob eandem incurfa absolvere suos subditos. Ita quoad utramque partem hodiedum tenent communissimè nedum Theologi, verùm etiam Canonistæ, uti Schmalzgrueber, Reiffenstuel tit. de hæret. §. 7. n. 369. & 372. Sanchez lib. 2. mor. c. 11. n. 2. Palao &c. Prior pars hujus resolutionis habetur decisa cap. ut Offi-

*Officium. 11. in princip. vers. si verò hoc. s. in 6to. 2da verò pars fundatur in cap. Enoscitur. 13. & c. quamvis 58. de sent. excomm.* Cui insuper suffragatur ratio: nãm impedimentum perpetuũ vel ad longũ tempus in ordine ad obtinendam vel dandam absolutionem meritò æquiparatur articulo, seu etiam periculo mortis, quandoquidem taliter impeditus moraliter certus est, se ante mortem adire non posse Summum Pontificem pro obtinenda absolutione, atqui stante tali impedimento perpetuò casus Papalis fit Episcopalis, seu devolvitur ad tribunal Episcopi &c. ergo hi possunt in simili casu absolvere. Et certè frustra omnino immò periculosè expectaretur, vel etiam differeretur absolutio usque ad articulum mortis: posset enim contingere, ut moreretur sine absolutione. Illud tamen circa hoc insuper observandum est, absolutionem scilicet pro foro externo datam prodesse pro foro interno in tantum, quatenus excommunicatione semel sublata postea quilibet Confessarius approbatus potest absolvere à peccato hæreseos prout DD. citi. communiter notant.

147. Dixi in 2da parte hujus resolutionis, Episcopos remotiores ab Urbe *ratione impedimenti perpetui saltem* posse absolvere suos suaditos, &c. ut per hoc innuerem. non esse omnino exploratum, an Episcopi non

non possint etiam per se absolvere ab isto casu papali. Enimverò certum omnino & apud omnes in confesso est, à Concilio Trident. §. 24. de reform. c. 6. iisdem olim fuisse concessam potestatem, nedum absolvendi ab hæresi occulta, & aliis quibuscunque suspensionibus & casibus occultis, etiam Sedi Apostolicæ reservatis, sed insuper in omnibus irregularitatibus, ex delicto occulto provenientes (excepta ea, quæ oritur ex delicto homicidii voluntarii) dispensandi &c. At verò, an hæc facultas vi Bullæ Cœnæ non sit revocata, immò quot annis Romæ per hujus promulgationem revocetur, acriter hisce temporibus controvertitur inter Doctores; quocirca affirmativam tenent Barbosa, Sanchez, Garcias, Durandus, Pignatelli, la Croix lib. 6. part. 2. n. 1617. Reiffenstuel lib. 5. decret. tit. 7. §. 7. a n. 363. Clericatus de pœnis. decis. 45. n. 5. Viva ad propos. 3. ab Alexandro VII. damnatam. n. 4. Babenstuber tr. 8. part. 6. disp. 6. art. 4. n. 32. & alii plures, hac potissimum ratione ducti: quia in eadem Bulla Cœnæ §. 22. expressè dicitur, quod à prædictis Sententiis (in Bulla scilicet fulminatis) nullus per alium, quàm per Romanum Pontificem, nisi in mortis articulo constitutus - - absolvi possit, etiam prætextu quarumvis facultatum & indultorum; quibuscunque personis Ecclesiasticis, Sacularibus:

bus : & quorumvis Ordinum , etiam Mendicantium , ac Militarium Regularibus . etiam Episcopali , vel alia majori dignitate pradiis &c. &c. Idque etiam dicitur fuisse declaratum nedum à Gregorio XIII. sed etiam à Clemente VIII. Econtra verò negativam (hanc scilicet facultatem per publicationem Bullæ Cœnæ Episcopis non adimi) tenent per multi alii DD. non minùs insignes , quorum 24. refert Barbosa de Offic. & potest Episcopi alleg. 40. n. 21. quæis insuper subscribunt Chapeauville , Pichler , Engel , & alii plures , absolute asserentes , Episcopos per se (præscindendo etiam ab impedimento perpetuo vel casu necessitatis) posse pro foro conscientie absolvere ab hæresi ; idque partim , quia correctio juris vitanda est , quoad fieri potest : atqui hic potest vitari : si dicatur concilium concedere Episcopis facultatem absolvendi pro foro conscientie & censibus occultis , è contra verò per Bullam Cœnæ eandem negari pro foro externo , id est , in casibus publicis , aut ad forum contentiosum jamiam deductis ; partim etiam quia cum de potestate Episcopis semel concessa certò constet , è contra revocatio ejusdem tot viris videatur dubia , debent Episcopi relinqui in sua possessione semel adepta ; præsertim cum etiam de declarationibus allegatis Summorum Pontificum non constet authenticè.

Verum

Verùm quidquid demum de hoc sit, inquit sapienter Pirhing *lib. 5. tit. 7. sect. 2. n. 42.* Sententiam hanc, nempe hanc facultatem non esse revocatam per Bullam Cœnæ, in praxi tutius amplecti possunt Episcopi in Regionibus ab Urbe remotioribus, propter difficultatem adeundi Summum Pontificem : Et hinc Episcopi Germaniæ Lutheranos & Calvinianos ac timiles hæreticos, qui Catholicam fidem suscipere volunt, possunt per se, vel delegatos suos, etiam in foro conscientię absolvere non solum ab hæresi occulta, sed etiam à notoria & publica. Ita Doctor cit. cum Laymanno *lib. 1. tr. 5. part. 2, c. 6. n. 6.*

Quæres 5to, utrum etiam Superiores Religiosi gaudentes jurisdictione quasi Episcopali possint suos saltem subditos absolvere ab hæresi, & excommunicatione ob eandem incurta?

R. ad hoc quæsitum ferè sicut ad prius, 143. scilicet, quòd possint absolvere suos subditos in foro conscientię saltem ratione impedimenti perpetui. Ratio est : quia dicti Prælati Regulares, utpote gaudentes jurisdictione Episcopali vel quasi Episcopali respectu suorum quantum ad potestatem absolvendi possunt idem, quod Episcopi in hoc passu valent respectu suorum : at, hi possunt suos subditos absolvere ab excommunicatione ob hæresin incurta ; ergo idem. *R. P. Elbel. Pars II. de Fide &c.* M ipsum

ipsum possunt Prælati Regulares respectu suorum Subditorum, eò præsertim, ne subditi sub prætextu absolutionis obtinendæ inutiliter vagentur per Orbem. Utrum autem Prælati Regulares id valeant per se, etiam extra casum necessitatis vel impedimenti perpetui? rursus controvertitur inter Doctores.

Multi negativam absolutè tenent \* eò quòd existiment privilegia olim diversis Religionum Superioribus concessa, hodie esse revocata: è contra Hyacinth. Donatus in *rerum Regularium praxi Tom. 1. part. 1. tr. 13. q. 17.* Herincx, Felix potestas *Exam. Confess. Tom. 1. part. 4. c. 5. num. 3377.* allegatis pluribus aliis, quos sequitur noster A. R. P. Kazenberger in *Supplement. II. P. Sargar. Confer. 118. n. 348.* mordicè hodiedum defendunt, hanc facultatem etiamnum competere Prælatis Regularibus respectu suorum Subditorum. Quidquid demum de hoc sit, nobis pro paxi nòsse sufficit, quòd dicti Prælati Regulares (quò nomine solum veniunt intelligendi Superiores majores, uti Generalis, Provincialis, Prælati Ordinum exemptorum, teste Reiffenstuel *tit. de hæreticis §. 9. n. 417.*) possint sive dein per se, sive per suos, absolvere sibi subiectos: & certè idipsum praxis in Germania nostra semper obtinuit, nec faciliè crediderim in hisce partibus nostris



stris ullum fore Religiosum Superiorem tam simplicem vel scrupulosum, qui ob hujusmodi Casum, præsertim occultum, subditum suum vel Romam ableget, vel ad Episcopum pro obtinendo beneficio absolutionis.

Quæres 6to, quidnam circa hæreticorum absolutionem valeant Confessarii, privilegiati, id est, illi, qui (uti solet) Romæ quinquennalem obtinuere licentiam absolventi ab hæresi, & legendi libros hæreticos?

¶ Breviter. Vi facultatis Apostolicæ 149. (cujus exemplar ordinariè dari solitum ad quinquennium videre licet apud nostrum A. R. P. Kazenberger *L. prox. cit. n. 348.*) Confessarii privilegiati possunt sequentia.

1. Legere omnes & quoscunque hæreticorum, ut alios prohibitos libros (exceptis tamen Caroli Molinei, & Nicolai Macchiavelli operibus, ac libris de astrologia judiciaria tractantibus) idque ex fine redarguendi hæreses & errores consutandi.
2. Possunt omnes & singulos utriusque Sexus tam Laicos, quàm Clericos Sæculares, ac cujusvis Ordinis Regulares, Hæreticos, Schismaticos, & à Catholica fide quomocunque aberrantes &c. (non tamen in hæreses post solennem abjurationem hujus schisma, & errores relapsos, vel ad judicium delatos & condemnatos &c. (dum

M a

mo.

modo corde sincero & fide non ficta hæreses, schisma, errores suos & in Sacramentali Confessione detestari sint &c. in-juncta salutari pœnitentia *in foro conscientia duntaxat* absolvere. 3. Insuper vi hujus privilegii iisdem conceditur, ut ab omnibus & singulis Casibus Apostolicæ Sedi, etiam in Bulla die Cœnæ Domini reservatis *de præterito tamen, & usque ad diem quò data fuere litteræ Apostolica*, incurfis possint absolvere.

- Ex quibus liquet, hanc licentiam quinquennalem esse computandam ab illa die, quâ Romæ fuit expedita, non verò quâ fuit recepta : ut si quis obtinuit hanc facultatem Romæ die 4. Januarii expeditam anno 1730. ea non post uti ultra diem 4- Januarii anni 1735.

Cæterum quo sensu intelligenda sit clausula illa : *in foro conscientia duntaxat absolvere &c.* colligi potest, ac debet ex proximè dictis n. 145. Major tamen (ut verum fatear) videtur moveri posse difficultas de sensu alterius clausulæ, vi cujus potestas absolventi ab omnibus & singulis casibus & peccatis Apostolicæ Sedi etiam in Bulla Cœnæ Domini legi solita reservatis conceditur quidem, sed *de præterito, & usque ad diem data præsentium litterarum incurfis &c.* Ex quo videtur inferendum, quòd si ad aalem privilegiatum litteræ Romæ sint datæ

v. g.

v. g. 7<sup>ma</sup> Septembris anno 1732. is non possit durante quinquennio absolvere à dictis casibus papalibus, nisi fuerint incurssi ante dictam diem septimam Septembris. Cum verò ex hoc dicta facultas præsertim in hisce partibus nostris videatur reddi omnino inutilis; rarissimè enim obtinget pœnitens, quæ indigeat absolutione à casu papali jam ab uno vel pluribus annis incurso &c. hinc non abs re à Reverendissimo Domino de Ungeltern Capitulari Campidonensi anno 1733. Agenti Campidonensi in Curia Romana propositum fuit dubium de genuino intellectu præfatæ clausulæ. A quo sequens obtinuit responsum,

*Respondetur ad retroscriptum dubium: non intellegi datam diei, sed datam quinquennii, quò tantum elapso, & computando à die concessæ facultatis, quæ competit in casibus & peccatis reservatis, quæ commissæ sunt NB. tam per totum tempus præteritum, quàm post datam diei obtentæ facultatis, nempe durante toto quinquennio, quod unice sumit initium à dicta data. Et hac est dubii resolutio certissima.*

*Abbas Josephus de Gentilibus Mogunt. & Campidon. Consil. & Agens ex Marchionibus de Grannati &c.*

Si de reliquis clausulis dubium tibi moveatur, consulas velim nostrum A. R. P. Kazenberger loc. proximè citato.

Quæres 7timò, an ergo alij Confessarii non valeant absolvere ab hæresi, & excommunicatione propter eam incurâ?

150. R. Per se loquendo non possunt, ne quidem in casu impedimenti perpetui. Ratio est: quia pro tali casu potestas absolvendi devolvitur ad Episcopos per *cap. de cætero & c. Ea noscitur. de Sent. Excomm.* ergo vel ab his, vel ab eorum delegatis, vel denique ab aliquo privilegiato ceu delegato Summi Pontificis oportet petere, & impetrare absolutionem. Nihilominus in casu, quò vel mora temporis, vel distantia viarum, vel aliæ circumstantiæ non permittunt accessum ad Episcopum vel alium, privilegiatum, jam quilibet Confessarius poterit absolvere, juxta *communissimam Doctorum*, quam tenent Tambur, *de casib. reserv. c. 12. §. 2. n. 28. & 34. Stoz lib. 2. num. 68. Reiffenstuel de hæres. §. 8. n. 397.* Ratio colligi potest ex proximè dictis: quia casus necessitatis æquiparatur articulo mortis: atqui in articulo mortis, quivis Confessarius potest absolvere: ergo &c.

Quæres denique octavò, quinam in irregularitate ob hæresin contracta valeant dispensare?

151. R. I. Suppositò, quòd secundum superius *num. 142.* dicta irregularitas non incuratur, nisi ob hæresin publicam, vel po-

potius ob infamiam inde redundantem, cum hujusmodi hæretico infami nequidem Episcopus dispensare valet.

Ratio est: quia per Tridentinum SS. 24. *de Reform. c. 6.* Episcopis solum conceditur facultas dispensandi in irregularitatibus ex delicto occulto provenientius: ergo si hæresis supponatur publica, vel potius reddere quempiam publicè infamem, Episcopus cum eodem dispensare nequit.

Illi nihilominus Doctores, qui existimant hanc irregularitatem ob hæresin etiam occultam seu non notoriam contrahi, coguntur fateri, Episcopum in eo casu posse dispensare. Et ita sentiunt Sanchez *lib. 2. mor. c. 25. n. 17.* Palao *tr. 4. disp. 4. pññt. 4. num. 3.* Felix Potestas in *Exam. Confessar. Tom. 1. par. 4. c. 5. num. 3338.* Nec mirandum; quia Doctoribus hisce praxis Germaniæ non fuit nota. Hinc sapienter Pirthing *de hæret. sect. 3. n. 47. circa finem:* consuetudinem, quæ in his septentrionalibus partibus viget, secundum quam Episcopi ex hæresi ad Fidem Catholicam conversos, & ab ea absolutos ordinare solent, validam, ac licitam esse; quia tales neque in foro civili à publicis dignitatibus & officiis excluduntur.

¶ Jam 2dò, ad idem quæsitum. Præ-152  
lati Regulares Mendicantium cum suis subditis dispensare possunt in irregularitate ob-

hæresin etiam notoriam contracta. Ratio est : quia vi diversorum privilegiorum, videndorum apud nostrum Herincx *part. 2. tract. 3. disp. 6 q. 7. num. 191.* hi possunt dispensare cum suis subditis in omni irregularitate, excepta illa, quæ ex homicidio publico est contracta. Neque quoad hoc constat de aliqua revocatione privilegiorum facta ab aliis Pontificibus subsequenter ; ergo &c.

## §. II.

Proponuntur & breviter resolvuntur Casus practici de Absolutione ab hæresi &c. &c.

### CASUS PRIMUS.

**T**itius Religiosus, nescio quibus de causis, Ordinem suum deserens aufugit in quandam civitatem Acatholicam, ubi non quidem amore Fidei Lutherana ( utpote quam pridem noverat esse falsam ) sed potius intuitu sustentationis sibi necessaria impetranda cogebatur sese gerere velut unum ex illis, utputa nedum Ecclesiam eorum frequentando, verum insuper Cæna Sacrilega communicando aliquoties. Nec desuere è Lutheranis etiam, qui, utpote probe gnari eum fuisse Religiosum (curiositatis, an verò veritatis indaganda causâ, ignoro) sapius

sapiùs interrogârunt Titium, an reapse crederet, etiam illos, qui in fide Lutherana moriuntur, posse salvari, quibus ille, licet mala fide, & conscientia multùm remurmurante, respondit affirmativè. Denique partim præsens status sui miseriis excitatus, partim etiam superni luminis radiis illustratus, oculos aperuit, errorem suum agnovit, & ovicula vagabunda, immodò perditâ sponte rediit ad suum Pastorem, vel maximè dolens de eo, quòd nonnullis A catholicis sciscitantibus responderit, eos etiam in sua secta, Lutherana scilicet, posse salvari. Jam ad nostrum institutum (relictis aliis pluribus dubiis, quæ circa hanc speciem facti possent moveri) quærere licet 1. An Titius inciderit excommunicationem? 2. An jamjam reversum Prælatus Regularis possit absolvere, vel quidnam agendum?

¶ Ad primum. Si Titius supponatur 153. fuisse Alumnus nostræ Sacræ Religionis Seraphicæ, dicendum, quòd non unam duntaxat, sed duplicem inciderit excommunicationem. Primam quidem (non reservatam S. Pontifici) ratione Apostasiæ ab Ordine per statuta general. c. 6. §. 20. num. 2. Secundam verò (Summo Pontifici reservatam) ratione Apostasiæ à fide. Ratio hujus est: quia cum participatio Communionis sit actus singulariter protestativus ipsius Religionis; hinc non abs ratione quisquis de Communione Lutheranorum

M §

par

participat, præsumitur ipsô factô pro foro saltem externo eandem sectam Lutheranam profiteri, Catholicam verò fidem negare: consequenter dicendum est, quòd saltem pro foro externo habendus sit velut hæreticus & excommunicatus vi Bullæ Cœnæ; idque tantò solidius, quantò minus de Titio præsumere licet, cum fuisse hæreticum merè materiale, aut ex mera ignorantia id practicasse.

154. Dixi: Si Titius supponatur fuisse *Alumnus nostra Religionis Seraphica &c.* Enimvero si supponatur fuisse alterius Ordinis, equidem in foro externo præsumetur incidisse excommunicationem Bullæ Cœnæ, ob rationem jam datam. Utrum verò vi Apostasiæ præcisè insuper inciderit alteram excommunicationem, unusquisque Religiosus nôsse debet ex particularibus constitutionibus suæ Religionis circa Apostatas factis. Quòd enim hujusmodi vagabundi & Apostatæ à suis Superioribus puniri possint, imò debeant, constat nedum ex Concilio Tridentino *SS. 25. de Regular. c. 4.* Sed insuper ex diversis Summorum Pontificum Bullis, videndis tum apud nostrum Rodriquez in Bullario, tum etiam apud Kerkove in *Commentario super statut. general. cap. 6. §. 20. n. 1.* Immo verò teste P. Portel in *dubiis Regular. V. Apostata addit. num. 4.* Julius II. excommunicatione refert;



reservata Sedi Apostolicæ punit Augustinienſes Apoſtatas, qui infrâ octo dies mandante Generali Ipſorum ad Conventum non redierunt.

§. jam ad 2dum quæſitum hujus Caſus, 155.  
Poſteſt Superior Regularis hujusmodi Apoſtatam ( datò quòd fuerit ex noſtris ) abſolvere, nedum ab excommunicatione ratione apoſtaſiæ incurſa, verùm etiam ab excommunicatione Bullæ Cœnæ, quam ſecundùm dicta in foro externo ſaltem ſupponitur incurſiſſe.

Ratio prioris liquet ex noſtris ſtatutis generalibus *loc. cit. n. 8.* ubi dicitur: cùm hujusmodi Apoſtatæ revertuntur, ſtatim Incarcerentur, & publicè coram fratribus cum pſalmo Miſerere mei Deus &c. virgis ſeu flagellis percutiantur, & ab excommunicatione abſolvantur. Ratio autem poſterioris pariter colligi poſteſt ex dictis ſuprà *n. 148.* Quia Prælati Regulares, tam per ſe, quàm per ſuos delegatos reſpectu ſuorum ſubditorum quantum ad hoc poſſunt idem, quod poſſunt Epiſcopi reſpectu ſuorum: atqui in caſu impedimenti perpetui vel diuturni poſſunt Epiſcopi ſuos abſolvere ab excommunicatione Bullæ Cœnæ juxta communiffimam DD. videndam apud Laymann *lib. 1. tr. 5. part. 2. c. 6. n. 5.* Reiffenſtuel Schmalzgrueber & alios. Neque verò neceſſum eſt. ut in ſimili caſu vel Epiſcopus,  
vel

vel Superior Regularis scribat Romam vel illuc mittat procuratorem; quia jura solum exigunt personalem comparitionem delinquentis: ergo cum Religiosus ex hisce partibus nostris id moraliter non possit, dicendum potius est, quod Superior Regularis possit subditum suum absolvere ab hac excommunicatione Bullæ Cœnæ.

Adde insuper ex dictis n. 148. Prælati Regularibus per se hanc potestatem competere vi diversorum Privilegiorum videndorum apud Felix Potestas loco prox. citato à n. 3372. de quibus cum certò non constet, quod fuerint revocata, manet hodieum probabile ex principiis directis, hanc potestatem iisdem competere: at ubi ex principiis directis probabile est, Superiori vel Confessario competere potestatem absolvendi, ibi ex principiis reflexis fit moraliter certum, quod valeant absolvere, quandoquidem in simili casu Ecclesia certò suppleat jurisdictionem: ergo &c.

At quid, si talis Religiosus sive sponte reversus, sive etiam contra voluntatem propriam retractus proiestatur, se non fuisse Apostatam, propterea que nec indigere, neque etiam velle absolvi, poteritne hoc non obstante Superior procedere ad absolutionem validam?

156. R. Potest pro foro saltem externo absolvere ab excommunicatione, licet non à pec;

peccato. Ratio est: quia sicut censura ferri potest in invitum; ita prorsus nihil obstat, quo minus absolutio ab eadem, velut actus jurisdictionis voluntariæ, dari possit invito; quandoquidem hæc absolutio præcisè dependeat ab arbitrio Superioris. Ita D. Thomas 4. disp. 18. q. 2. art. 5. Sayrus lib. 2. c. 21. n. 5. quos citat & sequitur R. P. Elias à S. Francisco in *idais Theolog. part. 2. dist. 1. Serie 6. sect. 2. §. 4. n. 2.*

## CASUS SECUNDUS.

**S**empronia vetula carnalibus Lutheri documentis inescata cum aliis multis emigrantibus annò abhinc proximè elapsò tuguriolum suum in montanis consitum deseruit: at, ubi Salisburgum venit, lethali morbo oppressa, gradum sistere coacta fuit: Tempore verò infirmitatis à nonnullis tum secularibus, tum etiam Religiosis visitata, tandemque ut abjurata Lutheri secta saniora sequeretur consilia, persuasa fuit. Deposita haud multò post professione solenni fidei catholica, & recuperata utcumque demum valetudine ad proprios lares redire non tam jussa, quàm permissa fuit; verùm paulò post suum reditum nedum filium suum, sed & alios plures in eandem sectam pertrahere pro viribus conata fuit. Jam ad nostrum propositum dubitare licet 1. *Utrum Sempronia inciderit excommunicationem Bulla Cana;* 2. *An vel*

*vel à quonam possit absolvi, casu quo verè pœnitens peteret hanc gratiam?*

157. R. ad primum, minimè ambigendum, quin Sempronia inciderit excommunicationem Bullæ Cœnæ; tum quia in fide catholica nata Lutheri sectam postea amplexa fuit; tum etiam quia insuper conata fuit alios seducere in eandem sectam: neque etiam de eadem præsumere licet, fuisse hæreticam materiale duntaxat; procul dubio enim tum ex Catechesi aliisque Concionibus; tum etiam ex particularibus instructionibus eorum, qui saniora suasere consilia, potuit ac debuit capere veritatem & soliditatem fidei Catholicæ, cui tamen pertinaciter sese opposuit. Unde

158. R. jam ad 2dum cum distinctione. Vel enim post depositam solennem fidei Catholicæ professionem Sempronia fuit juridicè relapsa in hæresin, ita scilicet, ut de tali relapsu seu etiam nisu & attentatione seducendi tam proprium filium, quàm alios etiam, fuerit judicialiter denunciata, & confessæ vel saltem convictæ (prout relapsum hunc juridicum explicat Reiffenstuel *lib. 5. decret. tit. 7. §. 6. n. 321.* R. P. Kazenberger *in Supplem. II. P. Sargar. Confer. 118. n. 347. sub litt. C. & alii*) vel verò supponitur merùm theologicè relapsa, id est in foro conscientie præcisè, ita scilicet, ut de tali relapsu Ecclesiæ non constet? si hoc po-

posterius: potest pro foro conscientie nedum ab Episcopo, verum etiam ab aliis privilegiatis, illis scilicet, qui Romæ quinquennalem licentiam obtinere, absolvi; quia hæc facultas expresse continetur in Rescripto Romæ dari assueto, prout videre licet tum ex dictis n. 149. tum etiam apud nostrum A. R. P. Kazenberger citatum in *Supplem. II. P. Sargar. n. 347.* Si verò supponatur illud prius (quod quidem meo iudicio ex relata specie facti verosimilius apparet) Sempronia per se loquendo neque ab Episcopo, neque etiam ab alio privilegiato potest absolvi. Ratio est: quia in illa licentia Romæ dari solita semper excipi solet contra Relapsos (juridice scilicet, prout intelligit Castropalao tr. 4. disp. 6. punct. 2. n. 7. & 8. Conformiter ad c. 1. *accusatus de hæret. in 6to*: ergo si Sempronia supponatur juridice relapsa profecto nequit absolvi ab ullo privilegiato, saltem per se loquendo; nam juxta vulgare illud, & inter Doctores receptissimum axioma: *privilegium tantum valet, quantum sonat, & non ultra.*

Dixi tamen, Semproniam *per se loquendo* 159. absolvi non posse; per quod minimè intendendo negare, sed potius innuere, eam saltem per accidens ratione scilicet impeditenti perpetui accedendi Summam Sedem, posse absolvi, modo verè contrita, & pœnitens errorem suum agnoscat & falsam Lutheri

theri sectam detestetur; Etenim universaliter in hisce partibus nostris, utpote valde remotis ab Urbe hujusmodi accessus censetur moraliter impossibilis 1. mulieribus, & vel maximè monialibus. 2. debilibus, infirmis, & pauperibus, quibus vel vires, vel peculium deficit: idem ob eandem rationem 3. tenendum est de impuberibus. 4. insuper talis accessus reputatur moraliter impossibilis iis, qui non sunt sui juris; uti servus aut filiusfamilias. item 5. iis, qui sunt adstricti ad curam animarum, vel aliud officium temporale, quod sine periculo gravioris damni deserere non possunt. Ita *ex communi DD.* Felix Potestas *loc. cit. n. 3348.* Quin etiam in mortis articulo quilibet Sacerdos talem Personam verè contritam ac dispositam directè potest absolvere; hanc enim facultatem Concilium Tridentinum *ss. 14. c. 7.* approbante S. Pontifice disertè concedit sequentibus omnino verbis: *ne hac ipsa occasione* (scilicet ob reservationem caluum, de qua ibi agitur) *aliquis pereat, in eadem Ecclesia custoditum semper fuit, ut nulla sit reservatio in articulo mortis; atque ideo omnes Sacerdotes quoslibet penitentes à quibusvis peccatis & censuris absolvere possunt.* Quod verò dictum est de constitutis in articulo mortis, rationabiliter omnino à Doctoribus extenditur ad constitutos in probabili & morali mortis peri-

periculo, quales censentur ii, qui luscipiunt longam navigationem, vel conflictum bellicum ineunt, item mulieres partui proximæ &c. de quibus videri possunt Sanchez *lib. 2. moral. c. 13. num. 1. Palao disp. 4. punct. 3. §. 5. n. 2. & 3.*

### CASUS TERTIUS.

**C**Aja mulier primò gestans uterum & partui jam proxima accessit suum Pastorem animò confitendi, & obtinendi ab eo absolutionem Sacramentalem: timuerat enim, ne fortassis paululum illud mellis quod gustaverat, cogeretur solvere impendio vita. At verò Pastor (nescio quo spiritu, quoque zelo ductus, dicitur repulisse Cajam, nec voluisse excipere illius Confessionem,) eò quòd sibi de hæresi fuerit valde suspecta, sin minùs convicta. Id tamen solatii causâ Caja respondisse fertur, ut, si contingeret eam in partu periclitari, curaret se vocari, tunc verò se compariturum, & absolutionem daturum. Casum hunc à quibusdam viris haud pridem intellexi, an verò per omnia fidem mereatur, nolim ego decidere, sit proin fides penes auctores. Placuit nihilominus eandem referre, quia practicus videtur & contingere natus; quò supposito ad nostrum propositum dubitare licet 1. An Pastor Cajam potuerit, vel omnino debuerit absolvere? 2. An vel qualiter deliquerit retusando ad-  
*R.P. Elbel. Pars II. de Fide &c. N mi*

*ministrationem hujus Sacramenti? & 3. quid de ejusdem responso tenendum sit?*

160. R. Ad primum. Pastor in hoc casu nedum potuit, sed insuper debuisset excipere Confessionem Cajæ, & ritè dispositam absolvere, non obstante suspitione vel omnimodo lapsu in hæresin. Quòd potuerit, ex proximè dictis liquet: quia secundum Tridentinum proximè allegatum in mortis articulo vel morali ejusdem periculo nulla est reservatio: atqui Cajæ utpote primò gestans uterum & partui jamjam vicina, erat in tali constituta; ergo datò etiam & supposito, quòd hæresin incidisset, potuit absolvi, & per consequens Pastor proprius nedum potuit, verùm etiam tum ex charitate, tum ex justitia etiam debuit eandem audire, ac ritè dispositam absolvere. Videantur, quæ diximus in *Theolog. Sacram. part. 2. confer. 18. n. 461.*

161. R. Ad 2dum quæsitum, hunc Pastorem negando administrationem hujus Sacramenti per se loquendo (nisi scilicet aliæ circumstantiæ, de quibus mihi non constat, concurrerint) deliquisse graviter nedum contra charitatem, verùm insuper contra justitiam; utramque enim negando hoc Sacramentum summopère necessarium graviter læsit, veluti constare debet ex dictis. Videantur de hac obligatione la *Croix lib. 2. n. 174. & lib. 3. p. 1. à num.*



754. Barbosa *de offic. Parochi part. 1. cap. 17. n. 15.* Vel Marchantius *noster in trib. Tom. 3. part. 1. tract. 9. tit. 2. q. 6. §. 2. R. 1.*

¶ Ad 3tium quæsitum, illud respon- 162.  
sum Pastoris (si tamen ita, ut fertur, datum fuit: nam de hoc merito dubitare licet) illud inquam responsum fuisse omnino ineptum & imprudens. Vel enim Cajam habuit pro hæretica merum materiali, vel pro formali etiam? si primum: hæc non fuit incapax absolutionis; cum propterea nullam prorsus incurrerit excommunicationem secundum hætenus dicta: ergo potuit, & debuit absolvi. Si 2dum tunc vel fuit parata resipiscere vel non? si non, ne quidem in mortis articulo potuisset absolvi, ut de se liquet. Si autem fuit parata resipiscere (prout præsumi debuerat; quandoquidem venerit ad Pastorem animò poenitendi & obtinendi absolutionem Sacramentalem) rursus de se liquet, Pastorem pessimè fecisse, negando eidem administrationem hujus Sacramenti, vel eam differendo usque ad actuale & præsentissimum vitæ periculum: nunquid enim prudenter sperare licuit hanc foeminam partus doloribus oppressam imò cum morte actualiter luctantem, magis fore dispositam ad Confessionem, & seriam peccatorum retractionem, quam eo tempore existit,

quò sana adhuc & incolumis propria sponte suum Pastorem convenit obtinenda absolutionis gratia? an verò Pastor ipse majori cum decencia hoc Sacramentum administrare potuit parturienti, quàm in Ecclesia suppliciter flectenti? Quis, amabo! vel oculis non cernat, vel non palpet omnino manibus ineptiam hujus responsionis?

## §. III.

## Corollaria ex dictis inferenda.

163. **C**olliges ex hæcenus dictis primò in ordine ad absolutionem à censura dandam, gnaviter attendendum esse à Confessario, & distinguendum inter hæreticum formalem & materiale, & rursus inter hæreticum merè internum, atque inter in- & externum simul; hæretici enim materiales secundum dicta superius *num. 138.* non incurrunt hanc excommunicationem, & hoc ipsò neque indigent absolutione, sicut nec hæretici merè interni secundum dicta *ibidem n. 139.* benè verò hæretici formales, qui suam hæresin exterius actione mortaliter mala manifestarunt.
164. Colliges 2dò, hanc excommunicationem non incurri I. ab eo, qui hæresin men-

mente conceptam manifestat Confessario, vel alteri amico, aut consilii duntaxat, vel instructionis capiendæ gratiâ. Neque 2. ab eo, qui hæresin mente conceptam manifestat in somno, aut plena ebrietate &c. Neque 3. ab illo, qui de sua hæresi loquendo exteriùs loquitur verbis merè indifferentibus, vel ita ambiguè, ut planè colliginequeat, quòd sit hæreticus. Ratio horum omnium est: quia hi omnes vel non manifestant suam hæresin internam, vel certè eam non manifestant exteriùs per actionem mortaliter malam: ergo non incurrunt excommunicationem Bullæ Cœnæ. Videatur Sporer *tract. 2. in decalog. cap. 3. sect. 2. num. 24.* Reiffenstuel *lib. 5. decret. tit. 7. num. 243.* vel Palao *tract. 4. disp. 3. punct. 3. num. 3.*

Colliges ulteriùs 3tò pro praxi, quòd 165.  
si persona quæcunque demum postulans instrui vel converti ad Fidem Catholicam, deprehendatur hætenus fuisse hæretica merè materialis, possit à quolibet Parocho vel Sacerdote approbato absolvi, & quidem sine omni speciali ceremonia vel facultate; quia secundum dicta nunquam incurrit excommunicationem Bullæ Cœnæ.

Nihilominus cùm praxis Germaniæ ferat, ut ii. qui publicè habentur pro hæreticis, utpote inter eosdem nati & educati,

dum cupiunt amplecti Fidem Catholicam, etiam publicè suam sectam abjurent, fideique salvificæ professionem deponant; hinc consulerem, ut talis homo vel ad Reverendissimum Ordinarium, vel si commodius fieri posse videatur, ad aliquem privilegium, potestate absolventi ab hæresi præditum mittatur, præsertim in casu, quo res hæc subjacet periculo publicationis; secus enim talis Sacerdos de facili posset incurrere pericula diversarum incommoditatum.

166. Colliges tandem 4to, nequidem in Germania cuilibet Confessario præsumendum esse, ut absolvat ab excommunicatione propter hæresin formalem incursum. Ratio est manifesta; nullus enim debet præsumere vel attentare id, quod excedit vires potestatis sibi concessæ: atqui certum est, quòd Summus Pontifex noluerit & hodie nolit cuivis Confessario in Germania concessam hanc potestatem, absolventi scilicet à Casibus Bullæ Cœnæ vel ab hæresi: imò verò in eadem Bulla §. 22. sub excommunicationis pœna prohibetur, ne quis (sine speciali facultate Sedis Apostolicæ) præsumat contra tenorem ejusdem Bullæ excommunicatione innodatis beneficium absolutionis impendere.

At verò, inquires, in Germania nostra passim & quotidie Religiosi mendicantes saltem, ad se recurrentes in hæresi natos con-

con-

convertunt & absolvunt, quin Romæ petant licentiam, vel illic reclametur: ergo in Germania nostra quilibet Confessarius approbatus potest absolvere ab hæresi, & ab excommunicatione propter eandem incurfa.

¶ Negando antecedens absolutè, de 167.  
hac enim praxi neque mihi, neque aliis pluribus constat, bene verò de contrario, quòd scilicet in nostra saltem Religione aut Provincia nullus, nisi præditus quinquenniali licentia (quam A. R. P. Minister Provincialis in hunc finem pro aliquibus Romæ petere & impetrare semper assolet) præsumere audeat hujusmodi hæreticum formalem absolvere.

Quin immò hæc licentia absolvendi ab hæresi neque Superioribus nostris, neque etiam Episcopis Germaniæ dari solet absolutè vel illimitatè, sed cum certis quibusdam clausulis; quæ procul dubio frustra adjicerentur, si in Germania nostra quivis Sacerdos gauderet potestate absolvendi, etiam illos duntaxat, qui in eadem hæresi v. g. Lutherana sunt nati & educati; quod quidem meò judicio evidens videtur argumentum, de hac praxi Germaniæ (quam quidam cæteroquin Insignissimus & Clarissimus Author prætendit) vel Sedi Apostolicæ nihil prorsus constare, vel certè contra eandem ipso factò excipi Romæ.

Dices iterum. In Germania hæretici sunt tolerati, etiam in tantum, ut reversi non indigeant absolutione pro foro externo, adeoque censeatur excommunicatio pro foro externo esse sublata generaliter: atqui ea sublata cessat & reservatio pro foro interno: ergo in hoc jam quilibet Sacerdos Germaniæ potest absolvere.

468. ¶ Rursus negando antecedens simpliciter. Enimverò etiam in Germania nostra hæretici communiter habentur pro excommunicatis, esto tolerentur, non quidem in favorem & gratiam ipsorum hæreticorum, sed potius intuitu fidelium, *ad evitanda* scilicet *Scandala* & animarum pericula, ut loquitur Bulla Martini V. edita in Concilio Constantiensi, videnda apud Sylvestrum V. *excommunicatio. s. n. 7.*

Hæc de causa ii, qui ad Fidem Catholicam volunt converti, indigerent absolutione in foro externo, tametsi in hoc absolvi non soleant, fortassis idèò, quia, si fuere hæretici formales, semper solent absolvi publicè saltem pro foro conscientie ab aliquo speciali potestate Pontificia prædito, ut dictum fuit: quæ absolutione semel impertita Ecclesia solet esse contenta, teste Laymanno, apud Pirhing *lib. 5. Decret. tit. 7. sect. 2. n. 42.*

CON-



# CONFERENTIA SEXTA

De Virtute Spei Theologicæ  
Vitiisque eidem oppositis

## SUMMARIUM.

169. Nomine Spei ut sic intelligitur actus desiderii erga bonum arduum.
170. Spes Theologica alia est habitualis, alia actualis.
171. Objectum materiale primum hujus est Deus aliquando beatificæ à nobis possidendus; secundarium verò sunt alia media in hunc finem necessaria.
172. Objectum verò formale motivum est partim Divina Bonitas respectiva, partim etiam promissio fidelissima Dei, vel potius infinita hujus fidelitas in servandis promissis.
173. Spes habitualis tam adultis, quam parvulis etiam est simpliciter necessaria ad salutem: actualis verò adultis duntaxat est necessaria ad justificationem assequendam.
174. Præceptum Spei multiplex est, tam affirmativum, quam negativum.

175. Quā affirmativum etiam obligat ad timorem; cuius quadruplex differentia breviter explicatur.
176. Quā negativum obligat semper ac pro semper, quā affirmativum verò per se primò probabiliter obligat post adeptum usum rationis.
177. Per accidens autem obligat sæpius.
178. Præceptum tamen timoris non videtur per se obligare ad actum explicitum.
179. Virtuti Spei duo opponuntur vitia, scilicet desperatio & præsumptio.
180. Desperatio consistit in abiectione voluntatis de assequenda beatitudine.
181. Præsumptio verò in temera ejusdem expectatione.
182. Resolvitur Casus I. de quodam Concubinario, qui meretricem suam nonnihil tergiversantem tandem ad consensum permovit sequenti epiphonemate: jam sumus perditī: ad quid ergo temperemus voluptatibus nostris.
183. Unde procul dubio commisit peccatum qualificatum contra virtutem spei.
184. Et quid de illis tenendum, qui admoniti ut ab hoc vel illo peccato desistant, respondent: *Pater non possum amplius.*
185. Resolvitur Casus II. de quadam Vetula exosa Marito suo, quæ, quantumvis infirmata renuit sumere medicinam, soli patrocinio B. Virginis Mariæ confisa.
186. An Maritus ejusdem peccaverit, curando quantocyus Sacrum legi pro felici fine suæ Uxoris?
187. Quid iudicii de eo, qui animo seu cogitationibus lapsus se sentiens insuper adjicit opus externum v. g. pollutionem, eò quòd propterea



pterea vix aut certè paulò majorem pœnitentiam sit reportaturus ?

188. Resolvitur Casus III. de quodam, qui apud Principem suum accusatus, proptereaquè officio suo orbatus delatorem provocavit ad duellum.
189. An vel quomodo propterea peccaverint ?
190. An peccaverit, sumendo Sacram Synaxim pro felici successu duelli ?
191. Confessarius circa hujusmodi homines desperabundos præcipuè attendere debet tum ad objectum, tum etià ad motivum desperationis.
192. Magna proin circumspectione & discretionè cum iisdem pro diversitate motivorum est utendum.
193. Quomodo homines, præsertim rudiores practice permoveri possint vel debeant ad actum formalem & supernaturalem Spei ?
194. Præsumptuosis meritò adnumerantur, qui voluptatibus fræna laxantes volunt differre pœnitentiam usque ad articulum mortis.
195. Iisdem pariter accenseri debent, qui neglecto studio vel lectione competente, Cathedralam Ecclesiasticam conscendunt, aut confessionale frequentant &c.
196. Quot modis habitus Spei deperdatur.
197. Et utrum in peccato desperationis ac præsumptionis detur parvitas materiæ ?
198. Quid si Deus alicui revelaret damnationem futuram ?

§. I.

Præmittuntur & breviter resolvuntur quæsitæ scitu necessaria ad resolvendos Casus præscticos circa desperabundos, & præsumptuosos &c.

Quæres primò, quidnam intelligatur nomine Spei ut sic?

169. R. Nomine Spei ut sic intelligi desiderium alicujus boni ardui, possibilis tamen, & verosimiliter aliquando à nobis possidendi. Quodsi bonum illud sit naturale, ita, ut viribus naturæ præcisè possit acquiri, dicetur Spes naturalis & humana, finitatur hominis promissione; Sin autem acquiri non valeat, nisi viribus gratiæ supernaturalis, prout revera Beatitudo supernaturalis aliter obtineri non potest à nobis, dicetur Spes supernaturalis, Divina, & Theologica. Et hæc Spes supernaturalis communissimè dividi solet in habitualement & actualem: de priori loquitur Apostolus 1. Cor. 13. dum ait: *nunc autem manent tria hæc, Fides, Spes, & Charitas &c.* De posteriori loquitur Rom. 8. ubi ait: *Spe salvi facti sumus.* At

Quæres 2dò, quid ergo sit Spes Theologica habitualis, & quid actualis?

170. R. Spes habitualis bene dicitur: *Virtus Theo-*

*Theologica supernaturalis, à Deo infusa, quâ voluntas fertur in Deum, quatenus is est beatitudo nostra, ex fidelissima promissione Divina per media ordinata à nobis obtinenda.*

2. Spes autem actualis rectè describitur, quodd sit certa expectatio futura beatitudinis ex DEI gratia & nostris meritis obtinenda.

Ità Sporer tract. 2. in decalog. c. 4. sect. 1.

n. 1. citans pro eadem opinione Magistrum Sententiarum, Petrum scilicet Lombardum,

D. Thomam 2. 2. q. 18. art. 2. ff. 1. Sco-

tum 3. dist. 26. q. un. quem Scotistæ communiter sequuntur. Explico brevissimè

datam descriptionem Spei habitualis. Di-

citur enim *virtus* ; quia est bona qualitas

mentis &c. dicitur 2. *Theologica* ; quia pro

suo objecto immediatè respicit Deum, &

quidem ut Auctorem supernaturalem bea-

titudinis, unde & *supernaturalis* appellatur.

Dicitur 3. *à Deo infusa* : quia juxta Conci-

lium Tridentinum SS. 6. de justif. Cap. 7.

in ipsa justificatione cum remissione peccato-

rum hac omnia simul infusa accipit homo per

Jesum Christum, cui inferitur, *Fidem, Spem,*

*& Charitatem.* Dicitur 4to, quâ voluntas

fertur in Deum, quatenus is est beatitudo no-

stra, per quæ innuitur differentia Spei ab

aliis virtutibus Theologicis, utputa Fidei,

& Charitatis, prout tum ex hæcenus di-

ctis, tum etiam ex proximè dscendis am-

plius constabit.

Ex

Ex his vero facile liquet descriptio spei actualis ; quocirca illud duntaxat est advertendum, scilicet, quod sit expectatio &c. *ex DEI gratia, & nostris meritis &c.* nullus enim ex solius naturæ viribus sibi sufficeret ad beatitudinem supernaturalem promerendam ; quia teste Apostolo 2. Cor. 3. v. 5. *non sumus sufficientes aliquid cogitare à nobis, quasi ex nobis, sed sufficientia nostra ex DEO est.* At neque debemus beatitudinem nostram sperare præcisè ex Christi meritis, prout perversè faciunt Sectarii nostri temporis, sed insuper ex nostris bonis operibus, cum adjutorio gratiæ ex Christi meritis obtentæ, juxta illud notissimum D. Augustini effatum : *qui fecit te sine te, non salvabit te sine te.* Quin & ipse Salvator noster jam pridem Matth. 16. v. 27. protestatus fuit, se in novissimo die redditurum *unuique secundum opera ejus* NB. non ait secundum merita mea, id est, Christi præcisè.

Quæres 3tio, quodnam sit objectum materiale, & quodnam objectum formale spei divinæ ?

171. R. 1. Objectum materiale primarium & principale est Deus aliquando à nobis beatificè possidendus mediante scilicet visione & fruitione. adò objectum verò secundarium & minus principale sunt alia bona & adjumenta tum ordinis supernaturalis, utpu-

utputa p*ri*ae inspirationes, gratia Sanctificans &c. tum naturalis etiam, quae aliquo modo saltem, remotè scilicet sunt necessaria vel conducentia ad serviendum Deo, & beatitudinem assequendam, uti est panis quotidianus &c. quem Christus voluit à nobis postulari. Ita quoad utrumque membrum tenent communissimè DD. Reiffstuel *theolog. mor. tr. 4. dist. 5. n. 4. & 5.* Sporer, Henno &c. Ratio prioris est: quia illud immediatè & primariò speramus atque desideramus, quod nos perfectè beatificat, & quò adepto nobis erit completè bene: atqui ex sola possessione Dei mediante visione & fruitione beatifica nobis erit completè bene, juxta Scotum *4. dist. 49. q. 2. §. de ado & alios Doctores*: ergo &c. Ratio autem posterioris hæc est: quia quisquis vult efficaciter aliquem finem (prout Deus vult ex sua parte omnium nostrum salutem æternam,) pariter vult media ad eundem finem necessaria: ergo similiter qui beatitudinem ex divina promissione sperat, pariter potest, immò debet sperare media ad eundem finem necessaria; consequenter dicendum, quòd hæc sint saltem objectum secundarium Spei theologicæ.

¶. jam ad alterum membrum hujus quæ-  
siti. Objectum formale motivum Spei nec est sola bonitas respectiva Dei, neque sola  
Dei

172.

Dei fidelitas aut promissio, sed utraque simul ita, ut tam bonitas Dei respectiva, quatenus scilicet Deus nobis est bonus, quàm etiam promissio fidelissima, vel potius infinita Dei fidelitas in servandis promissis ingrediantur rationem objecti formalis motivi. Ita reipsa sentiunt Henno *tr. de Virtut. disp. 5. q. 3. concl. 3. & 4.* ubi pro eadem opinione refert Frassen *q. 1. de spe. concl. 2. n. 10.* & reipsa non aliter sentiunt Sporer *loc. cit. sect. 1. n. 4.* & R. P. Claudius de la Croix *lib. 2. n. 121*: Ratio hujus resolutionis multum controversæ inter Doctores est hæc: quia illud rectè statuitur objectum formale motivum spei, quòd nos allicit seu movet ad sperandum: atqui nec sola bonitas Dei sine promissione, nec sola promissio quantumvis fidelissima sine bonitate nos moveret ad sperandum, bene verò utraque simul: ergo &c. minor hæc ulterius inde probatur & declaratur. Actus enim spei est actus voluntatis seu desiderii: atqui sola promissio non movet voluntatem ad desiderandum, nisi id, quod promittitur, bonum sit, prout quisque nostrum experientià doctus fatebitur: Neque etiam sola bonitas Dei respectiva moveret voluntatem nostram ad efficaciter prosequendam vel desiderandam beatitudinem, nisi hæc nobis fuisset promissa; quia cùm sit quoddam bonum supernaturale vires totius naturæ excedens

cedens, profectò liquet, quòd præscindendo à promissione divina nullus omnino mortalium eandem velut impossibilem efficaciter sperare aut desiderare posset.

Quemadmodum ergo superius *Conf. 1. n. 10.* diximus, objectum materiale primum fidei esse Deum, secundarium verò ea, quæ circa Deum sunt revelata; objectum verò formale fidei motivum esse summam & infinitam DEI veracitatem; eò quòd hæc sciscitanti, *cur Credamus Deo?* prudenter allegetur pro motivo credendi: *quia scilicet Deus infinite verax, falli & fallere nefcius id revelavit*; ita sanè à pari hic rectè statuitur pro objecto formali motivo Spei *bonitas DEI respectiva*, non quomodocunque, sed *ex fidelissima DEI promissione aliquando à nobis obtinenda*: nam ecce! sciscitanti, quid speremus à DEO? prudenter omnino respondemus, nos sperare Deum aliquando beatificè possidendum in Patria; & consequenter etiam media in hunc finem necessaria; ulterius verò interrogati, *cur illam speremus*, & quidem certò ac firmiter, *cùm tamen sit bonum quoddam excedens vires naturæ*? illicò, & prudenter quidem reponimus, nos eandem sperare ac desiderare: quia beatitudo nobis est summè bona, & quia DEUS in servandis suis promissis fidelissimus nobis eam promisit. Ex quo liquet, bonitatem DEI nos permovere ad desiderandum.

*R. P. Elbel, Pars II. de Fide &c. O ran-*

randum, non quidem absolutè (uti hæretici ex solis Christi meritis) sed sub conditione, si nimirum & nos in observantia mandatorum perseveraverimus; summam verò & infinitam DEI fidelitatem in servandis promissis, nos permovere ad certò & firmiter sperandum. Fatendum nihilominus est, quòd sicut revelatio DEI in ordine ad credendum se habet per modum conditionis sine qua non possemus credere; ita in ordine ad actum spei promissio DEI se habet per modum conditionis sine qua non possemus convenienter, aut prudenter sperare, prout sapienter observat noster P. Herincx *part. 3. tr. 1. disp. 10. q. 1. n. 10.*

Quæres 4to, an, vel quomodo Spes theologica sit necessaria ad salutem?

173. R. Spes habitualis est omnibus, tam parvulis scilicet, quàm adultis necessaria, & quidem necessitate mediæ in ordine ad justificationem & salutem consequendam.

Spes verò actualis, seu actus spei est duntaxat necessitate mediæ necessarius adultis ad justificationem & salutem consequendam. Ita *ex communi DD.* Babénstuber *tr. 5. disp. 1. art. 3. n. 2. & 3.* Sporer *tr. 2. in decalog. c. 4. sect. 2. n. 8.* Ratio prioris petenda est ex definitione Concilii Tridentini superius mox *n. 170.* relati, ubi dicitur, quòd homini in justificatione hæc omnia simul infundantur, scilicet *Fides, Spes,*



*Spes & Charitas*, addita mox causali; nam *fides*, nisi ad eam *spes* accedat, & *charitas*, nequē unit perfectē cum Christo, neque corporis ejus vivum membrum efficit: at, si sine *spe* & *charitate* (habituali scilicet) nemo efficitur vivum membrum Christi, profectō dicendum est, quōd *spes* non minus, quā *charitas* habitualis sit simpliciter necessaria ad salutem: ergo &c. Ratio posterioris pariter colligitur, ex eodem Concilio Tridentino *cit.* SS. 6. n. 6. ubi inter dispositiones ad justificationem adultorum necessarias refertur *Spes* sequentibus omnino verbis: *in spem eriguntur, fidentes, Deum sibi propter Christum propitium fore.* Accedit insuper ratio irrefragabilis, hæc scilicet, quōd nemo prorsus ex intētionē consequendæ justificationis suæ peccata efficaciter detestari vel retractare possit, nisi speret, se ex divina promissione veniam eorum consecuturum: ergo ad hanc consequendam simpliciter adultis necessaria est quædam *spes* actualis.

Quæres 1<sup>to</sup>, deturnē etiā præceptum sperandi?

g. Datur tam naturale, quā positivum 174. idque tam affirmativum, quā negativum. *Communis Doctorum.* Affirmativum duplex est, scilicet 1. de eliciendo positivo actu *spei*, 2. de eliciendo actu timoris certo tempore, & casu exigente.

O 2

Ne-

Negativum rursus est duplex, unum de non desperando, alterum de non præsumendo; de quibus paulò post. Jam quòd detur obligatio positiva subin eliciendi actum Spei colligitur apertè satis tum ex Scriptura Sacra *Psal. 4. Sacrificate sacrificium iustitiæ, & sperate in Domino.* Rursus *ad Tit. 2. expectantes beatam Spem &c.* & alibi sæpiùs, tum etiam ex hac ratione: quidquid enim homini adulto ad salutem est necessarium necessitate mediæ, illud ipsum pariter censi debet necessarium necessitate præcepti: atqui secundum mox dicta hominibus adultis Spes actualis ad justificationem est simpliciter necessaria: ergo pariter ad hanc, & consequenter ad salutem censi debet necessaria necessitate præcepti.

Quòd insuper detur præceptum positivum de timore, rursus constat nedum ex Sacra Scriptura. *Eccli. 1. v. 27. Timor Domini expellit peccatum:* & mox *v. 28. additur hæc causalis: nam qui sine timore est, non poterit justificari;* verum insuper vincitur hac ratione: quisquis enim tenetur ad prosequendum aliquod bonum, quod potest de facili amittere, pariter naturali ratione tenetur saltem secundario & ex consequenti timere, ne illud malum oppositum incurrat: ergo cum omnis homo teneatur ad prosequendam beatitudinem ceu bonum quoddam nobis omnibus præfixum per modum

dum præmii & ultimi finis nostri, dicendum consequenter est, quòd teneamur ad saluberrimum illum timorem Domini toties in Scripturis Sacris intimatum, vi cujus scilicet conemur cum *metu & tremore nostram* operari salutem, juxta monitum Apostoli *Philipp. 2. v. 12.* & timere, ne salute excidamus, & incurramus damnationem æternam. Videatur *Sporer tract. 2. c. 4. sect. 2. num. 12.*

Quocirca porro illud insinuandum duxi, 175  
hunc scilicet timorem, Spei communiter annexum, à Doctõribus quadrupliciter distingui, nempe 1. in mundanum. 2. in servilem. 3. filialem. & 4. initialem. *Mundanus* appellatur, vi cujus temporale nocumentum plus timetur, quàm peccatum, quò fit, ut hoc faciliùs incurratur, quatenus illud evitetur. *Servilis* ille censetur, quo peccatum vitatur, ne pœna incurratur; qui rursus à Doctõribus sapienter subdividitur in *purè*, seu (ut alii loquuntur) serviliter servilem, & in *non purè servilem*. hic posterior tunc habetur, quando quis timet peccare propter pœnam, sed ita, ut vi hujus timoris revera deponat & excludat omnem affectum ad peccandum; unde etiam talis timor honestus est & salutaris: ille prior autem, scilicet purè ac serviliter servilis habetur tunc, quando quis timet quidem peccare propter pœnam incurrendam, nihilo-

minus animò ita comparatus est, ut si pœna non esset timenda, actu peccaret (quod propriè servorum est,) ideoque stante huiusmodi timore stat simul actualis affectus ad peccandum, proptereaque censetur inhonestus & insufficiens ad salutem, sicut & ille mundanus mox descriptus. *Filialis* dicitur, quò timetur peccatum, quia est offensa Dei, seu optimi & amantissimi Patris; quâ de causa hic timor, utpote filiis genuinis proprius alio nomine appellari consuevit timor castus, reverentialis, & ingenuus. Denique *initialis timor* vocatur ille, quò quis timet culpam simul & pœnam, seu quo fugit peccatum, partim quia Dei offensivum est, partim etiam, quia pœnæ induktivum. Appellatur autem initialis ideo, quia communiter solet esse initium conversionis, & parare viam ad timorem filialem & castum, prout habetur in Concilio Tridentino SS. 6. de Justif. cap. 6. ubi de dispositione peccatorum in ordine ad justificationem dicitur: *Et dum peccatores se esse intelligentes, à Divina Justitia timore, quò utiliter concutiuntur, ad considerandam Dei misericordiam se convertendo, in Spem eriguntur, fidentes Deum sibi propter Christum propitium fore; illumque tanquam omnis justitiæ fontem diligere incipiunt.* Videatur de hoc Henno tract. de virtut. disp. 5. q. 7. vel Herincx part. 3. tr. 1. disp. 10. q. 4. à n. 33.

Quæ-

Quæres 6to, quoties vel quando obliget præceptum Spei affirmativum, & quando negativum?

R. Præceptum Spei quâ negativum obligat *semper & pro semper*, more scilicet aliorum præceptorum negativorum. 2. Quâ affirmativum verò probabiliter per se obligat 1. quàmprimum homo pervenit ad usum rationis, eidemque Deus sub ratione objecti beatifici seu ultimi finis nostri sufficienter fuit propositus. 2. in articulo mortis, & 3. aliquoties etiam per vitam, ferè quemadmodum superius *Conf. 1. num. 27.* diximus de obligatione eliciendi actum Fidei. Et ita tenent *Viva ad propof. num. 1. ab Alexandro VII. damnatam, num. 3. & 7.* nec non Matthæucci in *cautel. Confess. lib. 1. c. 1. propof. 1. §. 2. n. 23.* alique plures sequenti ratione potissimum ducti 1. quia ex iplo rectæ rationis dictamine absolum videtur asserere, quòd homo nunquam, aut rarò admodum teneatur se convertere in Deum ceu ultimum finem suum, median- tibus scilicet actibus Fidei, Spei, & Charitatis; quam ob causam *Viva loc. cit.* existimat Alexandrum VII. damnasse sequentem propositionem: *homo nullo unquam tempore tenetur elicere actum Fidei, Spei, & Charitatis ex vi præceptorum Divinorum ad eas virtutes pertinentium.* Fatendum nihilominus est, quòd, quemadmodum præ-

cepto Fidei satisfieri potest , & sapissimè satisfit per exercitium aliarum virtutum necessariò præsupponentium vel requirentium actum Fidei ; ita pariter huic obligationi Spei satisfieri possit per actus aliarum virtutum , prærequirentium actum Fidei : nec dubitandum , quin eidem sapissimè satisfiat , dum quis devotè recitat v. g. orationem Dominicam , vel humiliter confessus sua peccata , postulat à Deo , aut à Confessario DEI vices agente peccatorum suorum veniam ; frustraneè quippe postularemus nobis advenire regnum Cœlorum ; aut peccata nostra nobis dimitti , nisi speraremus Deum vi suæ promissionis fidelissimæ & posse , & velle nobis nedum indulgere peccata , verum insuper conferre beatitudinem sempiternam. Hac de causâ Doctores *communissimè* monent , circa adimpletionem hujus præcepti non esse multum scrupulizandum.

177. Dixi tamen , præceptum Spei in prædictis casibus *per se obligare* , licèt me minimè lateat , etiam hoc à multis Scotistis tempore , quò allegata propositio nondum fuerat damnata , fuisse negatum. Cæterum quòd *per accidens* durante hac vitâ ad actum Spei sapius , imò toties obligemur , quoties urget obligatio alterius virtutis , quæ sine actu Spei exerceri nequit , apud omnes in confessio est ; idque convincit ratio :  
quif.

quisquis enim tenetur ad aliquem finem, similiter tenetur ad media in eundem finem necessaria: atqui actus Spei est medium necessarium ad exercitium aliarum virtutum v. g. pœnitentiæ, orationis, veluti constat ex Concilio Tridentino proximè allegato &c. ergo.

Idipsum dicendum foret de casu, quò quis existimaret se non posse tentationem desperationis aliter vincere, nisi eliciendo actum Spei, licet hoc de raro contingere natum sit; cum & alia dentur media ad vincendam hanc tentationem. Videatur de hoc Cardinalis de Lauræa Tom. 4. *disp. 4. de spe* vel Matthæucci locò proximè cit. num. 25.

¶ Jam zdò, ad idem quæsitum. Præceptum timoris, regulariter actum Spei concomitantis, non videtur per se obligare ad aliquem actum expressum, signatum & formalem, sed probabiliter eidem satisficit per actus virtuales, utputa per actus contritionis, pœnitentiæ, nec non per fugam transgressionis quorumcunque demum præceptorum. Ita Filiucci *tr. 22. c. 8. n. 257*. Palao *tr. 5. disp. un. punct. 4. n. 6.* & alii plures. Ratio est: quia non ob aliam causam vel finem jubemur timere Dominum, nisi ut evitemus offensam illius, eundemque amore prosequamur; hinc est, inquit Sanchez *lib. 2. mor. c. 33. n. 4.* quod admit-

randum, non quidem absolute (uti hæretici ex solis Christi meritis) sed sub conditione, si nimirum & nos in observantia mandatorum perseveraverimus; summam verò & infinitam DEI fidelitatem in servandis promissis, nos permovere ad certò & firmiter sperandum. Fatendum nihilominus est, quòd sicut revelatio DEI in ordine ad credendum se habet per modum conditionis sine qua non possemus credere; ita in ordine ad actum spei promissio DEI se habet per modum conditionis sine qua non possemus convenienter, aut prudenter sperare, prout sapienter observat noster P. Herincx *part. 3. tr. 1. disp. 10. q. 1. n. 10.*

Quæres 4to, an, vel quomodo Spes theologica sit necessaria ad salutem?

173. R. Spes habitualis est omnibus, tam parvulis scilicet, quàm adultis necessaria, & quidem necessitate medii in ordine ad justificationem & salutem consequendam.

Spes verò actualis, seu actus spei est duntaxat necessitate medii necessarius adultis ad justificationem & salutem consequendam. Ita *ex communi DD.* Babenstuber *tr. 5. disp. 1. art. 3. n. 2. & 3.* Sporer *tr. 2. in decalog. c. 4. sect. 2. n. 8.* Ratio prioris petenda est ex definitione Concilii Tridentini superius mox n. 170. relati. ubi dicitur, quòd homini in justificatione hæc omnia simul infundantur, scilicet *Fides,*

*Spes,*



*Spes & Charitas*, addita mox causali; nam *fides*, nisi ad eam spes accedat, & *charitas*, neque unit perfecte cum Christo, neque corporis ejus vivum membrum efficit: at, si sine spe & charitate (habituali scilicet) nemo efficitur vivum membrum Christi, profectò dicendum est, quòd spes non minus, quàm charitas habitualis sit simpliciter necessaria ad salutem: ergo &c. Ratio posterioris pariter colligitur, ex eodem Concilio Tridentino cit. SS. 6. n. 6. ubi inter dispositiones ad justificationem adultorum necessarias refertur Spes sequentibus omnino verbis: *in spem eriguntur, fidentes, Deum sibi propter Christum propitium fore*. Accedit insuper ratio irrefragabilis, hæc scilicet, quòd nemo prorsus ex intensione consequendæ justificationis suæ peccata efficaciter detestari vel retractare possit, nisi speret, se ex divina promissione veniam eorum consecuturum: ergo ad hanc consequendam simpliciter adultis necessaria est quædam spes actualis.

Quæres 5tò, deturnè etiam præceptum sperandi?

R. Datur tam naturale, quàm positivum 174. idque tam affirmativum, quàm negativum. *Communis Doctorum*. Affirmativum duplex est, scilicet 1. de eliciendo positivo actu spei, 2. de eliciendo actu timoris certo tempore, & casu exigente.

O 2

Ne-

dum præmii & ultimi finis nostri, dicendum consequenter est, quòd teneamur ad saluberrimum illum timorem Domini toties in Scripturis Sacris intimatum, vi cujus scilicet conemur cum *metu & tremore nostram* operari salutem, juxta monitum Apostoli *Philipp. 2. v. 12.* & timere, ne salute excidamus, & incurramus damnationem æternam. Videatur Sporer *tract. 2. c. 4. sect. 2. num. 12.*

Quocirca porro illud insinuandum duxi, 175  
hunc scilicet timorem, Spei communiter annexum, à Doctõribus quadrupliciter distingui, nempe 1. in mundanum. 2. in servilem. 3. filialem. & 4. initialem. *Mundanus* appellatur, vi cujus temporale nocumentum plus timetur, quàm peccatum, quò fit, ut hoc faciliùs incurratur, quatenus illud evitetur. *Servilis ille* censetur, quo peccatum vitatur, ne pœna incurratur; qui rursus à Doctõribus sapienter subdividitur in *purè*, seu (ut alii loquuntur) serviliter servilem, & in *non purè servilem*. hic posterior tunc habetur, quando quis timet peccare propter pœnam, sed ita, ut vi hujus timoris revera deponat & excludat omnem affectum ad peccandum; unde etiam talis timor honestus est & salutaris: ille prior autem, scilicet purè ac serviliter servilis habetur tunc, quando quis timet quidem peccare propter pœnam incurrendam, nihilo-

minus animò ita comparatus est, ut si pœrta non esset timenda, actu peccaret (quod propriè servorum est,) ideoque stante hujusmodi timore stat simul actualis affectus ad peccandum, proptereaque censetur inhonestus & insufficiens ad salutem, sicut & ille mundanus mox descriptus. *Filialis* dicitur, quò timetur peccatum, quia est offensa Dei, seu optimi & amantissimi Patris; quâ de causâ hic timor, utpote filii genuinis proprius alio nomine appellari consuevit timor castus, reverentialis, & ingenuus. Denique *initialis timor* vocatur ille, quò quis timet culpam simul & pœnam, seu quo fugit peccatum, partim quia Dei offensivum est, partim etiam, quia pœnæ induktivum. Appellatur autem initialis ideo, quia communiter solet esse initium conversionis, & parare viam ad timorem filialem & castum, prout habetur in Concilio Tridentino SS. 6. de Justif. cap. 6. ubi de dispositione peccatorum in ordine ad justificationem dicitur: *Et dum peccatores se esse intelligentes, à Divina Justitia timore, quò utiliter concutiantur, ad considerandam Dei misericordiam se convertendo, in Spem eriguntur, fidentes Deum sibi propter Christum propitium fore; illumque tanquam omnis justitiæ fontem diligere incipiunt.* Videatur de hoc Henno tract. de virtut. disp. 5. q. 7. vel Herincx part. 3. tr. 1. disp. 10. q. 4. n. 33.

Quæ-

Quæres 6to, quoties vel quando obliget præceptum Spei affirmativum, & quando negativum?

¶. Præceptum Spei quâ negativum obligat *semper & pro semper*, more scilicet aliorum præceptorum negativorum. 2. Quâ affirmativum verò probabiliter per se obligat 1. quàmprimùm homo pervenit ad usum rationis, eidemque Deus sub ratione objecti beatifici seu ultimi finis nostri sufficienter fuit propositus. 2. in articulo mortis, & 3. aliquoties etiam per vitam, ferè quemadmodum superius *Conf. 1. num. 27.* diximus de obligatione eliciendi actum Fidei. Et ita tenent *Viva ad propof. num. 1. ab Alexandro VII. damnatam, num. 3. & 7.* nec non Matthæucci in *cautel. Confess. lib. 1. c. 1. propof. 1. §. 2. n. 23.* alique plures sequenti ratione potissimum ducti 1. quia ex ipso rectæ rationis dictamine absonum videtur asserere, quòd homo nunquam, aut rarò admodum teneatur se convertere in Deum ceu ultimum finem suum, median- tibus scilicet actibus Fidei, Spei, & Charitatis; quam ob causam *Viva loc. cit.* existimat Alexandrum VII. damnasse sequentem propositionem: *homo nullo unquam tempore tenetur elicere actum Fidei, Spei, & Charitatis ex vi præceptorum Divinorum ad eas virtutes pertinentium.* Fatendum nihilominus est, quòd, quemadmodum præ-

cepto Fidei satisfieri potest, & sapissimè satisfit per exercitium aliarum virtutum necessariò præsupponentium vel requirentium actum Fidei; ita pariter huic obligationi Spei satisfieri possit per actus aliarum virtutum, prærequirentium actum Fidei: nec dubitandum, quin eidem sapissimè satisfiat, dum quis devotè recitat v.g. orationem Dominicam, vel humiliter confessus sua peccata, postulat à Deo, aut à Confessorio DEI vices agente peccatorum suorum veniam; frustraneè quippe postularemus nobis advenire regnum Cælorum; aut peccata nostra nobis dimitti, nisi speraremus Deum vi suæ promissionis fidelissimæ & posse, & velle nobis nedum indulgere peccata, verum insuper conferre beatitudinem sempiternam. Hac de causa Doctores communissimè monent, circa adimpletionem hujus præcepti non esse multum scrupulizandum.

177. Dixi tamen, præceptum Spei in prædictis casibus *per se obligare*, licet me minime lateat, etiam hoc à multis Scotistis tempore, quò allegata propositio nondum fuerat damnata, fuisse negatum. Cæterum quòd *per accidens* durante hac vita ad actum Spei sapius, imò toties obligemur, quoties urget obligatio alterius virtutis, quæ sine actu Spei exerceri nequit, apud omnes in confesso est; idque convincit ratio: quis.

quisquis enim tenetur ad aliquem finem, similiter tenetur ad media in eundem finem necessaria: atqui actus Spei est medium necessarium ad exercitium aliarum virtutum v. g. pœnitentiæ, orationis, veluti constat ex Concilio Tridentino proximè allegato &c. ergo.

Idipsum dicendum foret de casu, quò quis existimaret se non posse tentationem desperationis aliter vincere, nisi eliciendo actum Spei, licèt hoc de raro contingere natum sit; cum & alia dentur media ad vincendam hanc tentationem. Videatur de hoc Cardinalis de Lauræa *Tom. 4. disp. 4. de spe* vel Matthæucci *locò proximè cit. num. 25.*

\* Jam 2dò, ad idem quæsitum, Præ-178.  
ceptum timoris, regulariter actum Spei concomitantis, non videtur per se obligare ad aliquem actum expressum, signatum & formalem, sed probabiliter eidem satisficit per actus virtuales, utputa per actus contritionis, pœnitentiæ, nec non per fugam transgressionis quorumcunque demum præceptorum. Ita Filiucci *tr. 22. c. 8. n. 257.* Palao *tr. 5. disp. un. punct. 4. n. 6.* & alii plures. Ratio est: quia non ob aliam causam vel finem jubemur timere Dominum, nisi ut evitemus offensam illius, eundemque amore prosequamur; hinc est, inquit Sanchez *lib. 2. mor. c. 33. n. 4.* quod admit-

O s

tens

tens quodcunque crimen, à quo vi timoris divini retrahi potuisset, sufficienter fateatur, explicando solum id crimen admissum, aut si non admisit, periculum illius admittendi; quod ex praxi hominum timoratz conscientiaz constat, qui nunquam de defectu timoris in peccatis admissis se accusant; nec Confessarii de eo interrogant.

Quæres 7timò, quæ, & quot vitia opponantur virtuti Spei theologicæ?

179. R Duo eidem opponuntur, scilicet 1. vitium desperationis, & 2. vitium præsumptionis. *Communis*. Nam de priori res clara est, quòd scilicet opponatur virtuti spei, & quidem per defectum, quemadmodum avaritia per defectum opponitur virtuti liberalitatis: & sicut huic per excessum opponitur prodigalitas; ita pariter virtuti spei per excessum opponitur præsumptio, prout amplius patebit ex dicendis. Unde

Quæres 8tavò, quid sit desperatio, & quale peccatum?

180. R Desperatio positiva (de qua hic loquimur) est actus voluntatis, quò quis efficaciter renuit æternam beatitudinem prosequi, eò quòd hæc sibi appareat obtentu nimis ardua, vel nunquam futura, vel impossibilis; unde etiam est gravissimum peccatum in Spiritum Sanctum. Ita in

*re communissimè DD. cum D. Thoma 2. 2.*

q. 14.

q. 14. à 2. *Mastrius thelog. mor. disp. 10. n. 40.* *Reiffenstuel theolog mor. tr. 4. dist. 5. n. 14. & 16.* Ratio hujus descriptionis cuius prudentium facile patebit; dicitur enim 1. actus voluntatis; Spei etenim & desperationis idem est subiectum scilicet voluntas, quemadmodum fidei & infidelitatis est intellectus. Dicitur 2. quo quis efficaciter renuit &c. ut per hoc excludatur quorundam pusillanimitas, qui vel tentationibus diaboli, vel aliis calamitatibus pressi, aliquò modo vacillant de sua salute, licet propterea non penitus abjiciant voluntatem tendendi ad beatitudinem. Dicitur 3tio, eò quòd hæc sibi appareat obtentu nimis ardua, vel impossibilis &c. Ex quo colligere fas est gravitatem hujus peccati, utpote vi cuius Deo & singulariter Spiritui Sancto infertur gravissima injuria; enimverò si beatitudo cuicunque demum peccatori in hac vita foret obtentu nimis ardua, jam jugum DEI non amplius foret suave: vel si foret omnino impossibilis, profectò sine ratione, sine charitate &c. ad hujus prosecutionem obligaremur? patet proin ex hoc ipsò, quòd qui desperat, non unam tantum sed plures Dei perfectiones lædat.

Quæres 9no, quid, vel quale peccatum sit præsumptio?

R. Præsumptio est actus voluntatis, quò 181. quis sperat beatitudinem, aliave auxiliagratia



tiæ extraordinaria temerariè, id est, vel propriis viribus, vel aliis mediis à Deo minime in hunc finem ordinatis obtinere; unde etiam hoc peccatum ex suo genere est mortale, & repugnans Spiritui Sancto, juxta *communem Doctorum*, videndam tum apud Doctores proximè allegatos, tum etiam apud Sporer *tr. 2. in decalog. c. 4. sect. 4. n. 17. & seqq.* nec non apud Sanchez *lib. 2. in decal. c. 33. n. 7.* Castropalao *tr. 5. disp. un. pu. 6. n. 2.* Ratio vel bonitas hujus descriptionis facillè colligetur ex proximè dictis. Quòd autem sit ex suo genere saltem peccatum gravissimum in Spiritum Sanctum, expressè docet S. Thomas *2. 2. q. 21. a. 1. quia scilicet per hujusmodi presumptionem tollitur, vel contemnitur adiutorium Spiritus Sancti, per quod homo revocatur à peccato: & hoc potissimum verificatur de illis, qui propterea peccant liberius, quòd sciunt Deum esse summè & infinite bonum ac liberalem in condonandis mortalium delictis.*



§. II.

§. II.

Proponuntur & breviter re-  
solvuntur Casus practici tum circa  
Spem Theologicam, tum etiam circa  
desperationem & præsumptionem.

CASUS PRIMUS.

**T**itio concubinario concubina sua aliquando  
præter morem solitum recusavit corporis  
usum, dicens se non ampliùs posse continuare  
hoc commercium carnale sine evidenti periculo  
scandali in populo, consequenter nec sine evi-  
denti periculo incurrenda damnationis aterna;  
Verùm huic Titius illico respondit: jam sumus  
perditi; neque de hoc ampliùs dubitare fas est  
ob vitam hæcenus tam scandalosè traductam:  
ad quid ergo metam ponamus desideriis ac vo-  
luptatibus nostris? itum proin fuit ex utraque  
parte in antiquam sylvam. Jam circa hanc  
speciem facti dubitare licet 1. quomodo Ti-  
tius peccaverit? 2. an præter peccatum for-  
nicationis aut adulterii insuper commiserint  
peccatum desperationis in confessione necessariò  
explicandum?

¶ ad primum, Titium procul dubio 184.  
gravissimè peccasse nedum peccato forni-  
cationis (vel adulterii, si scilicet vel ipse,  
vel meretrix saltem jam fuit actu ligata  
matrimonio) verùm insuper peccato scan-  
dali;

dali ; quippe qui male sollicitando , & pejus adhuc persuadendo concubinam suam pertraxit ad actuale peccatum , & fortassis ad consimilem desperationem . Insuper in hujusmodi casibus singulariter attendendum est & indagandum , an non vivant in concubinato notorio & scandaloso ( quod revera species hujus facti insinuare videtur ) in tali scilicet , de quo pluribus ejusdem communitalis vel civitalis constat &c. præterquam enim , quod iste casus in plerisque Diœcesibus sit reservatus , insuper noverit Confessarius , se non posse tutâ conscientia Titium absolvere , nisi sanctè & seriò appromittat , quamprimum moraliter potuerit , vel dictam concubinam relinquere vel à se amandare &c. quatenus hoc modo scandalum publicum tollatur .

Res de se clara est , & potest constare ex iis , quæ diximus in *theolog. sacram. part. 2. conf. 4. n. 93.* quamdiu enim Titius id non facit , aut non seriò appromittit illico se facturum , tamdiu convincitur velle perseverare in continuo statu peccati mortalis : at , qui vult perseverare in tali statu , est incapax absolutionis : ergo &c.

183. R. jam ad 2dum. Titius procul dubio commisit peccatum desperationis , in confessione necessariò exprimendum ; quandoquidem opere ipso monstravit , se abjecisse voluntatem tendendi ad beatitudinem,

nem,

nem, eò quòd existimaverit, hanc vel sibi jam impossibilem, vel certè nunquam futuram: immò verò hac pessima persuasionem motus fuit ad liberius peccandum, & ad pertrahendam quoque concubinam suam ad consensum, non sine malitiosa præsumptione. Insuper notet Confessarius, quòd, si Titius ideò desperavit, quia credidit DEum vel non posse, vel certè jam nolle sibi remittere peccata, vel sua peccata esse irremissibilia ob vitam tam malitiosè traductam, & scandala data &c, ideòque nec gratià Dei vinci posse licet hoc inter fideles rarius contingat) præter peccatum mortale desperationis, insuper commiserit peccatum hæreseos; revera enim omnes illæ persuasiones sunt contrariæ fidei Catholicæ, & repugnant Sacræ Scripturæ, in qua *Ezechiel 18.* dicitur: *Nunquid voluntatis mea est mors impii, dicit Dominus, & non ut convertatur à viis suis, & vivat?* Et rursus *Isa 1.* *lavamini (ait:) & mundi estote &c. si si fuerint peccata vestra ut coquinum, quasi nix dealbabuntur.* Utrum verò ex hac suppositione insuper inciderit excommunicationem, colligi debet ex eo, an non laboraverit aliqua juris vel facti ignorantia, item, an hanc hæresin exterius manifestaverit? videatur de hoc *P. Sporer tr. 2. c. 4. sect. 3. n. 15.*

At, quid de illis tenendum, inquires fortassis,

tassis, qui à Confessario dehottati, vel etiam admoniti, ut ab hoc vel illo vitio v. g. pollutionis, ebrietatis, furti &c. deinceps abstineant, illico respondent: Pater R. non possum amplius abstinere, tum ob nimis inveteratam consuetudinem, tum etiam ob nimiam meam fragilitatem pro dolor! sæpius, quàm par est, expertam.

184. R. Hujusmodi homines tractandos esse potius velut pusillanimes, quàm desperabundos, quippe qui potius desperant de propria virtute, velut benè conscii suæ fragilitatis, quàm de divino adjutorio: & cum hoc non obstante fieri possit, ut abjecta etiam confidentia de propriis viribus omnem spem suam collocent in adjutorio Divinæ gratiæ adjutricis fortissimæ, nec non in infinita DEI misericordia, cui utique nihil est impossibile; hinc Confessarius ceu Medicus spiritualis omni modo conari debet, ut hujusmodi hominem pusillanimum erigat, & ad firmiter sperandum, dolendum, & proponendum excitet, quatenus eum hisce mediis ad vitam spiritualem reducat; quemadmodum prudentes medici infirmum de sanitate corporis recuperanda quasi desperabundum, propterea non illico deserunt, sed potius conantur eundem tum salutaribus consiliis, tum etiam convenientibus medicamentis restituere pristinæ sanitati.

Secus

Secus utique dicendum foret, si tentatis omnibus poenitens inveniretur immobilis in sua diffidentia erga Deum; quia tunc velut indispositus foret dimittendus.

## CASUS SECUNDUS.

**S**empronia femina non minus annosa, quam Sexosa suo Marito; incidit in morbum lethalem, quo non obstante renuit simpliciter sumere quamcunque demum medicinam, constanter asserens, se totam suam fiduciam collocare in prapotentis patrocinio B. V. Mariae, qua, si DEO ita placuerit, procul dubio sibi impetret pristinam sanitatem. Sempronius Maritus è contrario hac sibi occasione utendum ratus: subito cucurrit ad certum quoddam monasterium, petiitque, ut sine mora legeretur sacrum pro felici fine sua uxoris: & quia iste totum suum amorem jam pridem transtulit in aliam personam, hinc sapius quasivit occasionem cum eadem peccandi: licet verò hanc nunquam obtinuerit, nihilominus fatetur, se toties quoties secretò polluisse semetipsum; partim idèò, quòd bene agnoverit se desiderando, immò & quarendo occasionem peccandi carnaliter, jamjam promeritum fuisse infernum, & hoc ipso parum vel nihil referre, tametsi superadderet opus externum; partim etiam, quia scivit, se nec magis confusum iri neque etiam gravius punitum à Confessario. R. P. Elbel, Pars II. de Fide &c. P sive

*sive dein superaddidisset pollutionem, sive non. Jam ad hunc casum valde practicum tres quaestiones moveri possunt 1. utrum vel qualiter Sempronia peccaverit, nolendo acceptare quamcunque demum medicinam? 2. An Sempronius ejusdem Maritus peccaverit, petendo Sacrificium Missa pro felici fine? 3. Denique an, vel quomodo is peccaverit post lapsum mentalem sese ulterius precipitando in lapsum corporalem, scilicet pollutionem, & quidem propterea, quod sciverit se jam prius meruisse infernum neque etiam multo graviores poenitentiam inde reportaturum?*

185. R. Ad primum quaesitum, Semproniam per se loquendo (nisi scilicet vel simplicitas vel ignorantia eam excuset) graviter deliquisse; quia non solum nimium praesumere, sed & Deum tentare voluisse videtur, relictis scilicet mediis naturalibus & ordinariis expectans effectum sanitatis à Deo sibi conferendum. Ratio est: quia quicumque demum vel corporis sanitatem vel quemcunque alium effectum similem relictis mediis à Deo in eundem finem ordinatis (uti sunt medicinae) expectat per sola miracula patrociniò Sanctorum impetranda, temerariè errare, immò & Deum tentare velle convincitur; non enim debemus ejusmodi dona vel gratias expectare, nisi per viam ordinariam, id est per media à Deo in talem finem ordinata:  
atqui

atqui Sempronia respuendo omnem medicinam, hoc non fecit : ergo &c. liquet proin, quòd Confessarius talem personam vel aliter disponere, vel n̄ acquiescere velit sanioribus consiliis, beneficio absolutionis privare, aut certè suspendere debeat.

¶. Ad 2dum quæsitum cum distinctione. 186.

Vel enim Sempronius voluit mediante hoc Sacrificio Missæ promovere, & voluntate antecedente ( ut loquuntur Theologi ) DEUM quodammodo cogere, ut uxorem tollat é vivis ? vel nihil aliud intendit, quàm, ut si quidem placeret Deo uxorem suam, sibi tam charam (scilicet) tollere é vivis, hæc felici fine defungeretur ? Si prius : dicendum erit, quòd Sempronius præter grave peccatum contra charitatem uxori debitam, cujus mortem inordinatè appetiit, iasuper commiserit peccatum gravissimum præsumptionis, & quidem qualificatæ, scilicet blasphemæ, & sacrilegæ ; quia præsumpsit SS. Missæ Sacrificio abuti in ordine ad aliquem effectum malum & illicitum, scilicet ad impetrandam præmatutam mortem vel hujus accelerationem, quam sine peccato hòc modo (scilicet voluntate antecedente) nec potuit intendere, nec debuit. Si verò supponatur posterius dicendum erit, quòd Sempronius neutiquam peccaverit, sed potiùs benefecerit, quia supponitur nil aliud intendisse, quàm



felicem mortem Uxoris suæ, eamque voluntate subsequente duntaxat Divinam, quam rationabiliter prævidere potuit ex eo, quòd Sempronia absolutè renuerit sumere quamcunque demum medicinam: atque certum omnino est, SS. Sacrificium Missæ quà impetratorium à Deo fuisse institutum ad hunc etiam finem, scilicet ad impetrandam felicem mortem: ergo ex hac suppositione Sempronius minimè peccasset. Videatur Sporer *loc. cit.*

187. R. Jam ad 3tium dubium, quòd Sempronius post lapsum mentalem insuper superaddendo lapsum corporalem, procurando scilicet pollutionem, sine dubio iniquitatem adjecerit iniquitati, prout nemo prudentum non videt: nihilominus in rigore loquendo per hoc nec peccatum desperationis commisit, neque etiam præsumptionis: non enim prius; quia propterea non abiecit animum simpliciter in ordine ad prosequendam beatitudinem: immò verò contrarium haud obscurè fas est colligere ex eo, quòd cogitaverit de confessione & pœnitentia sibi injungenda à Confessario. Neque etiam posterius; qui vi hujus non convincitur temerariè sperasse beatitudinem, aliavè auxilia gratiæ, mediis, aut via extraordinaria consequenda, licet suo modò videatur peccasse in clementiam Confessarii, cui confusus facilius consensit

in peccatum externum. Videantur de hoc ea, quæ diximus in casu haud multum ab-  
simili *part. 1. prælimin. Confer. 23. n. 684.*  
Vel Tannerus *Tom. 3. disp. 2. q. 1. n. 79.*  
aut la Croix *lib. 2. n. 127.* ubi is rectè sub-  
dit, quodd si peccans sibi tam facile promit-  
teret remissionem peccatorum plurium,  
quàm unius, & idèd sæpius peccaret, dicen-  
dus foret præsumptuosus.

### CASUS TERTIUS.

**C**Ajus ob varia delicta accusatus, à Prin-  
cipe, cujus ad obsequia pluribus annis  
steterat, tandem officio suo fuit orbat. Qua-  
re cum ex una parte advertit, se & uxore &  
prolibus oneratum, ex altera verò, post mul-  
ta etiam in cassum tentata remedia, omni sub-  
sidio humano destitutum, denique nedum in  
pusillanimitatem, verum insuper in omnimo-  
dam desperationem prolapsus fuit, unde &  
firmissime statuit, suum delatorem (à quo si-  
bi, suisque prolibus sustentationem necessariam,  
& consequenter suò modo pariter vitam ipsam  
ademptam existimavit) provocare ad duellum,  
ratus, melius sibi esse vel in arena generosè &  
honorificè (scilicet) succumbere, quàm ab om-  
nibus quasi spretum & despectum, vitam tam  
miserabilem diutius protrahere: prius tamen  
confiteri, sacràmque synaxin summere voluit  
pro felici successu duelli, quatenus hoc mediò

vel felicius vinceret, vel minus feliciter fortè decertans & occumbens, non sine Sacro Viatico ex hac vita decederet. Quaritur jam ad nostrum propositum 1. an Cajus verè possit aut debeat dici desperasse? 2. An adversarium suum ad duellum provocando peccaverit, & quomodo? 3. An non insuper commiserit peccatum presumptionis sacrilega ex eo, quòd pro felici successu duelli Sacram Synaxin summere attentaverit?

188. R. Ad primum quæsitum hujus Casus, de Cajo dici non posse, nec debere, quòd desperaverit simpliciter; patet enim ex ipsa facti specie, quòd non abjecerit omnimodam voluntatem prosequendi beatitudinem, eò ipso, quòd statuerit confiteri, & ante duellum Sacram summere Synaxin eo fine, ut non sine viatico decederet ex hac vita. Et licèt desperaverit de eo, quòd deinceps unà cum Uxore & prolibus possit ducere vitam tam commodam & congruam suo statui, prout hætenus eam fortassis duxit; hæc tamen non est propriè desperatio Theologica; tum quia non versatur circa Deum vel ejusdem affecutionem; tum etiam, quia nullibi jubebatur sperare à Deo vitam tam congruam suo statui, prout hætenus fortassis eam duxit: desperando igitur de hac sustentatione comoda tam parùm peccavit contra virtutem Theologicam Spei, quàm fur, qui jam intra manus carnificis

in Scala constitutus desperat de sua vita ulterius proroganda.

¶. Ad 2dum quæsitum. Cajum graviter peccasse contra charitatem proximi, provocando illum ad duellum, & hoc ipsò exponendo tum spiritualis, tum corporalis etiam vitæ amittendæ periculo. Esto etiam ab eodem suo adversario fuerit accusatus; quia tamen non propter accusationem (quæ procul dubio potuit esse justa) sed potius propter insolentias jam sæpius inceptas officio suo orbatus; hinc non delatori, sed sibimet imputare debet hoc detrimentum; Ex quo consequens est, quòd sine justa causa intendat sese vindicare mediante duello, & hoc ipso nedum in charitatis proximo suo debitæ, sed etiam in justitiæ leges enormiter impingat.

¶. Jam ad 3tium quæsitum. Cajus sum-  
mendo sacram synaxin ex præfato fine, 190.  
commisit peccatum præsumptionis Sacrilegæ; præsumptionis quidem; quia per hanc voluit impetrare victoriam injustam; quem in finem SS. Communio certè nunquam fuit instituta. Sacrilegæ verò, tum quia abusus fuit hoc Sacramento; tum etiam, quia utrumque Sacramentum, tam poenitentiae scilicet, quàm etiam SS. Eucharistiæ indignè suscepit. Neque etiam videtur, quomodo Cajus posset excusari ob ignorantiam inculpabilem: vel enim præsentem

animæ suæ statum Confessario exposuit debitor modo, vel non? si non: eò ipso à culpa minimè excusari potest. Si autem Confessarius eidem procul dubio nedum beneficium absolutionis negasset, sed SS. Communionem infallibiliter interdixisset, velut homini prorsus indigno & incapaci.

## §. III.

## Corollaria ex dictis inferenda.

191. **C**OLLIGES ex hæcenus dictis primò, circa hujusmodi homines desperabundos à Confessario esse bene attendendum tum ad objectum, tum etiam ad motivum desperationis.

Ad objectum quidem: quia si aliquis non de ipsa beatitudine, vel de mediis ad hujus consecutionem necessariis, sed de alia materia vel objecto à Deo nullatenus promissò desperet; utputa si infirmus de recuperanda valetudine, captivus de libertate, Rusticus vel alius homo plebejus de impetranda Imperii Corona desperet, dicetur quidem desperasse: verùm hæc desperatio nec Theologica est, neque peccaminosa, & hoc ipso impertinens ad forum Sacramentale. Ad motivum verò pariter est attendendum; enimverò si quis ad desperandum

dum moveatur aliquo errore contra fidem, utputa ex eo, quòd credat Deum vel non posse, vel nolle salvare &c. committit duplex peccatum, scilicet contra virtutem Spei & Fidei simul: è contra si quis desperet absque eo, quòd ad hanc inducatur quodam motivo erroneo contra fidem, ut si quis animum penitus abjiciat in ordine ad prosequendam beatitudinem, eò quòd putet, Deum sui non miserturum, nec daturum gratias efficaces, vel etiam gratiam finalem &c. committit quidem peccatum mortale contra virtutem Spei; sed simplex duntaxat, & non qualificatum; non enim tenemur velut de fide credere Deum nobis daturum gratiam finalem, vel alias gratias efficaces. Videantur de hoc Sanchez *lib. 2. in decalog. c. 33. num. 5.* Laymann *lib. 2. tr. 2. c. 2. n. 3. & 5.* Vel Sporer *tract. 2. c. 4. sect. 3. n. 15.*

Colliges ulterius 2dò, hujusmodi homines desperabundos à Confessario magnacum circumspectione, discretionem, prudentiam, nec minori patientia tractandos esse, & quidem pro diversitate geniorum. Enimverò nonnullos reperire est, qui ob nimiam peccatorum suorum Sarcinam, vel vitam revera scandalosè actam &c. à Diabolo fortiter tentantur ad desperandum de Divina misericordia; qui proin cum mansuetudine & charitate erigendi sunt ad piè

P §

con-

192.

confidendum in infinitam Dei misericordiam, quippe quæ, hoc ipso quod infinita sit, & potest, & vult parcere: propterea-  
 que Deus Pater Unigenitum suum Filium tradidit in mortem pro omnibus peccatoribus quantumvis gravibus &c. Juvabit insuper tali homini proponere breviter unum alterumve exemplum ex S. Scriptura depromptum, utputa de Rege Achab, vel Manasse, vel de Disma latrone &c. Alii rursus inveniuntur, qui calamitatibus aliisve hujus vitæ mileriis vel etiam persecutionibus pressi, non tam ex malitia, quam ex pusillanimitate desperant, qui proin-  
 Spem ac fiduciam Divinæ Providentiæ sunt erigendi, proponendo ipsis, quod *quem Dominus diligit, castigat, & omnem Filium, quem recipit, flagellat. Hebr. 12. cap. v. 6.* Item, quod ipsum Unigenitum Dei Filium oportuerit pati (consequenter & nos) & ita intrare in gloriam suam. Denique alii inveniuntur, qui quantumvis innocentes fortassis nec minimam haberent causam dubitandi de assequenda aliquando corona vitæ, nihilominus Deo ita permittente (procul dubio ad promerendam majorem in Cælis gloriam) continuo quasi exagitantur & molestantur cogitationibus vel potius tentationibus desperabundis; sive de-  
 in à dæmone, sive etiam ex hypocontria, melancholia seu abundantia atræ bilis pro-  
 fici-

ſcientibus : qui, quantò infirmiores tantò ſunt digniores compaſſione, licèt non tam exhortationibus Confefſarii, quàm phar-  
macis à Medico præſcribendis curari debe-  
ant aut poſſint. Quocirca tamen illud ani-  
madvertendum eſt, à Confefſario homi-  
nibus hujus ultimæ clafſis non tam facilè  
credendum, quòd peccaverint, tametiſi de  
ſimilibus ſeſe accuſare ſoleant velut pecca-  
tores maximos ; revera enim involuntariè  
& contra propriam inclinationem patiuntur  
hujusmodi incidentias.

At verò, inquires, quomodo homines,  
ſimpliciores præſertim & rudiores ad for-  
malem & ſupernaturalem actum ſpei exci-  
tari poſſunt vel debent ?

¶ Debent excitari hoc vel ſimili modò 193.  
incipiendo ab humanis & naturalibus, & ex  
his eodem elevando ad ſupernaturalia v. g.  
dicendo : chariſſime fili (vel filia) nun-  
quid ſi homo conſtans & fidelis in ſervandis  
promiſſis tibi aliquid promittat, ſperas te  
ſecuriùs ac certius illud obtenturum ab eo,  
quàm ab alio, qui non ſolet ſervare ſua pro-  
miſſa ; quò reſpondente : *ita Domine* : jam  
ulteriùs inſtet confefſarius. Ecce jam !  
fili chariſſime noveris procul dubio, Deum  
ſummè bonum, qui in ſervandis ſuis pro-  
miſſis fideliffimus eſt, nobis omnibus pro-  
miſiſſe vitam æternam, modo eidem fide-  
liter ſerviamus, ejusdemque mandata ob-  
ſerve



servemus : & nunquid jam statuisti firmiter non amplius peccare , quin potius Deo fideliter servire , eundemque super omnia amare ? Dic ergo charissime fili ! & ex corde dic : *O mi Deus ! spero à divina bonitate tua gratiam & vitam aeternam , quippe quam tu infinite fidelis in servandis promissis , nobis promifisti : tu solus es finis noster ultimus , tu solus nostra beatitudo : te solum desidero , te assequi ardentissime cupit anima mea : Deus meus & omnia : in te Domine spero & semper sperabo ; non confundar in aeternum.*

194. Colliges 3tio, etiam illos præsumptuosos esse adnumerandos, qui voluntarie sese resolvunt ducere dies suos in bonis, peccata peccatis cumulare, poenitentiam verò usque ad finem vitæ differre, eò quòd sciant misericordiam Dei esse infinitam &c. proptereaque nedum Dismæ crucifixo, sed & aliis innumeris peccatoribus in finæ vitæ pepercisse. Peccant revera tales peccato præsumptionis in Spiritum Sanctum, cujus bonitate abutuntur, dum hujus intuitu inducuntur ad liberius peccandum, & laxandas naturæ habenas ad omnem licentiam vivendi. Tales proin à Confessario excitandi sunt ad salutarem Dei timorem, ad quem nos omnes hortatur Doctor Gentium ad Philipp. 2. v. 12. ut scilicet cum metu & tremore nostram operemur salutem : & Deus ipse *Eccli 5. v. 8. ut non tardemus con-*

con-

*converti ad Dominum, & ne differamus de die in diem &c.*

Colliges 4<sup>to</sup>, in censum præsumptuo-195.  
forum pariter computandos esse illos Prædicatores, & Confessarios, qui tametsi hætenus parum vel nihil studuerint, nihilominus pergunt negligere competens studium & lectionem; ita, ut soli suæ dexteritati, ingenii felicitati, vel denique extraordinariæ Dei assistentiæ confisi &c. confessionale frequentent, & sine omni scrupulo expeditissimè, aut certe expeditius quàm alii docti, suos poenitentes absolvant, vel cathedram conscendant, aliquid deblatterantes sine spiritu, immò & sine iudicio, proptereaquæ juxta illud verissimum simul & notissimum proverbium, quemadmodum *sine labore ascendunt, ita pariter sine honore descendunt*, & sine fructu, non sine permagno præjudicio honoris divini. Verè inquam præsumptuosi, immò & temerarii dici merentur tales; quia prætermisso medio ordinario, studio scilicet, à Deo & natura ad hoc ordinato, à DEO expectant effectum quendam extraordinarium (in quo consistit interpretativa tentatio Dei) & sese exponunt periculo plurimorum errorum, tum contra sanam doctrinam, tum etiam contra reverentiam Sacramentorum non sine periculo animarum, prout sapienter advertit noster V. P. Cherubin

rubin Mayr in suo trismegisto dist. 2. c. 3. §. 2. n. 220. Quin propterea merito time-  
re deberent illud fulmen divinum *Osea 4.*  
*v. 6. quia tu scientiam repulisti, repellam te,*  
*ne Sacerdotio fungaris mihi.*

196. Colliges 5<sup>to</sup>, quòd, quemadmodum se-  
cundùm dicta superius Confer. 1. n. 5. ha-  
bitus infusus fidei amittitur per peccatum  
infidelitatis positivæ, hæresis scilicet; & apo-  
stasiæ; ita pariter habitum spei amitti per  
peccatum positivum desperationis, immò  
& per quodvis peccatum mortale spei di-  
rectè oppositum, id est, tale, quod directè  
tollit objectum formale spei, uti sunt posi-  
tiva & efficax nolitio vel contemptus bea-  
titudinis; neglectus mediorum ad illam  
assequendam, eò quòd judicetur vel ap-  
prehendatur velut impossibilis; itemque  
dejectio animi ex eo, quasi Deus non pos-  
sit, aut non velit nos salvare. 2. etiam po-  
test amitti per peccatum formalis & posi-  
tivæ infidelitatis; quia cùm fides sit quasi  
basis ac fundamentum omnium virtutum,  
ea sublata pariter spem corruere, necessum  
est. Nihilominus quemadmodum secun-  
dùm dicta l. c. fides non amittitur per infi-  
delitatem merè negativam, id est, omissio-  
nem actus fidei, dum hujus obligatio ur-  
get; ita pariter habitus spei non deperdi-  
tur per omissionem actus spei; quando-  
quidem hæc omissio directè non oppona-  
tur

tur motivo spei. Videatur Sporer *tr.* 2. c. 4. *sect.* 4. n. 19. vel la Croix *l.* 2. n. 129.


Colliges denique 6to, quòd tametsi peccatum desperationis & præsumptionis ex suo genere sint mortalia, utpote immediate repugnantia divinæ bonitati, misericordiæ vel justitiæ, in quibus non datur parvitas materiæ; nihilominus subinde ex indeliberatione, vel imperfectione actûs fieri possit, ut quis venialiter tantum, & non mortaliter peccet, sicut & in aliis materiis idemet fieri natum est, juxta dicta in *tractat. primo seu præliminari confer.* 20. n. 573. Fateor tamen, mihi satis probabile videri id, quod apud la Croix *lib.* 2. n. 128. docent RR. PP. Bonæ Spei, & Stephanus à S. Paulo scilicet, eum, qui ex præsumptione de bonitate Dei peccaret venialiter, aut in sequentem diem differret agere pœnitentiam circa peccatum mortale, propterea non peccaturum, nisi venialiter: meritò tamen negari potest, quòd in his casibus interveniat præsumptio propriè dicta; quia per hoc non expectatur beatitudo temerariè, vel mediis in hunc finem à Deo minimè ordinatis obtinenda.

At, inquires adhuc: quid si Deus alicui homini revelaret suam damnationem futuram, tenereturne talis, vel saltem posset adhuc sperare beatitudinem?


æ. bre-

198. *¶* brevissimè ad hanc quæstionem speculativam cum distinctione; nam si Deus eam revelaret propter peccatum jam præteritum, quod non ampliùs vellet remittere, procul dubio talis homo, utpote jam destitutus objecto spei simpliciter, nec potest, nec teneretur ampliùs sperare beatitudinem. At verò si propter peccatum futurum & primò incurrendum alicui revelaretur damnatio, meò judicio nedum posset, sed etiam teneretur adhuc sperare beatitudinem; quia impedimentum hujus, peccatum scilicet liberè ponendum, dependet purè ab ejusdem arbitrio, quod utique tenetur non ponere, sed potius tendere ad beatitudinem, cui sola revelatio divina nullum prorsus ponit obstaculum, sicut revelatio D. Petro facta de futura negatione Christi, nullum prorsus posuit obstaculum, quò minùs potuisset, immò & debuisset non negare. Verùm dimissa hac quæstione speculativa ad Scholasticos, pro praxi respondendum est 1. non facile credendum hujusmodi revelationem, utpote prorsus extraordinariam, & alienam à præsentì statu ordinationis divinæ, fuisse factam à DEO, vel à bono, sed potius à malo spiritu, eo fine, ut hominem inducat ad desperationem omnimodam. 2. Dato etiam, quòd constaret, talem revelationem revera profectam esse à DEO, præsumendum foret, cam

eam esse intelligendam sub conditione, *nisi* scilicet ageret pœnitentiam, quemadmodum revelatio de subversione Ninive per Prophetam Jonam facta sequentibus verbis absolute & satis clarè prolatis: *adhuc quadraginta dies & Ninive subvertetur* Jon. 3. v. 4. non fuit aliter intelligenda, quàm sub conditione: nisi scilicet Ninivitæ agerent pœnitentiam: quemadmodum ergo hi adhuc poterant, & tenebantur adhuc sperare, fore, ut Ninive non subvertatur, casu quo agerent pœnitentiam: ita pariter talis homo adhuc & posset, & teneretur sperare, fore, ut non damnetur, casu quo non peccaret vel de suo peccato pœnitentiam ageret. De quo videri possunt Herincx *part. 3. tr. 1. disp. 10. n. 56.* Sporer *tr. 2. in decal. c. 4. sect. 4. n. 20.* Salmanticens. *tom. 7. tr. 18. disp. 5. dub. 2. n. 32.* apud Babenstuber *tr. 5. disp. 1. à. 3. n. 20.*



*R. P. Elbel, Pars II. de Fide &c.* Q. CON.



# CONFERENCE SEPTIMA

De Virtute Charitatis tum  
DEO, tum etiam proximo de-  
bitæ.

## SUMMARIUM.

199. Quid sit charitas theologica.
200. Varia hujus membra breviter declarantur.
201. Amor Dei alius dicitur appetitiuè, alius intensiue summus.
202. Quivis homo tenetur diligere Deum super omnia, id est, amore appetitiuè, non tamen intensiue summo.
203. Hoc præceptum per se obligat 1. post adeptum usum rationis, & sæpius &c.
204. Per accidens autem adhuc frequentius.
205. Huic tamen obligationi sæpe sæpius satisficit per actum amoris virtutalem & implicitum.
206. Quomodo homines, præsertim rudiores practice excitari debeant ad amorem supernaturalem DEI super omnia?
207. Præter Deum insuper tenemur ordinatè diligere nosmetipsos, nec non & proximum.
208. Quinam nomine proximi veniant?
209. Insinuatur breviter triplex, bonorum genus in ordine ad regulandam charitatem erga proximum.

210. Qualis ordo charitatis Deum inter & nos, nec non inter proximum generaliter loquendo sit observandus?
211. Pro hujus meliori captu distinguendum est inter bona necessaria, & inter non necessaria ad salutem.
212. Rursus distinguendum est inter necessitatem extremam, gravem, & communem.
213. Quando, vel quomodo unusquisque teneatur succurrere proximo suo constituto in necessitate salutis spiritualis?
214. Quomodo vel qua ratione charitas, seu gratia habitualis amittatur?
215. Resolvitur Casus I. cujusdam personæ, quæ, ut mortem in manibus carnificis subeundam sibi conciliaret, proprio motu, occidit infantem innocentissimum.
216. Proptereaque sine dubio graviter deliquit contra charitatem nedum proximo, sed sibimet etiam debitam.
217. Occurritur cuidam instantiæ in contrarium.
218. Resolvitur Casus II. cujusdam honestissimæ puellæ, quæ à quodam lascivo homine stupri causâ obruta, lamentabiliter imploravit opem cujusdam alterius.
219. An iste fuerit obligatus ad succurrendum?
220. Huic puellæ probabilissimè licuisset occidere seu etiam confodere injustum aggressorem, si aliter non potuit illum repellere.
221. Satisfit cuidam instantiæ in contrarium.
222. Resolvitur Casus III. cujusdam pœnitentis interrogantis Confessarium, an cum periculo vitæ teneatur succurrere proximo in pari periculo vitæ constituto.
223. Qui per se loquendo potuit quidem, per accidens tamen non, si supponatur, hujus vi-



- tam fuisse necessariam ad aliorum, utputa uxoris, prolium &c. salutem.
224. Unde à Confessario in his circumstantiis minime potuit obligari ad ferendam opem per se ipsum.
225. Respondetur ad quandam objectionem in contrarium.
226. Contra charitatem Dei dupliciter, vel omnino tripliciter peccari potest.
227. Odium Dei est gravissimum peccatum.
228. Fieri potest, ut quis vitam alterius teneatur præferre periculo vitæ propriæ, ubi ad titulum charitatis simul accedit titulus iustitiæ &c.
229. Ordinata charitas jubet, ut circa dilectionem proximi vel inter proximos servemus ordinem; hinc
230. Quantum concernit bona naturalia præferre debemus consanguineos aliis non consanguineis.
231. Quantum ad politica cæteris paribus concivem extraneis.
232. Nunquam tamen creaturas irracionales rationalibus.

## §. I.

Præmittuntur, & breviter resolvuntur quæsitæ, scitu necessaria ad debite resolvendos Casus practicos circa amorem DEI, sui ipsius, & Proximi.

**Q**Uæres primò, quid sit charitas?

199. **Æ.** Charitas velut virtus Theologica, de qua in hac conferentia agere intendimus, per-

perbenè describitur, quòd sit virtus supernaturalis, qua quis Deum diligit tanquam summum bonum propter se, seipsum verò & proximum propter Deum. Ita *Communis Theologorum*. Explico, & declaro brevissimè. Dicitur 1. *Virtus supernaturalis*; quia hoc habet commune cum virtute fidei & spei, quibuscum velut in genere convenire dignoscitur. Dicitur 2. *qua quis DEUM diligit*; per quod innuitur objectum materiale primarium; quemadmodum enim fides & spes velut virtutes theologicæ pro suo objecto materiali primario immediatè respiciunt Deum, pro secundariò autem ea quæ sunt circa Deum; ita pariter charitas pro objecto materiali primario respicit Deum, pro 2dario autem nos ipsos & proximum, in quantum participamus DEI bonitatem & sumus capaces beatitudinis assequendæ &c. Hinc ulterius additur: *tanquam summum bonum propter se, seipsum verò & proximum propter DEUM*; quibus verbis innuitur objectum formale motivum charitatis scilicet summa & infinita DEI bonitas, & hòc ipso infinito amore digna, quæ, in quantum relucet in nobis, pariter habet vim voluntatem nostram permovendi tum ad nos ipsos, tum etiam ad proximos nostros amandos. Ex quibus ad oculum liquet differentia formalis specifiça charitatis, tum à virtute fidei

Q 3.

ad

ad quam movet infinita Dei veritas secundum dicta Confer. 1. num. 10. tum etiam à virtute Spei, ad quam nos movet infinita Dei fidelitas juxta dicta num. 172. è contra verò ad amandum Deum super omnia movet sola & unica infinita Dei bonitas absoluta.

Quæres 2dò, quotuplex fit Charitas ut sic?

200. R. Charitas ut sic variè dividi solet, & quidem I. in *habitualem* & *actuaalem*. Nomine prioris intelligitur *habitus* à Deo infusus, quò inclinamur ad Deum propter se, nos verò & proximum propter Deum diligendum. Nomine autem posterioris intelligitur *actus voluntatis*, quò quis Deum, seipsum aut proximum amando prosequitur. Quocirca tamen advertendum est, quòd præter amorem supernaturalem insuper dari possit amor merè naturalis, in eo differens à priori, quòd hic (naturalis scilicet) nec à principio supernaturali seu gratia procedat, neque etiam in Deum tanquam Auctorem supernaturalem tendat.

II. Charitâs dividi solet in *incipientem*, *proficientem* & *perfectam*; incipiens dicitur, quamdiu amans incumbit studio expugnandi vitia, & eradicandi vitiosas inclinationes: proficiens verò, quando jam principaliter incumbit implantandis virtutibus: perfecta denique appellatur, quando in ope,

operibus virtuosis jamiam habitatus, totus quantus intendit contemplationi & amorì Divino. Videatur de hoc Herincx noster *part. 3. tr. 1. disp. 11. n. 15.*

III. Charitas actualis, vel potius amor supernaturalis solet dividi in amorem *concupiscentiæ*, quò Deum vel etiam proximum diligimus, in quantum nobis bonus, & in amorem *amicitiæ*, quò DEUM aut proximum diligimus, quatenus ipse in se est bonus ac propter ipsiusmet bonitatem propriam; & hic amor amicitiæ rursus subdividi solet in amorem *complacentiæ*, vi cuius scilicet de bono à proximo aut à Deo jam actualiter possessio nobis complacemus, eidem congaudemus & congratulamur &c. & in amorem *desiderii*, quò eidem ea bona quibus adhuc caret, sincerè optamus & desideramus, eadem pro viribus procurando.

Sic revera qui Deo congaudet & congratulatur de infinitis Ejusdem perfectionibus jam actu possessis, dicitur illum amare amore complacentiæ: qui verò efficaciter desiderat, ut Deus, Ejusdemque infinita bonitas ab omnibus agnoscat, vel pro viribus fatagit, ut ipsius honor, cultus & amor indies magis ac magis dilatetur, Eundem dicitur diligere amore desiderii.

IV. Denique è nonnullis præsertim asce-  
seos Magistris solet amor amicitiae dividi in  
*affectivum & effectivum*. *Affectivum* dicunt,  
quò Deo aut proximo affectu & actu in-  
terno bene volumus, sive de ejus bono  
jam actu possessio gaudendo, sive nondum  
possessum desiderando. *Effectivus* verò  
& practicus appellatur, quò ipso opere &  
conatu externo, quantum in nobis est, ni-  
timur Deo, proximovè benefacere. Qui  
plura horum exempla affectat, consulat  
nostrum P. Sporer *tract. 2. in Decalog. c. 5.*  
*sect. 1. per totam*, ubi abundanter procul du-  
bio inveniet, quod desiderat.

Quæres 3tiò, quomodo Deum diligere  
teneamur?

201. Ante responsionem nota, Deum dupli-  
citer diligi posse *super omnia*, scilicet vel 1.  
*appretiativè* vel 2. etiam *intensivè*, ut habet  
Scotus 3. *dist. 27. q. un. §. quantum ad il-*  
*lum articulum*. *Intensivè* super omnia di-  
ligitur, dum quis ex majori affectu vult  
Deo bene esse, quàm alicui alteri; vel, ut  
alii hodie loquuntur, quando actus amoris  
in Deum est intensior seu vehementior om-  
ni alio amore erga creaturas. *Appretiati-*  
*vè* verò super omnia diligitur, quando ha-  
betur in majori pretio, quam quævis alia  
creatura, ita scilicet, ut amans Deum hōc  
modo vellet potius omnem aliam creatu-  
ram, quantumvis sibi charam, & quid-  
quid

quid demum in creatis charum esse potest, relinquere, quàm Deum. Ita in *recommunis DD.* Hoc notatô

R. Jam ad quæstionem propositam, 202. Omnis homo ratione præditus tenetur diligere Deum super omnia appretiativè Eundem scilicet habendo in majori pretio &c. non tamen super omnia intensivè. Ita Doctor subtilis *loc. cit.* & alii Doctores *communissime*, esto contradicat Henno.

Ratio prioris desumitur ex illo *Matth. 22. Diliges Dominum Deum tuum ex toto corde tuo, & in tota anima tua, & in tota mente tua &c.* atqui hoc mandatum intelligi nequit de dilectione intensivè summa, prout statim dicetur: ergo debet intelligi de dilectione appretiativè tali.

Ratio igitur posterioris inde desumitur, quia hodie nobis non constat, neque humanitùs constare potest, quisnam amor sit intensivè summus; hinc tale præceptum, utpote difficillimum & supra vires humanas, eò ipso præsumi non debet fuisse impositum humeris hominum; & certè infinitis scrupulis daret ansam, quandoquidem nullus scire potest, an Deum dilexerit amore intensivè summo: cùm proin aliunde constet, in dubio de obligatione unquam contracta subditum manere in possessione suæ libertatis, prout diximus in *tr. pralim. Confer. 6. n. 152.* hinc prudenter omnino

Q5

con-

concludimus, huic præcepto satisfieri per amorem Dei super omnia, seu, quod idem est, *summum appretiative*, licet *non intensive* talem,

Quæres 4tò, quoties teneamur Deum diligere, eliciendo actum formalem dilectionis?

203. R. Vi magni mandati de diligendo Deo quisque per se tenetur elicere actum formalem dilectionis erga DEUM 1. post adeptum rationis usum, & agnitam Dei bonitatem. 2. in mortis articulo, nec non 3. sæpius per decursum vitæ. Ita hodie *communissimè Doctores*. D. Thom. 1. 2. q. 89. art. 6. Scotus ubi supra n. 18. Sporer tr. 2. c. 5. n. 33. & seqq. Marchantius trib. part. 2. tr. 2. tit. 4. sect. 1. q. 2. Laymann lib. 2. tr. 3. c. 2. num. 6. Illsung. tract. 3. disp. un. à num. 69. Ratio primi hæc est: quia ex S. Scriptura *Matth. 22.* mox allegata certò constat, quòd homo teneatur Deum diligere: & hoc profectò Status & Conditió Viatoris exigit, ut finem viæ tunc intendat sibi que præfigat, cum primum illam ingreditur: at, ubi primò homini illucescit diluculum rationis, ita ut agnoscat Deum in ratione ultimi finis & summi boni, incipit esse viator moraliter loquendo: ergo cum DEUS ab homine rationis usu prædito in ratione ultimi finis non possit aliter intendi, nisi per actum Charitatis di-
- cen-

cendum est, quòd tunc primò teneatur; id quod amplius confirmari potest ex illa *l. 14. ff. de Reg. Jur. in omnibus obligationibus, in quibus dies non ponitur, presenti die debetur*, scilicet satisfieri obligationi: ergo eum Deus non videatur apposuisse certam diem huic obligationi, dicendum, quòd homo teneatur elicere actum formalem Charitatis, quamprimum illum in ratione summi boni & ultimi finis sui incipit agnoscere. Ratio 2di est: quia illo tempore, quò instat articulus mortis seu etiam vicinum mortis periculum, vel maximè ad amorem Dei super omnia nos videntur compellere tot gratiæ, tot favores, tot beneficia tempore totius vitæ accepta.

Et certè, si in eo articulo quisque quantum potest signa amoris amicis suis exhibet: quidni eadem amicorum nostrorum amicissimo, Deo scilicet, à quo processimus, & ad quem proximè tendimus, exhibere deberemus? Ratio denique 3tii haud obscurè deducitur ex illo *Deuteronom. c. 6.* ubi dicitur: *Diliges Dominum Deum tuum ex toto corde tuo, & ex tota anima tua & ex tota fortitudine tua, eruntque verba hæc, quæ ego præcipio tibi hodie in corde tuo, & narrabis ea filiis tuis, & meditaberis in eis sedens in domo tua, & ambulans in itinere, dormiens, atque consurgens; quibus verbis, uti sapienter cum Cardena & aliis advertit Ba-*  
ben-



benstuber cit. art. 5. n. 9. inculcatur frequens exercitium diligendi DEum. Quod quidem efficacissime confirmatur ex eo, quòd Innocentius Papa XI. sequentes tres propositiones tanquam Scandalosas, & in praxi perniciosas damnaverit; quarum prima (quæ est numerò 5ta inter damnatas) ita habet: *An peccet mortaliter, qui actum dilectionis DEI semel tantum in vita eliceret? condemnare non audemus.* 2da (numerò 6.) *probabile est, ne singulis quidem rigorosè quinquenniis per se obligare præceptum Charitatis erga DEum.* 3tia (numerò 7.) *tunc solum obligat (præceptum charitatis) quando tenemur justificari, & non habemus aliam viam, quâ justificari possumus.*

204. Dixi notanter, quòd in præfatis tribus temporibus vi magni mandati teneamur *per se* diligere Deum, eliciendo scilicet actum formalem charitatis; nam quòd per accidens sæpius teneamur diligere Deum apud omnes in confesso est, & extra controversiam; idque præcipue primò, quoties urget aliud præceptum, quod sine actu dilectionis DEI adimpleri nequit, ut puta 1. Si quis in peccato mortali existens teneatur vel celebrare, vel Sacramentum ministrare, vel etiam Sacramentum aliquod vivorum suscipere, nec habet copiam confessarii. 2. Dum quis gravissima tentatione sive odii erga DEum, sive alterius peccati obruitur, ita,

ita, ut credat, se aliter non posse evadere, nisi eliciendo actum amoris erga DEUM, Ratio jam sæpius fuit inculcata: quia scilicet obligatus ad aliquem finem eò ipso censetur obligatus ad media in eum finem necessaria: fatendum tamen est, quòd is, qui ob omissionem amoris incidit v. g. in peccatum Lasciviæ, propterea non teneatur specialiter sese accusare de omissione charitatis, quippe ad quam per se non supponitur fuisse obligatus, sed satisfacit exponendo peccatum commissionis. Ita omnes quot scio.

Illud insuper silentiò hic minimè prætereundum censeo, quod præter alios ad declinandos conscientiarum laqueos Sapienter admonet Cardenas *in crisi theolog. diff. 6. c. 2. a. 2. n. 14.* eumque secutus R. D. P. August Michel *theolog. canon-Moral. part. 1. tom. 2. q. 3. §. 1. n. 15.* scilicet ad satisfaciendum huic præcepto non semper opus esse, ut quis eliciat actum charitatis formalem, et explicitum, sed sufficere etiam virtuales & implicitum, qualem exercet is, qui præcepta DEI observat, quia scit, hoc esse Deo placitum, vel qui peccatum committendum evitat, vel jam actu commissum efficaciter detestatur; eò quòd sciat, hæc repugnare divinæ & infinitæ bonitati. &c.

Rursus huic præcepto haud infrequenter satisficit per hoc, quòd actus charitatis exercetur

ceatur ex imperio alterius virtutis ; ut dum quis peccati mortalis sibi conscius, & copiam confessarii destitutus vult celebrare, proptereaque praviè elicit actum perfectæ contritionis, ad quem virtute Religionis adstringitur in illis circumstantiis : quo casu nedum virtuti Religionis, sed & charitatis satisfacit ; tametsi enim secundum dicta præcepto charitatis seu magni mandati obligemur per se ad non nimis diu differendum actum charitatis, minimè tamen prohibemur, ne hunc urgente simul præcepto alterius virtutis, eliciamus.

Quæres igitò, quomodo homines præsertim rudiores, & toti quanti immersi hujus sæculi cupiditatibus ac desideriis, excitari possint aut debeant ad formalem actum supernaturalem charitatis ?

206. R. Eò ferè modo ad hujusmodi amorem excitandi sunt, quò modo *part. 2. Theol. Sacram. Conf. 3. n. 72.* diximus, eos esse excitandos ad veram contritionem supernaturalem, scilicet incipiendo à naturalibus & sensibilibus motivis, & ab his postea ascendendo ad altiora ac supernaturalia, v. g. hoc, aut simili modo ; nunquid charissimè fili (aut filia) parentes tuos, vel illos, qui tibi benefaciunt, amas, & diligis ? nunquid etiam nôsti DEum esse optimum parentem nostrum, qui de nihil creavit nos, qui nos conservat, & in hunc finem indies  
innu-

innumera, & maxima quidem beneficia nobis confert, paratus pro exiguis nostris meritis nobis ulterius conferre vitam & gloriam sempiternam? numquid ergo charissime fili hunc optimum parentem nostrum, utpote infinite bonum sincere amas, & amare desideras? Dico ergo charissime fili, & ex corde dico: O summum, & infinitum bonum meum, amabilissime DEUS: diligo te ex toto corde meo, & amo te, quia tu es summè & infinite bonus: amo te Deus meus, & magis ac magis te amare volo. Da mihi DEUS meus & omnia! da mihi hanc gratiam, ut te desiderem, & amen quantum volo, & quantum debeo &c. &c.

Quæres 6tò, utrum præter Deum O. M. insuper teneamur diligere nos ipsos, & proximum nostrum?

R. Affirmativè. Ita enim expresse no- 207.  
bis præcipitur *Matth. 22.* sequentibus omnino verbis: *Diliges proximum tuum sicut te ipsum.* Id ipsum inculcatur *Joan. 1. cap. 4.* *Hoc mandatum* (ait Evangelista amoris) *habemus à Deo, ut qui diligit Deum, diligit & fratrem suum.* Et ratio est: quia in proximo relucet idem formale motivum dilectionis, scilicet bonitas divina participata, in quantum sumus creaturæ Dei, conditæ ad imaginem Ipsius, gratiæ, amicitiae divinæ, & æternæ beatitudinis capaces:

ces : ergo sicut DEum jubemur diligere, ita & nos, & proximum nostrum, non quidem eodem modô, quô DEum, scilicet *super omnia appetitivè*, sed propter eandem DEI bonitatem, esto limitatè participatam. Et hoc præceptum, quatenus affirmativum est, præcipit 1. Ordinem inter personas diligendas servandum. 2. Dilectionem inimicorum. 3. Opera misericordiæ, eleemosynam scilicet, nec non correctionem fraternam : quatenus verò implicite & virtualiter negativum est, prohibet 1. odium proximi. 2. Scandalum, & 3. injurias, damna, vel alia quæcunque mala injustô modo eidem inferenda, ut videbitur.

At, inquires, quisnam nomine Proximi intelligendus est ?

208. R. Nomine Proximi intelligi debet omnis creatura rationalis, divinorum bonorum, gratiæ, & beatitudinis æternæ capax ; quales sunt 1. Angeli. 2. Beati in cœlo. 3. Homines viatores, nec non, 4. animæ in purgatorio. Non tamen dæmones, neque damnati, quippe qui ex invariabili decreto divino ad tartara damnati, non amplius sunt capaces ad assequendam beatitudinem : ex quo liquet pariter, creaturas irracionales non venire nomine proximi. Videatur Laymann *l. 2. tr. 3. c. 2. n. 3.*

Quæ-

Quæres 7<sup>timò</sup>, qualis ordo charitatis nos inter & proximum sit observandus?

Ante responſionem notanda eſt ſolemnis illa diſtinctio inter tria bonorum genera, jam alibi à nobis inſinuata, ſcilicet 1. bona ſpiritualia, utputa beatitudo, gratia ſanctificans, virtutes &c. 2. Bona corporalia, utputa vita, ſanitas, membrorum integritas, 3. Denique bona externa vel etiam fortunæ; uti ſunt fama, honor, divitiæ, agri, animalia &c. &c. his notatis jam ad quæſtionem propoſitam

R. Ordine charitatis ante omnia & ſuper omnia diligendus eſt. 1. DEus ceu infinite bonus. 2. Quiſque tenetur diligere ſeipſum ſecundùm animam & bona ſpiritualia, ſeu etiam ſupernaturalia, deinde proximum ſecundùm eadem bona. 3. Rurſus ſeipſum ſecundùm bona corporis & dein proximum ſecundùm eadem bona. 4. Denique ſeipſum ſecundùm bona externa, & dein proximum ſecundùm eadem bona. Ex quibus liquet, quemvis adſtringi 1. ad plus diligendam animam ſuam, quàm corpus. 2. Ad plus diligendam animam proximi, quàm corpus proprium vel corpus illius. 3. Ad plus diligendum corpus vel ſanitatem propriam, quàm corpus, aut ſanitatem proximi; quòd ſi nonnulli obſervarent, proſectò non biberent in ſanitatem aliorum uſque ad notabilem deſtructionem.

*R. P. Elbel, Pars II. de Fide &c.* R. nem

nem sanitatis propriæ. Videatur de hoc Henno *tract. de virtut. disp. 6. q. 10.* Vel Babenstuber *tr. 5. disp. 1. art. 4. n. 20.*

211. Quocirca tamen ulteriùs benè notandum & distinguendum est, inter bona necessaria & non necessaria v.g. ad salutem (idem proportionaliter tenendum est de bonis corporis) Bona ad salutem æternam necessaria sunt baptismus, fides vera, pœnitentia post lapsum, gratia Sanctificans, perseverantia finalis ac similia: & hæc juxta ordinem charitatis unusquisque tenetur potius sibi velle aut procurare, quàm proximo vel aliis, veluti admonet Christus Salvator noster apud *Matth. c. 16. v. 26. quid prodest* (inquiens) *homini, si Mundum universum lucretur, anima autem sua detrimentum patiatur?* Porro inter non necessaria bona ad salutem computantur v.g. status Religiosus, Sacerdotalis, & alia dona gratiæ gratis datæ; quæ quidem sine peccato possumus ex causa rationabili optare aliis potius, quàm nobis, eo ipsô, quòd non teneamur absolute de similibus nobis providere, prout benè docent Coninek *de actibus supernat. disp. 25. n. 43.* Valentia 2. 2. q. 4. part. 3. conclus. 1. eosque secutus Michel *Theol. Canon-mor. tom. 2. part. 1. q. 3. §. 2. n. 3.*

212. Rursus ad bene intelligendam resolutionem proxime n. 210. datum bene distingui debet

debet inter triplicem necessitatem, scilicet extremam, gravem, & communem. Extrema dicitur illa, è qua quis se ipsum saltem moraliter loquendo nequit eripere, sed indiget ope alterius: talem patitur in ordine ad salutem animæ v. g. infans moriturus ante Baptismum; item 2. peccator in somnis vel amentia occidendus; nec non 3. infidelis aut alius peccator valde rudis & ignarus contritionis, qui, si sine confessione seu beneficio absolutionis moriatur, certò damnabitur.

Gravis necessitas dicitur, è qua quis sine permagna difficultate se nequit extricare, nisi ab alio sublevetur.

Denique communis necessitas illa appellatur, quæ tametsi proprio conatu vinci posset, vinci tamen nequit sine difficultate præciso alieno adjutorio.

Dicendum itaque est 1. quòd vi magni <sup>213.</sup> mandati quisque (modò tamen NB. affulgeat spes certa juvandi, nec adsit alius, qui possit, vel omnino debeat potius adjuvare) proximo in extrema necessitate spiritali seu salutis æternæ constituto teneatur succurrere etiam cum periculo vitæ corporalis. Ratio colligitur, tum ex illo *Joan. 14.* ubi Christus ait: *hoc est praeceptum meum, ut diligatis invicem, sicut dilexi vos*: atqui Christus nos dilexit dando vitam pro nostra salute & redemptione: hac de causa idem



Evangelista epist. 1. c. 3. v. 16. ait: *quoniam ille animam suam pro nobis posuit, & nos debemus pro fratribus animas ponere.* Tum ex eo etiam; quia Charitas utpote principaliter respiciens bonum & beneplacitum Dei, magis nos inclinat ad prosequenda illa bona, quæ Deo præplacent: atqui bona spiritualia seu salus animæ magis placet Deo, quàm quævis bona temporalia, etiam vitæ: ergo huic præferri debet salus æterna proximi. Econtra 2. proximo in gravi duntaxat necessitate salutis æternæ constituto regulariter loquendo nullus tenetur succurrere cum jactura vitæ aut notabili dispendio bonorum temporalium, veluti post S. Thomam 2. 2. q. 46. a. 1. ad 3<sup>ti</sup>um docet Suarez disp. 9. de charit. sect. 2. n. 3. & 4. Ratio hujus est: quia lex charitatis nimis dura accideret, si ad tollendam necessitatem gravem, è qua proximus seipsum absolute loquendo extricare potest, teneremur vitam nostram aut bona ad hujus sustentationem necessaria exponere. Fatendum nihilominus est, quòd cum bonum spirituale proximi toto genere excedat bona temporalia, cum aliquali bonorum temporalium jactura aut impendio teneamur succurrere proximo in gravi necessitate salutis constituto, utputa in ordine ad amplectendam fidem Catholicam &c. modò appareat vera aliqua spes sinceræ conversionis. Denique

3<sup>ti</sup>o

3tio ubi proximus noster constitutus deprehenditur in communi tantum necessitate, utique charitas suadet, ut eidem succurramus, at, si absque notabili detrimento bonorum temporalium, vel alio graviore incommodo fieri hoc nequeat, minimè urget. Ratio hujus est: quia constitutus in communi necessitate potest seipsum juvare: ergo si hoc renuat, sive ex desidia sive ex alia causa, nemo sub gravi culpa adigendus est, ad sublevandam hanc necessitatem. Videantur de hoc Bonacina *disp.* 3. q. 4. *pu.* 4. n. 2. vel Michel *loc. cit.* n. 11.

Quæres octavò? an, vel qua ratione charitas habitualis (quæ secundum Scotistas eadem est realiter cum gratia Sanctificante) amittatur?

R. Gratia hæc deperditur 1. per quod-  
vis peccatum mortale. 2. per venialia autem, quantumvis multiplicata charitas habitualis non deperditur, bene tamen charitatis fervor minuitur. Ita cum communi theolog. Herincx ubi *suprà disp.* 11. n. 20. Henno *disp.* 6. q. 6. *conclus.* 2. & 3. Ratio prioris evidenter liquet ex scriptura *Rom.* 6. ubi dicitur: *stipendia peccati mors.* & rursus *Jacob.* 1. *peccatum, cum consummatum fuerit, generat mortem:* utique non corporis, experientiâ teste: ergo animæ. Qua ratione Concilium Trident. *sess.* 6. *de justific.* cap. 15. ait: *asserendum est, non mo-*

*ad infidelitatem - , sed etiam quocunque alio mortali peccato - - acceptam justificationis gratiam amitti.* Et licet peccatum mortale non destruat gratiam Sanctificantem physicè, nihilominus eandem destruit moraliter & demeritoriè, idque ex ordinatione divina; quia qui graviter offendit divinam Majestatem, non meretur amplius haberi aut tractari à Deo velut amicus. Videatur Herincx *cit. n. 23.*

Ratio autem posterioris est hæc: quia peccatum veniale quodcunque demum, vel quantumvis multiplicatum, quamdiu manet intra limites venialis, non est offensa gravis, sed levis tantum; atqui non est, conveniens, ut propter levem offensam dissolvatur amicitia: ergo charitas propterea non amittitur; hinc etiam *Proverb. 24. v. 16.* dicitur: *sepius enim cadit justus, & resurget &c.*

Quòd autem fervor charitatis per venialia, præsertim multiplicata minuatur, nedum experientia quotidiana probat, sed insuper suadet ratio: quia quodlibet veniale generat habitum vitiosum, & hoc ipso modo inclinatur ad peccandum, animam debilitat, & gratiarum actualium à Deo obtinendarum fluxum quodammodo impedit & obstruit: ergo charitatem minuit. Videatur Herincx *locò proximè cit. n. 19.*

§. III.

§. II.

Proponuntur & breviter resol-  
vuntur Casus practici de Chari-  
tate, quam unusquisque tum sibi, tum  
etiam proximo debet.

CASUS PRIMUS.

**T**itia à germano fratre suo offensa diu de-  
liberavit, quò tandem medio miserabili  
vita hujus cursui finem imponeret : cùm verò  
bene agnoverit suicidium, quippe à quo natu-  
ra tantopere abhorret, esse illicitum : hinc fir-  
missimè statuit, quòd velit occidere infantem  
innocentem, & post infanticidium illicò sese  
præsentare Judici, à quo procul dubio coge-  
retur reddere vitam pro vita, sicque quam-  
optimè disposita & contrita moreretur, quem-  
admodum paulò ante viderat aliam personam  
eadem viâ, & optimè quidem dispositam, de-  
fungi : hoc verò suum propositum sine mora  
executioni mandavit, dum paulò post infanti  
innocentissimo in locum campestem ab homi-  
num frequentia remotum sub schemate bene-  
volentia abducto, quodam cultro guturiolum  
miserabiliter abscidit, moxque Judicem adiens  
manum & cultellum innocenti sanguine adhuc  
rubentem monstravit, petens, ut pro qualitate  
delicti sui consimili morte puniretur. Omis-  
sis jam aliis pluribus dubiis circa hanc speciem

R 4

facti

*facti mobilibus, ad nostrum propositum quari potest, an, vel qualiter in hoc facto Titia peccaverit contra charitatem tum proximo, tum sibimet etiam debitam?*

215. R. ad primum. Titia procul dubio gravissimè peccavit contra charitatem proximo suo debitam, occidendo innocentissimum infantem, & quidem sub schemmate benevolentiae.

Ratio hujus de se liquet: quia egit contra præceptum 5<sup>um</sup> decalogi per se graviter obligans. Et certè, si nefas est, proximo suo efficaciter desiderare, seu etiam optare mortem, juxta *communissimam* DD. videndam apud P. Sporer *tr. 2. in decal. c. 6. sect. 1. n. 9.* quantò majus malum est, eidem mortem & quidem tam crudelem, effectivè inferre? Nec facile crediderim, hominem usu rationis præditum fore tam simplicem, ut malitiam, vel etiam crudelitatem hujus facti non apprehendat, id quod vel maximè etiam de Titia suspicari licet, eò quòd hoc infanticidium commiserit eo fine, ut ob hoc delictum condemnaretur ad similem mortem: ergo evidens videtur, quòd gravitatem hujus delicti satis agnoverit, utputa haud ignara, nec immemor poenæ eidem commensuratæ ac debitæ. Qua ratione pariter concludendum censeo, quòd Titia vi recentissimæ constitutionis: *Ex quo divina 1725. 15.*

Junii

*Junii Roma emanata* Authoritate S. M. Benedicti XIII. non potuisset gaudere beneficio asyli, casu quo confugisset in aliquem locum sacrum. Ita profectò pro foro conscientiae concludendum arbitror, quidquid denuum Judex pro foro externo (quod me minimè tangit vel angit) concluderit.

R. Jam 2dò, Titia etiam peccavit graviter (saltem per se loquendo) contra charitatem sibi debitam.

Ratio est: quia sibi voluit grande 216. malum, imò quantum in se erat, procuravit, scilicet mortem temporalem, & quidem in manibus Carnificis subeundam; at, hujusmodi malum sibi velle, & quidem voluntate antecedente Divinam, non vacat culpa gravi, prout colligi potest ex dictis n. 210. Est etiam Sanchez, Soto, Grano & alii videndi apud Busenbaum probabiliter teneant, posse mulierem ad evadendam gravem infirmitatem, vitam acerbam, & alia similia mala sibi *optare* mortem; nihilominus hætenus nullum inveni, qui doceat, quòd ob hujusmodi causam vel innocentem occidere, vel mortem in manibus Carnificis subeundam moraliter sibi *procurare* liceat.

At verò, inquires, Titia non voluit mortem ut sibi malam, sed potius bonam, quatenus eandem apprehendit velut finem ma-

R §

lorum

lorum in hac miserabili vita subeundorum, vel potius velut medium, felicissime ex hac miseriarum valle demigrandi ad meliorem vitam: ergo per hoc nullatenus peccavit contra charitatem sibi debitam.

217. R. Distinguendo consequ. Ergo nullatenus peccavit per accidens, quia scilicet hanc malitiam contra charitatem sibi debitam fortassis non apprehendit. *Trans.* Nullatenus peccavit per se loquendo, *neg. consequ.* Nam finem hujus vitæ, seu mortem sibi inferendam, inordinate appetiit, vel potius procuravit. Fateor nihilominus, quod cum Titia hoc non tam fecerit ex odio sui, quam ex amore inordinato (vel potius passione prædominante) hinc non teneatur in confessionali specialiter se desuper accusare, sed satisfaciat dicendo, se occidisse infantem innocentem, & eo quidem fine, ut pari morte punita ab hujus vitæ miseriis expediretur. Quemadmodum enim ille, qui committit peccatum v. g. furti aut fornicationis &c. non ex odio Dei, sed impulsu inordinatæ passionis &c. propterea non censetur committere speciale peccatum contra charitatem DEI, sed satisfacit in Confessione exprimendo illud peccatum v. g. luxuriæ, vi cujus expressionis Confessarius satis potest intelligere, cum quodammodo læsisse charitatem Deo debi-

debitam, quandoquidem talis læsio imbibitur generaliter in omni peccato, secundum communissimam DD. videndam apud P. Sporer *tr. 2. c. 5. sect. 4. n. 46.* ita pariter Confessarius ex tali Confessione potest satis liquidò intelligere, Titiam vi homicidii perpetrati peccasse quodammodo contra charitatem sibi debitam.

## CASUS SECUNDUS.

**S**empronia puella honestissima, dum jussu heri sui tempore nocturno, aut certè jam satis obscuro (nescio quò fine vel cuius negotii causâ) per publicam civitatis plateam ingreditur, ab aliquo non minùs feroci, quàm lascivo milite stupri intentandi causâ de repente obruitur, quæ tam evidenti tum animæ, tum etiam pudicitie & corporis perdendi periculo constitutam se cernens, dum subitò alium quendam civem sibi perbene notum præterire animadvertisset, eundem proprio nomine compellendo imploravit, quatenus se è præsentis periculo vellet eripere. Civis ille rei novitate nonnihil perturbatus, dum propius accessit, advertit militem stricto pugione mortem sibi minitantem, nò quantocyùs inde discederet: hac de causa illico abiit vias suas, relinquendo Semproniam in tanto periculo trepidantem. Jam ad nostrum propositum quari potest 1. Utrum Sempronia fuerit obligata ad implorandam  
opem



*opem civis prætereuntis ? 2. An Civis imploratus fuerit obligatus ex charitate ad ferendam opem Sempronia ?*

218. R. Ad primum. Sempronia fuit obligata ad clamandum, & implorandam opem transeuntis civis. Ratio est : quia obligatus ad finem, eo ipso censetur obligatus ad media in eundem finem necessaria juxta notissimam illam Regulam ; atqui Sempronia tenebatur ad servandam pudicitiam & non admittendam copulam : in hunc verò finem maximopere necessarium judicavit implorare opem civis prætereuntis, qui, tametsi fortassis se solo non fuerit sufficiens, potuisset tamen, utpote constitutus in civitate, aliorum auxilio liberare Semproniam, utputa vocando milites, quibus actu incumberebat custodire civitatem, vel alios concives in vicinia &c. &c. Videantur ea, quæ in casu haud multum absimili diximus in *tr. prælim. Conf. 2. n. 40.*

219. R. Jam ad secundum. Civis imploratus fuit quidem obligatus succurrere Sempronix, eandemque pro viribus è præsentis periculo liberare, utputa implorando aliorum auxilium, veluti proximè dictum fuit. Casu quo tamen moraliter loquendo id non potuisset, sibi que rationabiliter timuit de periculo vitæ, dicendum foret, quòd non peccaverit abeundo, & relinquendo.

Sem-

Semproniam trepidantem &c. Ratio hujus colligi potest & debet ex dictis *n. 213.* quia nullus tenetur cum jactura aut periculo vitæ temporalis succurrere proximo in gravi duntaxat, & non extrema necessitate salutis constituto : atqui Sempronia non fuit constituta in extrema necessitate salutis spiritualis, id est, in tali, è qua non potuisset seipsam liberare ; quandoquidem steterit in ejusdem arbitrio, consentire delectationi carnali vel non : quo consensu non præstito utique non peccasset, neque incurrisset jacturam salutis, sed potius reportasset ingens meritum : ergo cum tanto periculo vitæ Civis præteriens non tenebatur succurrere Sempronix, esto hæc fuerit constituta in evidenti periculo nedum pudicitix, sed & salutis perdendæ. Videantur de hoc Filliuccius *tr. 28. c. 2. n. 37.* Laymann *lib. 2. tr. 3. n. 4.* Vel Michel *ubi supra num. 4.*

At, nunquid licuisset Sempronix, utpote non valenti alia viâ evadere, injustum aggressorem occidere v. g. cultello vel alio instrumento eundem confodiendo eo fine, ut evaderet præsentissimum periculum animæ & pudicitix ?

¶. Licuit probabilissimè si supponatur, 220.  
quòd alia via nequiverit declinare periculum. Ita hodie dum contra Matthæucci &  
Hen-

Henno, aliosque paucos tenent insignissimi DD. Filliuccius, Molina, Azorius, Sporer *tr. 5. c. 2. sect. 3. 165.* Illung *tr. 4. disp. 3. n. 68.* Lessius *de just. lib. 2. c. 9. dubit. 12. n. 76.* Sayrus *lib. 7. Clar. Reg. c. 10. n. 36.* Babenstuber *tr. 5. disp. 6. art. 2. num. 10.* Viva *prop. 18, ab Alexandro VII. damnatam n. 12.* Cardenas *Crisi Theolog. dissert. 21. c. 2. art. 4. n. 47.* qui mox *num. 48.* subdit, hunc, aliosque ejusdem generis Casus admittendos esse ab omnibus ex regula : *vim vi repellere licet. l. ut vim. ff. de just. & Jur. Et Cap. si vero 1. de Sentent. Excomm. & cap. 2. de homicid.* Ratio est : quia bonum pudicitiae meritò præfertur cunctis opibus & thesauris rerum fortunæ : ergo si cum defensione inculpatæ tutelæ fas est occidere illum, qui injusto modò nititur tibi eripere aliquod bonum fortunæ magni momenti aut pretii : quidni cum eodem moderamine inculpatæ tutelæ liceat occidere injustum aggressorem pudicitiae. Accedit insuper, quòd talis puella ab injusto aggressore exponatur evidenti periculo peccati : & licet peccatum ipsum non sit certò futurum ; eò quòd puella possit non consentire delectationi, nihilominus periculum peccandi certum est, & evidentissimum, prout nemo prudentum non videt.

Dices

Dices tamen contra hoc. Non perditur bonum pudicitiae per stuprum, sed potius juxta effatum S. Luciae notissimum, castitas duplicatur ad coronam, modo puella consensum constanter excludat: ergo cum hæc possit, immò debeat non consentire, pariter non obstante stupro potest conservare bonum pudicitiae: ergo propterea nullatenus licet stupratori auferre bonum vitae.

*ꝛ.* Ad hanc instantiam cum distinctione. 221.  
Non perditur bonum pudicitiae mentalis, ubi puella constanter excludit consensum, *conced.* pudicitiae corporalis seu etiam integritatis, *neg. ant. cum. conseq.* Certum quippe est, quod propterea claustrum virginale violetur, & puella exponatur periculo diffamationis publicae, aliorumque graviorum incommodorum, si ex tali congressu evaderet prægnans & gravida, prout revera contingere natum est, esto supponatur nolle consentire in delectationem naturaliter subsequentem. Profectò nisi in hoc casu liceret vim vi repellere, etiam occidendo injustum aggressorem, hujusmodi homines foverentur in frequentandis stupris, & aliis sceleribus, prout bene observat P. Illung *tr. 4. disp. 3. n. 68.* Nec refert, quod invasor injustus propterea sit incursum nedom corporis, sed & animæ seu æternæ, damnationis periculum &c.  
Non

periculo. Ratio prioris de se liquet, laudabile enim & summè meritorium est, erga proximum suum exercere actum charitatis præstantissimum: atqui Cajus succurrendo suo vicino in his circumstantiis: ubi is videtur quodammodo derelictus ab omnibus, exercebit actum præstantissimum charitatis: ergo laudabilissimè faciet saltem per se loquendo.

Dico: *saltem per se loquendo*; nam, si 223.  
vita Caji supponatur esse necessaria aliis pluribus v.g. Uxori vel prolibus propriis &c. aliisvè consanguineis ad bonum temporale, vel etiam ad salutem animæ, non bene faceret exponendo vitam propriam pro vita alterius sui vicini velut hominis privati, uti supponit Casus, quin potius graviter peccaret contra debitum ordinem charitatis postponendo nedum vitam propriam, sed & uxoris, proliumque comoda vitæ sui proximi. Hac de causa S. Augustinus *lib. de mendac. c. 6.* ait: *si quis exponat vitam corporalem propriam pro vita corporali alterius, jam non diligit proximum sicut se ipsum, sed plus, quàm se ipsum, quod doctrinæ regulam excedit.* Videatur Babenstuber *cit. tr. 5. disp. 1. art. 4. n. 26.* Herincx *disp. 11. n. 88.*

Ratio autem posterioris hæc est: quia 224.  
præceptum de conservanda vita alterius non potest cum gravi detrimento vitæ pro-  
*R. P. Elbel, Pars II. de Fide &c.* S priæ

priæ obligare : esset enim nimis asperum & durum præceptum : at, qui se exponit periculo amittendi vitam propriam pro conservatione alterius, procul dubio grave detrimentum subit, vel hujus subeundi periculo sese exponit : ergo ad hoc minimè tenetur. Ita Saà, Navarrus, Toletus & Lopez, quos citat & sequitur Castropalao *tom. 1. tr. 6. disp. 1. punct. 8. n. 2.*

At, inquires fortassis contra hoc. Vicinus Caji supponitur nedum in gravi, sed omnino in extrema necessitate salutis corporalis constitutus : atqui constituto in extrema necessitate tenemur succurrere quantum valemus : ergo & Cajus à Confessario fuit obligandus ad succutrendum, eo præsertim, quòd periculum vitæ ex parte Caji non sit tam propinquum, sicuti supponitur esse ex parte proximi.

225. *R.* Distinguendo & explicando *min. tenemur proximo in extrema necessitate constituto succurrere, quantum possumus moraliter, id est, sine æquali damno, vel periculo damni æqualis, concedo.* Quantum possumus præcisè physicè, at non moraliter, prout evenit in hoc casu, *nego min. cum conseq.* Etenim charitas bene ordinata postulat, ut quisque vitam propriam præferat vitæ proximi, præsertim hominis privati.

Adde insuper, quòd cum tanto periculo ne quidem in extrema necessitate constituto  
pro-

proximo teneamur succurrere titulô charitatis præcisè (aliud namque foret, si insuper accederet titulus justitiæ, prout fit in medico corporali aut spiritali) ubi inveniuntur alii, qui possent & deberent succurrere: atqui in nostro casu procul dubio potuère inveniri alii, qui debuissent aut certè potuissent succurrere: immò in tali casu ex officio incumbit Magistratui vel Superiori communitatis cujuscunque demum, ut provideat hujusmodi hominibus extreme indigentibus de necessariis, ne hujus occasione vel defectu tota communitas inficiatur. Suadendum igitur potius fuisset Cajo, ut rem deferat ad Superiorem communitatis, aut propriis expensis alium infirmarium substituatur, quò facto procul dubio abundè satisfaciet eharitati proximo suo debitæ.

§. III.

Corollaria ex dictis inferenda.

**C**olliges ex hætenus dictis primò, contra præceptum charitatis tribus modis peccari posse mortaliter, & primò quidem omittendo actum dilectionis, quando hoc præceptum obligat. 2. Diligendo Deum aliter, quàm oportet diligere. 3. Per for-

male odium DEI. Quantum ad primum, id est, ad omissionem dilectionis, pauci peccant mortaliter; dum enim fideles exequuntur opera præcepta v. g. audiendo missam, orationi incumbendo, & præsertim dicendo orationem dominicam, & illa verba: *Sanctificetur nomen tuum, fiat voluntas tua* &c. sincero ex corde proferendo, exercent actum charitatis, & quidem amicitiae; quia per hoc appetunt Dei gloriam in quantum Deo bona: rursus dum tentationibus ad mortale peccatum incitantibus resistunt, eò quòd sciant huiusmodi peccatis Deum offendi, profectò exercent actum amoris erga Deum; secus enina procul dubio consentirent, & Deum offenderent &c. prout cum Lorca & aliis prudenter notat Cardenas in *crisi Theolog. dissert. 6, c. 2. art. 3. à. n. 24.*

Quantum ad 2dum modum peccatur, dum quis in animo comparatus est, ut Deum quidem diligit v. g. propter vitam & gloriam sempiternam, nunquam tamen dilecturus, si ea spes præmii abesset: quod quidem rariùs inter verè fideles contingere natum est: frequentius tamen quàm par est inveniuntur homines, qui totum suum amorem & affectum collocant in hisce temporalibus, parum curantes de Deo, modò sæculi hujus voluptatibus & perituris illiciis semper perfrui possent. Et hi procul dubio



bio versantur in statu pessimo, utpote præferentes hæc bona temporalia ultimo suo fini, qui est Deus infinite bonus, & hoc ipso super omnia amandus.

Colliges 2dò, Odium formale Dei esse 227.  
peccatum omnium gravissimum: quia in hoc peccato immediatè ac per se involvitur aversio formalis ab ultimo fine, Deo scilicet infinite bono; qualis aversio formalis in aliis peccatis non reperitur, licet omnis, qui mortaliter peccat, convincatur, quòd virtualiter saltem sese voluerit avertere ab ultimo suo fine. Equidem verum est, quòd nullus possit Deum, utpote infinite bonum quà bonum odisse; quandoquidem bonitas non sit objectum motivum odii sed amoris; nihilominus cum homines subinde soleant apprehendere Deum velut authorem quorundam malorum seu calamitatum, utputa infirmitatum, persecutionum &c. hinc rarissimè quidem, non tamen nunquam solent concipere odium formale erga Deum haudquam absimiles illis insensatis & formalibus stultis, qui dum è cælo cadentibus nimbis aut nivibus obruti nonnihil gravantur, Deo, Sanctis, & omnibus elementis maledicunt. Videatur S. Thomas 2. 2. q. 34. art. 1.

Colliges 3tio, quòd tametsi nemo vi 228.  
lius charitatis teneatur cum periculo vitæ propriæ succurrere proximo in gravi duntaxat necessitate salutis constituto, secun-

dum dicta n. 213. fieri nihilominus possit, ut quis ad hoc teneatur, casu quo titulo charitatis insuper accidit alius titulus v. g. pietatis aut justitiæ: hac de causa juxta *Communissimam Doctorem* videndam apud Laymann *lib. 2. tr. 3. c. 3. n. 3.* Valentiam, Castropalao & alios, animarum Pastores alique Superiores, quibus ex officio incumbit procurare salutem Spiritualem suorum subditorum tenentur cum periculo vitæ corporalis succurrere periclitantibus: idipsum tenendum & asserendum est de Medicis, certo salario conductis &c. Ratio clara est: quia similes procul dubio strictiori vinculo tenentur ad succurrendum, quam alii ex mero titulo charitatis obligati; ergo cum isti teneantur succurrere proximo in extremo salutis Spiritualis periculo constituto, dicendum, quod illi, utpote ex justitia simul obligati, teneantur concurrere in necessitate etiam gravi duntaxat. Hac de causa Parochis tempore pestis, vel alterius persecutionis sibi, suisque ovibus v. g. ab hæreticis imminenti non licet fugere, nisi forte ad breve duntaxat tempus ob rationabilem causam alium subrogent, ad idem officium verè idoneum & capacem: neque fas est in talibus circumstantiis officio suo renunciare, nisi in promptu sit alius, qui cum bona venia Episcopi vel quorum interest, velit in se suscipere & exequi idem offi-

officium; quia juxta effatum Christi Domini *Joan. 10.* bonum Pastorem decet dare animam suam pro ovibus sibi concreditis: fugere verò mercenariis est proprium. Herincx, *cit. disp. 11. n. 96.*

Colliges 4<sup>to</sup>, ordinatam charitatem postulare, ut inter ipsos proximos servetur 229.  
quidam ordo dilectionis, ita scilicet, ut unus magis, quàm alter diligatur, & uni prius, quàm alteri succurratur. Ita communissime Doctores. Ratio est: quia natura ipsa & lumen naturale nobis congenitum nobis dictat, esse faciendum selectum inter diligendos, & magis (cæteris paribus) diligendos esse illos, qui nobis sunt conjunctiores: hac de causa videmus, matres majori dilectionis affectu ferri erga suos natos, quàm erga extraneos: quod pariter in brutis animantibus naturali instinctu ductis cernere licet: cum ergo inclinatio charitatis perficiat inclinationem naturæ, dicendum profectò est, illos esse magis secundum ordinem charitatis diligendos, qui nobis magis sunt conjuncti; quod vel inde etiam haud obscure licet colligere, quia odium parentum est longè gravius peccatum, quàm odium extraneorum: quam ob rem *Levitici 20. is.*, qui maledixerat patri vel matri, jubebatur occidi, non item, qui maledixerat alteri. Videantur de hoc D. Thomas 2. 2. q. 26. a. 6. Castropalao

tr. 6. disp. 1. pu. 10. n. 3. Filliuccius tr. 28. n. 47. & seqq. Herincx part. 3. tr. 1. disp. 11. n. 101.

230. Colliges igitur, in bonis ad naturæ, & vitæ corporalis conservationem pertinentibus consanguineos præferendos esse aliis non consanguineis: quin immò universaliter loquendo charitas ordinata postulat, ut sive in temporalibus sive etiam in spiritualibus, illis prius succurramus, qui nobis sunt respectivè conjunctiores sive sanguine, sive amicitia, sive Religione, ita, ut quo major, intimior aut nobilior est conjunctio, eo majori ardore, studio & conatu teneamur indigentibus succurrere; quæ quidem omnia fundantur in lumine naturali, inquit Henno *cit. disp. 6. q. 11. concl. 2.* Quod & D. Augustinus *lib. 1. de Doctr. Christ. c. 28.* clarissimè tradidit, inquit: *Cum omnibus prodesse non possis, his potissimum consulendum est, qui pro locorum & temporum, vel quarumlibet rerum oportunitatibus constrictius tibi quasi quadam sorte junguntur.* Ex quo idem Henno, *l. cit. & Herincx disp. 11. n. 102.* & alii inferunt, in casu, ubi omnibus indigentibus subvenire nequit, esse succurrendum 1. Patri. 2. Matri. 3. Uxori. 4. prolibus. 5. Fratribus & sororibus. 6. aliis consanguineis juxta gradus propinquitatis &c. licet alii velint, Uxorem à Marito præferendam esse Patri & Matri, saltem

saltem extra casum extremæ necessitatis. Ratio autem nostræ responsionis est: quia tametsi Uxor, utpote una caro cum marito, & filii velut pars inde decisa videantur eidem magis conjuncti, nihilominus beneficia tum temporalis tum spiritualis etiam vitæ videntur obligare nos, ut prius illis, quàm istis succurramus. Quidquid demum sit de hoc, illud nobis solatio esse potest, quòd ex subversione hujus ordinis rarò peccetur graviter, eò præsertim, quòd in praxi sæpissimè occurrant tales circumstantiæ, quæ cuivis prudentum suadent, esse huic potius quàm illi, esto fortassis magis conjuncto subveniendum, vel quia utriusque necessitas non est æqualis, vel quia prioritas unius exigit contrarium. Videantur de hoc Laymann *lib. 2. tr. 3. c. 3 num. 6* vel Filliucius *loc. cit. à n. 50.* Ex his ulterius

Colliges 6tò, in rebus pertinentibus ad 231. civilem communicationem (cæteris paribus) Concives esse præferendos aliis extraneis, quemadmodum etiam in rebus bellicis commilitones præferri oportet aliis non commilitonibus. Ratio est: quia cæteris paribus civis civi, commilito commilitoni conjunctior est, quàm aliis; Quod tamen intelligas velim, quando comilito aut civis habet actionem & causam justam, non item, quando habet causam injustam: unde

S s

de

de dum civis, vel miles, vel studiosus &c. incipit rixas vel insolentias sine justa causa, proptereaque vel Superiorum auctoritate, vel aliorum injuriatorum violentiâ comperitur aut vapulat, minimè sequitur, quòd huic potius, quàm legitimæ auctoritati debeas assistere. Videatur Laymann *loc cit.* vel Babenstuber *tr 5. disp. 1. art 4. num. 29.*

232. Colliges denique 7<sup>timò</sup>, creaturas rationales, homines scilicet, juxta Sanum charitatis ordinem esse præferendas creaturis irrationalibus. Ita omnes saltem speculative loquendo, licet in praxi non raro contrarium contingat. Ratio autem hujus illationis est: quia charitas proximi fundatur super communicabilitate beatitudinis; id est: tenemur proximum diligere, in quantum ad imaginem & similitudinem Dei creatus, ejusdem beatitudinis æternæ nobiscum capax: atqui solæ creaturæ rationales, non item irrationales sunt capaces beatitudinis: ergo juxta ordinatam charitatem tenemur homines præferre creaturis irrationalibus vel brutis animantibus, tametsi etiam hæc amore naturali sint digna, in quantum deserviunt ad gloriam Dei propagandam, vel ad nostram, proximorumve utilitatem, juxta illud *Exod. 23. Si videris asinum odientis te jacere sub onere, non pertransibis, sed sublevabis cum eo.* Pessimè proin

proin, & prorsus inordinate faciunt v. g. Maritus, qui animalia sua magis diligit, quàm uxorem propriam, aut liberos: pessimè item, ac perversè omnino agere noscuntur mulierculæ illæ, aut domicellæ, quæ teneriori dilectionis affectu feruntur erga catellos suos vel feles, quàm erga Deum ipsum, vel certè erga homines, præsertim pauperes & egentes, quibus subinde (utinam non nimis frequenter!) negant bolum panis, catellos è contra carnibus nedum nutriunt, sed & saginant. Videatur noster A. R. P. Kazenberger in *Supplem. I. Confer. P. Sargar Confer. 57. num. 76.* vel Reiffenstuel *Theolog. mor. dist. 6.*

tr. 4. n. 14.



CON-



# CONFERENTIA OCTAVA

De Dilectione Inimicorum.

## SUMMARIUM.

- 233. Nedum amicos, sed inimicos etiam tenemur diligere.
- 234. Recensentur breviter signa charitatis tam communia, quam specialia.
- 235. Signa communia charitatis quivis tenetur exhibere suo inimico ;
- 236. Nisi vel charitas, vel iustitia, vel alia iusta causa contrarium suadeat.
- 237. Non tamen tenemur ei exhibere signa specialia charitatis ;
- 238. Nisi forte per accidens, in casu necessitatis, &c.
- 239. Præterea quivis nostrum tenetur non odisse suum inimicum, neque eidem malum quæ tale, vel per modum injustæ vindictæ velle aut imprecari :
- 240. Quin potius eidem ex corde dimittere offensam ;
- 241. Non tamen necessario injuriam, præsertim damnosam.

242.



242. Dilucidatur breviter, quidnam intelligatur nomine offensæ, & quid nomine injuriæ.
243. Tenemur ulterius proximum nostrum, etiam inimicum, in certis circumstantiis diligere actu interno.
244. Qui alium offendit, tenetur quærere reconciliationem v. g. veniam ab eo petendo &c.
245. Nisi suppetat alius modus magis conveniens attenta qualitate tum injuriæ, tum etiam personæ offendentis & offensæ.
246. Ubi verò duo se mutuò offenderunt, regulariter loquendo ille tenetur prius quærere reparationem charitatis, qui prius præbuit causam offensæ.
247. Qui verò ab alio fuit offensus, ordinariè tenetur acceptare reconciliationem, eidemque ex corde indulgere offensam.
248. Casu quo offendens veniam postulat tempore & modò oportuno.
249. Resolvitur Casus I. cujusdam conjugatæ, quæ odium implacabile conceperat erga quandam puellam à se educatam, novissimè verò in flagranti adulterio deprehensam.
250. Quam propterea licuit sine mora domo expellere.
251. Eidemque una alteravé vice supplicanti, veniam negare, nec deinceps amplius in domummittere.
252. Insuper hæc Uxor de jure non amplius tenetur Marito adultero reddere debitum.
253. Charitas nihilominus, à Confessario eidem bene inculcanda, omnino suadet contrarium.
254. Resolvitur Casus II. de quadam vetula, quæ gravissimè tulit, quòd ab alia fœmina ter fuerit amore Dei rogata, ut dissolveret maleficiū

255. Nihilominus supposita deprecatione tenebatur offendentem ex corde remittere offensam.
256. Ad quid teneatur illa, quæ causam offensæ dedit, si vetula nolit esse contenta hac deprecatione?
257. Resolvitur Casus III. de quodam Malefactore condemnato ad patibulum, qui Judices paulò ante suam mortem provocavit ad vallem Josaphat, seu ad extremum Judicium.
258. Quæ appellatione non obstante Judices potuerunt tutâ conscientia procedere ad executionem sententiæ latæ.
259. Et talis malefactor à Confessario ne quidem sub conditione absolvi potuit aut debuit, nisi retractaverit prius appellationem injustam.
260. Quid Confessario hujus Malefactoris in his circumstantiis specialiter observandum, vel agendum fuerit?
261. Confessario inimicorum quàm cautissimè & prudentissimè procedendum est:
262. Et ante omnia pœnitens eò disponendus, ut suo inimico ex corde dimittat offensam.
263. Quid observandum circa eos, qui dicunt, se non posse amplius oblivisci injuriæ sibi illatæ?
264. Qui se mutuò offendunt, & deinceps ad longum tempus, vel omnino in perpetuum nolunt amplius sibi invicem loqui &c. versantur in malo statu.
265. Secus dicendum foret, si ad modicum tempus duntaxat abstinere vel abstrahere à colloquutione, &c.
266. Qui ab oratione communi positivè excludit inimicum, per se loquendo peccat mortaliter.
267. Undenam gravitas vel levitas peccatis in hoc casu practicè desumenda sit?

*g. I. Præ-*

## §. I.

Præmittuntur, & breviter resolvuntur quæsitæ, scitu necessaria ad debitè resolvendos Casus practicos de Dilectione inimicorum.

**Q**Uæres primò, utrum non solum amicos, sed & inimicos teneamur diligere?

**R.** Affirmativè. Ita *Catholici omnes*. Hoc 233. enim inculcat Christus D. apud *Matth. c. 5.* *Ego autem dico vobis, diligite inimicos vestros, benefacite his, qui oderunt vos: quòd locò Christum nedum consilium, sed verum præceptum dedisse teste Mastro Theolog. mor. diss. 10. num. 53. communissimè tenent Theologi, unde & S. Gregorius hom. 37. in Evangel. jubemur (ait) & inimicos diligere.* Accedit ratio: quia ex dictis suprà n. 207. tenemur diligere proximum: atqui inimicus per hoc, quòd inimicus sit, non definit esse proximus: ergo & hunc teneamur diligere; non quidem quia inimicum, id est, quia affectum prava affectione erga nos, sed quatenus est capax beatitudinis & Divinæ fruitionis.

Quæres 2dò, an, vel quænam Signa charitatis teneamur exhibere proximo nostro, etiam inimico?

Ante

234. Ante Responsionem breviter advertendum putò, alia dici signa charitatis *communia* seu generalia, alia verò *specialia* & particularia. Communia censentur illa, quæ communiter omnibus sine delectu personarum exhiberi solent; uti est 1. orare pro omnibus, saltem in communibus orationibus ab Ecclesia, vel à Deo in hunc finem institutis. 2. salutantem resalutare seu etiam gratias agere pro salute. 3. alloquenti respondere. 4. postulanti merces vendere. 5. communia officia vel obsequia præstare, quæ scilicet aliis omnibus in civitate, collegio vel monasterio versantibus exhiberi solent. Specialia autem charitatis signa meritò appellantur illa, quæ non passim cuivis exhiberi solent, sed amicis duntaxat, uti sunt 1. ægrotum invisere. 2. mæstum consolari. 3. egenti succurrere, etiam extra necessitatem extremam. 4. pecunias mutuare. 5. Hospitio vel convivio excipere &c. 6. ad familiare colloquium admittere &c. uti explicat P. Sporer *tr. 2. decalog. c. 6. sect. 2. n. 22. & 25.* his notatis

235. N: jam ad quæstionem. Quivis nostrum tenetur suo inimico, quantumvis in inimicitia perseveranti exhibere signa communia charitatis, nisi charitas ipsa, vel justitia, vel alia rationabilis causa contrarium prudenter suadeat. 2. non tamen tenemur eidem

eidem, præsertim in inimicitia perseveranti, exhibere signa specialia charitatis, saltem per se loquendo. Ita post S. Thomam 2. 2. q. 25. art. 8. & 9. & S. Bonaventuram 3. dist. 3. art. 1. q. 5. cum communi DD. tenent Laymann l. 2. tr. 3. c. 4. n. 2. Sporer, Reiffenstuel, Herincx, Babenstuber, Michel &c. Ratio prioris est: quia signa communia charitatis vi naturæ & societatis humanæ debentur omnibus: at de his, quæ communi societati sunt debita, nemo est exemptus: hinc fit, quòd ex negatione, omiissione seu etiam subtractione talium signorum proximus meritò argueret, nos malè erga ipsum affici, ac proinde non sine nota scandali eidem administrati seu dati in pari erga nos odio, seu etiam malevolentia obfirmaretur. &c.

Dixi tamen: nisi charitas ipsa, justitia, 236. vel alia causa rationabilis prudenter contrarium suadeat &c. Nam in primis charitas contrarium suadet, quando is, qui offendit, prævidetur ex negatione signorum communium agniturus suum errorem, proptereaque & correcturus, qui sine negatione talium fieret deterior, insolentior aut audacior. 2. Justitia contrarium suadet, quando similia signa ex justa abominatione delicti jubemur intermittere, juxta illud Joann. 2. Si quis venit ad vos, & hanc Doctrinam non affert, nolite eum recipere in domum, nec ave  
R. P. Elbel, Pars II. de Fide &c. T ei

*ei dixeritis &c.* Similiter Parens aut Superior justè negare potest filio vel subdito communia charitatis signa cæteris exhiberi solita, quatenus hoc modò eundem castigando ad meliorem frugem reducat, corrigat; vel inter displicinæ terminos coerceat &c. 3. denique inter alias rationabiles causas denegandi hæc signa communia charitatis meritò recensetur gravitas injuriæ: itemque significatio seu etiam expressio justì doloris inde concepti &c. prout tenet *Diana part. 2. tr. 15. resolut. 62. & rursus part. 5. tr. 13. resolut. 89.* Lorca, aliique plures.

237. Ratio autem posterioris est hæc: quia signa specialia charitatis eò ipso, quòd specialia sint & extraordinaria, non sunt debita omnibus. ergo multò minus debentur inimico, quippe qui, quòd amicitiam dissolverit, non est melioris, sed potius deterioris conditionis, quàm alii; unde nec ex negatione talium signorum prudenter arguere potest, quòd erga ipsum portemus malignum affectum, odium vel inimicitiam: consequenter per se loquendo non ei debentur.
238. Dixi rursus: *per se loquendo* hujusmodi signa specialia charitatis non esse debita inimico; per accidens enim sæpius contingere potest, ut teneamur etiam inimico exhibere signa specialia charitatis, idque possi-

tissimum 1. quando is versatur in gravi necessitate sive animæ, sive corporis, nec alium habet, à quo sublevari possit aut debeat, item 2dò, quoties negatio hujusmodi signi specialis evaderet signum speciale odii aut inimicitiae, prout contingere posset, casu quo inimicus suppliciter postularet veniam sui delicti, & tamen offensus nollet eam dare. 3. Ratione scandali, quando scilicet negatio similium signorum vel ipsi inimico, vel aliis præberet causam mali exempli, odii, majoris inimicitiae &c. Videatur de hoc Sporer *cir. n. 25*. Babenstuber *tra. 5. disp. 1. art. 4. n. 35*. Reiffenstuel *theol. mor. tr. 4. dist. 6. n. 23*.

Quæres 3tiò, quid adhuc præter illa signa communia teneamur præstare inimicis?

R. Tenemur insuper ad hæc duo, scilicet, 1. non odisse inimicum, nec ei malum velle, quatenus ipsi malum est, seu ex affectu malevolentiae. 2. tenemur eidem præsertim supplicanti & deprecanti remittere offensam. 3. non item injuriam. Ratio primi inde desumitur: quia præcepto charitatis jubemur diligere proximum *Matth. 22. & Luc. 10.* ergo hòc ipso virtualiter & implicite prohibetur eum odisse, eidemve malum velle ex affectu vindictæ aut malevolentiae; prout amplius constabit

bit ex dicendis paulò inferiùs *Confet. 11. a n. 331. ubi de odio proximi.*

240. Ratio autem 2di hæc est : quia Christus Dominus *Matth. 18.* id præcipit sub interminatione gravissimæ pœnæ, nunquam scilicet obtinendæ veniæ nostrorum delictorum, dum proposità parabola de servo qui noluit remittere debitum suo conservo mox subjunxit : *sic & Pater meus cælestis faciet vobis, si non remiseritis unusquisque fratri suo de cordibus vestris &c.* Quod iteratò inculcat *Luca 17.* dicens : *si reversus fuerit ad te, dicens : pœnitet me ; dimitte illi &c.*

241. Cæterùm, quòd cum offensa non teneamur simul remittere injuriam, sed quivis contra suum inimicum (pro exigentia causæ) possit instituere nedum actionem injuriarum, petendo scilicet satisfactionem pro injuria, sed etiam actionem civilem, prætendendo scilicet satisfactionem seu restitutionem pro damno illato ; quin immò, ubi gravitas injuriæ aut delicti id exigat, insuper actionem criminalem, petendo scilicet justam sceleris vindictam, modò NB. id fiat sine pravo affectu vel odio, aut animo se vindicandi &c. &c. Hodie communissimè tenent Doctores, nominatim Castropalao *part. 1. tr. 6. disp. 1. pu. 6. n. 3. & 9.* Valentia *tom. 3. disp. 3. q. 3. pu. 2.* Laymann *lib. 2. tr. 3. c. 4. n. 3.*

Reif,



Reiffenstuel *theol. mor. tr. 4. dist. 20 n. 6.*  
 & fuse P. Sporer *cit. sect. 2. n. 18. & seqq.*  
 Ratio est : quia charitas solum obligat, ut  
 proximo non velimus malum ipsi indebi-  
 tum, injustam scilicet vindictam, minimè  
 verò adstringit; ut ei condonemus aut re-  
 mittamus bonum nobis debitum: atqui sa-  
 tisfactio pro injuria illata supponitur debi-  
 ta injuriato: ergo hanc non tenetur remit-  
 tere, sed solam offensam &c.

Verùm pro majori dilucidatione hujus 242.  
 responsionis breviter declarandam existi-  
 mo, quidnam per *offensam* & quidnam  
 per *injuriam* intelligatur. Itaque nomine  
*offensæ* intelligitur *lasio seu irritatio volun-*  
*tatis alterius*: nomine autem *injurix* intel-  
 ligitur *lasio juris* alterius; ex quo liquet,  
 aliud esse offendere, aliud injuriare proxi-  
 mum: & licet omnis injurians per se lo-  
 quendo offendat injuriatum, non tamen  
 vicissim omnis offendens injuriat offensum,  
 prout perbene explicat P. Sporer; nam, si  
 amico tuo librum à te commodatò postu-  
 lanti rotundè neges, tametsi sine incommo-  
 do commodare potuisses, is procul dubio  
 se sentiet à te offensum, at, in veritate di-  
 cere nequit, se propterea fuisse injuriatum,  
 quando quidem nullum habuerit jus ad tuum  
 librum.

Porro alia injuria potest esse damnosa,  
 alia non damnosa. Damnosa dicitur,

T 3

quan-

quando per eam aliquid aufertur proximo, quod iam erat illius: & contra non damnosa dicitur, quando per eam nihil aufertur, esto usurpetur alienum sine iusta causa; ex gr. committis adulterium cum uxore Titii, at sine imprægnatione vel alio damno inde secuto, procul dubio per usum corporis infers injuriam, non tamen damnosam - at verò, si uxorem simul imprægnasti, propterea que Titius innocens cogatur alere prolem supposititiam, intulisti eidem injuriam damnosam. Quod si res postea Titio innotescat, tenebitur quidem tibi ex corde remittere offensam, seu, quod idem est, dare veniam delicti, & nullum rancorem aut odium erga te portare: at verò minimè tenetur tibi etiam remittere injuriam, vel damnum inde sibi emergens, sed potest iura conscientiam contra te instituere actionem civilem, petendo satisfactionem debitam coram Iudice competente, & damni resarcitionem. Videatur *Sporer cit. a n. 17.*

At inquires, sufficitne, ut proximo nostro revera remittamus offensam, eidemve in necessitate constituto succurramus, an verò tenemur eum etiam actu interno diligere?

243. R. Non sufficit, quòd offensam eidem remittamus, aut in necessitate succurramus, sed tenemur illum etiam actu interno diligere

gere. Ita hodie communiter DD. Cardenas in *Crisi Theolog. disp. 8. c. 4. n. 34.* Viva ad propos. 10. & 11. ab Innocent. XI. damnatas. n. 6. Matthæucci in *cautel. Confess. l. 2. c. 8. n. 8.* Henno de *virtut. disp. 6. q. 9. concl. 2.* Kazenberger in *Supplem. I. Confer. P. Sargar Confer. 58. n. 81.*

Ratio est : quia de mandato Christi Domini *Joan. 13.* tenemur proximum diligere sicut Christus dilexit nos : atqui certum est, quod Christus nedum opere externo, sed & actu interno nos dilexerit : ergo &c. Et certè amor merè externus sine interno, non est verus amor, sed potius larva amoris. Ex quo liquet, ab Innocentio XI. iustissime damnatas fuisse sequentes duas propositiones, quarum prior n. 10. ita sonat : *non tenemur proximum diligere actu interno & formali* : posterior n. 11. *præcepto proximum diligendi satisfacere possumus per solos actus externos.*

Quæres 4tò, ad quid tenearis, si tu alterum quempiam offendisti ?

R. Si offendisti eum signò aliquò exter- 244.  
no, verbò scilicet, vel opere, teneris pariter quærere congruam reconciliationem externam, v. g. rogando veniam ab eo, nisi aliud medium vel modus reconciliationis magis conveniens suppetat. Ita omnes. Ratio desumitur tum ex illis Christi Domini verbis *Matth. 5. c. si ergo offers munus*

T 4

tuum

*tuum - - vade prius reconciliari fratri tuo ;  
tum ex eo etiam , quia jubemur diligere  
proximum & mutuam ad invicem charita-  
tem portare 1. Petr. 4. v. 8. ergo quicun-  
que charitatem læsit , tenetur modò mora-  
liter possibili eandem reparare : atqui re-  
paratio charitatis regulariter fit per recon-  
ciliationem , & hæc per veniæ petitionem :  
ergo quicumque proximum offendendo cha-  
ritatem læsit , tenetur quærere reconcilia-  
tionem modò moraliter possibili. Hæc de  
causa D. Joannes Chrysostomus relatus à  
P. Sporer c. 6. sect. 3. n. 36. in cit. l. Matth.  
ait : qualis præcessit offensio , talis debet esse  
reconciliatio : si cogitatu offendisti , cogita-  
tu reconciliare : si verbis offendisti , verbis re-  
conciliare : si operibus offendisti , operibus re-  
conciliare ; omne enim peccatum , quo modò  
committitur , eodem modò de ipso pænitentia  
agitur.*

245. *Dixi : nisi aliud medium , vel modus re-  
conciliationis magis conveniens suppetat &c.  
Non enim semper necessum est , ut is , qui  
offendit , rogando veniam quærat recon-  
ciliationem cum offenso , præsertim in se-  
quentibus casibus. 1. si injuria non fuit  
gravis , vel si alter intulit vicissim gravio-  
rem , ut propterea delicta meritò dici pos-  
sint mutuo compensata. 2. quando aliter  
satisfieri potest læso v. g. per exhibitionem  
aliorum signorum specialium beneficentiæ ,*  
scu

seu etiam amicitiae, per oblationem pecuniariam &c. 3. quando læsus per petitionem veniæ prævidetur magis irritandus, aut certè eam non curaturus. 4. quando inter ejus generis aut qualitatis personas v. g. Nobiles petitio veniæ in usu non est. 5. Quando offendens est Superior vel majoris auctoritatis, quàm offensus, ut propterea non videatur conveniens auctoritati ipsius Superioris petere veniam, poterit is alio modò jam insinuatò, scilicet exhibitione gratiæ specialis, aut singularis beneficii &c. placare animum subditi sui. Videatur de hoc de la Croix *lib. 2. n. 189.* Tamburinus in *Decalog. lib. 5. c. 1. §. 8. n. 24.* Vel Kazenberger *cit. n. 93.*

At quid, inquires, si duo mutuò se offenderunt, uter eorum tenebitur priùs quærere reconciliationem?

R. Per se loquendo, & cæteris paribus 246. tenetur ille, qui priùs offendit. Ratio est; quia priùs offensus ceu prior tempore est potior jure ad exigendam satisfactionem. Secus dicendum foret, si posterior intulisset longè graviolem injuriam, vel si esset longè inferioris conditionis; tunc enim teneretur priùs quærere reconciliationem, esto charitatem posterius læsisset. Ita Filliucius *tr. 28. c. 1. n. 27.* Sporer *c. 6. n. 40.* de la Croix *loc. cit. n. 190.* Babenstuber *tr. 5. disp. 1. a. 4. n. 43.* ubi mox subdit,

T § in

in dubio, uter prius alterum offenderit, standum esse arbitrio Confessarii, vel alterius boni viri, prout etiam advertit Azorius *tom. 2. lib. 12. c. 3. q. 10.*

Quæres denique s<sup>to</sup>, ad quid tenearis, dum alter, qui te offendit, reconciliationem quærit, vel veniam petit? &c.

247. R. Teneris acceptare reconciliationem, tempore tamen & modô oportuno postulata, eidemque signis etiam externis demonstrare seu manifestare, quod offensam ex corde remittas: quô non obstante potes tutâ conscientia prætereendere satisfactio- nem pro injuria, uti jam dictum fuit *n. 241.* Ita ex *Communi DD.* tradit Laymann *l. 2. tr. 2. c. 4. n. 4.* Filliucius *loc. cit. n. 21.* Bassæus *V. charitas n. 14.* Ratio prioris evidenter colligitur ex illis Christi Domini verbis apud *Matth. 6. cap. si autem non dimiseritis hominibus peccata eorum, nec Pater vester cœlestis dimittet peccata vestra.* Quod autem remissionem offensæ etiam inimico veniam postulanti teneamur manifestare, inde concluditur: quia secus faciendo monstraremus, nos gerere odium aut certè aversionem grandem erga illum, & hōc ipso præberemus eidem causam scandali, seu perseverandi in inimicitia & aversione erga nos, proptereaque contra charitatem graviter delinqueremus, saltem per se loquendo.

Dixi

Dixi tamen , quòd tenearis acceptare 248.  
 reconciliationem , dum inimicus veniam  
 petit *tempore & modo oportuno &c.* Nul-  
 lus enim te obligabit , ut illico post acce-  
 ptam gravissimam injuriam des veniam  
 postulanti ; atrox quippe injuria præser-  
 tim ab inferiori illata Superiori , tam facili  
 negotio decoqui nequit : unde talis meritò  
 diceretur non postulasse veniam *tempore  
 oportuno.* Rursus non teneris illico acce-  
 ptare reconciliationem , quando is , qui te  
 offendit , non sincerè sed potius illusoriè de-  
 precatur , prout fecerat ille , qui alterum Ne-  
 bulonem flagitiosum vocavit , proptereaque  
 eidem deprecari jussus , coram Judice , in  
 hæc verba prorupit : *ego te appellavi Nebu-  
 lonem flagitiosum : hoc est verum. Quod  
 autem te hodie debeam dicere hominem inge-  
 nuum , eò me compellit Superiorum auctoritas.*  
 Videatur Tamburinus *loc. cit.* §. 3. n. 22.  
 Azorius *ubi supra* q. 7. Filliuc. n. 25. vel  
 Sporer c. 6. sect. 3. n. 44.

## §. II.

Proponuntur & breviter re-  
 solvuntur Casus practici circa di-  
 lectionem , & reconciliationem ini-  
 micorum.

CA-

## CASUS PRIMUS.

**T**itia ingenuè fatetur, se concepisse implacabile odium & aversionem erga aliquam puellam, quam quidem jam à teneris annis velut filiam educavit, & enutrivit in propria sua domo, novissimè verò eandem cum suo Marito in flagranti adulterio deprehendit; hanc ob causam eam nedum illico compulit domo exulare ( Maritus etenim utpote complex criminis non fuerat ausus contradicere ) sed insuper jam pluries veniam postulantem, non sine graviore indignatione à se repulit, nec eam alloquio amplius dignatur vel aspectu. Erga proprium verò Maritum fatetur se ab eo tempore concepisse extremam prorsus aversionem, proptereaqué hætenus eidem constanter negasse debitum, nec sibi videri possibile, ut deinceps unquam amplius eidem possit reddere. Quid in hoc Casu cum Titia vel alia simili persona aget Confessarius?

249. R. in primis generaliter, in his & similibus Casibus, utpote non minùs practicis quàm frequentibus & difficilibus, à Confessario quàm cautissimè procedendum, & prudenter ponderandum esse nedum id, quod sola justitia, sed vel maximè etiam quod charitas justitiæ sociata postulat; secus enim de facili impingere poterit vel nimis gravando pœnitentem, vel eundem etiam nimis facile absolvendo ab oneribus,  
aut



aut denique perplexitatibus, & conscientia scrupulis intricando. Verum ut res magis dilucidetur, lubet ad hunc casum proponere tria dubia practica. 1. An Titia tutâ conscientia potuerit dictam puellam domo ejicere, & quidem illico sine mora? 2. An actu expulsam, & sapius veniam postulantem potuerit tutâ conscientia repellere, eidemque nedum alloquium, sed etiam aspectum negare? 3. Denique an hactenus justè potuerit, & deinceps etiam possit suo Marito negare debitum?

¶ jam ad primum quæsitum. Potuit 250. Titia sine scrupulo puellam domo expellere, velut Scortum ingratissimum; tum quia aliunde nullum habuit jus perseverandi stabiliter in illa domo, ideoque Titia eam expellendo non peccavit contra justitiam: atqui per hoc neque deliquit in charitatem; cum enim tam graviter læserit jutori immò & pietatem nutrici debitam, ex ulteriori porro cohabitatione Titia meritò timere potuerit frequentiores relapsus, indeque consecuturam Dei offensam, animatum periculum, diffamationem domûs &c. jure meritissimo eam expulit, ne fortassis videretur velle præbere fomentum pluribus criminibus, juxta illud, quod habetur C. 1. XXXII. q. 1. qui adulteræ cohabitat *patronus turpitudinis* dicitur, & particeps criminis efficitur. Nec refert, quòd puella tam subito

subito exulare coacta, videatur necessario subitura periculum bonæ famæ; etenim non Titia, sed sibi potius imputare debet, si quam notam aut sinistram suspicionem apud alios incurrat.

Accedit insuper, quod Titia vi justitiæ potuisset contra eandem puellam coram Iudice instituere actionem injuriarum secundum dicta *num. 240.* & hoc ipsò eandem coram diffamare: quidni ergo à fortiori eandem sine mora domo ejicere, & diffamationem inde subsequituram tutâ conscientia permittere potuisset?

251. R. Ad 2dum. Si Titia una tantum vel altera vice puellam repulit, etiam durius illam increpando, idque non ex odio personæ, sed solum ex abominatione criminis, vel ad correctionem & emendationem puellæ, vel denique ad amplius ostendendam gravitatem injuriæ sibi illatæ, dicendum, quod non peccaverit. Ratio est: quia ubi injuria, præsertim ab inferiore erga Superiorem (prout in præsentî contigit) fuit atrox, offensus vel offensa non tenetur illico ignoscere, secundum dicta *num. 248.* Nihilominus cum mulieres semel irritatæ, & à passionibus dominatæ, similia plerumque ex inordinato affectu vindictæ, vel etiam ex odio erga ipsam personam, à qua fuerunt offensæ, faciunt; hinc oportet, ut Confessarius in similibus circumstantiis aut casibus

bus pœnitentem examinet 1. quo fine, quâve intentione & à quanto tempore puellæ supplicanti jamjam negaverit veniam? 2. eidem inculcet, quòd quidem eandem ob periculum relapsûs & alias rationes *n. 250.* insinuatâs non ampliùs teneatur recipere in domum; nihilolociùs communia signa charitatis impofterum non ampliùs possit, nec debeat denegare, sed potiùs bellô modo eidem insinuare signis exterioribus, quòd offensam jamjam remiserit, utputa casu quo fuerit denuo ab illa puella salutata, agendo eidem gratias pro salute, vel etiam resalutando &c. Ratio horum constare potest ac debet ex dictis *n. 239. & 247.* potestque de hoc videri Laymann *cit. l. 2. tr. 3. c. 4. num. 4.* vel Sporer *tr. 2. c. 6. sect. 2. num. 23.* Ubi bene monent, circa hujusmodi pœnitentes, sive Parentes supponantur sive alii Superiores &c. duo esse attendenda à Confessario, & bene ponderanda. *Primum*: an non hæc signa communia charitatis negent ex odio vel aversione animi erga delinquentem? *Secundum*, An vindicta non excedat gravitatem delicti; non enim possunt illis negare reconciliationem & veniam in perpetuum, sed solùm ad eorum emendationem, vel alios fines bonos &c. Ita Sporer *l. cit.*

2. Jam

252. R. Jam ad 3tium quæsitum hujus Casus, Titiam nec hæcenus peccasse, neque etiam (per se loquendo) peccaturam contra justitiam, negando debitum suo Marito adultero.

Ratio est: quia Maritus adulterando perdidit jus petendi debitum, privatio enim debiti est veluti pœna quædam conventionalis, jure naturali & Divino inducta, ait Sanchez, ut scilicet frangenti fidem fides non servetur: at, si non amplius habet jus petendi, procul dubio Uxor sine injuria eidem potest negare debitum: ergo negando non peccat contra justitiam. Et ita tenent DD, communissimè Sanchez lib. 1. de Matr. disp. 68. n. 4. de la Croix lib. 6. p. 3. n. 372. Laymann tr. 10. part. 3. c. 1. num. 3. quod etiam colligunt ex Matth. c. 5. & 19.

253. Dixi tamen, Titiam non peccaturam contra justitiam, &c. Etenim contra charitatem adhuc probabilius peccabit, si propter unicum & simplex adulterium adhuc occultum, velit eidem perpetuo negare debitum, prout jam diximus in Theolog. mor. Sacram. part. 3. Confer. 16. num. 388. Nam moraliter loquendo fieri potest, quin Maritus Uxori cohabitans ob denegationem debiti sæpe sæpius exponatur periculo incontinentiæ, consequenter & periculo salutis æternæ; è quo Uxor eundem procul dubio

bio posset liberare reddendo debitum : at-  
qui charitas obligat , ut proximo suo in  
tanto periculo constituto succurrat , ubi id  
moraliter loquendo fieri potest : ergo &c.  
Adde insuper , quòd perpetua debiti conju-  
galis negatio pròcul dubio datura sit causam  
perpetuis discordiis & rixis ; quandoqui-  
dem experientia quotidiana quasi probet ,  
inter conjugatos vix reperiundum esse alium  
lapidem magis offensivum , animorumque  
divisivum , quàm negationem debiti conju-  
galis , quippe ob quam amorem conjuga-  
lem nedum in alios vel alias dividere , sed  
erga se invicem prorsus perdere solent :  
quare cùm Confessarius semper debeat pœ-  
nitentibus consulere & inculcare ea , quæ ad  
animarum salutem , pacem & concordiam  
magis conducere sunt nata , liquet profe-  
ctò , Titiam omni modo fuisse inducendam  
ac persuadendam ; quatenus dimissa nedum  
offensa , sed etiam injuria vi adulterii sibi  
illata , deinceps velit sese accommodare  
Marito.

## CASUS SECUNDUS.

**S**Empronia paupercula unicam habuit ca-  
pram , & ultra parum , vel omnino nihil :  
hanc dum veneficio infectam , dolenter animad-  
vertit , hinc inde consuluit alias fœminas , qua  
ratione , quovè medio capra à maleficio foret.  
*R. P. Elbel, Pars II. de Fide &c. U libe.*

liberanda, *Alia proin fœmina* (nescio quò animo) *Sempronia* persuaserat, ut certam quandam *Vetulam* accederet, eandemque tribus vicibus moraliter non interpolatis per amorem Dei rogaret, quatenus vellet capram suam à maleficio liberare: accessit *Sempronia*: *Vetulam* rogavit modò præfato. *Vetrum* hac illico quasi in furorem acta: quid, agebat? ergonè me *Sagam* esse credis, quòd ter me rogando per amorem Dei, maleficiū capræ tuæ illatum dissolvi postules? Profectò si quid callerem de hac arte, nedum capram tuam, sed & te ipsam novo maleficio intoxicarem: appage sine mora! vade vias tuas: tu ipsamet es *Saga* & *malefica*, nullius valoris, nulliusque honoris, proptereaque aliis honorem adimere conaris &c. Jam apud *Confessarium* conqueritur *Sempronia*, quòd dictam *vetulam* ab eo tempore summopere offensam, & sibi infensam sentiat, ita; ut dum in platea publica casu sibi invicem occurrunt, eadem *vetula* vel illico viam declinet, vel si id facere non possit, contra se. (*Semproniam* scilicet) exspuat, aliâque convitia evomat. Quaritur jam ad hanc speciem facti 1. ad quidnam *Sempronia*? 2. ad quidnam *Vetula* illa obligetur?

254. 17. Ad primum conformiter ad dicta 11.  
246. *Semproniam* teneri nedum ad condonandas offensas à *Vetula* sibi illatas, sed etiam ad quærendam reconciliationem;  
nam

nam qui prior offendit, per se loquendo tenetur prius quærere reconciliationem: at- qui Sempronia prior offendit vetulam: si- quidem ille modus, *ter scilicet per amorem Dei rogandi pro solutione maleficii* in nostra Germania saltem à plebe communi, & vel maximè à vetulis habetur summo opere inju- riosus & offensivus. Quia tamen minimè consultum est, ut Sempronia personaliter accedat vetulam, ne fortassis utraque ve- hementius irritata, in graviores rixas, scom- mata, dicteria &c. erumpat; hinc consu- lendum eidem est, ut per aliam mediatri- cem, aut mediatorem deprecando, stu- deat charitatem læsam reparare, & se pro possibili excusare, quòd scilicet *ter per amorem Dei rogando*, non intenderit eam velut Sagam prostituere aut calumniare &c. sed potius ex mera simplicitate id fecerit &c.

R. Jam ad 2dum. Supposita hac depre- 255  
catione Vetula tenetur Sempronie condo- nare offensam, odiùmque & omnem ani- mi aversionem deponere, nec solum ab illis injuriis, contumeliisque abstinere, sed potius è contrario Sempronie communia saltem charitatis signa exhibere: secus non erit capax absolutionis, veluti ex hæcenus dictis, præsertim à *num. 247.* liquidò constare potest, ac debet: neque verò ad hoc probandum alio indigemus argumento,

U 2                      quam

quàm illo infallibili effato Christi Domini apud *Matth. 18. c. v. 35.* mox suprà *num. 240.* relato: *sic & Pater meus Cœlestis faciet vobis &c.* Videatur *Sporer cit. c. 6. sect. 2. num. 31.*

At quid, inquires, si supposita etiam deprecatione vetula nolit esse contenta, nec Sempronix quantumvis quærenti amicam reconciliationem v. g. eam salutando, alloquendo &c. respondere &c. tenebiturnè hæc ad plura, utputa ad iteratam deprecationem &c.

256. *R.* Eam in hoc casu & in his circumstantiis non teneri ad plura, neque ad iteratam deprecationem. Ratio est: quia Vetulæ nullum prorsus damnum intulit: ergo ratione damni ~~ad~~ nihil tenetur. Esto etiam illam graviter offenderit, nihilominus excessus dignitatis vetulam inter & Semproniam non est tam ingens, ut vetula humili deprecatione seu petitione veniæ non debeat esse contenta: quare si hoc nolit, potest Sempronia tutâ conscientia abstinere ab ulteriori salutatione, colloctione & similibus amicitix signis, eò præsertim, quòd alloqui vel salutare prætereuntem vel sibi occurrentem in platea &c. non sit Signum commune charitatis, omnibus exhibere solitum, prout experienciâ constat, sed potius signum particulare, amicis duntaxat assuetum. Videatur *Tamburinus lib. 5. deca.*



*decalog. c. 1. §. 3. n. 15. vel Sporer loc. cit. n. 35.* Ubi tamen illico subjungit, quòd si talis persona prævideat, fore ut offensùs vel offensa ex iterata gratuita salutatione vel allocutione emolliscat, odiùmq; deponat, ex charitate teneatur denuo salutare, modò id sine minùs magna molestia & difficultate possit; quia bonum spirituale proximi tenemur ex charitate procurare etiam cum aliquali nostro, non tamen cum magno incommodo: & hoc vel maximè in nostro casu dicendum, eò quòd Sempronia vetulæ dederit causam gravis indignationis.

### CASUS TERTIUS.

**C**Ajus tum propter pluries repetita furtà levìa, tum potissimùm propter solennem rapinam nuper cum aliquibus sibi similibus factam, captus, incarceratus, & tandem ad patibulum condemnatus fuit: annunciatà verò sibi mortis sententia haudquaquam se opposuit, sed petiit Confessarium, cujus operà optimè dispositus gaudens ac lubens videbatur pergere ad locum supplicii, ad quem, dum pervenit, calceis jamiam exutus & spoliatus dixit ad carnificem: ergonè seriò res agitur mecum? quo respondente seriò, petiit, ut sibi ante mortem & actuale strangulationem permetteret pauca verba loqui ad populum circumstantem: tum verò jam in Superioribus Scala gradibus inter

*manus carnificis constitutus, exorsus fuit fari in hunc modum: notum sit omnibus ac singulis spectatoribus, me ad hoc infame mortis supplicium fuisse condemnatum propter quinque florenos & non plures, quos nuper ex rapina NN. facta reportavi: protestor igitur coram universo Mundo gravissimam mihi irrogari injuriam, prout nemo non videbit: & hanc ob causam contra illos, qui me ad hoc infame supplicium condemnarunt, vindictam clamito, eosque in vallem Josaphat, & ad extremum Dei judicium provoco: hoc inopinato eventu obstupere omnes, erectis auribus adstantes, potissimum vero confessarius, quippe qui hactenus sibi persuaserat, Cajum quamoptime esse dispositum. Quid ultra! subito fit ingens tumultus in populo, tandemque concluditur, executionem esse paulisper diffendam, presentemque malefactoris statum denunciandum iudicibus utpote solemniter adhuc congregatis. Interim Confessarius omni possibili modo nitebatur persuadere Cajo, ut deposito odio & animi rancore desisteret ab illa appellatione, quippe quæ non deserviret in alium finem, quam ad perdendam corporis simul, & animæ vitam: ast, surdo videbatur canere fabulam; Cajus enim nil aliud respondit, quam, oppido injustum, & ab omni pietate alienum esse, homini ob quinque tantum florenos vitam auferre, & quidem tam infami*

mi supplicio. Unde non obstante hac appellatione paulò post redeunte scilicet cursore suspensus fuit. Quaritur jam 1. utrum Cajus appellando & provocando Judices ad tribunal Christi peccaverit? 2. An Judices non peccaverint saltem contra charitatem, jubendo Cajum strangulari, tametsi moraliter certò præviderint eum aternaliter periturum?

R. ad primum. Cajus appellando ad tribunal Dei peccavit mortaliter nedum contra charitatem, sed etiam contra justitiam; contra charitatem quidem, quia, ut ex ipsa specie facti liquet, injustam vindictam appetiit, nec ullatenus ignoscere voluit Judicibus; contra justitiam verò, quia à sententia utique justissimè contra se lata appellando ad tribunal Christi Judicibus insignem calumniam imposuit, potestatique publicæ à Deo constitutæ rebellem sese exhibuit, non sinè gravi scandalo spectatorum. Ita ex *communi DD.* tradunt Bunsenbaum *lib. 4. de Reo. art. 2. in fine.* de la Croix *lib. 4. n. 1529.* Laymann *lib. 3. tr. 6. c. 6. n. 8.* Vega *in summa part. 1. c. 16. ad Casum I.* Ex quo ad oculum liquet, Cajum in eo statu non fuisse capacem absolutionis Sacramentalis.

R. ad 2dum quæsitum, Judices nec in leges justitiæ, neque etiam in legem charitatis impigisse ex eo, quòd jusserint Cajum strangulari. Ita *cum communi DD.* Amicus.

cus, & Salon art. 2. contr. 2. quem citat  
& sequitur Filliucius tr. 29. part. 2. c. 2.  
n. 20.

Ratio hujus est: quia ad officium Judicis spectat malefactores occidere, veluti desumitur ex S. Scriptura *Exodi 22.* ubi dicitur ad Moysen tanquam Judicem Israelitici populi: *maleficos non patieris vivere.* Et rursus *Deuteron. 21. & 22.* Deus præcepit occidi homicidas & blasphemos &c. tum etiam quia æterna damnatio debet adscribi iniquæ & obstinatæ voluntati Malefactoris, quam posset, & deberet mutare, minimè verò Judici, quippe qui eundem per Confessarium fecit adhortari ad pœnitentiam. Adde insuper; quòd si hujusmodi maligni homines semel scirent, se ob similem obstinationem vel appellationem, vel denique ob periculum æternæ damnationis incurrendæ non amplius posse condemnari, nullus profectò inveniretur, qui non se monstraret pertinacem & rebellem: quatenus hac via evaderet extremum supplicium, utique non sine permagno præjudicio Reipublicæ; quare cùm aliunde constet, semper majorem rationem esse habendam pro salute boni publici, quàm pro salute hominis privati, præsertim quando is ex propria duntaxat malitia se committit tali periculo, dicendum profectò est, quòd Judices per hoc nec in minimo violave-

laverint legem charitatis. Et certè, quamdiu Judex ferendo sententiam juxta leges procedit, meritò flocci pendet, & ridet hujusmodi appellationes & provocationes ad tribunal Dei, hominibus malitiosis valde familiares, quibus utique Deus non præfiget alium Judicii aut processûs ordinem. Secus tamen dicendum foret, casu quo Judex ex mera passione vel sine justa aut sufficienti causa hominem innocuum ad infame vel extremum mortis supplicium condemnaret. Legatur de hac materia Stengelius de judiciis divinis. *tom. 1. cap. 37. §. 4. & seqq.*

At, inquires, nunquid Cajus in hoc statu debuisset, vel potuisset saltem sub conditione absolvi; quandoquidem firmiter sibi persuasum habuit se injustè gravari: nec in illis circumstantiis potuit appellare ad alium Judicem, nisi ad Deum, ad quem alii plures etiam Sancti Viri leguntur subinde appellasse?

¶. Cajum nequidem sub conditione potuisse absolvi in eo statu; evidens quippe est & liquidum ex narrata specie facti, quòd Judicibus nedum offensam, quam sibi videbantur intulisse, minimè dimiserit, sed insuper animò vindicativo, utique non sine magna calumnia contra Judices, & cum scandalo totius Orbis, eos ad tribunal Christi provocaverit.

U s ter

ter & alios Sanctos viros instituta paritas quidquam valet ; præterquam enim, quòd assumpta similitudo per se claudicare noscatur, illi Viri sancti, qui hinc inde leguntur appellasse ad tribunal Dei, nunquam id fecerunt desiderio injustæ vindictæ, uti Cajus, sed amore justitiæ duntaxat ; multò minùs appellasse quisquam Virorum Sanctorum legitur contra sententiam justè contra se latam.

Dices adhuc : quid ergo Confessario Caji in his circumstantiis agendum fuit ?

260. R. Debuit eidem ante omnia proponere 1. imminens periculum æternæ damnationis. 2. justitiam sententiæ contra ipsum latæ, quippe qui non propter quinque florenos præcisè, sed propter damnum habituale Reipublicæ illatum, aut certè rationabiliter timendum, si hujusmodi rapinæ tolerarentur impune, damnatus fuit, conformiter juribus. 3. eidem inculcandum fuit gravitas scandali, quod toti orbi suo modò daret, casu quo sine revocatione appellationis factæ moreretur. 4. denique omni modo moraliter possibili fuit persuadendus, ut ante mortem publicè protestaretur, se omnibus illis, qui quòcunque demum modo ad suam mortem concurrerunt, ex eorde dimitttere offensam, & ignoscere. Si Cajus hæc recuset, noverit Confessarius, eum  
velut

velut indispositum ne sub conditione quidem posse aut debere absolvi; neque enim prudenter præsumi potest, quòd laboret ignorantia invincibili suæ obligationis post plenariam instructionem à Confessario datam.

§. III.

Corollaria ex dictis inferenda.

**C**olliges primò, à Confessario magna 261.  
cum cautela & discretionem procedendum esse cum pœnitente, quem vel ex propria confessione, vel ex aliorum relatione certò novit hæctenus in continuis rixis atque inimicitiiis vixisse. Certum quippe & exploratum esse debet, nullum prorsus, quamdiu in inimicitia vult perseverare, utpote nolens remittere offensam sibi quomodo libet irrogatam, aut suo inimico exhibere signa communia charitatis esse capacem absolutionis Sacramentalis, tum ob rationes jam suprà datas; tum etiam, quia talis pœnitens, utpote actuali odio proximi sui implicatus, ponit obicem gratiæ sacramentali, proptereaque falsificaretur forma absolutionis non sine gravissimo Sacrilegio. Quodque ulterius circa tales pœnitentes diffi.

difficultatem potissimum mihi videtur augere, est, quòd subinde negatio signorum nedum communium, sed & specialium (quando scilicet antecedenter semper assueverunt similia sibi exhibere) possit cedere in notam inimicitiae seu aversionis conceptae; è contra in aliis circumstantiis personarum seu etiam locorum nonnunquam etiam signa charitatis communia intermitteri possint sine nota inimicitiae: liquet proin, quòd à Confessario desuper consulto omnes circumstantiae sint bene ponderandae, & semper consulendum id, quod ad fovendam charitatem mutuam magis videtur conducibile; quia hoc modò melius prospicitur honori divino, & animarum saluti.

*Omnes.*

262. Colliges 2dò, poenitentem quemcunque demum hætenus in inimicitiiis constitutum, ante omnia à Confessario eò esse disponendum, ut inimico suo ex corde remittat offensam; enim verò multos reperire est, præsertim è rudioribus, qui ab aliis graviter damnificati, aut processibus, litigiisvè implicati, ignorant distinguere inter offensam atque injuriam, existimantes sinistrè: quòd si suo inimico deberent ignoscere, eò ipso deberent unà simul cedere jure suo; quam ob causam non rarò audiuntur dicere, se durante hac lite seu processu non posse amplius confiteri &c. talibus



bus à Confessario eximendus & scrupulus & sinistra persuasio, eisdem declarando, quòd quidem inimico vel potiùs adversario suo teneatur ignoscere, id est, dare veniam ratione offensæ, nec desiderare injustam vindictam, neque eidem malè imprecari, per hoc tamen minimè eos teneri ad cedendum jure suo, quin potiùs tutà conscientia posse causam suam prosequi coram legitimo Judice, exigendo satisfactionem, seu etiam restitutionem sibi debitam: neque hanc voluntatem quidquam obstare perfectæ reconciliationi cum Deo, dummodo eidem adversario suo exhibeant signa communia charitatis, & hâc via demonstrent, se esse inimicos causæ tantum, non item personæ.

Sed quid, si pœnitens Confessario respondeat: Domine, jam petii satisfactionem coram Judice, sed quia adversarius meus ex mera malitia debitum absolute & rotundè negavit, & ego aliunde illud probare non potui; hinc passus fui repulsam: cùmque propterea jam à longo tempore unà cum uxore & prolibus meis miserissima egestate premar; hinc non amplius possum oblivisci hujus injuriæ: quin potiùs dum vel à longè inimicum meum conspicio, bilem mihi moveri sentio, sanguinemque in venis ebullire.

R. Casum

263. R. Casum hunc utique satis practicum sua difficultate non carere vel ideò, quia cum causa offensæ vel potius inimicitiae sit semper duratura, praesertim egestas multum premens; hinc meritò timendum est, ne ex parte offensi pariter continuetur inimicitia. Expediit ergo, ut ante omnia talis poenitens inducatur ad patientiam Christianam exemplò Christi Salvatoris nostri. 2. Ad plenam resignationem in voluntatem divinam, cujus admiranda dispositione similes injuriæ permittuntur, vel potius immittuntur ex altioribus motivis & quidem Sanctissimis. 3. Ulterius examinari debet, utrum hujusmodi motus iracundiae sint merum naturales, utpote, merum consurgentes ex impressione phantastica injuriæ acceptæ, an verò eidem sint etiam morales & liberi, ita scilicet, ut verè cupiat se vindicare, vel inimico suo malè imprecari? si primum, concludendum est, poenitentem versari in bono animæ statu, & capacem esse absolutionis Sacramentalis; quia motus merè naturales quantumcunque ad malum inclinantes, non sunt peccaminosi, nisi accedat voluntas libera. Si autem 2dum, talis poenitens non foret capax Absolutionis, nisi seriò adpromittat, se deinceps pro viribus cum divina gratia restitutum hujusmodi motibus iracundiae seu malevolentiae. Videantur de hoc Tambur.
- lib. 5,*

*lib. 5. in decalog c. 1. § 3. n. 1. Sporer ubi  
suprà num. 47. Matthæucci lib. 2. c. 8. n.  
18. Vel noster A. R. P. Kazenberger in  
Supplem. I. P. Sargar. Conferent. 61, num.  
96.*

Colliges 3tò, eos non versari in bono 264.  
statu, qui posteaquam se mutuò offende-  
runt, deinceps ad longum tempus, vel  
omnino in perpetuum nolunt amplius col-  
loqui ad invicem, vel alia communia cha-  
ritatis signa sibi exhibere mutuò, prout de  
duobus Religiosis, nec non de duabus  
Monialibus narrant Tamburinus, Sporer,  
& alii. Ratio hujus illationis est: quia  
cessatio loquendi ad invicem in tali casu per  
tantum temporis spatium continuata vel  
continuanda, meritò præsumitur profici-  
sci ab interno odio: nec dubium, quin tam  
diuturna animorum aversio inter contuber-  
nales quoscunque demum, instigante præ-  
fertim diabolo, datura sit causam innume-  
ris passionum motibus, utputa odii, ma-  
levolentiæ, detractiōis &c. &c. tum etiam,  
quia propterea nedum sibi, sed aliis Re-  
ligiosis aut contubernalibus gravi Scanda-  
lo erunt, proptereaque absolvi non debent  
à Confessario, nisi promittant ocyùs res-  
piscere, & omne odium ex animo penitus  
abjicere.

Dixi tamen: *qui ad longum tempus, vel* 265.  
*omnino in perpetuum non amplius voluit*  
*col.*

colloqui ; secus enim dicendum est de illis, qui ad exiguum duntaxat tempus abstinent, v. g. ad aliquot dies ; nec non de illis, qui ob levem duntaxat causam inciderunt huiusmodi discordias, aliunde verò noscuntur esse boni animi & probatæ virtutis, ut proin suspicari prudenter non liceat, eos id facere ex odio gravi, sed potius ex quadam passione animi non adeò gravi, vel ad manifestandam offensæ notam. Quocirca tamen Sporer *cit. c. 6. sect. 2. n. 34.* sapienter monet, huiusmodi abstinentiam ab alloquio &c. omnimodis dissuadendam esse omnibus, præsertim verò personis religiosis, utpote aliunde vi sui instituti obligatis ad charitatem mutuam & ad sectanda perfectiora : oportet profectò, ut contubernales etiam sæculares sint liberales, ne dicam prodigi, in exhibendis sibi invicem mutux charitatis & amicitix signis ; hoc enim nos reddit amabiles, sicut è contrario opposita morositas nos reddit odibiles Deo, Angelis, & hominibus.

266. Colliges 4tò, contra charitatem proximo debitam mortaliter delinquere sequentes. 1. Qui in Orationibus Communibus à Deo vel Ecclesia institutis *positive* excludit inimicum, secus si *negative* solum excluderet, scilicet actu non recordando de illo. 2. Item qui eleemosynam in omnes pau-


pauperes civitatis, vel aliud pium legatum distribuere jussus, suos inimicos excludit, tametsi pro his suffecisset. Item 3. qui reliquos suos cognatos aut consanguineos ad convivium invitans, alios sibi inimicos excludit, & non invitat, esto sint consanguinei. 4. Item qui aliàs solitus quosvis sibi notos in civitate; monasterio aut domo religiosa salutare aut alloqui, suo inimico salutationem vel alloquium negaret &c. Ita Sporer citatus n. 27. Verùm in his multa circumspèctione opus est, sicut jam diximus: non enim quilibet illico peccati mortalis à Confessario damnandus, vel in infernum omnino negatò absolutionis beneficio relegandus est, quandoquidem multæ causæ dentur, ob quas inimico, vel illi, qui gravem intulit offensam, communia etiam charitatis signa vel obsequia aliunde indebita negari possunt, prout ex dictis in hac conferentia abundè constare potest.

Quocirca noster P. Herincx *part. 3. tr. 1. 267. disp. 11. num. 68.* sapientissimè omnino monere mihi videtur, in ordine ad discernendam gravitatem peccati in hisce casibus non tam considerandam esse bonum, à quo inimicus excluditur, quàm utrum talis exclusio ex gravi aversione procedat, sitque hic & nunc graviter offensiva; etenim seclusò odio interiori & scandalo non videtur, cur quis mortaliter peccet ex eo, quòd

R. P. Elbel. Pars II. de Fide &c. X be-

beneficium aliunde indebitum: uti est v. g. invitatio ad convivium, solis præstet amicis, non item inimicis, quibus illud nullatenus debetur. Ego sanè non video, quò minùs & scandalum in tali casu evitari possit, modò tali inimico, vel aliis, quorum fortassis interest, bellò modo significetur, negationem talis beneficii, v. g. invitationis ad convivium, non fieri ex odio, sed partim quia illud aliunde indebitum: partim etiam, quia inferendo hanc vel illam offensam sese reddidit indignum. Fateor tamen oppositum nedum tutius sed & consultius esse ac conformius exemplo Patris nostri cœlestis, quippe qui *solem suum oriri facit, super bonos & malos, & pluit super justos & injustos, ut dicitur*

*Matth. 5. v. 45.*



CON-



# CONFIDENTIA NONA

De Eleemofyna.

## SUMMARIUM.

268. Recensentur breviter multiplices actus charitatis.

269. Declaratur, quid sit actus misericordiae.

270. Opera misericordiae universim enarrantur quatuordecim.

271. Nomine eleemofynae corporalis & propriae sumptae intelligitur actus, quod aliena indigentia corporalis sublevatur.

272. Datur praecipuum in ipsa natura fundatum, vi cuius habentes abundantiam bonorum, tenentur indigentibus dare eleemofynam.

273. Hanc tamen illi duntaxat dare possunt, quibus competit expeditum Dominium, & libera administratio bonorum.

274. Annotatur breviter triplex necessitas proximi scilicet extrema, gravis, & communis.

275. Rursus alia dicuntur bona, quae vel 1. ad naturam, vel 2. ad statum conservandum sunt necessaria, vel denique 3. superflua omnino.

276. Proximo in extrema necessitate constituto, nemo quidem tenetur dare eleemofynam de

X 2

sibi

sibi necessariis ad vitam, bene tamén de necessariis ad statum duntaxat conservandum.

277. In gravi verò necessitate constituto danda est eleemosyna de superfluis, aut certè non multùm necessariis ad statum.
278. Denique in communi necessitate constitutis tenetur succurrere is, qui habet bona superflua suo statui.
279. Quocirca tamen dari possunt causæ rationaliter excusantes.
280. Satisfit cuidam instantiæ in contrarium.
281. Utrum extremè indigenti teneamur succurrere gratis, an verò sufficiat, eidem succurri cum onere restitutionis.
282. Solvitur rursus quædam objectio contra hanc resolutionem.
283. Resolvitur Casus I. de quadam fœmina, quæ, ut liberiùs posset indulgere genio suo, ficto sub schemmate paupertatis hinc inde collegit, vel potiùs exproctavit eleemosynas.
284. Utrum talis persona revera aquirat dominium eleemosynæ taliter exproctatæ?
285. Et utrum Confessarius teneatur eam obligare ad restitutionem?
286. Resolvitur Casus II. de quodam libertino, qui amplum patrimonium suum non quidem in pauperes, sed in commensationes dissipavit.
287. Utrum huic jam gravi egestate presso alii amici vel consanguinei teneantur succurrere quodam subsidio eleemosynario?
288. Resolvitur Casus III. Cuisdam pauperculæ, mirum conquerentis, vel potiùs murmurantis contra constitutionem nuper editam, vi cuius prohibitus fuit conquestus eleemosynarius.



289. Quâ via tali personæ à Confessario fuerit occurrendum, vel quid eidem consulendum?
290. An vel quando catholici peccent non subministrando congrua sustentationis media conversis ad fidem Catholicam?
291. Quid Confessariis divitum, & simul nimis tenacium, vel potius avarorum observandum & agendum?
292. Divitibus, præsertim Ecclesiasticis vel maxime cavendum est, ne tempore caritatis aut publicæ necessitatis sua granaria recludant pauperibus intuitu augmentandi pretii.
293. Medici & Chirurghi nolentes pauperibus graviter decumbentibus operam suam gratis locare, peccant contra charitatem.
294. Pharmacopolæ tamen, aliivè divites non tenentur quæque pretiosissima medicamenta gratis exhibere vel procurare eo fine, ut pauper extremè decumbens curetur &c.
295. Vi magni mandati tenemur proximo nostro duntaxat succurrere, in quantum moraliter loquendo possumus, & ipse ad evadendam miseriam indiget.

## §. I.

Præmittuntur & breviter resolvuntur quæsitæ scitu necessaria ad debitè resolvendos Casus practicos circa dandam, vel non dandam Eleemosynam.

**Q**Uæres primò. quot dentur actus vel etiam effectus charitatis?

**R.** Actus seu etiam effectus charitatis præcipui numerantur sequentes, scilicet 1. Dilectio. 268.

lectio. 2. Beneficentia. 3. Gaudium. 4. Pax & 5. Misericordia. Ita ex communi DD. Reiffenstuel *Theol. mor. tr. 4. dist. 6. n. 26.* Explico brevissimè singulos. 1. Nomine *Dilectionis* intelligitur actus voluntatis, quò proximo nostro (vel etiam Deo) volumus bonum: ex quo protinus 2. sequitur *Beneficentia*, id est, executio hujus bonæ voluntatis, vi cujus proximo pro possibili facimus bene. 3. Nomine *Gaudii* non venit actus charitatis, sed potius quidam charitatis effectus, passio scilicet mentis, vi cujus in bono amato & jamiam possessio quodammodo quiescimus. Similiter *Pax* non est actus, sed potius effectus charitatis: supposito enim quòd Deum vel proximum sincerè diligamus, nostram voluntatem ejusdem voluntati facillimè accommodamus, ex qua voluntatum cohærentia naturaliter consequitur quædam animi tranquillitas seu pax, juxta illud *Psal. 118. pax multa diligentibus legem tuam &c.* At

Quæres adò singulariter ad nostrum propositum, quid intelligatur nomine *miseri cordiæ* ut sic?

269. *¶* Misericordia juxta S. Augustinum lib. 9. de civit. DEI. c. 5. est *alienæ miseriæ in corde nostro compassio, quâ, si possimus, subvenire compellimur.* Verum quia misericordia etiam reperitur in Deo nec non in Beatis, in quibus propriè nec passio neque com-

compassio, multò minùs tristitia naturaliter inde consequens locum habet; hinc non abs re Misericordia ut sic generalius sumpta describitur à P. Herincx *part. 3. tr. 1. disp. 12. n. 4.* quòd sit *affectus efficax subveniendi miseria proximi*; per hanc enim movemur ad sublevandam alienam miseriam, quod fieri assolet per opera misericordiae tum Spiritualia, tum etiam corporalia, veluti proximè patebit. Ex his verò facile colligetur, virtuti misericordiae duo opponi vitia, scilicet 1. nimiam cordis mollitiem seu nimiam indulgentiam: hæc eidem opponitur per excessum & 2. nimiam cordis duritiem & crudelitatem, quæ misericordiae opponitur per defectum.

Quæres 3tio, quæ & quot sint opera misericordiae?

2. Opera misericordiae sunt septem corporalia, & septem Spiritualia, ideoque universim rectè enumerantur quatuordecim, ita *omnes Catholici*, immò & pueri ex Catechismo respondere assolent. Corporalia sunt 1. Esurientes pascere. 2. Sitientibus potum dare. 3. Nudos operire. 4. Captivos redimere. 5. Ægrotos visitare. 6. Peregrinos hospitio suscipere. 7. Mortuos sepelire, quæ omnia nonnemo aptissimè comprehendit sequenti versu: *Visito, poto, cibo, redimo, tego, colligo, condo.* 270.

Porro opera misericordiæ Spiritualia sunt 1. peccantes corrigere. 2. ignorantes docere. 3. dubitantibus rectè consulere. 4. pro salute proximi orare. 5. consolari mæstos. 6. improborum injurias patienter ferre. 7. offensam remittere : hæc opera comprehenduntur in sequenti versu jam pridem notissimo. *Consule, castiga, solare, remitte, fer, ora.* Ubi sub ly consule insuper intelligitur *doce* ignorantes &c. Quia tamen Theologi communiter dimissis aliis actibus charitatis, utpote de quibus parum vel nihil difficultatis in praxi occurrere solet, examinare seu etiam fusiùs discutere solent duos actus principales, scilicet dationem Eleemosynæ & correctionem fraternam ; hinc & nos majorum nostrorum vestigiis inhærentes, in hac Conferentia de Eleemosyna, in proxima autem de correctione fraterna agemus, postea etiam acturi de vitiis charitati oppositis.

Quæres proin 4to, quid sit Eleemosyna ?

271. R. Nomine eleemosynæ sæpissimè quidem intelligi rem in eleemosynam distributam, utputa panem, pecuniam &c. &c. quibus mediantibus proximi indigentia sublevari solet. Verùm ad nostrum propositum sumitur pro ipso actu misericordiæ seu charitatis, quo contendimus miseriam alienam sublevare ; unde etiam rectè descri-

scribitur: quòd sit *aliena miseria sublevatio*, in quo sensu sub se comprehendit omnia opera misericordiæ, tam corporalia, quàm Spiritualia etiam. Comuniùs tamen nomine eleemosynæ intelligitur actus seu opus misericordiæ corporalis, solètque describi, quòd sit *actus externus, quò aliena indigentia corporalis sublevatur*. Ex quo facilè liquet dationem eleemosynæ esse actum misericordiæ, quatenus procedit ex motivo sublevandi miseriam proximi, simulque esse actum charitatis, si fiat ob amorem DEI vel proximi, tametsi haud ignorem hujusmodi elargitionem posse insuper imperari ab aliis virtutibus v. g. pœnitentiæ, si fiat in ordine ad latisfaciendum pro peccatis: qua ratione *Tobia 4.* legitur: *Eleemosyna ab omni peccato, & à morte liberat*. Et rursus *Eccl. 3.* habetur: *ignem ardentem extinguit aqua, & eleemosyna resistit peccatis*.

Quæres s̄tò, deturnè præceptum, dandi quandoque eleemosynam?

R. Affirmativè. *Ita omnes Catholici*, Reif- 272.  
*fenstuel cit. dist. 6. n. 35, Herincx disp. 12.*  
*n. 34. Matthæucci in cautel. Confess. lib. 2.*  
*c. 9. n. 2.* ubi putat, hanc resolutionem esse de fide. Cujus ratio clarè constat ex S. Scriptura *Eccl. 4.* ubi dicitur *Eleemosynam pauperis ne defraudes*: & rursus *Luc. 11.* *verumtamen, quod superest, date eleemosynam*. Et ne quis putaret, elargitionem

X 5

elec-

eleemosynæ esse sub consilio duntaxat, non autem sub præcepto, Christus Dominus *Matth. 25.* protestatur, se in die iudicii ob denegatam sibi (in pauperibus scilicet) eleemosynam dicturum huiusmodi immiseri-  
cordibus impiis: *Discedite á me maledicti in ignem æternum: esurivi enim, & non dedistis mihi manducare &c.* atqui nullus damnabitur ob neglectum consilium tantum, sed ob neglectum præceptum: ergo evidens est, eleemosynam cadere sub præceptum.

Quæres jam 6to, quinam possint dare Eleemosynam?

273. R. Omnes illi & soli possunt, quibus competit rei dominium, & libera administratio: Alii autem non possunt nisi de obtenta, vel certè rationabiliter præsumpta licentia Domini. Ita ex *Communi DD.* Herincx *l. cit. n. 23.* Matthæucci *cit. n. 22. & seqq.* Ratio clara est: quia elargitio eleemosynæ est actus donationis, vi cuius dominium transfertur in donatarium: at, illi duntaxat possunt donando, transferre dominium in donatarium, qui habent dominium expeditum in rem; unde & *l. 7. ff. de donat. donatio dicitur quadam rerum suarum jactatio*: ergo illi duntaxat eleemosynam dare possunt &c. Ex quibus liquet, quòd uxor de bonis sibi cum Marito communibus, filiusfamilias de bonis Parentum, servi & ancillæ de bonis do-

dominorum fuorum, Religioſi denique de bonis Monafteriorum fuorum, in eleemofynam dare nequeant ultra id, ad quod ſe extendit licentia rationabiliter præſumpta, uti jam dictum fuit. Secus dicendum, ſi uxor habeat bona paraphernalia vel alia ſibi propria, vel ſi filius habeat bona caſtrenſia &c. Nam de his, utpote ſuo dominio & liberæ diſpoſitioni ſubjectis, poſſunt procul dubio donare pauperibus, & donando laudabiliſſimè nec minùs meritorie faciunt.

Quæres, 7timò, quibusnam pauperibus, & de quibus bonis aliquis teneatur dare Eleemofynam?

Ante reſponſionem neceſſariò animad- 274-  
vertendum hic venit triplex neceſſitas proximi, cui ſuccurrendum eſt; nam alia dicitur *extrema*, *gravis* alia, & alia *communis*. *Extrema* dicitur illa, quando quis defectu ſubſidii neceſſarii periclitatur de vita, vel propterea deberet incurrere aliud graviffimum damnum morti æquivalens ſaltem in morali hominum exiſtimatione, uti ſunt abſciſſio membri cujuſdam principalis, carceris perpetui, infamiae publicae &c. *Gravis* neceſſitas appellatur; vi cujuſ imminet verè grave malum, utputa ſi homo deberet ſubire carcerem, vel notabilem jacturam bonorum, vel ſi deberet propterea deſerre ſuum ſtatum honeſtè acquiſitum, ſi homo

no-

nobilis deberet serviliter laborare, vel, quod minus conveniens, mendicare &c. Denique in communi necessitate dicuntur versari illi pauperes triviales, qui vel in plateis vel alibi coguntur emendicare subsidia, & alii pauperes (uti vocant) domestici, qui ob conditionem status erubescunt mendicare, reipsa tamen non nisi cum magna difficultate sibi suisque necessaria ad convenientem vitæ statum procurare possunt, qui propterea subinde majori commiseratione digni sunt, quàm alii pauperes triviales, quibus neque sanguinis, neque etiam status sui conditio prohibet postulare elemosynam. Videantur dicta *de restitut. confer. 10. n. 271.*

275. Animadvertendum insuper est prius 2dò, ex bonis corporalia alia dici necessaria 1. ad vitam seu naturam, 2. alia necessaria ad statûs conservationem, denique 3. alia dicuntur superflua respectivè ad unum vel alterum statum. Ad naturam necessaria dicuntur, sine quibus aliquis vel propriam, vel suorum vitam sustentare non posset: quæ verò requiruntur non ad ipsam vitam, sed ad conditionem sui statûs v. g. nobilis &c. conservandam, appellantur necessaria ad conditionem statûs.

Denique illa bona, quæ nec ad vitam propriam vel suorum, neque ad conditionem status sunt necessaria, eò quòd sine illis



lis conservari possit tam vitæ, quàm etiam condecens statûs & familiæ conditio, meritò reputantur superflua seu superabundantia. Quocircâ tamen bene notari debet, quòd illa dicantur superflua statui, sine quibus *status præsens*, convenienter potest conservari, veluti Doctor Angelicus 2. 2. q. 32. artic. 5. ad 3. sapientissimè tradit, in-  
*quiens, superflua esse, quæ secundum statum præsentem non sunt sibi necessaria, prout probabiliter æstimari potest: nec oportet, quòd consideret ad omnes casus, qui possent contingere in futurum; hoc enim esset de crastino cogitare; quod Dominus prohibet Matth. 6. sed debet dijudicari superfluum & necessarium secundum ea, quæ probabiliter, & ut pluribus occurrunt.* Ex quo cernere licet, quàm justè ab Innocentio XI. damnata fuerit sequens propositio, inter alias num. duodecima: *vix in sæcularibus invenies, etiam in Regibus superfluum statui; & ita vix aliquis tenetur ad eleemosynam, quando tenetur tantum ex superfluo statui.* Videatur Cardenas in *Cristi Theolog. dissert. 9. c. 1. & 2.*

¶ Jam ad propositam quæstionem 1. <sup>246.</sup>  
 Proximo quantumvis in extrema necessitate constituto nemo quidem tenetur dare eleemosynam de bonis temporalibus sibi met ad propriam, vel suæ familiæ, Uxoris scilicet ac prolium &c vitam conservandam necessariùs; bene tamen 2. de necessariis  
 ad

ad solum statum conservandum. Ita *cum communi Doctorum* docet Castropalao *part. 1. tract. 6. disp. 2. punct. 2. n. 5. & Matthæucci l. cit. c. 9. num. 6.* Ratio prioris est hæc : quia propria vita secundum rectam rationem præferri debet vitæ alienæ ; etenim & ordo charitatis postulat , ut quisque seipsum magis diligat , quàm proximum , ideòque etiam sibi potius ac suis , quorum cura sibi incumbit , prospiciat , quàm alienis : excipiunt tamen circa hoc Doctores casum , quando proximus esset persona publica , ex cujus interitu bonum publicum pateretur ; vita namque privata postponenda est utilitati , & bono communi juxta rectam rationem . Verùm hic casus utpote rarissimus parum negotii dabit Confessario in praxi.

Ratio posterioris pariter colligi debet ex ordine charitatis , qui nos obligat , ut vitam proximi præferamus propriæ dignitati vel etiam statui , ideòque ex iis saltem , quæ superflua sunt proprio statui succurramus , ad vitam proximi quomodocunque conservandam.

277. *q. 2dò ad idem quæsitum.* Proximo in necessitate verè gravi constituto tene-  
mur succurrere non modò de superfluis ,  
verùm insuper de utilibus , & non valde ne-  
cessariis ad statum & decentiam personæ  
nostræ. Ita rursus Castropalao *cit. pu. 2.*  
*n. 13.*

n. 13. Babenstuber tract. 5. disp. 1. art. 5.  
 n. 13. Henno, & alii. Ratio hujus de-  
 sumitur ex illo 1. Joann. 3. filii mei, non  
 diligamus verbo neque lingua (tantum sci-  
 licet) sed opere & veritate: At, qui pau-  
 peri in verè gravi necessitate constituto non  
 succurrunt de iis, quæ sibi superflua sunt,  
 vel certè non necessaria ad conservationem  
 sui status, non diligit proximum suum ope-  
 re & veritate. Hinc Doct̃or Gentium 1. Ti-  
 moth. 6. scribit: *Divitibus hujus sæculi præ-*  
*cipe - - facile tribuere,* scilicet necessitate  
 præsertim gravi laborantibus.

R. jam 3t̃id. Pauperibus in communi 278  
 duntaxat necessitate constitutis tenetur suc-  
 currere, quisquis habet bona nedum natu-  
 ræ, sed etiam statui suo superflua. Ita  
 communissimè DD. post S. Thom. 2. 2. q.  
 32. artic. 5. Ratio hujus satis evidens de-  
 sumitur ex illo 1. Joan. 3. cap. qui habue-  
 rit substantiam hujus mundi, & viderit fra-  
 trem suum necessitatem habere, & clausit  
 viscera sua ab eo, quomodo charitas DEI  
 manet in eo? Profectò videtur quædam  
 inordinatio gravis, ita esse addictum opi-  
 bus hujus sæculi, ut stante etiam abundan-  
 tia illarum renuat quis proximo suo ad  
 imaginem DEI creato succurrere, tametsi  
 absque ullo detrimento posset. *Dives igitur*  
*(sunt verba R. P. Babenstuber tr. 5.*  
*disp. 1. art. 5. n. 19.) qui propositum habet*

nun-

nunquam subveniendi pauperibus, communem necessitatem patientibus, ideoque universim mendicos eleemosynam petentes repellit, in malo statu esse, merito censetur: licet fatendum sit, quod nemo teneatur omnibus dare, neque huic vel illi (in communi tantum necessitate constituto, ut supponitur) dare; sed tenetur distribuere secundum quod sibi visum fuerit opportunum, inquit S. Thomas *quodl. 8. art. 12.*

279. Quocirca tamen bene advertendum est, posse procul dubio sæpe sæpius intervenire causas rationabiles, hic & nunc excusantes ab omni, vel certè à gravi peccato illos, qui renuunt dare, vel non dant eleemosynam; nam in primis ab omni culpa eximendus est, qui huic vel illi pauperi non succurrit, eò quod ignoret illius indigentiam. Nec non 2. ille qui rationabili motivo ductus huic vel illi pauperi triviali nihil dat, vel quia scit, dari alios magis egentes, vel qui nimis importunè, vel etiam loco aut tempore minùs oportuno postulavit. Vel 3tiò qui scit, dari alios, qui huius vel illius necessitati succurrere velint, vel omnino debeant.

At contra hoc inquires: si talis præsumptio excuset à gravi peccato, planè cogimur fateri, quod nemo prorsus teneatur dare eleemosynam pauperibus, communi duntaxat necessitate laborantibus; nam quivis pote-

poterit prudenter præsumere dari adhuc alios, qui aut velint, aut etiam debeant succurrere indigentia hujus vel illius.

¶ Negando illatum; nam si nulla esset 280. obligatio dandi eleemosynam, procul dubio paucissimi darent: at, hoc ipso non possit quivis prudenter supponere, dari alios, qui velint aut debeant pauperibus succurrere, ut de se liquet: ergo ex hoc argumento potius inferendum videtur, quod divites & mediis abundantes teneantur succurrere pauperibus congrua eleemosyna.

Quæres denique 8tavò, utrum vi hujus præcepti (de danda scilicet eleemosyna) teneamur proximo indigenti succurrere gratis, an verò sufficiat, quod eidem succurratur cum onere, scilicet denuo refundendi id, quod datum fuit?

¶ Cum distinctione. Vel enim sup- 281. ponitur is, qui hic & nunc in extrema necessitate versatur, esse talis, qui saltem alibi habet bona propria sive in re, sive etiam in certa spe, utputa infallibiliter obtinenda ex hæreditate, aut ex proprio labore? Vel verò supponitur esse talis, qui neque hic, neque alibi, nec in re, neque in spe habet bona propria, ex quibus compensare valeat id, quod fuit datum? si prius: dicendum, quod tali nemo teneatur gratis, id est, sine onere recompensandi succurrere, bene verò si supponatur hoc

*R. P. Elbel, Pars II. de Fide &c. Y po-*

posterius. Ita cum *cummuniore DD.* tenet Castropalao *tr. 6. disp. 2. pu. 4. n. 2. & 5.* Ratio prioris est: quia in ejusmodi casu proximus revera nequit dici absolute constitutus in extrema necessitate: neque enim re ipsa extreme pauper dici potest, qui alibi habet bona vendibilia, aut oppignorabilia: quin immò vel sola spes acquirendi tantò pluris æstimatur, quantò major est aut certior: ergo talibus nemo tenetur gratis omnino succurrere, sed satisfacit charitati mutuando interim cum onere denuo refundendi. Ratio autem posterioris peti, debet ex dictis *n. 273.* quia scilicet nomine eleemosynæ intelligitur gratuita & liberalis donatio facta aut facienda in ordine ad sublevandam indigentiam pauperis: at, qui nec in re, neque in spe quidquam habet, simulque hic & nunc extreme indiget, procul dubio opus habet eleemosyna: ergo huic gratis & sine onere succurrendum erit. Et certè, si neque in hoc casu quispiam teneretur gratis succurrere indigenti, prorsus è medio tolleretur obligatio dandi eleemosynam; quod tamen à Theologo Christiano, ne dicam Catholico, minimè admittendum est. Videatur Laymann *l. 2. tr. 3. c. 6. n. 6.* vel Filliucius *tr. 28. c. 3. n. 80.*

Dices contra hoc. Præceptum Eleemosynæ solum obligat ad sublevandam indigentiam proximi: atqui hæc sublevatur etiam

etiam tunc, quando pauperi succurritur cum onere denuo recompensandi id, quod præstitum fuit tempore necessitatis: ergo &c.

¶ *Negando Major: absolute, vel gratis 282.* distinguendo, præceptum eleemofynæ solum obligat ad sublevandam indigentiam proximi, & quidem gratuito, *concedo*. Non gratuito, *subdist.* quando indigens habet alibi bona in re, vel certè in probabilissima spe, *concedo*; tunc enim præceptum eleemofynæ non obligat simpliciter: quando indigens nulla prorsus habet bona, neque in re, neque in spe, *neg. Major. cum conseq.*

## §. II.

Proponuntur & breviter resolvuntur Casus practici circa Eleemosynam pauperibus elargiendam.

### CASUS PRIMUS.

**T**Itia femina non minùs astuta quàm malitiosa, quò faciliùs genio suo posset indulgere: hinc inde apud Nobiles præsertim, quibus hætenus fuit incognita, pauperrimam se dictitabat, quos, ut faciliùs ad misericordiam inflecteret, finxit, se uterum gestare, & partui jam proximam: quin & nuper insigniter quendam Confessarium decepit, dum sub specioso schemmate,

Y 2

quòd

quòd hujus extrema necessitatis causam nulli praterquam Confessario aperire possit, eundem ed adduxit, ut à quodam Patrono notabilem eleemosynam sibi impetraret; hanc verò (more solito) magna ex parte, licet nondum ex integro consumpsisse, vel potius dilapidasse fatetur. Quariter jam 1. an, vel quommodo Titia peccaverit? 2. An revera obtinuerit dominium eleemosynarum hinc inde tam subdolè extrahatarum?

283. R. Ad primum. Titia graviter peccavit. Ita ex communi DD. Matthæuccilib. 2. cautel. Confessar. cap. 9. n. 31. Ratio est: quia cum gravi dolo & deceptione petiit & accepit rem alienam Domino rationabiliter invito, qui, si cognovisset fictionem, probabiliter nunquam dedisset huic personæ eleemosynam. Nec refert, quòd fortassis à pluribus non obtinuerit quantitatem notabilem; quia saltem habuit animum malitiosè obtinendi, scilicet sub ficto paupertatis extremæ titulo.

Insuper eo ipsò aliis pauperibus haud exiguum intulit injuriam; partim quia hæc eleemosyna alteri pauperi fortassis fuisset data; partim etiam ex eo, quòd si Dominus resciverit, se fuisse ab hac fictitia paupere insigniter deceptum, deinceps procul dubio non amplius erit tam liberalis, quò fiet, ut alii verè indigentes destituantur subsidio charitativo. Accedit insuper, quòd  
Titia



Titia in ordine ad paliandam suam nequitiam abusa fuerit Sacramento poenitentiae : nec dubium, quin si in ipso actu Confessionis decepit Confessarium, in materia tam notabili mentiando, Sacrilegè fuerit absolutus: velut indisposita & merum ficta poenitens. Secus quoad hoc ultimum dicendum foret, si supponatur extra Confessionale imposuisse Confessario.

R. Jam ad 2dum quæsitum hujus Casus, 284. Doctores minimè convenire quoad hoc; Lessius namque *lib. 2. de just. c. 18. dubit. 17. n. 132.* Coninck, Soto & alii plures absolutè affirmant, pauperem fictitium acquirere dominium eleemosynæ, eò quòd piè præsumendum, quòd Dominus eam principaliter voluerit elargiri ob amorem DEI & proximi, & secundariò duntaxat ac minùs principaliter ad sublevandam indigentiam hujus vel illius pauperis; esto proin hoc secundum motivum, vel potius finis secundarius supponatur fallere, quia tamen adhuc subsistit primarius, hinc valida censeretur donatio &c. &c. quemadmodum matrimonium valet, si habes animum ducendi hanc, quam putas divitem, esto talis non sit.

Econtra verò communior Sententia, cui subscribunt Scotus 4. *dist. 15. q. 2. art. 3.* Herincx *de charit. disp. 12. n. 32.* Henno *de virtut. disp. 6, q. 12. art. 1. conclus. 6.*

Y 3

circa

*circa finem.* Castropalao tr. 6. disp. 2. pu. 14. n. 5. Babenstuber ubi supra n. 26. Navarrus & alii absolute negant, à paupere fictitio aquiri dominium; quia inquirunt, eleemosyna ex sua natura importat donationem liberalem, quæ pro motivo essentiali respicit sublevationem pauperis: ergo si is, cui datur non sit verus, sed fictitius pauper duntaxat, cessat ex parte dantis voluntas donandi, & hoc ipso voluntas transferendi dominium. Ego cum P. Vega in *Summa part. 2. cap. 21. cas. 3.* existimo, utramque sententiam mox relatam esse verè probabilem, prout rationes utriusque perpendenti facile constabit, nî fallor.

Ergone, inquires Titia à Confessario obliganda est, ut eleemosynas hinc inde fraudulentè obtentas restituat?

285. R. Si certò constaret, quòd Dominus noluerit dare eleemosynam, nisi verè pauperi, vel sub tacita saltem conditione paupertatis realis, procul dubio Titia à Confessario foret obliganda ad restituendam pecuniam acceptam vel ipsi Domino immediate, vel saltem aliis verè pauperibus, idque ob rationem mox datam pro Sententia Scoti & aliorum sequacium. Nihilominus cum inprimis certò non constet, quòd dans hujusmodi subsidium nolit transferre ejus dominium nisi in verè pauperem, aliunde verò Confessarius hanc ob-
- liga-

ligationem vix, aut ne vix quidem persuaderet, ita, ut meritò timendum, ne talis persuasio potius vergat in laqueum animæ; hinc censeo, eum omnino prudenter facturum, si interdicta deinceps hac malitiosa praxi, cæteroquin obligationem restitutionis omnino diffimulet, præsertim respectu illorum, à quibus modicum accepit; quia de talibus facilius præsumere licet, quod non desiderent tam modicum sibi refundi. At verò si quantitas eleemosynæ sit valde magna, vel si sit per modum gratialis continuanda v. g. annuatim vel de mense in mensem &c. omnimodis obligandam existimarem Titiam, & sin minùs per seipsam saltem per alium virum prudentem satagat explorare mentem Patroni dantis, an scilicet is esset contentus, si sciret, se quandam eleemosynam notabilem distribuisse, vel deinceps etiam distributurum flecto duntaxat pauperi, an verò potius exigeret eandem sibi restitui, aut certè deinceps non ampliùs daret? quo facto haud quaquam erit difficile Titix dare resolutionem congruam. Videatur Lessius *loc. prox. cit.* Vel Coninck *disp. 27. dub. 6.* Castropalao *tr. 6. disp. 2. pu. 14. n. 4.*



## CASUS SECUNDUS.

**S**empronius amplam hæreditatem à Parentibus sibi relictam intra respectivè exiguum temporis Spatium, non quidem in pauperes (quibus ne obulum quidem vel nummum nunquam dederat) sed in luxum, commensationes & alia familiæ suæ probra expendendo, vel potius dilapidando consumpsit: modo miserrima egestate pressus, & nedum ab illis, quibus paulo antè benefecerat, verum etiam ab amicis seu consanguineis, quos hoc vivendi genere hæud modicum afflixerat, derelictum se sentiens, velut alter filius prodigus dissipata jam substantiæ portione hinc inde stipem postulat, sed qui succurrere velit, nemo est; enim verò ab extraneis jubetur implorare amicorum seu etiam consanguineorum suorum opem; hi verò eundem repellunt, causantes, esse perditum quidquid impenditur Sempronio, quippe qui solet abuti amicorum suorum beneficentia ad prostitutionem suæ familiæ. Dubitatur jam primò, num Sempronius censendus sit graviter deliquisse ex eo, quòd de sua substantia, ampla scilicet hæreditate, nullam prorsus fecerit eleemosynam? 2. Utrum Consanguinei teneantur eidem succurrere subsidio charitativò?

286. **R.** Ad primum practicè loquendo videtur Sempronius non esse condemnandus  
gra-

gravis peccati (nisi fortassis cuipiam in extrema vel certè gravi necessitate constituto etiam rogatus negasset subsidium charitativum eo tempore, quo adhuc mediis abundavit) Ratio hujus resolutionis est: quia tametsi mediis abundantes teneantur per se loquendo sub gravi obligatione pauperibus in communi necessitate constitutis stipem dare; nihilominus plusquam certum est, quòd hujusmodi homines assueti genio suo indulgere, & commensationibus sua bona dilapidare, hanc obligationem gravem vel non apprehendant, vel certè etiam ea non apprehensa pauperibus hinc inde tribuant, dum nimia prodigalitate bona sua dissipantes nullam quasi metam suæ liberalitati ponunt, quousque tandem mediis deficientibus volentes nolentes eò adiguntur.

¶ Jam ad 2dum quæsitum. Consanguinei vel alii propinqui tenentur quidem 287. Sempronium liberare ab extrema necessitate eidem suppeditando media ad vitæ sustentationem necessaria, nisi is aliunde sibi met sufficiat ad procurandam sustentationem congruam: quia secundum dicta n. 276. proximo in extrema necessitate constituto quivis abundans mediis (quid ni à fortiori consanguineus? &c.) tenetur succurrere. Nihilominus cum Sempronius supponatur nedum sua bona cum dedecore & prostitutione familiæ suæ dilapidasse,

Y s

dâsse, & fortassis adhuc plura contraxisse debita, quibus solvendis non amplius par est, judico, quòd ab istis oneribus non teneantur eundem eximere, esto etiam propterea fuisset incarceratus; supponitur enim voluntariè sese conjecisse in talem necessitatem, & quidem cum dedecore suæ familiæ; tum etiam quia consanguinei sine permagna difficultate non poterunt eum liberare &c. Et quis, amabo! prudenter obligabit consanguineum, immò & Parentem, ut filium, quem longa consuetudine expertus fuit omnia dilapidare & abligurire, & etiam cum detrimento & prostitutione suæ familiæ, quis inquam talem obligabit, ut eundem post dilapidatam substantiam sibi competentem, & post contracta fortassis plura debita, redimat à vexa creditorum vel à carcere?

### CASUS TERTIUS.

**C**Aja paupercula multùm conqueritur, quòd jamiam extrema paupertate & indigentia prematur; partim quia Marito suo, non permittitur, ut suum opificium liberè exerceat; partim etiam, quia stante moderna ordinatione non amplius fas est mendicare; & licèt de communi pauperum cassa singulis septimanis recipiat aliquos crucigeros, hanc tamen eleemosynam ait nequaquam sufficere ad procurandum

*dum victum, sibi, quinque prolibus, & Marito necessarium, multò minùs ad solvendum censum pro habitatione, ad ligna, luminaria, & alia hujusmodi procuranda: his de causis nedum conqueritur, sed potiùs murmurat mirum in modum contra illam constitutionem, vi cuius prohibitus fuit conquestus eleemosynarius. Quaritur jam 1. an Caja quærela sint justæ? 2. quid eidem à Confessario fuerit consilendum?*

ꝛ. Ad primum quæsitum, Cajam non 188. justè, sed malè fuisse conquestam, & pejus adhuc murmurasse contra illam constitutionem, vel potiùs contra illius auctores. Ratio est: quia dicta constitutio sapienter omnino fuit facta, tum ad tollendam hominum inertium ignaviam & desidiam, tum etiam ad stimulandam eorum solertiam: experientia enim docuit, quamplures illa facultate libera mendicandi fuisse abusos ad ignaviam, otium, immò & alia graviora vitia, qui, tametsi potuissent laborando sibi procurare necessaria, maluerunt tamen mendicando id præstare, quatenus possent liberius indulgere otio. Quare cùm hujusmodi fæx Reipublicæ sit summopere nociva, & ex libera facultate mendicandi passim omnibus, etiam vagabundis plerumque vitiis deditis, concessa, teste experientia nata sint sequi plurima incommoda & damna Reipublicæ, meritò fuit introducta memoria

rata constitutio, vi cujus ex communi pauperum cassa jubetur subveniri verè indigentibus. Videatur de hoc Herincx *cit. disp.* 12. n. 30. & 31.

289. R. Jam ad 2dum quæsitum. Caja à Confessario jubeatur quærere primùm Regnum Dei & justitiam ejus, scilicet observando mandata, Deum super omnia amando, præ oculis habendo, & rogando &c. unà cum suis prolibus, & firmissimè sperando in divinam providentiam, quæ juxta infallibile promissum Christi Domini *Matthæi 6. v. 33. eis adjiciet omnia necessaria.*
2. Edoceatur, illam constitutionem quantumvis odiosa videatur pauperibus, non fuisse factam sine verè gravibus & ponderantibus motivis mox allegatis, ideòque jubeatur nedum omnem malevolentiam deponere, sed deinceps etiam cavere ad omni detractiōe & dictæis &c.
3. Eidem bene inculcetur, neque Principem neque Magistratum aut Rempublicam teneri ad simpliciter, & quidem gratis omnino, sustentandas integras familias; neque enim hoc foret possibile: sed solum ad succurrendum indigentibus pro possibili: principalem verò curam providendi de necessariis tum sibi, tum Uxori etiam & prolibus, tam jure naturali, quàm etiam civili incumbere Patrifamilias, qui, si non permittatur liberè suum opificium exercere
- (pro-



(prout sanè justissimè prohiberi potest multis, præsertim extraneis) conari debet alio labore conveniente sibi suisque lucrari panem, & interim suam inopiam tantò libentius ferre, quantò liberius prævisa hac indigentia & impossibilitate se, uxorem ac proles nascituras alendi, in talem necessitatem sese coniecit, tum matrimonium iniiit.

At verò, inquires adhuc: quanta hæc est miseria, vel potius immisericordia, quòd pauperes extranei præsertim, qui ob amorem fidei seu veritatis Catholicæ, Patria, Parentibus, quin & melioris fortunæ spe contemptis aut certè postpositis ad civitatem Catholicam confugiunt, fidem Catholicam hæresi abjurata profitentur, & ferventissimè Deo servire noscuntur, nihilominus non solùm congruam sustentationem obtinere nequeunt, sed potius hac civitate relicta aliò, vel omnino in patriam redire jubentur, utique non sine evidenti periculo denuo reincidenti in antiquam hæresin?

¶. Ex supposito, quòd talis homo re-290.  
vera amore veritatis duntaxat professus fuerit Catholicam fidem, & in hac Deo ferventer servire noscatur, malè procul dubio facturum, quisquis eundem compulerit ad deferendam civitatem vel locum Catholicum, & ad redeundum in patriam; quia cum talis homo nedum jure naturali sed  
& di-

& divino teneatur manutenere veritatem semel agnitam, nec non de sibi ad vitæ corporalis sustentationem necessariis providere, profectò nedum contra charitatem proximo debitam, sed etiam contra justitiam peccare convincitur, quisquis hujusmodi pauperulo vitæ subsidia nedum è communi pauperum cassa negat, sed insuper prohibet, ne mendicando charitativum subsidium hinc inde quærat, vel quod adhuc pejus est, eundem compellit ad redeundum in Patriam acatholicam, non sine evidenti periculo salutis æternæ. Rationem hujus liquidò colligere fas est ex hæcenus dictis: quia constituto in extremo vel certè gravissimo periculo nedum tenemur virtute charitatis pro viribus succurrere, sed insuper virtute justitiæ obstringimur eundem non impedire, quò minùs mediis licitis sibi comparet necessaria ad salutem animæ vel etiam corporis.

At verò, quòd subinde cum similibus solitò rigidiùs procedatur, fortassis in causa est: quia pauci reperiuntur, qui præcisè amore veritatis seu fidei Catholicæ ducti hanc profitentur: plurimi ècontra deprehenduntur, qui ob alia motiva profana, utputa ob sustentationem, ampliorem promotionem & similia potius simulant, se velle accedere Ecclesiæ, reipsa autem semper manent Catholici, tepidi, immò nullus

lius prorsus valoris, utpote otio, aliisque vitiis dediti, existimantes sibi deberi commodam sustentationem apud Catholicos vel ideò duntaxat, quòd fidem Catholicam fuerint saltem pro foro externo amplexi; unde etiam hac negatà non rarò audiuntur nedum conqueri, sed potiùs minitari, quòd velint denuo velut canes reverti ad vomitum, seu amplecti hæresin semel abjuratam, minimè advertentes, quòd ex tali relapsu sibi potiùs, quàm Ecclesiæ aut veræ fidei noceant. Sapienter proin omnino fit, dum in talium vitam ac mores exactiùs indagatur, quatenus veris fidei ac veritatis Zelatoribus opportuno charitatis subsidio subveniatur, aliis verò hypocritis id, quod minimè debitum, subtrahatur. Videantur de hoc Bonacina *disp. 3. de char. q. 4. pu. 6. n. 19.* Babenstuber *tr. 5. disp. 1. art. 5. n. 23.* vel Herincx *part. 3. tract. 1. disp. 12, n. 30.*

## §. III.

## Corollaria ex dictis inferenda.

**C**olliges ex hætenus dictis primò à 291. Confessario modestè adhortandos, vel, ubi opus fuerit graviùs objurgandos esse illos

illos divites, qui mediis & pecuniis abundantes pretiosa quæque recludunt in suis cistis, pauperibus verò charitativa vitæ subsidia negant, prout multorum perversa praxis, vel potius avaritia fert. Ratio hujus desumitur ex illo Apostoli 1. *Timoth. 6.* ubi ait : *divitibus hu. us sæculi præcipe* (NB. non dicit consule) - - *facile tribuere* : ergo si huic obligationi nolint satisfacere, à Confessario debent modò congruo ejusdem admoneri vel omnino redargui. Hinc noster Henno *tr. de virtut. disp. 6. q. 12. conclus. 3. Resolut. 2.* non absere ait : Confessarios, qui hujusmodi hominum Confessiones excipiunt, se suosque poenitentes perdere, nisi seriò de illorum obligatione ipsos moneant.

292. Colliges 2dò, quàm DEO & naturæ humanæ sint exosi divites illi, præsertim Ecclesiastici, qui tempore publicæ necessitatis granaria frumentis redundantia reclusa tenent sub spe majoris pretii aut lucri; quibus *Proverb. 11.* haud immeritò dicitur : *qui abscondit frumenta, maledicetur in populis ; Benedictio autem super caput vendentium.* Ita Castropalao *tr. 6. disp. 2. pu. 5.* Kresslinger in *addit. post n. 42. ad tr. 4. dist. 6. theol. mor. R. P. Reiffenstuel.* Henno *l. cit. Resol. 3.* qui mox *Resolut. 6.* ulterius subdit *lathalis culpæ reos esse illos, quibus ob vestium pompam, epulas frequentiores & splendidi-*

*didiores, adium magnificentiam, ludos immoderatos, curiositatis lenocinia, & equorum multitudinem, nihil superest dandum pauperibus; quia revera substantiam pauperum devorant: nam juxta D. Thomam 2. 2. q. 66. art. 7. Res, quas aliqui superabundanter habent, ex naturali jure debentur pauperum (NB. non canum aut equorum superfluum) sustentationi, & rursus q. 78. art. 1. ad 4. ait idem Doctor Angelicus: Dominus non solum decimam partem, sed omnia superflua jubet exhiberi pauperibus.*

Colliges 3tio, Medicos & Chyrurgos, 293. qui pauperibus graviter decumbentibus, eò quòd solvendo non sint, operam suam negant sine graviore & justa causa, graviter peccare: idipsum tenendum est de Medico spirituali præsertim ex justitia obligato, uti sunt DD. Parochi & Pastores animatum; nec non de Advocato qui renuit gratuito suscipere patrocinium pauperis, non habentis alium, à quo in judicio defendatur, dum miser versatur in gravi periculo, v. g. ne injustè damnetur capitis vel ad triremes vel ad carcerem perpetuum &c. Ratio colligitur à simili; sicut enim is, qui negat subsidium ex bonis sibi superfluis proximo graviter indigenti, eum non diligit opere & veritate, ita nec ille, qui denegat alia auxilia circa suum detrimentum, præstabilia. Aliud dicendum foret, inquit Sylvester R. P. Elbel. Pars II. de Fide &c. Z Verb.

*Verb. Advocatus n. 11.* Si Advocatus ipse (idem dic de Medico & Chirurgo) esset tam pauper, ut gratis patrocinari non possit. Videatur Laymann *lib. 2. tr. 3. c. 6. n. 5.* vel Bonacina *de charit. q. 4. pu. 6. n. 9.*

At quid, si pauper lethaliter decumbat, simulque moraliter certò prævideatur, fore, ut pristinae sanitati restituatur, casu quo eidem pharmaca pretiosissima applicarentur: ècontra verò fore, ut moriatur, si eidem applicentur minùs pretiosa & minùs efficacia, tenebiturnè Pharmacopola præsertim dives, vel alii bene habentes cum magnis etiam sumptibus similia gratis administrare vel procurare?

294. \* Cum Castropalao *tr. 6. disp. 2. pu. 2. n. 8.* Laymanno *cit. n. 4.* Sporer *tr. 3. in decalog. c. 6. n. 51.* Negative. Ratio est: quia ipsemet infirmus quantumvis potens & mediis abundans, vi charitatis sibimet debitæ non teneretur magnam summam expendere in ejusmodi media extraordinaria, sed satisfacit huic præcepto utendo mediis ordinariis: ergo multò minus tenetur alius quantumcunque dives eidem gratis subministrare medicamenta tam pretiosa & hòc ipso extraordinaria. Ob eandem rationem nemo tenetur pro salvanda vita proximi, quam inimicus injustè, vel à fortiori Judex justè adimere tentat, expendere  
val.

valde notabilem summam v. g. centum aut plures aureos; secus enim facile contingere posset, ut passim inimicus suum adversarium conaretur redigere ad eas angustias, in quibus alter bene habens cogeretur pro eodem magnam expendere summam. Excipit tamen Sporer; nisi persona in tali necessitate constituta sit conjunctissima, ut filius Patri aut Matri; quia talem etiam aliquot millibus existimat redimendum, si statui vel sunt superflui, vel non admodum necessarii. Verum hic casus erit rarissimus; nec dubium, quin etiam in hoc omnibus bene perpensis dari possit causa excusans v. g. Parentem, quo minus filium degenerem liberet.

Colliges denique 4to, vi magni mandati de diligendo scilicet proximo nos duntaxat adstringi ad succurrendum in quantum moraliter, id est, sine permagna difficultate possumus, & proximus indiget: tum quia charitas utpote benigna, non obligat ad moraliter impossibile; tum etiam quia non obligat, nisi proximus supponatur constitutus in aliqua necessitate: ergo ubi vel deficit necessitas, vel occurrit moralis impossibilitas, cessat obligare charitas. Ex quo facile liquet, quod si proximus egeat duntaxat usu rei v. g. usu equi vel navis vel etiam vestis &c. ad evadendum periculum ex injusta

persecutione sibi imminens, non tenearis eidem dare dominium equi aut vestis &c. sed satisfacias dando solum usum. Videatur Laymann *cit.* n. 6. Castropalao *ubi supra punct.* 4. n. 1. vel Babenstuber *tr.* 5. *disp.* 1. *art.* 5. n. 18.



# CONFERENTIA DECIMA

## De Correctione Fraternali.

### SUMMARIUM.

- 296. Nomine Correctionis Fraternalis intelligitur monitio charitativa ad emendationem proximi.
- 297. Quæ non tantum lege naturali, sed & divina positiva debetur proximo delinquenti vel erranti &c.
- 298. Suppositis tamen nonnullis circumstantiis;
- 299. Unde hoc præceptum omnes quidem obligat, sed non omnes æqualiter.
- 300. In modo corrigendi per se loquendo observandus est ordo à Christo Domino præscriptus;
- 301. Nisi ex certis circumstantiis prudentia aliud dicat.
- 302. Superiores Religiosi justè possunt præcipere, ut Frater Fratrem, socius socium delinquentem.



quentem immediatè denunciaret sibi, Superioribus scilicet, quando delictum tale est, ut inde publica infamia vel damnum possit redundare in totam Religionem ;

303. Non item quando delictum nemini, præterquam ipsimet delinquenti nocivum est, simulque sperari potest fructus ex correctione Fraterna ; Excipe rursus :

304. Nisi talis Religiosus supponatur sponte renunciâsse juri in suam famam &c.

305. Quidnam Superiori agendum, casu quo is intelligit, delictum aliquod prætermittit correctione Fraterna sibi immediatè fuisse delatum ?

306. Resolvitur Casus I. cujusdam famulæ, referentis suspectum lascivum commercium filiarum familias cum suo proco ;

307. Quæ à Confessariò eò adigenda fuit, ut propossibili illud impediret.

308. Secus dicendum, si moraliter loquendo id non potuisset.

309. Resolvitur Casus II. cujusdam Mariti, gravati uxore ac famulo vitiis admodum deditis.

310. Utrum vel quomodo ancilla teneatur corrigere Dominam, vel etiam famulum vitiis deditum ?

311. Quid si Maritus vel alius Superior supponatur eidem vitio subjectus cum uxore aut subdito ?

312. Quam cautelam observandam sint præsertim Religioso, cogitanti alium denunciare suo Superiori ?

313. Resolvitur Casus III. cujusdam Religiosi dubitantis, an teneatur suum Confratrem immediatè denunciare suo Superiori.

314. Et quid, si hoc in statutis particularibus vel generalibus Ejusdem Religionis præcipiatur.

315. Hoc præceptum de Correctione fraterna utpote affirmativum duntaxat, non obligat pro semper, ideoque nonnunquam prudenter potest, immò debet differri correctio.
316. Nihilominus per se loquendo tantò obligat strictius, quantò delictum est majus vel perniciosius etiam soli delinquenti.
317. Religiosis sæpius incumbit, quàm sæcularibus obligatio corrigendi proximum etiam venialiter tantum delinquentem.
318. Idque à fortiori intelligendum est de Superioribus Ecclesiasticis & Religiosis.
319. An subditus, animadvertens à Superiore dissimulari aut prætermitti correctionem fraternam, teneatur illam supplere?
320. Concionatores volentes è suggestu corrigere aut carpere vitia populi, uti debent magna discretione & circumspectione.
321. Nemo tenetur proximum fraternè corrigere, nisi certò constet, eum deliquisse.
322. Neque etiam in casu, quo dubitatur, sitne correctio privata & fraterna profutura potius, quàm obfutura;
323. Nisi delinquens supponatur constitutus in mortis articulo, & de salute æterna periclitari.

## §. I.

Præmittuntur & breviter resolvuntur quæsitæ scitu necessaria ad debitè resolvendos Casus practicos de Correctione fraterna

**Q**Uæres primò, quid sit correctio fraterna?

**R.** No-

¶, Nomine Correctionis fraternalis intel- 296.  
ligitur monitio charitativa proximi ad emen-  
dandum, vel etiam impediendum ipsius  
peccatum. Ita *in re communis DD.* esto in  
modo hujus descriptionis non nihil varient.  
Dicitur autem monitio charitativa; tum  
quia à charitate præcipitur; tum etiam quia  
corrigens debet duci motivo charitatis, ad  
emendationem scilicet & ad bonum spiri-  
tuale proximi, non verò ad ejusdem pu-  
nitionem, uti facit Judex.

Dicitur 2. *ad emendandum, vel impediendum peccatum &c.* tametsi enim ordinariè  
correctio fraternalis fieri non soleat, immò  
nec debeat, nisi proximus jam peccaverit,  
juxta illud Christi Domini *Matth. 18. si  
peccaveris in te frater tuus, corripe eum &c.*  
quia tamen hoc præcepto nil aliud inten-  
ditur nisi bonum animæ, prout *loc. cit.*  
patenter innuitur; hinc rationabiliter omni-  
no fieri potest ac debet, casu quo proxi-  
mus prævidetur lapsurus, nisi moneatur, aut  
corrigatur; quòd vel maximè etiam Supe-  
rioribus Religiosis observandum est, ubi  
prævidet delictum subditi &c. &c.

Quæres 2dò, utrum correctio fraternalis  
cadat sub præceptum vel potius sub con-  
siliium duntaxat?

¶. Cadit sub præceptum & non tantum 297.  
sub consiliium. Ita rursus *Communissimè  
DD.* Enimverò Christus Dominus abso-

lutè dicit *Matth. 18. si peccaverit in te frater* (id est proximus) *tuus, vade, & corripe eum.* Ratio est: quia lumen naturale dicitur, subveniendum esse proximo nedum in corporis, sed etiam in animæ necessitate constituto, eò præsertim, quòd hujus semper major sit ratio habenda, quàm illius. Unde non immeritò R. P. Paulus à S. Stephano in sua *Theologia morali de charit. tr. 3. disp. 3. dub. 3. §. 2. n. 34.* ait: *miror, quomodo* (verba Christi mox relata) *ab aliquibus dicantur solum esse consilii & non præcepti, cum eorum praxis servanda sit vi legis naturalis.* Videatur de hoc noster A. R. P. Marinus Panger *lib. 4. de pœnit. disp. 5. q. 4. n. 43.*

Quæres 3tiò, utrum hoc præceptum obliget in omni casu, vel verò in quibusdam duntaxat circumstantiis?

298. R. Non obligat in omni casu, sed in certis duntaxat, quando scilicet simul concurrunt sequentes circumstantiæ. 1. Quando certò constat de peccato vel periculo spirituali proximo imminenti. 2. quando simul probabile est proximum se non emendasse, neque emendaturum præcisa correctione fraterna; quia elemosyna egentibus tantum, & non aliis debetur. 3. si alius æquè idoneus non adsit, qui possit, vel omnino debet corripere delinquentem. 4. si simul appareat probabilis

bilis spes fructus seu emendationis; cessante etenim fine, cessat obligatio agendi propter finem. §. denique non teneris proximum corrigere, nisi habeas occasionem, locum, & tempus oportunitum, possisque sine gravi damno tuo facere; quodsi ex conditionibus aliquid desit, præceptum hoc non amplius obligat, juxta communem DD. videndam apud Busenbaum, Babenstuber, Henno & alios passim. Id nunc tamen circa hoc advertendum est, quod, ubi correctio hic & nunc otiosa quidem, seu frustranea aut importuna, alio tamen tempore magis commoda & profutura prævidetur, non debeat absolute intermitteri, sed tempore aut loco magis opportuno fieri; quia cum tali tempore fructus & finis sperari possit, simulque proximus indigeat, omnino charitas suadet, ut correctio fraterna fiat, quemadmodum etiam eleemosyna corporalis vel maxime illo tempore fieri debet, quô proximus potissimum indiget alieno subsidio. Videatur Bonacina *tom. 2. disp. 3. q. 4. pu. 7.*

Quæres 4to, utrum hoc præceptum obliget omnes æqualiter, an verò unum potius, quàm alterum?

R. Omnes quidem obligat in circumstantiis mox recensitis, at, non obligat omnes æqualiter. Ratio prioris desumitur

Z §

tum

tum ex præcepto Christi, quod nullum eximit à charitate proximo exhibenda, unde etiam *Eccli. 17.* dicitur Deus *mandavit unicuique de proximo suo &c* tum etiam, quia omnes sumus commembra ejusdem corporis mystici, quod est Ecclesia: certum autem est ex lege naturæ, quòd unum membrum teneatur pro possibili succurrere alteri: ergo omnes ad hoc adstringimur. At quòd non omnes æqualiter, sed Superiores præsertim magis obligentur quàm subditi ad invicem, ex eo facile suadetur: quia subditus respectu sibi æqualis ex charitate tantum, è contra verò Superiores respectu sibi subjeutorum nedum ex charitate, verum insuper ex justitia tenentur impedire peccata, consequenter etiam uti correctione fraterna: quod verò de Superioribus dictum, id ipsum dictum intelligas velim de Patrefamilias respectu sibi subjeutorum. Vide si placet Palaum *tr. 6. disp. 3. pu. 7. n. 8.* vel Laymann *lib. 2. tr. 3. c. 7.*

Quæres 5to, sitne in correctione fraterna servandus aliquis ordo seu modus?

300. 1. Est sine dubio & quidem per se loquendo sub gravi culpa servandus ordo ille, quem Christus *Matth. 18.* præscripsit, nisi prudentia aliud dicte. Ita primò corrigendus seu charitativè admonendus est proximus in secreto. 2. si hæc admonitio  
nihil

nihil fructificet, ulterius corripiendus est coram uno aut altero teste: quod si delinquens neque hoc modo resipuerit, oportet illud delictum denunciari Ecclesiae, id est, Superiori, non quidem illico tamquam Judici ad punitionem, sed potius tamquam Patri ad emendationem delinquentis. Liqueat hoc totum ex ipsis verbis Christi Domini *loc. cit.* ubi ait: *si peccaverit in te* (id est, coram te, inquit Paulus à S. Stephano) *frater tuus, vade & corripe eum inter te & ipsum solum: si te audiêrit, lucratus es fratrem tuum: si autem te non audiêrit, adhibe tecum adhuc unum vel duos, ut in ore duorum vel trium testium stet omne verbum. Quod si non audiêrit eos, dic Ecclesiae, si autem Ecclesiam non audiêrit, sit tibi sicut ethnicus & publicanus.* Ratio autem hujus est: quia debemus famam proximi etiam peccatoris conservare, quantum possumus, quamdiu apud alios est adhuc integra.

Dixi tamen: *nisi prudentia aliud dicat.* 301.  
Nam in hoc præcepto non minus, quam in aliis plerisque magis attendenda est Domini intentio, quam verba: atqui certum est, intentionem Domini eò collimasse, ut suaviori modo quò possemus, niteremur proximum delinquentem reducere ad meliorem frugem, ubi autem modus ille suavior prævidetur nihil omnino fructificaturus, adhiberemus paulò duriorē, ut puta vel  
im;

rationem habendam esse pro bono totius  
communitatis , quàm pro bono hominis  
privati : ergo si bonum , id est , fama vel  
honor totius Religionis conservari nequeat,  
nisi cum aliquali diffamatione seu etiam de-  
nunciatione hominis privati : profectò re-  
cta ratio dicat , quòd hic potius , quàm  
tota Communitas debeat pati : atqui ubi de-  
lictum ex se est valde perniciosum vel redun-  
dans in detrimentum seu etiam diffamatio-  
nem totius Communitatis , aliter servari non  
potest honor Religionis : ergo Superior  
justè præcipit , ut subditus taliter delin-  
quentem immediatè sibi denunciet ; Secus  
non esset satis provisum bono totius Com-  
munitatis Religiosæ. Cæterùm nomine  
talium delictorum ego intelligo non tan-  
tùm illa delicta , quæ *immediatè* , *per se* ,  
& *directè* vergunt in perniciem boni pub-  
lici , uti est v. g. proditio , disseminatio hæ-  
reseos , vel etiam falsæ monetæ , seminatio  
discordiarum inter fratres , furtum grave , im-  
pugnatio vel machinatio contra institutum ,  
diffamatio seu etiam traductio Superiorum  
præsertim Generalium , vel Religionis co-  
ram aliis præcipuè sæcularibus , consuetudo  
detrahendi aut susurrandi &c. Verùm etiam  
illa quæ *indirectè* *ladunt* totam communita-  
tem scilicet in honore , uti est v. g. lapsus car-  
nis cum altero Sexu , publica ebrietas præ-  
sertim coram sæcularibus , discursus scanda-  
losi



Iosi præsertim in materia luxuriæ, suspectum consortium &c. Enim verò hujusmodi delicta si notoriè fiant, gravissimè labefactant honorem totius Ordinis seu etiam Religionis, vixque fieri potest, ut talis Religiosus scandalosus alios non pertrahat ad sui imitationem, prout bene notârunt Suarez *de charit. disp. 8. sect. 6. n. 12.* & Thomas Sanchez *lib. 6. in decalog. c. 18. n. 50.* ergo cum cuilibet Superiori nedum permissum sit, sed etiam sub gravi obligatione incumbat, defendere honorem suæ Religionis, & avertere scandala in populo, planè dicendum est & fatendum, quòd possit justissimè præcipere, ut hujusmodi delicta immediate sibi denuncientur,

Jam Ratio 2dæ partis hujus asserti dari 303. potest ac debet sequens: quia obligatio correctionis fraternæ nedum in jure divino secundum dicta *n. 297.* sed insuper etiam in jure naturæ, utputa in illis principiis: *Diliges proximum tuum sicut te ipsum, & quod tibi non vis fieri, alteri ne feceris* &c. fundatur: at quivis Religiosus per se loquendo potest rationabiliter velle & desiderare, ut non immediate denuntietur Superiori, quando delictum nemini præterquam sibi est perniciosum, neque etiam hanc denuntiationem exigit bonum publicum, ut de se liquet: ergo cum lex naturæ Superiorem Religiosum vel maximè etiam strin-

stringat, dicendum, quòd, iste nequeat sua auctoritate contrarium præcipere: & contrarium faciendo malè præciperet, si subditus supponatur talis, qui privátam correctionem acceptando sese corrigeret: malè autem præsertim contra jus naturæ præcipienti impunè non pareri, aliunde notum est; nam *obedire oportet magis Deo, quàm hominibus. Act. 5. v. 29.* Porro nomine delicti soli delinquenti nocivi ego intelligo illud, quòd ex se nec proximi aut communitatis læsivum est, neque etiam scandalosum saltem in his vel illis circumstantiis, prout universim sunt illa delicta, quæ merùm occultè committi solent, uti est v. g. procuratio pollutionis S. V. crapula vel ebrietas facta sine nota aliorum præsertim sæcularium &c.

304. Dixi tamen rursus, *per se loquendo id præcipi non posse &c.* Secus enim dicendum est 1. quando subditi sponte renunciârunt juri suæ famæ, prout in Societate JESU fieri jam suprà n. 301. insinuavimus; nam volenti & consentienti non fit injuria. Secus itidem dicendum est, quando delictum est publicum seu notorium; quia talis subditus ipso factò supponitur amisisse jus in famam suam, esto etiam Kerchove & alii nonnulli contrarium teneant. Secus denique dicendum foret, casu quo rationabiliter prævidetur, correctionem fraternam nihil profutu-

futuram, sed potiùs obfuturam, id quod vel inde haud obscurè colligi potest ac debet, si scilicet delinquens sit homo ferocis seu etiam pertinacis animi, perversæ vitæ, & jamjam inveteratus in sceleribus, aut pluries sine effectu correctus &c. Videatur *Herincxubi supra n. 96.*

Quæres 7timò, quidnam Superiori agendum, casu quo is intelligit aliquod crimen merè occultum ad se immediatè fuisse delatum, prætermiſſa correctione fraternali?

R. In tali casu ipse Superior debet adhibere privatam admonitionem, quemadmodum debuisset, si ipse Superior solus delictum occultum fratris agnovisset. Et ratio est: quia Superior tunc debet supplere vices subditi, qui omisit correctionem fraternali. Quare etiam nequit exinde non convictum juridicè condemnare, esto possit ac debeat eidem sollicitius invigilare, uti bene notat *Herincx ibi n. 94.* Quocirca tamen magna discretione opus est; unde etiam P. Marchantius *tom 3. tr. 3. sect. 3. q. un. conclus. 3.* Sapienter ait: *videant, qui statim omnia deferunt ad Superiores, unde gravamina intolerabilia, subditorum lites, contentiones. & oppressiones parvulorum sequuntur, quod malum maximè hoc tempore regnat, dum in iis, quæ suspicionem vix in rigore causare possunt, palpones, & adulatores audiuntur, immò & detractores,*  
*R. P. Elbel. Pars II. de Fide &c. Aa &*

*& pacis inimici foventur sub titulo Zeli & vigilantia. Et hic est ferè abyssus Pralatorum, in quam ob clamorem innocentium à DEO præcipites ruere permittuntur. Ita Doctor cit.*

## §. I.

Præmittuntur, & breviter resol-  
vuntur casus practici de fra-  
terna Correctione proximi.

## CASUS PRIMUS.

**T**itia famula Confessario consilii causâ refert, quendam procum valde frequenter tempore nocturno venire ad filiamfamilias sui heri, insciis omnino Parentibus: qui procus, cum alia via ad cameram suâ amasiæ pervenire non possit, semper solet transire per cameram Titia, hæc verò, quia sibi facile persuasit, eos non convenire animo vacandi precibus, sed potiùs libidini, nuper subducto pessulo suâ camera eidem proco interclusit aditum, quod dum altero die filia familias per procum intellexit mirum in modum irata, Titiam increpavit, jurejurando asseverans se eam durius adhuc tractaturam, si deinceps vel pessulum subducere præsumeret, vel de hisce conventiculis nocturnis cuipiam mortalium aliquid manifeste-

nifestaret : timet proin Titia hinc duriores tractationes, eò præsertim, quòd dicta filia familias sola quasi totam domum gubernet ; illinc verò DEI offensam si protinus omnia dissimulet ; quam ob rem postulat scire, an tutâ conscientia possit similia dissimulare & permittere, aut quid sibi agendum. ?

R. Ad hunc Casum, quòd si Titia revera 306.  
sine periculo gravis sui detrimenti, seu etiam durioris tractationis, rixarum &c. nequeat hujusmodi conventicula impedire, possit tutâ conscientia rem totam dissimulare & permissivè se habere ; tum quia admonitio seu etiam correctio charitativa prævidetur nihil fructificatura ; tum etiam quia sola charitas neminem obligat ad impedienda peccata alterius, nisi id facere possit sine pergravi aut notabili suo incommodo : ergo si Titia supponatur non posse illa conventicula impedire sine prætensis illis incommodis, potest tutâ conscientia in ordine ad illa conventicula se habere merùm permissivè, nullatenus tamen positivè concurrente ad illa, utputa proco aperiendo januam, cedendo lectum suum in ordine ad concubitum illorum, vel etiam litteras amatorias, invitatorias &c. ab una parte ad alteram deferendo, prout amplius constabit ex dicendis paulò inferius, ubi de scandalo á n. 362. Videatur de hoc R. P. Kresslinger addit. 3. post n. 48. ad tr. 4.

dist. 6. Theolog. moral. R. P. Reiffenstuel.

307. Dixi tamen : *Si Titia sine periculo gravis detrimenti nequeat hujusmodi conventicula impedire* : non enim video , cur in tali casu res non posset intimari Parentibus , ita , ut complicibus minimè innotescat , se à famula fuisse proditos : non enim necessum est , ut Titia immediatè per se ipsam illos prodatur , sed satis erit , ut modo meliori ac tutiori sive per se , sive per alium commonefaciat Parentes , quatenus paulò solertiùs invigilare velint suæ domui , præsertim tali & tali tempore , scilicet nocturno , quò ipsis imminere videtur periculum detrimenti &c. &c. Quò facto deinceps Parentibus incumbet præscindere occasionem , & impedire scandala &c.

Ad quid , si talis famula respondeat Confessario : P. Reverende , jam semel monui Parentes , at illi nolunt impedire , vel interdicerè filix hanc familiaritatem ; vel quia procum , de quo habent magnam dependentiam timere debent , vel etiam quia libenter viderent , si idem proculus filiam duceret in uxorem : potestne hoc supposito famulæ permitti , ut deinceps rem omnem dissimulet ?

308. R. Potest sine dubio permitti , ut merum negativè se habeat , non item positivè , ut jam dictum est. Ratio hujus facile eruitur

tur ex jam dictis ; quia famula non tenetur ex justitia impedire hujusmodi peccata, sed ex sola charitate : atqui hujus debito jam satisfecit admonendo nedum filiam sed etiam Parentes ipsius ; ergo si hi, quibus principaliter nedum ex virtute pietatis ac charitatis, sed etiam justitiæ incumbit impedire talia peccata & conventicula scandalosa, nolint ea impedire, potest famula permissivè se habere, eò præsertim, quòd aliter absque gravi suo incommodo impedire non possit. Væ tamen hujusmodi Parentibus, qui intuitu pinguioris fortunæ aut matrimonii favorabilioris impia commiseratione filiis aut filiabus omnia permittunt, dissimulant, vel quòd adhuc pejus, viam sternunt ad frequentiora conventicula solum inter & solam etiam sub crepusculo, vel omnino tempore nocturno instituenda, non advertentes, quòd dum hac via prohibus quoad temporalia melius provisum cupiunt, nedum proles, sed seipsos etiam periculo æternæ damnationis exponant ; nam experientiâ teste hujusmodi matrimonia plerùmque malum sortiuntur exitum, DEO in vindictam præteritorum criminum justissimè disponente, ut quantò ardentius lascivo amorì indulgentes prius cum offensa DEI sese amârunt, postea matrimonio jam copulati tantò implacabiliore odio non sine offensa & afflictione Paren-

tum, & aliorum scandalo sese persequantur.

## CASUS SECUNDUS.

**S**empronius jam pridem advertit suam conjugem diversis vitiis ac vanitatibus deditam, similiter & famulum satis vitiosum esse ac lubricum nedum in verbis, sed etiam in gestis, quem propterea uxor velut sibi haud ab similem magni aestimare, favoribusque prosequi assolet pro possibili: è contra verò ancillam modestiæ præ primis, aliisque virtutibus deditam sæpesapius durioribus verbis increpare, eandemque velut hypocritam seu etiam (Germanicè loquendo) eine scheinheilige Bettschwester redarguere assolet. Fatetur proin Sempronius vir valde honestus, hæc & similia sibi summopere displicere, nihilominus non audet corrigere uxorem, eò quòd ab hujus arbitrio quasi tota sua fortuna dependeat; famulum pariter non vult corripere, eò quia iste totam quasi domum gubernat, proptereaque rationaliter timet, ne correctus vel correptus abeat vias suas in præjudicium totius rei domesticæ. Quaritur jam Theologus, an Sempronius ex modò allegatis motivis tutâ conscientia possit dissimulare correctionem fraternam seu charitativam tam respectu famuli, quàm uxoris etiam?

R. Sem-



R. Sempronius nequit in hoc casu tutâ 309.  
 conscientia omnem correctionem etiam  
 charitativam dissimulare; certum quippe  
 est, quòd Maritus ceu Caput Mulieris *ad*  
*Ephes. 5. v. 23.* teneatur hanc nedum ex  
 charitate, verùm insuper ex justitia corri-  
 gere pro possibili; nec dubium quin &  
 famulum sin minùs ex justitia, saltem ex  
 charitate corrigere vel potius corripere te-  
 neatur, quantum moraliter potest. Ne-  
 que verò ab hoc opere tam facîle abster-  
 reri debet; certum quippe est, quòd que-  
 madmodum honestas & Sanctitas vitæ ali-  
 cui familiæ DEI benedictionem, ita è con-  
 trario vita scandalosa etiam unius duntaxat  
 vel alterius personæ maledictionem supra  
 integram domum aut familiam attrahere so-  
 leat, veluti Scriptura Sacra nos docet ex-  
 emplò Putipharis, cujus domui Dominus  
 benedixerat propter innocentiam Joseph  
*Gens. 39. c. v. 5.* & exemplò Heli 1. *Reg.*  
*2. v. 22. & 31.* cujus domum Deus gra-  
 vissimè castigavit ob neglectam ab eo fi-  
 liorum correctionem, de quo D. Grego-  
 rius 2. *part. Pastor. c. 6.* ait: *quia enim falsa*  
*pietate superatus ferire Heli delinquentes filios*  
*noluit, apud districtum Judicem semetipsum*  
*cum filiis crudeli damnatione percussit.* Vi-  
 deatur de hoc Castropalao *tr. 6. disp. 3.*  
*punct. 7. n. 8.*

At inquires, teneturnè etiam Ancilla in tali casu Dominam suam vel famulum corrigere ?

310. R. Non tenetur. Ratio est : quia præceptum de fraterna correctione cessat obligare casu quo, hæc certò prævidetur nihil profutura, vel datur alius, qui efficacius delinquentem dehortando fraternè corrigere potest ac debet : atqui in nostro casu datur alius, scilicet herus, cui primariò incumbit corrigere Dominam & famulum : & certè correctio seu etiam admonitio charitativa famulæ in his circumstantiis non solum nihil prorsus fructificaret, sed potius subministraret majoris odii, indignationis & rancoris fomenta, vi cujus Titia meritò timeret graviores persecutiões : atqui ubi hujusmodi circumstantiæ occurrunt prudenter omnino correctio fraterna intermititur. Hac de causa D. Augustinus relatus *cap. si quis dist. 7. de pœnit.* dixit : *si scirem, meam correctionem tibi non prodesse, silerem, non monerem &c.* Illud nihilominus consulerem tali ancillæ, ut protinus satageret Sanctæ conversationis exemplò potius, quàm verbis corrigere suam Dominam ; cum enim exempla nedum movere soleant (uti verba) sed potius trahere, profectò plus emolumenti spiritualis sperare licet exhibitione boni exempli, quàm exhortatione verbi : juvabit insuper jugi obsecra-

secratione apud Deum instare pro conversione errantium, quatenus Deus omnipotens, in cujus manu corda nostra sunt, velit potentiam dexteræ suæ eos reducere ad meliorem frugem.

Dices adhuc. Sed quid, si Maritus (idem quæri potest de Parente respectu filii, & de quocunque Superiore seu etiam Prælati respectu sui subditi) supponatur subiectus eidem vitio, cui uxor est dedita, tenebiturnè nihilominus eam corrigere?

R. Affirmativè. Ita cum communi DD. 311.  
 Filliuc. tr. 28. c. 5. n. 123. Castropalao  
 tr. 6. disp. 3. pu. 7. n. 3. Herincx ubi  
 præ diff. 12. n. 69. Ratio est: quia propter peccatum nemo eximitur à lege divina: atqui correctio à Superiore debetur inferioribus ex lege divina & naturali: ergo &c. Et hoc potissimum tenendum est de peccatoribus occultis, quorum delicta à subditis non sunt cognita. Fatendum tamen est, peccatores notorios minus esse aptos ad correctionem aliorum delinquentium; timere etenim debent, ne à subditis quos corrigere volunt, eisdem dicatur: medice cura te ipsum. Unde etiam S. Gregor. in Pastor. & post Eum. D. Bernardus serm. 2. post pascha ait: quorum vita despicitur, necessum est, ut & prædicatio contemnatur. Et licet vi hujus præcisè præcepti (de correctione fraternali scilicet) nullus quantum-

Aa 5

vis

vis malitiosus teneatur specialiter à vitiis abstinere, & virtutum studio incumbere: quemadmodum nullus, qui bona sua dissipavit, tenetur comparare sibi divitias eo fine, ut possit dare eleemosynam indigentibus; certum nihilominus esse debet, Prælatos, quibus ex officio incumbit salutis subditorum invigilare, vi muneris hujus arctius adstringi ad virtuosam vitam, quatenus efficacius sibi commissos in viam salutis dirigere, vel ubi opus fuerit, etiam corripere valeant, uti bene advertit noster P. Herincx *part. 3, tr. 1. disp. 12, n 69.*

### CASUS TERTIUS.

**C**Ajus Religiosus optima quidem voluntatis sed exigui intellectus, consilii causâ venit ad suum confessarium, asserens, se nuper vidisse alium quemdam è Confratribus graviter excedentem nedum contra regulas temperantia, sed etiam religiosæ modestiæ in loquendo & conversando cum persona alterius sexus, proptereaque vehementer dubitare, an non teneatur Superiori suo similia immediate intimare in ordine ad præcavenda scandala: quid Confessarius huic dubitantio respondebit?

312. Ante responsionem directam Confessarius bene notet, in his & similibus casibus multa prudentia ac discretionem opus esse; nam

nam ante omnia debet attendere ad qualitatem personæ denuntiandæ, an scilicet sit bonæ vel malæ famæ? an nunquam de tali delicto accusata aut certè suspecta fuerit? itémque vel maxime, an appareat spes aliqujus fructus seu etiam emendationis ex correctione fraterna; nam si sit persona superba, duræ cervicis, & proterva, quæ non tam ex fragilitate, quàm pravitate & malitia peccare solet, minor erit spes correctionis seu etiam emendationis; secus, si sit persona non proterva, sed docilis aut simplex, quæ potius ex ignorantia, inadvertentia malitiæ, seu etiam levitate peccavit. 2dò, advertendum etiam est ad qualitatem delicti, an scilicet ex se sit valde scandalosum, & in his vel illis circumstantiis redundans in diffamationem totius Religionis? an verò soli delinquenti nociturum & omnino mansurum occultum? &c. 3tiò, insuper debet Confessarius attendere ad qualitatem illius, qui vult denunciare, an scilicet capax sit ad adhibendam correctionem fraternam nec ne? &c. Jam his omnibus suppositis, & bene ponderatis,

R. ad speciem hujus facti, vel potius ad dubium propositum cum distinctione. Si enim excessus ille contra regulas temperantiæ & honestatis commissus sit merum in occulto, ita ut rationabiliter credi possit,

313

sit,

fit, illum in nullius, præterquam ipsius delinquentis damnum ac detrimentum reduntaturum, simulque (spectata qualitate tum personæ corrigentis, tum etiam corrigendæ) appareat probabilis spes emendationis ex fraterna admonitione, tunc Confessarius suo Clienti debet consulere ac præcipere, ut per se ipsum bello modò fratrem lucrari & corrigere conetur, minitando, etiam, quòd si deinceps simile quid videret, illud vellet aliis quorum interest, deferre &c. Quòd si Confessarius prudenter judicet, consultius esse, ut ipsemet delinquentem charitativè moneat, procul dubio magnum charitatis opus præstabit, dum conabitur lucrari fratrem suum.

At verò, si ex parte corrigendi nulla vel exigua prorsus appareat spes alicujus emendationis, vel si fama delicti jam usque eo invaluit, ut credatur proximè idem delictum divulgatum iri cum prostitutione totius Ordinis, Monasterii, aut Religionis &c. simulque ex denunciatione immediate ipsimet Superiori facta præcaveri posse huic prostitutioni, Confessarius hujusmodi clientem nedum potest, sed etiam tenetur obligare, ut immediate rem deferat ad Superiorem non quidem tanquam ad Judicem, sed velut ad Patrem spirituales, prætermittenda omni correctione fraterna, ob rationem jam suprà n. 302. datam: quia  
sci-

ſcilicet ordinata charitas poſtulat, ut honor & fama totius Communitatis præferatur honori vel famæ hominis privati, præſertim ubi ex taciturnitate aut diſſimulatione publicum ſcandalum eſt timendum. Videantur de hoc Sayrus in *clav. Reg. lib. 11. c. 4. n. 4.* Kerchøve in *ſtatut. general. c. 6. ſ. 2. n. 57.* Stephanus à S. Paulo ubi ſuprà *ſ. 2. n. 35.*

At, inquiet fortassis nonnemo, vi ſtatutorum generalium quivis ſubditus tenetur delicta gravia ſui confratris quantumvis occulta, modò extra-confessionem Sacramentalem cognita, prætermiſſa omni correctione fraternali Superiori ſuo tanquam Patri in ordine ad correctionem immediate denunciare: ergo Confefſarius tenetur talem ſubditum obligare ad immediatam denunciationem, eſto etiam ſupponatur, quòd hac præciſa delictum nunquam prorsus pateſceret, vel aliis innotefceret?

R. in primis, hoc ſtatutum hodie neque 314. in noſtra Provincia, neque etiam in tota familia Nationis Germano-Belgicæ vigere, & certè de hoc nihil prorsus, ſed contrarium potiùs in iisdem legitur prout advertit noſter A. R. P. Marinus Panger *lib. 4. de pœnit. q. 4. n. 92.* Datò tamen & ſuppoſito, quòd in tua Provincia hoc vigeat (ſalvò meliori iudicio) breviter reſpondendum arbitror, quòd quidem Confefſarius

rius talem clientem teneatur obligare ad denunciandum, quando delictum tale est, ut ex se, vel ex circumstantiis, in quibus fuit commissum, natum sit redundare in publicam infamiam & detrimentum totius Communitatis, non item si sit tale, quod nunquam redundabit nisi in detrimentum solius delinquentis secundum dicta paulò superius *n. 303*, Ratio prioris est: quia, si statutum supponatur obligare duntaxat ad denuncianda delicta toti communitati perniciosa &c. omnino justum est & saluberrimum: justo autem Superioris mandato obtemperandum esse, aliunde constat: ergo &c. Nec refert, quòd tale delictum v. g. imprægnatio fæminæ præcisa tua denunciatione maneret omnino occultum: quia lex fundata in præsumptione periculi communis (uti est hæc) non cessat obligare ex eo, quòd in casu particulari per accidens communitati nulum sequatur periculum, veluti diximus in tract. pralim. de actib. human. confer. 15. *n. 417.*

Ratio autem posterioris colligi potest ac debet ex dictis *n. 303*. quia statutum obligans ad immediatam denunciationem delicti, quod in solius delinquentis damnum redundat &c. non est justum, utpote contrarium legi naturali ac divinæ positivæ. Hac de causa P. Panger *loc. proxime cit.* existimat,



stimat, illud statutum (de quo fusiùs R. P. Reiffenstuel *lib. 5. decret. tit. 1. §. 2. n. 70.*) pro altera familia conditum & videndum *cap. 10. §. 1. n. 2. & 3.* vi cujus fratres, cum primùm ad conventum redierint, jubentur sociorum suorum excessus notabiles, si quos commiserint, Guardianis atque Superioribus secretò insinuare, etiam sine pravia monitione delinquentis &c. illud inquam statutum esse intelligendum de delictis valde scandalosis duntaxat, qui scilicet ex se nata sunt redundare in infamiam & detrimentum totius Ordinis aut Conventûs, non item de illis quæ nemini præterquam soli delinquenti nocebunt, nisi prævideatur, correctionem fraternam nihil prorsus fructificaturam. Et certè S. Thomas hic *art. 7. ad 5.* docet, quòd si Superior inferioribus præcipiat, ut, qui peccata corrigenda cognoscunt, ea referant (scilicet Superiori) id intelligendum esse salvo ordine correctionis fraternæ à Christo instituta: idipsum de similibus statutis tenet Bannes 2. 2. q. 33. *art. 8. dub. 2. ad 7.* eumque secutus Kerchove in *statut. general. c. 6. §. 2. n. 60.*

## §. III.

## Corollaria ex dictis inferenda.

Colliges ex hæctenus dictis primò præceptum hoc de correctione fraterna utpote  
affir.

affirmativum duntaxat, non obligare semper & pro semper. Unde omnino consultum est, ut interdum nonnihil differatur, & expectetur tempus magis opportunum v. g. donec delinquens fuerit magis dispositus, vel à passione inordinata iræ &c. liber & sibi præsens. Ex quo facile deducet quisque prudentum, quàm imprudenter faciat v. g. Uxor, Maritum suum corrigens, vel potius corripuens & increpans, dum is vel crapula tinctus, vel alia passione obrutus est: quamque imprudenter faciant alii Superiores quicunque demum subditos suos actualiter quacunque demum passione præsertim vindictæ aut iracundiæ &c. obrutos corrigere tentant &c.

Ratio est: quia cùm finis correctionis non sit aliùs, quàm emendatio & bonum spirituale delinquentis, de se liquet, hanc non esse adhibendam, nisi probabiliter saltem sperari possit fructus fraternæ correctionis: atqui ubi animus subditi jam est præoccupatus passione prædominante, prudenter sperari nec potest nec debet fructus: ergo in talibus circumstantiis correctio secundum regulas prudentiæ nedum potest, sed etiam debet intermitteri, aut certè in aliud tempus magis commodum differri. Vid. Filliuc. *tr.* 28. *c.* 6. *n.* 138. vel Bonacina *disp.* 1. *q.* 4. *pu.* 7. *n.* 9.

Col.

Colliges 2dò, præceptum hoc de fraterna correctione tantò strictius obligare, quantò gravius noscitur esse delictum, etiam soli delinquenti perniciosum; quia cum nos stringat ad sublevandam proximi indigentis miseriam & indigentiam spiritualem, profectò tantò efficacius obligare debet, quantò amplius proximus noster indiget, & quantò in majori periculo versatur. Quò fit, ut potius teneamur corrigere peccantem mortaliter, quàm venialiter tantum delinquentem: quin immò ob peccatum veniale præcisè non tenemur corrigere proximum, nisi appareat certa spes fructus, simulque sine gravi incommodo nostro id facere possimus, quæ duæ conditiones, etiam rarius simul concurrant, eò ipso efficitur, quòd sæculares saltem rarius teneantur corrigere proximum propter peccatum veniale &c. uti observat Filliucius *lib. cit.* c. 5.

Dixi *Sæculares saltem*. Fatendum quippe est, quòd frequentius obliget Religiosos quoscunque etiam privatos; quia cum vi professionis nostræ teneamur ad majorem perfectionem, quàm sæculares, peccata autem venialia præsertim crebrius repetita non modicum ponant obstaculum adipiscendæ perfectioni, de se liquet, quòd teneamur nedum in nobis ipsis, verum insuper in confratribus nostris pro viribus eliminare

R. P. Elbel, Pars II. de Fide &c. B b has

has culpas veniales corrigendo seu etiam fraternè admonendo confratrem religiosum. Singulis ergo confratribus pro virili allaborandum, quando spes est alicujus fructus, ut leves quóque, attamen noxias transgressiones præceptorum inter se impedi-  
ant, inquit rectè Babenstuber *tr. 5. disp. 1. art. 5. n. 33.*

318. Colliges 3tìd, à fortiori Superioribus. maximè Ecclesiasticis & Religiosis cæteris arctiùs incumbere obligationem de fraterna correctione respectu subditorum suorum. Unde etiam hi tenentur quandoque visitare, seu in vitam suorum subditorum inquirere; quòd tamen prudenter & circumspectè faciendum, ne aliis detur ansa turbationis aut inquietudinis sinistrævè suspicionis, prout de facili contingere posset, si nimis frequenter, præsertim sine gravi causa in aliquorum vel alicujus vitam singillatim inquirerent vel si nulla etiam infamia aut indicio probabili criminis præcedente vellent inquirere, an iste vel iste non commiserit hoc vel illud crimen grave. Hac de causa nostra statuta generalia *c. 6. §. 2. n. 6.* expressè interdicunt, ne *Prælati nostræ Religionis inquirant nominatim de peccato alicujus, nisi is Religiosus fuisset infamiae nota respersus de eo crimine, aut nisi essent indicia evidèntia, vel probabiliora contra eum,*

At

At quid, inquires, si ego advertam confratrem ob hoc vel illud delictum non corrigi nec admoneri à Superiore, tametsi is deberet, & multò efficacius posset, tenebore ego illum corrigere, an verò licet mihi rem dissimulare?

¶ Teneris illum Confratrem corrigere, 319. modò sine gravi tuo incommodo id possis, simulque prævideas tuam correctionem profuturam. Ita Filliucius *ubi supra n. 144.* Bonacina *disp. 1. q. 4. pu. 7. n. 6.* Ratio est: quia proximus seu Confrater tuus versatur in necessitate Spirituali, nec habet præter te quemquam, cujus ope ab illa liberetur. Nihilominus cùm plerùmque Superiores hujusmodi correctionem intermittant, vel quia inde graviora mala timent, vel etiam quia eam nihil prorsus fructificationem prævident; hinc cenleo, hanc obligationem rariùs à Superiore devolvi ad subditum: magna proin prudentia in tali casu opus est.

Colliges 4tò, similiter Concionatoribus 320. volentibus populi vitia corrigere è suggestu, prudenter ac circumspectè procedendum esse; nam in primis diligenter cavere debent, ne Prælatos Ecclesiæ è suggestu publicè corripiant, nisi fortè (quod DEUS avertat) docerent hæresim; quia tunc publicum scandalum communitati datum, publica refutatione tollendum est, nec pri-

vata correctio ad hoc sufficeret. 2. Nunquam ad particularia vitia aut personas ita descendere debent, ut possint ab aliis facile agnosci non sine periculo prostitutionis publicæ seu gravis infamiæ. 3. Præcipue cavere debent, ne in ordine ad talem correctionem utantur notitia ex sola Confessione Sacramentali hausta; Secus enim auditores, de facili possent scandalizari, persuadentes se propter Confessionem secretò factam publicè fuisse infamatos aut certè reprehensos, sicque ab hoc salutifero Sacramento absterrentur, prout bene observat Stephanus à S. Paulo *ubi supra* n. 30.

321. Colliges igitò, te non obligari ad correctionem fraternam, quando delictum proximi non est certum, sed dubium duntaxat. Ratio est: quia fraternæ correctionis obligatio supponit in eo, qui vult aut debet corrigere, moraliter certam notitiam de delicto commissio juxta illud Christi Domini *Matth. 18. si peccaverit in te, id est, te sciente, vel coram te, uti communiter exponunt SS. Patres teste Azorio tom. 2. part. 2. lib. 12. c. 14. q. 1.* ergo si non sis certus de delicto à proximo tuo commissio, neutiquam teneris illum corrigere, quin potius contrarium faciendo temet exponeres periculo vel injuriandi proximum innocentem, aut in te concitandi odium, vel indignationem.


At

At quid, inquires, si certus quidem sum de delicto commissio, incertus tamen, immo dubius omnino, sitne mea admonitio aliquid profutura, fructificatura, nec ne? teneor ne in his circumstantiis correctionem charitativam adhibere?

R. Non teneris. Ratio est: quia ad 322. instituendam correctionem prudentem supponi debet saltem probabilis spes emendationis, quæ sola est finis hujus præcepti secundum hætenus dicta: at, ubi ex circumstantiis personæ, loci, aut temporis &c. rationabiliter dubitare licet, sitne correctio fraterna profutura, nec ne, ibi nequit supponi probabilis, sed potius multum dubia spes alicujus fructus: ergo &c. Ita ex communi DD. Babenstuber tr. 5. disp. 1. art. 5. n. 43.

Excipiunt tamen ab hac regula casum, 323. quo talis peccator in mortis articulo constitutus de æterna sua salute extreme periclitatur; tali etenim adhibenda est correctio fraterna & charitativa, tametsi de hujus fructu aut felici eventu rationabiliter dubitetur. Ratio est: quia in hoc casu malum proximo imminens ex intermissa correctione fraterna est prorsus irreparabile: malo autem irreparabili etiam dubia spes alicujus fructus juxta rectæ rationis dictamen præferendum est: ergo tentanda correctio fraterna in hoc casu. Ita tenent

Suarez, Bonacina, aliique, quos sequitur  
Castropalao tom. 1. tr. 6. disp. 3. pu. 5. n. 6.



# CONFERENTIA UNDECIMA

De odio, aliisque vitiis cha-  
ritati oppositis.

## SUMMARIUM.

- 324. Recensentur breviter octo vitia charitati  
opposita.
- 325. Odium (seu vitium directè oppositum cha-  
ritati) bene describitur, quòd sit averfio vo-  
luntatis ab eo, quod velut malum apprehen-  
ditur.
- 326. Aliud dicitur odium inimicitiae, aliud ab-  
ominationis.
- 327. Odium inimicitiae tam respectu DEI, quàm  
proximi est intrinsecè malum, & ex suo genere  
mortale peccatum.
- 328. Esto ob defectum sufficientis deliberationis  
subinde à mortali excusari valeat.
- 329. Odium abominationis respectu DEI simili-  
ter est intrinsecè malum : at verò respectu pro-  
ximi indifferens, ita, ut etiam subinde possit  
evadere bonum & laudabile.

330. An



330. An vel quando peccet, qui sibimet mortem exoptat ?
331. Proximo sine justa causa maledicere, seu malum optare, & quidem feriò, per se loquendo grande nefas est ;
332. Non item, si fiat justa ex causa.
333. Neutiquam licet proximo efficaciter, seu etiam voluntate antecedente mortem optare præcisè propter bonum seu emolumentum temporale nobis inde obventurum.
334. Secus dicendum, si hoc fieret propter majus bonum proximi spirituale præsertim v. g. ut salvetur &c.
335. Gaudere tamen ob emolumentum temporale quodcumque tibi è morte proximi obveniens, nequaquam illicitum est.
336. *Discordia* consistit in dissensione voluntatum circa bonum, quod ex charitate velle debemus ;
337. Estque ex suo genere peccatum mortale.
338. Nomine *Seditionis* intelligitur dissensio civium &c.
339. *Contentio* est altercatio verborum ad impugnandam veritatem &c.
340. Estque ex suo genere peccatum mortale.
341. Resolvitur Casus I. cujusdam uxoratæ, quæ, dum advertit, Maritum suum gravissimè affligi doloribus calculi & podagræ, eidem sincerissimè exoptavit majorem intensiorem dolorum.
342. An etiam justè eidem exoptaverit mortem ipsam ?
343. Resolvitur Casus II. cujusdam ancillæ, asserentis, se summopere aversari, immò odisse famulum quendam sibi domesticum ;
344. Proptereaquæ eidem sæpè sæpiùs gravissima mala exoptasse.

345. An hæc teneatur in Confessione specificè exprimere illa mala maligno affectu exoptata ?
346. Resolvitur Casus III. de quodam Professore, assueto impugnare sententias sui Collegæ, esto illas agnoverit verissimas.
347. An propterea censendus sit peccasse peccato contentionis ?
348. In continuo odio vel inimicitia viventes malè vivunt, & quid circa tales à Confessario observandum ?
349. Parentes, qui ob minimos quosque defectus prolibus suis nescio quæ mala imprecari solent, modestè redarguendi seu etiam dehortandi sunt.
350. De strage Turcarum, aliorumvè Ecclesiæ hostium gaudere, an vel qua ratione licitum sit ?
351. An vel qualiter fas sit optare stragem Principis Catholici ?
352. Quænam sit differentia inter odium, & invidiam.
353. Quomodo examinandus sit pœnitens sese accusans, quòd odio habuerit proximum suum ?

## §. I.

Præmittuntur & breviter resolvuntur quæsitæ scitu necessaria ad debitè resolvendos Casus præcticos tangentes vitia charitati opposita.

**Q**Uæres primò, quæ, & quot vitia opponuntur charitati ?

**R.** Vitia

8. Vitia charitati directè, vel etiam in-324.  
directè & consecutivè opposita commu-  
niter enumerantur sequentia octo, 1. odium.  
2. invidia. 3. acedia. 4. discordia. 5. sedi-  
tio. 6. contentio. 7. schisma. 8. scanda-  
lum. Quia verò de invidia & acedia ceu  
peccatis capitalibus jam egimus in tractat.  
prælim. Confer. 22. & 23. De schismate  
verò suprâ Confer. 3. n. 87. hinc in præ-  
senti Conferentia nobis restat agendum de  
odio & reliquis vitiis charitati oppositis.  
De scandalo autem ceu materia Confessa-  
rio summopere scitu necessaria in proxima  
conferentia agemus. Neque me latet ab  
aliis communiter quasi hîc loco etiam tra-  
ctari de bello nec non de duello, velut  
vitiis charitati oppositis; verum cum hæc  
mereantur fufius examen, consultò hanc  
materiam duxi differendam ad alium tracta-  
tum, ubi (DEO volente) agemus de 5to  
præcepto decalogi.

Quæres 2dò, quid, & quotuplex sit  
odium?

8. Ad primam partem hujus quæfiti.325.  
Odium ut sic rectè dicitur alienatio, seu  
quædam averfio voluntatis ab eo, quod ve-  
lut malum apprehenditur. Ita cum com-  
muni Herincx noster part. 3. tr. 1. diff. 13.  
n. 1. Ratio hujus descriptionis facile li-  
quet; odium quippe immediatè ac directè  
opponitur amorì: ergo quemadmodum

B b 5

amor

amor consistit in quadam conversione seu etiam prosecutione voluntatis erga id, quod bonum apprehenditur; ita à contrario odium bene describitur per aversionem voluntatis &c. Et sicut Deus æquè ac proximus noster dupliciter potest amari, scilicet vel amore amicitiae, vel amore concupiscentiae; ita pariter uterque dupliciter odio haberi potest. Hinc

326. R. jam ad 2dum membrum hujus quaesiti. Odium ist sic rectè dividitur in odium inimicitiae, & in odium abominationis. Ita rursus *ex communi DD. Laymann. l. 2. tr. 3. c. n. 1. Sporer tr. 2. in decalog. c. 6. sect. 1. n. 1. Herincx loc. cit.* Explico brevissimè. Odium inimicitiae (ab aliis appellatur odium Personae) est, quò quis personae sibi displicenti malum vult ac desiderat, & quidem sub ea ratione, qua eidem malum est: & hoc odium directè opponitur amorì amicitiae seu benevolentiae. Odium verò abominationis (quod ab aliis dicitur odium qualitatis) est, quorem, vel personam aliquam aversamur non secundum se ipsam, sed secundum aliquam qualitatem, quam in ea invenimus nobis contrariam, v. g. vinum quà acidum, medicinam quà amaram, hominem litigiosum quà talem &c. &c.

Quæres 3tiò. Quale peccatum sit odium inimicitiae, & quale sit odium abominationis?

R. I.

R. I. Odium inimicitiae nedum erga 327.  
Deum, verum etiam erga proximum per  
se & intrinsecè malum est, atque ex suo ge-  
nere mortale peccatum. Ita Laymann *loc.*  
*cit. n. 2.* Ratio est: quia odium inimicitiae  
secundum dicta immediatè & directè op-  
ponitur maximæ virtuti, charitatis scilicet,  
de qua præcipuum mandatum habemus.  
Hac ratione jam superius *Confer. n. 227.*  
diximus, odium inimicitiae erga Deum, ut-  
pote oppositum immediatè summo bono,  
esse gravissimum peccatum.

Dixi tamen, odium inimicitiae *ex suo ge-* 328.  
*nere esse peccatum mortale*, volens per hoc  
innuere, quòd odium inimicitiae, non qui-  
dem erga Deum ceu summo amore di-  
gnum, sed quatenus tendit in proximum,  
possit subinde excusari à peccato mortali.  
Ratio disparitatis inter utrumque hæc est:  
quia quisquis Deum odio habet, optando  
eidem quodcunque demum malum, vult  
(quantum de se) Deum non esse sum-  
mum bonum, & hòc ipso Deum non  
esse Deum; quod utique nunquam desi-  
derari potest sine maxima deordinatione  
contra rectum rationis imperium: at verò  
si ex displicentia seu odio etiam personæ  
erga proximum leve tantum malum eidem  
velis, ob parvitatem materiæ tale odium  
non erit, nisi venialiter peccaminosum.  
Ita Turrianus 2. 2. d. 91. dub. 1.  
quem

quem refert & sequitur Laymann *loc. cit.*  
*n. 4.*

329. R. Jam 2dò. Odium abominationis erga Deum per se & intrinsecè malum, atque ex suo genere peccatum mortale est: at verò odium abominationis erga proximum interdum culpa vacat, interdum laude omnino dignum est. Ita rursus *ex communi Sententia Laymann cit. n. 5.* Sporer *ubi supra n. 2.* Herincx *diff. 13. n. 4.* Ratio prioris colligi potest ex illo *Matth. 19.* ubi dicitur: *quid me interrogas de bono? unus est bonus Deus*, quò innuitur, solum Deum esse essentialiter bonum, ita, ut in eam nulla prorsus malitia, nullus defectus sive in sive extrinsecus, utputa ob productionem vel gubernium creaturarum, defectus cadere possit, juxta illud *Genes. 1. c. v. 31. viditque DEUS cuncta, quæ fecerat, & erant valde bona*: erga quisquis Deum abominatur, quacunque demum sub ratione, enormiter excedit contra legem naturalem ac divinam. Ratio autem posterioris est: quia odium abominationis erga proximum, est odium qualitatis: atqui certum omnino & exploratum est, quòd non omnes qualitates in proximo reperiuntur sint amore dignæ, sed potius abominabiles, prout revera sunt omnia vitia, utputa luxuria, injustitia &c. ergo odium talium qualitatum nedum honestum, sed & laude

laude omnino dignum est : quemadmodum ergo odium proximi quoad qualitatem simpliciter bonam, malum est, quoad qualitatem verò indifferentem indifferens; ita prorsus odium proximi quoad qualitatem malam & peccaminosam seu etiam vitiosam, omnino honestum est, atque laude dignum: hac de causa Regius Psalter *Psalms. 118.* ait, *iniquos odio habui, & legem tuam dilexi.* Et rursus *Psalms. 138.* *Nonne qui oderunt te Domine oderam, & super inimicos tuos tabescebam? perfectò odio oderam illos.*

Quæres 4tò, an, vel quomodo peccet, qui sibi met mortem optat, seu etiam imprecat?

R. cum distinctione. Nam sibi mortem optare vel ad evitanda revera gravissima mala, quæ interdum videntur morte ipsa acerbiora, uti est v. g. diutina gravis infirmitas, condemnatio ad triremes vel carcerem perpetuum &c. vel ad perfectius amandum Deum, eundemque nunquam amplius offendendum &c. omni culpa vacat. At verò optare sibi mortem vel ex desperatione vel ex impatientia, vel etiam ob evadenda quæcunque levia mala, satis vituperabile est, & culpabile. Ratio hujus posterioris est: quia graviter repugnat charitati sibi debitæ sicut & rectæ rationi, velle sibi gravissimum malum ob evadendum aliud malum leve: 330.

leve: & certè Diana *part. 5. tr. 14. Resolut. 92.* apud Busenbaum *lib. 2. de charit. dub. 2. Resolut. II.* peccati mortalis condemnat mulierculas, ob leviuscula quævis mala mortem sibi imprecantes. Ratio autem prioris sumitur à contrario: quia scilicet talis non supponitur sibi optare mortem quàm sibi malam, sed potius quàm illam apprehendit velut finem majorum malorum, juxta illud *Eccli. 30. melior est mors, quàm vita amara:* atqui hoc nullatenus repugnat ordinatæ charitati neque rectæ rationi. Unde & Doctor gentium *ad Philipp. 1. c.* ait: *cupio dissolvi, & esse cum Christo.* Et rursus *ad Rom. 7. v. 24.* deplorans vitæ hujus misérias: *infelix ego homo (inquit) quis me liberabit de corpore mortis hujus?*

Quæres 5tò, sitnè graviter illicitum proximo maledicere, seu optare malum?

331. R. Proximo seriò maledicere sine justa causa, optando scilicet, ut eidem eveniat hujusmodi malum, est ex suo genere peccatum mortale. Ratio est: quia tale desiderium repugnat charitati ex suo genere graviter obliganti; pertinet enim ad odium proximi. Quin immò si talis maledictio proximo fiat in faciem, nedum charitati, sed & justitiæ graviter repugnabit, quandoquidem per talem contumeliam, honor proximi lædatur, ideòque contrahitur duplex malitia specie distincta, & in Consolatione



sione necessariò exprimenda prout rectè advertit Laymann *cit. c. 8. n. 8.* Fatendum nihilominus est, hujusmodi maledictiones sæpessæpius excusandas esse à peccato mortali, idque vel ob materiæ levitatem, vel ob impetum passionis prædominantem rectæ rationi ita, ut non fiant animo deliberatò, sed potius ad ostendendam displicentiam vel indignationem conceptam erga delinquentem &c. quam ob causam Doctores satis communiter excusare solent parentes & dominos, dum suis prolibus aut subditis ex passionis impetu solent nescio quæ mala imprecari: solent itidem excusare rusticos, aurigas, pastores &c. dum suis pecoribus aliisvè creaturis irrationalibus maledicunt; tales quippe interrogati, an seriò maledixerint, optando scilicet, ut hæc mala eveniant, regulariter loquendo illicò respondere solent: nequaquam mi Domine, quin immo si evenissent, vel maximè fuisset invitus &c.

Dixi etiam, esse mortale peccaminosum 332. proximo *maledicere sine justa causa*; nam ubi justa causa intervenit, nequaquam illicitum est maledicere ex odio abominationis optando scilicet, ut proximo eveniat tale malum, idque vel propter majus bonum ipsius, quatenus scilicet à Deo punitus tandem errorem suum agnoscat, ac seriò resipiscat, vel & per hujusmodi punitionem in-

injusta vexa, aliudve malum majus ab universali Ecclesia, vel ab integra aliqua communitate amoveatur. Hanc ob causam Patrens filium, Superior subditum delinquentem, Judex reum juxta qualitatem seu etiam gravitatem delicti justissime castigant, infligendo iisdem etiam graviores poenas, vel ut resipiscant, vel ut alii absterreantur &c. hoc enim totum fit, aut certe fieri potest absque odio aut displicentia personae, sed potius amore illius, vel certe amore justitiae, & boni publici conservandi seu etiam procurandi; quod utique omni culpa vacat: quin immo universaliter licite abominamur homines malos quia tales in ordine ad destruendam eorundem malitiam, eisdemque commeritis exoptamus poenas, exemplum Regii Psaltis *psalm. 54.* dicentis: *veniat mors super illos, & descendant in infernum viventes, quoniam nequitiae in habitaculis eorum &c.* Fatendum tamen est haec & similia à nobis viatoribus de facili non esse attentanda, eo quod semper timendum, ne sub colore justitiae & justii odii abominationis lateat, vel clanculo subrepat verum odium inimicitiae aut affectus vindictae, praesertim si fiat respectu inimici, aut hominis aliunde infensi. Videantur de hoc si placet, Castropalao *part. 1. tr. 6. disp. 4. pu. 1. n. 9- & seqq.* Laymann *loc. cit. n. 7.* Sporer *tr. 2. c. 6. sect. 1. §. 4. n. 5. pertot.*

At,

At, inquires, licetne etiam proximo innocenti optare malum v. g. mortem temporalem &c. non quidem quatenus ipsi malum est, sed quatenus nobis cedit in bonum v. g. filio in ordine ad adipiscendam hæreditatem, vel aliam promotionem &c.

R. Optare proximo mortem ob aliquod 333. emolumentum temporale nobis, alterive inde obventurum, & ita optare, ut voluntate antecedente divinam desiderando dicas v. g. oquam vellem, ut Deus hunc v. g. Parentem, consanguineum &c. è vivis tolleret, quatenus hac via possem adire hæreditatem, vel adipisci jus primogenituræ &c. hoc vel illud officium aut servitium &c. non vacat gravi culpa. Ratio est: quia graviter repugnat rectæ rationi & ordinatæ charitati, bonum longè inferioris ordinis præferre bono ordinis superioris: atqui hoc facit, quisquis ob bona temporalia sibi obventura exoptat proximo suo mortem &c. Hac de causa Innocentius XI. an. 1679. justissime damnavit sequentes propositiones, quarum Ima, num. 13. ita sonat: *si cum debita moderatione facias, potes absque peccato mortali de vita alicujus tristari, & de illius morte naturali gaudere, illam inefficaci affectu petere & desiderare, non quidem ex displicentia persona, sed ob aliquod temporale emolumentum*; altera, quæ est num. 14. li-  
R. P. Elbel. Pars II. de Fide &c. Cc ci

*citum est absolutò desiderio cupere mortem Patris, non quidem ut malum Patris, sed ut bonum cupientis; quia nimirum ei obventura est pinguis hæreditas.* 3tia, num. 15ta inter damnatas ita sonat: *licitum est filio gaudere de parricidio Parentis à se in ebrietate perpetrato, propter ingentes divitias inde ex hæreditate consecutas.* Quæ propositiones si intelligantur, ut jacent, ad minus scandalosæ sunt, ac piarum aurium offensivæ, prout nemo prudentum non apprehendet, & amplius ostendunt Cardenas, Viva, & alii plures scribentes de hac materia.

334. His tamen non obstantibus haud illicitum cenleri debet gaudere, seu etiam inefficaci tantum affectu desiderare mortem proximi eo fine, ut majus bonum spirituale, salus scilicet æterna eidem obtingat, vel ne Ecclesia à tyranno diutius injustè vexetur, gravetur vel opprimatur &c. bonum quippe majus non sine ratione, & hoc ipso sine læsione charitatis præfertur bono minori: at, ubi mors temporalis optatur propter bonum spirituale vitæ æternæ, vel propter ingens emolumentum totius communitatis, præfertur bonum majus bono minori, velut de se liquet: ergo &c.

335. Denique etiam gaudere de emolumento temporali, quod tibi obvenit ob mortem proximi, ita scilicet, ut non tam de morte, quàm de ipso emolumento, quod suppo-  
sita

sita jam morte tibi obvenit, gaudeas, omni culpa vacat.

Ratio est : quia hoc gaudium specificatur à suo objecto : at, objectum hujus gaudii est duntaxat tuum emolumentum, quod supposita jam morte proximi tibi obtigit : hoc autem objectum non est inhonestum : nunquid enim tristari deberes de tali emolumento ? &c. ergo de hoc licitè gaudes. Et ita expressè tenet la Croix *lib. 2. n. 187.* Cardenas, Viva, Babenstuber & Sporer *tr. 2. in decalog. c. 6. sect. 1. n. 10.*

Quæres 5to, quid sit Discordia, & quale peccatum ?

¶ Discordia rectè describitur, quòd 336. fit dissensio voluntatum circa bonum, quod ex charitate velle debemus. Ita post S. Thomam 2. 2. q. 37. art. 1. Reiffenstuel *theolog. mor. tr. 4. dist. 7. n. 29.* Ratio hujus descriptionis liquet à contrario, quemadmodum enim concordia consistit in consensu voluntatum seu cordium &c. ita discordia rectè dicitur consistere in dissensu voluntatum ; additur autem *circa bonum, quod ex charitate velle debemus* ; agimus enim hic de discordia prout opponitur virtuti charitatis : at, si discordia non versetur circa bonum, sed potius circa malum, vel certè circa illud, quod est indifferens aut non obligatorium &c. talis discordia non opponitur charitati : quo fit, ut si proximo

te invitanti ad ingrediendam cum illo eandem Religionem, renuas aut recuses peti-  
tum: neutiquam incidas peccatum discor-  
diæ: vel si invitanti & allicienti te ad actum  
malum, dissentias & minimè acquiescas,  
non solum non peccas, sed potius laudem  
mereris ac præmium tam coram hominibus,  
quàm coram Deo.

337. R. jam ad alterum membrum hujus quæ-  
siti. Discordia est peccatum contra chari-  
tatem, & quidem ex genere suo mortale.  
Ratio est: quia discordia tollit ingens bo-  
num; scilicet pacem & concordiam cum  
proximo & quidem circa bonum, quod  
ex charitate velle debemus. Hac de causa  
Proverb. 6. dicitur Dominus detestari, *eum,*  
*qui seminat inter fratres discordias.* Hoc ta-  
men non obstante discordia evadit pecca-  
tum veniale, si vel bonum illud sit de se  
exigui momenti, vel si fiat quidem circa  
bonum magni momenti, at sine sufficienti  
deliberatione. — Laymann *cit. c. 11. n. 1.*  
Filliucius *tr. 28. c. 9. n. 194.*

Quæres 6tò, quid intelligatur nomine  
Seditionis?

338. R. Nomine Seditionis intelligitur talis  
dissensio civium, qua adversantur bono  
pacis politicæ. Et quia pax atque unitas  
civium profectò habetur pro magno bono  
Reipublicæ, liquet, quòd seditio sit ex  
suo genere peccatum mortale, saltem ex,  
par-

parte illorum, qui pacem publicam subvertere nituntur : secus dicendum de iis, qui resistunt pacis perturbatoribus : hi enim laudem potius merentur, quam vituperium ; unde nec propriè debent, neque possunt dici seditiosi.

Quæres denique 7timò, quid sit Contentio, & quale peccatum ?

R. ad primum membrum hujus quæsit. 339.

Contentio propriè dicta est impugnatio veritatis, seu altercatio verborum ad impugnandam veritatem, ut si quis cum altero verbis contendat ex intentione contradicendi iis, quæ de se clara, aut omnino fide Catholica credenda sunt. Quocirca Valentia, Babenstuber, & alii plures notant, tribus modis fieri posse hanc contentionem respectu veritatis, primò scilicet, ut contendens veritatem etiam agnitam impugnet. 2dò modo, ut contendens velit impugnare adversarium, sive falsum asserat, sive etiam verum. 3tiò denique modo, ut contendens revera impugnet veritatem, quam culpabiliter non agnoscit, vel potius non vult agnoscere, prout hæretici vincibili ignorantia laborantes nolunt agnoscere veritatem fidei Catholicæ. Jam, qui primò modo impugnat veritatem, eam formaliter, qui verò 2dò & 3tiò modò, eam virtualiter impugnare dicitur, uti ha-

bent Valentia & Babenstuber *tr.* 5. *disp.* 1.  
*art.* 6. n. 36.

340. R. jam ad 2dam partem ejusdem quæsit.  
Contentio mox descripta est ex suo genere  
peccatum mortale. Ita ex Communi DD.  
Reiffenstuel *ubi supra* n. 31. Filliucius *loc.*  
*cit.* n. 198. Ratio est: quia opponitur bo-  
no charitatis ac pacis, & quidem in mate-  
ria gravi. Unde & Apostolus *ad Galat.*  
5. inter opera carnis à Regno Dei excluden-  
tia enumerat *contentiones*, & rursus *ad Rom.*  
1. inter eos, quos Deus in reprobum sen-  
sum tradidit, recenset eos, qui sunt *pleni*  
*invidia, homicidio, & contentione*. Hoc ta-  
men intelligendum est de contentione veri-  
tatis seriò facta; nam si fiat præcisè exer-  
citi Scholastici causa, vel ad eruendam &  
amplius dilucidandam veritatem, vel ad  
explorandam alterius doctrinam, acuen-  
damvè diligentiam &c. dummodo cum de-  
bita modestia fiat, omni culpa vacat: quod-  
si seriò quidem, ac sine sufficiente delibe-  
ratione contingat, vel si impugnetur veritas  
exigui momenti, non excedet culpam pec-  
cati venialis, uti rectè docet Filliucius *loc.*  
*cit.*





J. II.

Proponuntur & breviter re-  
solvuntur Casus practici de Odio  
& maledicentia erga proximum.

CASUS PRIMUS.

**T**itia juvenis & jovialis puella nupsit cui-  
dam Seniculo non tam amore persona,  
quàm divitiarum allecta : quia verò idem Se-  
niculus continuis quasi doloribus calculi ac po-  
dagra affligitur ; hinc impatientia motibus  
propè tabescens ferre non valet hilarem uxoris  
animum ; nec minùs ejusdem Seniculi animus  
premitur Zelotypia stimulis, quàm podagra,  
quam ob rem pati non vult, ut Titia ulli al-  
teri viro familiariter colloquatur, quin & hu-  
jusmodi alloquia nedum durioribus verbis, sed  
subinde etiam verberibus eidem compensat.  
Titia verò, quò innocentior & ab omni in-  
honesto consortio magis remota, tantò am-  
plius affligitur Mariti sui duritie, & quia  
timore perdendi amplam hereditatem eidem  
obloqui non audet exterius ; hinc interiùs sal-  
tem sapesapiùs eidem exoptat dolores calculi  
ac podagra, diuque subin eundem hujusmo-  
di doloribus oppressum mirum in modum eju-  
lare audit, ipsa interiùs summopere gavisà  
illud S. Francisci Xaverii effatum ( licet in  
sensu à mente hujus sancti longè alieno inge-

*minare solet : ampliùs Domine , ampliùs. Quin & mortem ipsam Marito suo nedum sapissimè exoptat , sed insuper hujus impetranda vel acceleranda causâ Deum ac Cœlites omnes interpellat. Jam dubitari licet , an vel qualiter Titia peccaverit suo Marito exoptando animitùs dolores Calculi ? & 2. quomodo exoptando Eidem mortem ipsam ?*

341. *R. ad primum quæsitum hujus casus Titiam exoptando , suo marito vehementiores calculi dolores &c. probabilius peccasse mortaliter. Ratio est : tum quia afflictum voluit ampliùs affligi , & quidem doloribus intensissimis , quales sunt illi ex calculo & podagra orti ; tum etiam quia ex majori dolorum intensione non potuit è suo marito sperare mitiorem sui tractationem , & consequenter non potuit desiderare hujusmodi intensiorem dolorum per modum medii in ordine ad evadendam hanc satis duram & intolerabilem mariti sui conversationem : ergo convincitur hanc majorem intensiorem postulasse solùm per modum vindictæ , ob malam scilicet tractationem hætenus expertam : at , qui per modum vindictæ proximo suo imprecatur grande malum , graviter delinquit secundum dicta n. 331. ergo &c. &c.*

*R. jam ad 2dam partem hujus quæsitum , à Confessario explorandam esse mentem Titia , & interrogandam , an Deum Sanctos-  
que*

que interpellârit ad impetrandam, vel etiam accelerandam mortem sui mariti vel per modum vindictæ ob malam tractationem &c. vel præcisè eo fine, ut ab hac tyrannide tandem aliquando liberaretur? Si primum concludendum erit, eam mortaliter peccâsse nedum peccato odii contra charitatem proximo debitam, sed etiam peccato Sacrilegii, contra virtutem Religionis, in quantum non sine permagna irreverentia ausa fuit implorare Deum & Sanctorum patrociniū ad impetrandam gravem vindictam & castigationem sui mariti. Si vero supponatur ædum, dicendum foret, quod non peccaverit graviter. Ratio est: quia secundum communem D. D. paulò *suprà* n. 334. insinuatam in ordine ad evadendam hanc durissimam tractationem licite potuisset sibi mortem optare, & in hunc finem invocare Deum ac Cœlites: quidni ergo possit ex eodem fine sine peccato proximo suo optare mortem, Sanctorumque suffragia implorare?

## CASUS SECUNDUS.

*S*Empronia fatetur, se summopere aversari quendam famulum in eadem secum domo ac servitio constitutum; tum quia ab eodem nuper sine sufficienti causa fuit apud herum

Cc 5

suum

uum accusata; tum potissimum, quia homo est valde lubricus, qui vix non singulis discursibus suis solet immiscere quadam impudica, foeminasque atque puellas hinc inde sibi occurrentes tangere in partibus inhonestis saltem super vestes: his de causis Sempronia illius consortium, ubiubi demum potest, pro viribus declinare solet, eidemque jam sapius nescio quæ mala utpote malam pestem, morbum gallicum, membrorum contracturam, & patibulum ipsum fuit sincero ex animo imprecata. Jam ad nostrum propositum dubitare licet 1. An Sempronia peccet fugiendo & pro viribus declinando consortium dicti famuli, præsertim si alii quoque domestici id advertant? 2. an peccaverit eidem mox enumerata mala imprecando?

343. R. ad primum. Sempronia nec averfando famulum, neque etiam ipsius consortium pro viribus declinando peccat, quin potius laudabiliter agit: pudicitia namque nullibi minus, quam inter impudicos secura est, juxta illud *Psalm. 17. cum viro innocente innocens eris, & cum perverso perverteris.* Talis proin aversio, talis fuga à Sceleratis quæ talibus omnino laudabilis est, ac meritoria. Nec refert, quòd alii domestici hujusmodi aversionem fortassis apprehendant; nam pariter possunt apprehendere, aut certè de facili instrui, hujusmodi aversionem non fieri in odium personæ, sed potius in odium qualitatis vitiosæ, quam jure

iure meritò quisque abominatur. Unde S. Thomas 2. 2. q. 34. art. 3. in corp. ait: *amor autem debetur proximo secundum id, quod à Deo habet, id est, secundum naturam & gratiam: non autem debetur eidem amor secundum, id, quod habet à se ipso & diabolo, id est, secundum peccatum & iustitiæ defectum. Et ideo licet habere odio peccatum in fratre, & omne illud, quod pertinet ad defectum divina iustitiæ.*

R. jam ad 2dum cum distinctione. Vel 344.  
enim huiusmodi mala ei fuit imprecata per modum vindictæ, id est, propterea, quòd ab eo fuerit delata seu accusata apud herum, & ob hanc causam eundem puniri desiderat; vel præcisè eo fine, ut hisce pœnis excitatus & correptus à Deo, tandem resipiscat, se emendet, ac salvus fiat? Si hoc posterius: dicendum, quòd non peccaverit ob rationem suprà n. 332. datam. Si autem illud prius: concludendum erit, quòd graviter deliquerit, & quidem toties, quoties moraliter interruptis vicibus eidem famulo tam grandia mala exoptavit: quandoquidem id graviter repugnet charitati proximo debitæ juxta dicta superius n. 331. Et quia in huiusmodi contingentis quasi semper subesset periculum, ne irrepat quidam inordinatus affectus sinistra affectionis vel potius passionis, hinc noverit Confessarius, muneris sui esse, ut pro viribus talem

lem pœnitentem dehortetur, seriôque moneat, ut si quidem proximi salutem sincero ex animo desiderat, studeat potius hanc gratiam precibus ad Deum fufis, sanctæq; Conversationis exemplô eidem impetrare.

At, inquires, teneturne pœnitens specificè ac distinctè in confessione exprimere differentiam malorum, quæ proximo suo fuit imprecatus?

345. R. Quoad hoc Doctores in diversas abire sententias, nonnullis affirmativam, aliis autem negativam tenentibus. Mihi probabilius videtur, quòd pœnitens teneatur explicare diversitatem malorum circa bonum animæ, corporis vel fortunæ efficaciter exoptatorum; revera enim juxta communem Doctorem non satisfaceret pœnitens præcisè dicendo: *damnificavi proximum*, sed tenetur exprimere, utrum illum damnificaverit in bono animæ, vel corporis, vel fortunæ: ergo probabilius tenetur etiam exprimere, utrum desiderio efficaci intenderit ipsi damnum in bono animæ vel verò in bono famæ aut fortunæ; nam actus efficaces secundum dicta in *tract. pralim. Conferent. 3. 61.* sumunt suam specificationem ab objecto, in quod tendunt: atqui certum est, quòd bona animæ, vitæ, ac fortunæ specie morali differant: ergo & desideria efficacia lædendi hujusmodi bona.

Nec

Nec refert, quod eidem virtuti charitatis opponantur; quia etiam damnificatio in bono animæ, vitæ & fortunæ opponuntur eidem virtuti justitiæ, quò non obstante certum atque exploratum est, quod injuriæ contra hoc triplex genus bonorum illatæ specie infima moraliter differant. Liquet proin ex his (ni fallor) Confessarium omnino prudenter facturum, si ex tali pœnitente (casu quo is se ipsum non exprimit) interroget, quæ, vel qualia mala proximo suo seriò & efficaciter exoptarit. Vide si placet Herincx *disp.* 13. n. 7. Suarez *disp.* 6. de charit. sect. 2. n. 2. vel Castropalao *tom.* 1. tr. 6. *disp.* 4. punct. 1. num. 7.

### CASUS TERTIUS.

**C**Ajus certæ cujusdam facultatis Professor ad discordias & contentiones natus quodammodo videtur, enimverò Sententias sui Collegæ, esto illas judicet verissimas, auctoritati, rationique maximopere consentaneas, nihilominus acerrimè impugnare solet, idque non exercitii, aut veritatis dilucidandæ causâ, sed ut coram populo videatur major, ac in profunditate, soliditatèque doctrinæ suæ eminentior illo; quod & hætenus, præsertim coram minùs intelligentibus affecutus fuit, tum ob valde exquisitum argumentandi modum, tum præsertim ob linguæ, vocisque claritatem,  
qua

qua alteri suo Collegæ haud modicum pravalet. Quaritur jam 1. utrum Cajus peccet peccato discordiæ, & 2 an vel quomodo peccet peccato contentionis?

346. R. Ad primum membrum hujus quæsitæ, Cajum absque dubio incurrere peccatum discordiæ; quia ut refertur in specie facti, non consentit suo Collegæ in bono veritatis, sed potius ex mera protervia vel superbia veritatem agnitam impugnare solet eo fine, ut videatur major &c. Existimo tamen hujusmodi discordias (nisi aliunde in modo impugnandi, vel potius vituperandi aut vilipendendi adversarium cum notabili læsione honoris aut modestiæ excedatur) non esse graviter peccaminosas, nisi versarentur circa materiam fidei ac morum, ut proin ex tali discordia vel scandalum aliorum, vel perversio morum esset timenda; prout sapienter innuit noster P. Herincx *loc. cit. n. 26.*

347. R. Jam ad 2dum membrum quæsitæ hujus, minimè ambigendum, quin Cajus peccaverit peccato contentionis, nedum humilitati, sed & charitati oppositiæ; quandoquidem supponitur contendere eo fine, ut propriam auctoritatem extollat, alterius verò, scilicet Collegæ sui diminuât.

In ordine tamen ad dignoscendam gravitatem peccati rursus attendi debet materia contentionis, utrum scilicet contendere soleat



soleat circa veritatem merè Philosophicam, an verò circa veritatem Theologicam, id est, Fidem, aut bonos mores concernentem? Si priùs illud supponatur, dicendum, quòd non, nisi venialiter deliquerit; quia præcisè egit contra veracitatem, cujus violatio ex suo genere non est graviter peccaminosa. Si verò 2dum, per se loquendo peccavit mortaliter, eò præsertim, quòd talis contentio vix, aut ne vix quidem fieri possit sine scandalo vel detrimento animarum, saltem tunc, quando impugnans nec verbis, neque etiam factò ipso ostendit, se præcisè agere vel exercitii, vel veritatis amplius eruendæ, aut dilucidandæ causâ; quod in hoc casu non supponitur factum fuisse. Verùm cùm versemur in materia Sapientes tangente, sufficere arbitror Sapientibus hæc pauca, dixisse vel potius insinuâsse, ne ultrâ quàm oportet, aut in me est, sapere videar.

### §. III.

## Corollaria ex dictis inferenda.

**C**olliges ex hæctenus dictis primò, eos, 348.  
qui quasi in continuo odio erga proximum suum versantur, vivere in pessimo statu; id, quod vel maximè timendum 1.  
de

de conjugibus in continuis discordiis ac rixis viventibus. 2. item de famulis aut famulabus aliisque domesticis sese averfantibus, nec non de illis, qui ad duellum se provocârunt. Ratio de se liquet: quia quisquis odio prosequitur proximum suum, per se loquendo versatur in statu peccati mortalis, juxta illud 1. Joan. 2. *qui dicit se in luce esse, & fratrem suum odit, in tenebris est.* Noverit proin Confessarius, quàm cautè cum talibus procedendum sit, ne Sacramentum administret indignis. Videatur Kazenberger in *Supplem. I. P. Sargar Conferent. 61. n. 96.*

349. Colliges 2dò, à Confessario dehortandos, & suò modo reprehendendos esse illos parentes, qui iracundiæ & impatientiæ motibus nimium subiecti, ob minimos quosque defectus aut errores prolibus suis nescio quæ mala tum corporis, tum animæ etiam imprecari consueverunt, utputa dicendo: diabolus te rapiat &c. eas in malam crucem, maledicta bestia, titio infernalis &c. Enimverò similia verba serio animo prolata in filium aut filiam nedum charitati, sed & pietati graviter adversantur: & licet videntur posse excusari ex eo, quòd non tam animò deliberato, quàm passionis inordinatæ impetu proferantur; certum nihilominus esse debet, quòd hæc ipsa consuetudo maledicendi voluntariè re-  
tenta

tenta graviter sit peccaminosa, actusque inde profecti velut in causa ac radice voluntarii imputentur ad culpam gravem. Videatur Matthæucci *l. 2. c. 10. n. 14.*

Colliges 3<sup>tiò</sup>, licitum esse gaudere, im- 350.  
mò etiam optare stragem turcarum, hæreticorum, & aliorum fidei Catholicæ hostium, ne scilicet veram Religionem, Dei-que cultum & communem omnium felicitatem evertant. Ita cum communi DD. Viva ad *propof. 15. ab Innocent. XI. damnatam n. 21.* Matthæucci *cit. l. 2. c. 8. n. 25.* Ratio est: quia secundum rectam rationem & ordinatam charitatem bonum totius Reipublicæ meritò præfertur bono hostium veritatis & membrorum diaboli: ergo etiam licitè desideratur. Nec refert, quòd præter mortem temporalem insuper supponantur incurfuri mortem sempiternam; tum quia hanc non incurrent, nisi ex propria culpa; tum etiam quia diutius viventes in tali statu nedum salutem suam probabilissimè nunquam fuissent operati, sed potius damnationem sibimet augmentassent. Et quia aliunde constat, bonum Reipublicæ Christianæ præstantius esse bono vitæ alicujus Rei, hinc non abs re possumus gaudere justèque desiderare mortem talium hostium: quemadmodum ob conservationem totius boni publici Judex justissimè ad mortis supplicium condemnat  
*R. P. Elbel Pars II. de Fide &c. Dd Re-*

Reum, quem prævidet in sua impœnitentia obstinatè moriturum, veluti diximus *suprà Confer. 8. n. 258.*

At quid, inquires, de illo tenendum, qui audiens inter duos Principes Christianos v. g. Regem Galliæ & Imperatorem ortum esse bellum, semper solet gaudere, dum è novellis vel aliunde intelligit Gallos occubuisse, è contra tristari solet, ubi percipit, eos triumphâsse?

351. R. Breviter cum distinctione. Vel enim gaudet de Gallorum strage, in quantum hæc vergit in Nationis illius eversionem, vel certè in damnum Regis Christianissimi, vel solet præcisè gaudere de tali strage Gallorum, in quantum hæc conducit ad conservandam vel etiam restituendam tranquillitatem Patriæ, Pacémque in populo? Si prius; dicendum, quòd graviter peccet; quando quidem tale desiderium necessariò supponat animum malè affectionatum immò odio erga Christianissimum Principem imbutum; quod utique rectæ rationi æquè ac Christianæ charitati graviter adversatur. Si autem supponatur hoc posterius, dicendum, quòd non peccet. Ratio est: quia quilibet pacem ac tranquillitatem Patriæ suæ ac Reipublicæ Christianæ licitè exoptat. Hac de causa S. Mater Ecclesia publicas preces fundere solet ad DEum in ordine ad pacem conservandam, seu etiam.

etiam restaurandam inter Principes præsertim Catholicos. Neque etiam in hoc casu necessum est, ut per se ac primario intendatur malum Principis Christiani, sed per se solum intenditur bonum Reipublicæ, id est pax & communis tranquillitas, quæ, cum obtineri non possit sine malo seu etiam virium diminutione aut strage alterius partis; hinc per accidens duntaxat & secundario quasi intendi debet illud malum: hæc verò intentio non repugnat charitati Christianæ; Secus enim nullum bellum foret justum aut licitum. Timendum nihilominus est, ne in hujusmodi hominibus præsertim privatis sub specie pietatis ac Zeli justipro bono Patriæ sæpessæpius lateat vel irrepat malignus aliquis affectus; odiumvè proximi; unde à Confessario potius suadendum est hujusmodi pœnitentibus, ut si quidem sinceri & ex animo nil aliud in votis habeant, quàm pacem & tranquillitatem Reipublicæ, contentur eandem suis precibus & Sanctæ conversationis exemplo à DEO impetrare, ommissis oblocutionibus vel etiam inutilibus contentionibus, quæ plerùmque in simili casu intervenire assolent.

Colliges, 4to, odium inter & invidiam 352: eam versari differentiam; quòd odium consistat in quadam malevolentia erga proximum, vi cujus is, qui odium fovet, proximo suo malum vult, aut lætatur de malo


Dd 2

ipsum

ipsius in quantum eidem malum est: vel tristatur de ejus bono, in quantum ipsi bonum: è contra invidia consistit in quadam tristitia de bono proximi, non præcisè quatenus ipsius bonum est, sed quatenus vergit quodammodo in diminutionem honoris aut excellentiæ ipsius invidentis: itaque si doleas, quòd v. g. Titius habeat hoc vel illud officium, tot aut tantas divitias &c. in quantum ipsi bona &c. diceris odio habere illum; at verò si non ideò præcisè doleas, in quantum ipsi bona sunt, sed quia tu non es tot ac tantis dotatus, vel quia tibi cedunt quodammodo in diminutionem honoris, invidus es dicendus, veluti post Campion, advertit Matthæucci in *cautela Confessarii lib. 2. c. 8. n. 21.* Vide etiam dicta in *tract. pralimin. Confer. 22. n. 633.*


- Colliges denique sibi, quomodo tractandus seu etiam examinandus sit pœnitens, qui se accusat, quòd odio habuerit proximum; nam si se ipsum non satis exprimat, interrogari debet 1. an unum duntaxat, an verò plures odio habuerit, & à quanto tempore? 2. quoties eidem intra hoc tempus malè imprecatus fuerit, & quænam in bono animæ, corporis, aut fortunæ? &c. 3. An eidem non negaverit communia signa charitatis, & quoties? 4. An actu cum eodem sit reconciliatus, aut

aut certè habeat animum quamprimum se reconciliandi cum illo ; secus enim non esset bene dispositus , neque capax absolutionis Sacramentalis , ut de se liquet. Hæc tamen , uti jam monui , interroganda sunt solum tunc , quando pœnitens seipsum non satis explicat , veluti sæpius , quàm par est , experiuntur Confessarii in excipiendis Confessionibus rudiorum ; nam de aliis , qui sunt cultiores aut magis docti , faciliùs præsumere licet , quòd , si etiamnum de prælenti portarent odium erga proximum , non accederent Confessionale animo obtinendi absolutionem Sacramentalem-



Dd 3

CON-



# CONFERENTIA DUODECIMA

## De Scandalo.

### SUMMARIUM.

- 354. Nomine Scandali activi & propriè talis intelligitur dictum vel factum minus rectum &c.
- 355. Scandalum ut sic communiter dividi solet in activum & passivum.
- 356. Rursus Scandalum activum subdividi solet in directum, & indirectum: passivum verò in datum & acceptum; & hoc posterius in Pusillum & Phariseorum.
- 357. Scandalum activum, præsertim directum, est ex suo genere peccatum mortale.
- 358. Potest nihilominus fieri veniale vel ob in-deliberationem, vel ob parvitatem materiæ?
- 359. Ob Scandalum evitandum, seu etiam impediendum peccatum proximi, neutiquam licet exercere actionem de se malam v. g. mentiri &c.
- 360. An vel quando, quis causâ evitandi Scandali teneatur intermittere opus de præcepto, vel etiam de consilio?

361.



361. Cooperatio ad peccatum alterius duplici modo fieri potest, scilicet vel 1. præbendo materiam, vel etiam 2. concurrendo ad ipsam actionem malam.
362. Nunquam prorsus fas est cooperari eo fine, ut alter peccet.
363. Licet tamen ob rationabilem & gravem causam cooperari peccato alterius per actionem de se bonam aut indifferentem, merum remotè se habentem ad peccatum.
364. Quænam censeantur causæ rationabiles & justæ?
365. Licitum est ob gravem causam, petere opus ab alio, quod is sine peccato posset ac deberet præstare, esto non sit præstiturus sine peccato &c.
366. Similiter suppositis certis circumstantiis probabiliter licet suadere minus malum eo fine, ut evitetur majus.
367. & 368. Satisfit duabus instantiis in contrarium.
369. Resolvitur Casus I. Cujusdam uxorata, quæ se, suasque proles de rebus à Marito furtivè hinc inde ablatis sustentare solet.
370. Hæc, si aliunde habuisset media se sustentandi &c. procul dubio turâ conscientia non potuisset hoc præstare.
371. Eadem persona certò peccavit graviter denudando mammas, & corpus suum prostituendo, animò sibi suisque prolibus panem lucrandi &c. &c.
372. Resolvitur Casus II. de quodam libidinoso milite, assueto coram aliis passim proferre verba impudica.
373. An, vel qualiter hic teneatur exprimere numerum personarum scandalizatarum &c.?

374. An peccaverit peccato scandali, eò quòd fœminam ad concubitum sese offerentem jussit redire altera die?
375. Resolvitur Casus III. Cujusdam Civis, qui putans se domum locare honestæ Matronæ, paulò pòst inaudiit, se eam locâsse meretrici.
376. Quidnam huic à Confessario suadendum fuerit?
377. An idem Civis peccaverit petendo ab illa usum corporis eo præcisè fine, ut deprehenderet, sitnè reipsa meretrix nec ne?
378. Fœmina ad evitandum scandalum pusillorum potest turâ conscientia una alterave vice omittere Sacrum etiam præceptum, esto ad hoc probabiliùs non teneatur.
379. Opera verò consilii duntaxat ob avertendum scandalum nedum possunt, sed interdum debent intermitteri saltem ad tempus. Atque hinc
380. Fœmina data operâ accedens hoc templum, vel hoc sacrum; cui novit interesse lascivum juvenem, à quo turpiter concupiscetur &c. peccat, si absque suo incommodo posset accedere aliud templum vel sacrum.
381. Secus dicendum foret, si absque permagno incommodo id non posset.
382. Fœminæ lascivo ornatu aut vestitu utentes graviter peccant, & à Confessariis dehortandæ sunt.
383. Vendere res ita indifferentes, ut proximus iisdem vel bene vel malè uti possit, haud illicitum est, modò non vendantur scienter ad malum usum.
384. Et quid, si dubitetur, sitnè emptor abusus nec ne?
385. Qui turpia seu lasciva &c. componunt, scribunt, pingunt vel repræsentant &c. graviter delinquant.

386. Utrum ex metu mortis liceat adjuvare furem aut latronem in asportanda cista furtiva?
387. Fas est, peccatum proximi permittere, vel ad id etiam ansam positivam de se merum indifferentem præbere eo fine, ut deprehensus corrigatur seu emendetur;
388. Non item eo præcisè fine ut puniatur, aut multam solvere cogatur.
389. Ad quid teneatur ille, qui proximum suum scandalizavit?

## §. I.

Præmittuntur, & breviter resolvuntur Quæsitæ scitu necessaria ad debitè resolvendos Casus prædictos de Scandalo.

**Q**Uæres primò, quid intelligatur nomine Scandali?

R. Nomine Scandali ut sic intelligitur *peccatum occasionatum*: propriè tamen loquendo de Scandalo, hujus nomine intelligitur *dictum vel factum, vel etiam omissum minus rectum, præbens alteri occasionem ruinæ spiritualis*. Ita S. Thomas & alii DD. communissimè. Explico breviter singula. Dicitur 1. *dictum vel factum*; nedum enim loquendo, sed etiam agendo potest alteri præberi occasio peccandi: additur insuper 2. *omissum &c.* quia etiam omissione debiti officii, utputa horarum canonicarum,

Dd 5

admi-

administrationis Sacramentorum &c. potest proximus scandalizari. Dicitur 3tò *minus rectum*; enimverò tale dictum vel factum aut ex se malum esse potest, uti sunt v. g. blasphemia, detractio &c. aut saltem præfert speciem mali, ut si quis reipsa dispensatus in jejunio, die veneris comedat carnes coram aliis ignorantibus dispensationem. Unde etiam dicitur 4tò, *præbens alteri occasionem ruinæ Spiritualis*; quia scandalosus vel positivè intendit proximum inducere ad peccandum (quòd propriè esset scandalizare) vel saltem prævidet, alios ex suo dicto vel facto sumpturos malum exemplum acturosque id, quòd DEI offensivum est.

Quæres 2dò, quotuplex sit Scandalum?  
 355. R. Scandalum ut *sic communissimè* parti-  
 solet in activum & passivum. Nomine  
 activi intelligitur illud dictum vel factum  
 &c. quod alteri præbet occasionem ruinæ  
 Spiritualis.

Nomine autem Scandali passivi intelli-  
 gitur ipsa ruina Spiritualis proximi conse-  
 cuta ex dicto vel facto &c. Ex. gr. tu  
 loquendo coram juvene vel puella inno-  
 cente turpia, permoves eam ad delectatio-  
 nem carnalem, diceris activè scandalizans,  
 puella verò utpote à te pertracta in rui-  
 nam Spiritualem, dicitur passivè scandali-  
 zata.

Porro

Porro Scandalum activum subdividi so- 356.  
let in *directum* atque *indirectum* : passivum  
verò in *datum* & *acceptum*, & hoc Poste-  
rius in scandalum pusillorum & Phariseo-  
rum. Explico rursus brevissime singula  
membra. *Directum* appellatur illud, quod  
datur in ruinam Spiritualem proximi, sive  
dein hæc ruina Spiritualis intendatur prima-  
riò, prout intendunt dæmones tentando ho-  
mines v. g. ad carnalia, sive etiam intenda-  
tur 2dario, veluti intendere solent homines,  
dum v. g. voluptatis captandæ causâ indu-  
cunt mulieres ad concubitum &c.

*Indirectum Scandalum* appellatur, dum  
aliquid dicis vel facis, quod vel malum  
est, vel speciem mali præsefert, ideoque  
natum est ad præbendam alteri occasionem  
peccandi, ut si diè prohibita ab Ecclesia  
carnes comedas coram aliis fidelibus, qui  
ignorant te esse excusatum ab onere jeju-  
nii, ideoque tuo exemplò pariter mandu-  
cabant carnes non sine violatione præce-  
pti. *Scandalum datum* dicitur, quod ori-  
tur ex dicto aut facto re ipsa minus recto:  
*acceptum* verò quod accipitur ex dicto vel  
facto, vel de se indifferente, vel nullam  
speciem mali præseferente: quod si nihi-  
lominus ex tali aliquo facto homines vel  
ob ignorantiam vel ob fragilitatem scanda-  
lizentur, dicetur scandalum pusillorum, ut  
si homo lubricus ex ornatu mulieris etiam  
licito

licito labatur in prævum desiderium &c. Econtra verò si ob meram malitiam ex actione alterius de se etiam licita atque honesta accipias occasionem ruinæ Spiritualis, utputa de eodem malè loquendo, detrahendo &c. dicitur scandalum pharisaicum, id est pharisæis proprium, quippe qui ex actionibus Sanctissimis Christi Domini, puta ex curatione infirmorum, conversatione cum peccatoribus &c. sumpserunt occasionem calumniandi, & murmurandi &c.

Quæres 3tiò, quale, & quàm grave peccatum sit Scandalum illud activum & propriè tale?

357. R. Scandalum activum est ex suo genere peccatum mortale charitati repugnans, quoties quis tenetur abstinere ab illo dicto aut facto præbente occasionem ruinæ &c. idque probabilius verum est, tametsi ruina spiritualis proximi per se ac directè non intendatur, modò prævideatur subsequutura. Prima pars hujus responsi est communiter ab omnibus recepta, nam directè scandalizans intendit proximum damnificare in bono animæ utique de se summi momenti; quod procul dubio charitati proximo debitæ graviter repugnat. Secundam verò partem contra Paludanum, Vasquez, & nonnullos alios hodie tenet communior Doctorem, nominatim Laymann *lib. 2.*

*tr. 3.*

tr. 3. c. 13. num. 6. Tamburin. de Confess. lib. 2. c. 1. ff. 17. Sporer tr. 5. in decalog. c. 1. n. 16. Babenstuber tr. 5. disp. 1. art. 6. n. 11. Felix Potestas Exam. Confess. tom. 1. part. 2. c. 2. n. 328. Reiffenstuel Theolog. mor. tr. 4. dist. 7. n. 21. Et ratio hujus est: quia etiam in aliis materiis moralibus ad contrahendam malitiam specificam peccati sufficit voluntarium indirectum: ergo similiter sufficit ad contrahendam malitiam scandali. Et certe qui fornicatur in loco Sacro, esto directe non intendat irreverentiam loci Sacri, sed potius voluptatem &c nihilominus fit obnoxius peccati Sacrilegii ex eo, quod in tali loco non abstineat ab ejusmodi actu, cum tamen deberet & posset abstinere: ergo similiter is, qui prævidet ex sua actione, à quâ hic & nunc deberet abstinere, alios sumpturos occasionem ruinæ spiritualis, verè obnoxius efficitur peccato scandali.

Adde insuper, quod peccatum scandali perrarum foret inter homines, si semper requireretur directa intentio ruinæ spiritualis; cum hoc dæmonibus potius, quàm hominibus proprium sit, ut jam diximus: at verò Scriptura Sacra videtur clarè innuere, hoc peccatum scandali non esse rarum, sed frequens inter homines; unde etiam *Matth. 18. v. 7.* ait: *Va Mundo á scandalis. Necessum est enim ut veniant scandala: verumtamen va homini illi, per quem scandalum venit.*

Dixi

Dixi tamen , Scandalum *per se loquendo* esse peccatum mortale , ut per hoc innuerem , quòd possit subin fieri veniale sive ob inconsiderationem seu indeliberationem; sive etiam ob parvitatem materiæ, ut si quempiam inducas ad peccatum veniale duntaxat: quia hoc in genere damnerum spiritualium censetur solum quid leve seu ruina parva , idque etiam verum est, quando peccatum veniale directè intenditur & quidem per actum moraliter peccaminosum v. g. per mendacium seu etiam detractionem gravem: ut tenet Sanchez *lib. 1. in Decalog. c. 6. n. 10.* Id ipsum haud improbabiler tenet Michel in sua Theolog. Canon-morali *tom. 2. part. 1. q. 3. §. 7. n. 23.* Eum scilicet non peccare nisi venialiter, qui ex actione levi seu venialiter duntaxat mala v. g. levi joco &c. prævidet alium graviter lapsurum; v. g. in gravem iracundiam.

Adididi insuper: *quoties quis tenetur abstinere à tali dicto aut facto &c.* quemadmodum enim non datur semper obligatio abstinendi à tali actione , prout patebit ex dicendis , ita frequenter datur causa excusans à culpa Scandali. Unde jam

Quæres 4to , Utrum ob evitandum Scandalum teneamur intermittere opus, quod est de præcepto vel etiam de consilio tantum?

359. R. Primò ob evitandum Scandalum vel impediendum peccatum proximi nunquam licet



licet vel ponere actionem intrinsecè malam v. g. mentiri &c. Vel omittere aliquam actionem in iis circumstantiis, in quibus omissio est verè peccaminosa præsertim intrinsecè, uti est v. g. dissimulatio veræ fidei, casu quo urget præceptum de profitenda fide exteriori, in quo dissimulatio professionis habetur pro negatione, uti dictum fuit supra *confer. 2. n. 53. & seqq.* Ita communis & certa sententia Doctorum, hac ratione irrefragabili fulta: quia non sunt ullatenus facienda mala, ut eveniant bona c. 8. & 10. XXXII. q. 4. Unusquisque enim tenetur potius peccatum vitare in se ipso, quàm in altero; quia ut ait S. Thomas 4. dist. 38. q. 2. a. 2. ad 2, *Nullus autem debet Deum offendere parum, ne alius offendant multum; quia homo debet in infinitum plus diligere Deum, quàm proximum.*

¶ jam 2dò ad idem quæsitum. Nemo per 360. se loquendo tenetur omittere actionem seu opus præceptum, immò neque opus consilii, modo id fiat sine animo inducendi proximum in ruinam, & ex causa multum rationabili, ita scilicet, ut moraliter loquendo hujusmodi opera intermitteri non debeant. Ita rursus Communis DD. Vasquez, Suarez & alii, quos sequitur Castropalao de charit. tr. 4. disp. 6. pu. 16. n. 3. & 6. item Felix Potestas loc. cit. n. 338. & 326. Ratio est: quia suppositis hisce conditionibus

bus nemo nos obligare potest ad abstinendum ab ulla actione secundum se honesta aut permessa : & quisquis demum inde arripit ansam peccandi, suæ id potius vel pravitati vel etiam fragilitati adscribere debet, quàm actioni nobis præceptæ, vel certè aliunde haudquaquam prohibitæ. Loquimur autem hic de eo, quod est de jure; secus dicendum foret, si loquamur de eo quod consilii vel charitatis causâ sùdinde fieri expedit, prout paulò inferiùs dicitur. Insuper dictum fuit, quòd nemo teneatur intermittere opus præceptum aut consultum, modò id fiat *ex causa multùm rationabili &c.* quænam verò tales censendæ sint, dicemus proximè. n. 364.

Quæres s'tò, sitnè licitum cooperari peccato alterius?

361. Ante responsionem directam suppono, cooperationem ad peccatum alterius dupliciter fieri posse, scilicet vel 1. præbendo materiam ad peccandum v. g. potum excessivum, vel carnes die prohibita &c. vel etiam 2. concurrente cum eodem ad eandem actionem peccaminosam v. g. furti, homicidii &c. Quocirca (ni fallor) Cardenas *in crisi Theolog. ad propos. 51. ab Innocentio XI. damnatam dissert. 31. n. 2.* itemque R. P. Michel ubi *suprà* §. 7. n. 15. & Felix Potestas *loc. cit. n. 346.* sapienter advertunt, hujusmodi cooperationem subinde fieri

fieri posse per actionem de se prorsus indifferentem, & ita quidem, ut hæc vel remotè duntaxat & per accidens, vel etiam propinquè aut proximè omnino deserviat ad peccatum. Ex gr. gestare seu etiam applicare scalam ad domum, aperire januam domus, vocare puellam, lectum sternere, portare litteras internuncias vel munuscula &c. sunt actiones ex sua natura prorsus indifferentes, prout nemo prudentum non videt; at verò, si fiant ad finem malum, ut si famulus succollet hero, sternât lectum; vocet puellam &c. eò quòd idem Dominus velit cum ea habere rem &c. hujusmodi actiones evadunt malæ, & quidem (juxta opinionem Sanchezii, Lumbieri, Vivæ ad propof. 51. n. 4. & aliorum) intrinsecè; actus enim vel etiam medium de se indifferens sumit bonitatem aut malitiam specificam à fine secundum dicta in tr. pralim. confer. 3. n. 66. atqui finis, ad quem assumuntur hujusmodi actiones, est intrinsecè malus, uti supponitur, scilicet stupratio Virginis aut fornicatio: ergo &c. Jam quæsitum hoc potissimum intelligi debet de actionibus ex sua natura indifferentibus, an scilicet; vel quomodo his mediantibus fas sit concurrere ad peccatum alterius: quo notatò & supposito.

R. Nunquam licet cooperari peccato 362. alterius, sive dein administrando materiam

R. P. Elbel, Pars II. de Fide &c. Ec v. g.

v. g. carnes ad frangendum jejunium, sive etiam cooperando seu concurrando ad actum peccaminosum eo fine, ut alter peccet. Ratio liquet ex mox dictis; quia scilicet talis cooperatio contrahit malitiam finis. Insuper nefas est scienter cooperari peccato alterius per actionem proximè influentem in ipsum peccatum, sive dein actio sit ex sua natura & intrinsecè mala, uti est v. g. occisio innocentis, sive sit mala ideò duntaxat, quia lege prohibita, uti est comestio carnis die ab Ecclesia interdicta &c. Qui enim proximè concurrat ad actum peccaminosum, convincitur directè velle peccatum, prout bene arguit la Croix *lib. 2. n. 252.*

363. R. Nihilominus 2dò. Licitum est cooperari materialiter tantum peccato alterius suppositis sequentibus conditionibus 1. si tuum opus aut cooperatio de se sit honesta aut saltem indifferens, & ad peccatum proximi merum remotè ac per accidens se habeat, ita scilicet, ut nec physicè, neque moraliter in illud influat. 2. si talem cooperationem præstes ex rationabili & ponderosa causa; minimè verò eò fine, ut alterum adjuves ad consummationem peccati. 3. si peccatum alterius non teneris specialiter impedire, vel certè non possis. Ita in re communis DD. prout videre licet apud Sanchez in *decalog. lib. 1. cap. 7. & lib. 3. c. 8.*

c. 8. Castropalao tr. 6. disp. 6. pu. 11. Tamburin. in decalog. lib. 5. c. 1. §. 4. n. 2. & 16. Sporer tr. 5. c. 1. sect. 3. n. 41. la Croix lib. 2. n. 250. & 255. Ratio hujus resolutionis est : quia stantibus præfatis conditionibus non cooperaris proximè aut positivè ad peccatum alterius , sed solùm permissivè seu negativè te habes respectu illius, eò præsertim, quòd illud impedire non tenearis vel certè non possis : atqui certum & exploratum est, quòd ex rationabili ac ponderosa causa fas sit p[er]mittere peccatum alterius: ergo &c.

Dixi : ex rationabili ac ponderosa causa 364. &c. Jam verò dubium exurgit , quænam censenda sit causa satis ponderosa ac rationabilis ? Quocirca Doctores communiter fatentur , non posse statui universalem regulam , quemadmodum etiam peccata ipsa in sua gravitate non sunt æquè ponderosa, neque etiam actiones æqualiter concurrentes ; nihilominus ad aliqualem saltem ingenii sublevationem circa hujusmodi cooperationem licitam vel illicitam juvabit bene notare sequentes aphorismos. I. Tantò gravior causa ad licitè concurrendum requiritur, quantò gravius est peccatum, cujus occasio datur. II. Tantò gravior causa &c. quantò probabilius est, te non cooperante alterum non peccaturum & quantò certior est effectus peccati ex tua

Ec 2

coope-

cooperatione. III. Tantò gravior &c. quantò propinquiùs tua cooperatio peccatum attingit. IV. Tantò gravior &c. quantò minus juris habes ad tale opus seu cooperationem. V. Tantò gravior &c. quantò magis peccatum repugnat justitiæ cum damno tertii. Ita in re Laymann *l. 2. tr. 3. c. 13.* Busenbaum apud la Croix *l. 2. n. 250.* Sporer *ubi supra. n. 74.*

Quæres 6tò, sitnè licitum ab altero petere opus, quod quidem sine peccato præstare posset, certò tamen creditur, aut prævidetur non præstiturus sine peccato?

265. R. Ob gravem & rationabilem causam licet, non tamen sine causa multum ponderosa. Ita *communis DD.* Ratio hujus ex dictis facile eruitur; nam si absque rationabili causa id facias, convinceris velle offensam DEI & ruinam proximi: è contra si id facias ex causa rationabili v.g. necessitatis &c. censeris permissivè tantum te habere in ordine ad peccatum proximi, quòd, cum impedire aliunde non tenearis, non tibi, sed illius malevolæ voluntati duntaxat imputandum est. Unde ulterius cum Sanchezio, Diana & Lugone rectè infert Sporer *cit. tr. 5. c. 1. sect. 3. n. 76. & seqq.* ob hujusmodi ponderosam causam tutà conscientia peti posse 1. à Parocho administrationem Sacramenti. 2. à Conjuge redditionem debiti. 3. à Saga vel mago solu-

solutionem maleficii &c. quando hi possent similia facere sine peccato, esto prævideantur cum peccato facturi. Secus dicendum foret, si id facere non possent sine peccato novo, ut si saga nequeat solvere maleficium sine novo maleficio. Videantur *Doctores cit.*

Quæres 7timò, utrum fas sit suadere minus malum illi, qui jam iam determinatus est ad committendum majus sive ejusdem, sive etiam alterius generis, v. g. volenti occidere Petrum, suadere ejus vulnerationem aut mutilationem, vel volenti committere adulterium, suadere fornicationem sine læsione tamen juris tertio competentis?

¶ Probabiliter fas est, suppositò quòd 366. suadens nequeat impedire utrumque peccatum, tam majus scilicet, quàm minus, simulque nihil suadeat in præjudicium tertii. Ita contra non paucos tenent Sanchez, Lugo, Tamburinus, Sporer & alii plures; idque hac râtione, meo judiciò validissima: quia suadens è duobus minus malum, casu quo (utì supponimus) utrumque impedire nequit, omnino prudenter agit, quandoquidem aliud nihil intendit, nisi impedire gravio rem offensam DEi, majorisque mali proximo inde imminentis aversionem, veluti Loth fecisse legitur *Gen. 19.* dum Sodomitis volentibus abuti duobus viris (vel potiùs Angelis virorum speciem

Ec 3

præ:

præferentibus, dixit: *habeo duas filias, quæ necdum cognoverunt virum, educam eas ad vos, & abutimini eis - - dummodo viris istis nihil mali faciatis.* Videatur Sporer *ait. n. 56.* atqui prudenter agens non peccat: ergo &c. &c.

At verò, inquires fortassis cum Laymano, Castropalao & aliis adversæ Sententiæ patronis: inductio ad peccatum positivè illud suadendo aut consulendo, præsertim quando actus ex natura sua malus est, nefas est nulla ratione excusabile: at, qui volenti committere adulterium, suadet fornicationem, suadendo illum inducit ad actum intrinsecè malum, ut de se liquet; ergo nefas est &c. Confirmatur ex eo amplius; quia non licet mihi committere leve mendacium eo fine, ut impediam v. g. homicidium vel fornicationem, esto hæc sint longè graviora peccata: ergo nec licet suadere alteri fornicationem in ordine ad impediendum adulterium.

367. R. ad hanc objectionem satis difficilem distinguendo Maj. inductio *absoluta* ad peccatum &c. nefas est &c. *concedo*, inductio non absoluta, sed *conditionata* potius, suadendo scilicet proximo, ut siquidem velit committere peccatum, potius committat id, quod minus est, nego Major. &c. Nam in hoc casu non consulitur malum absolute, neque malum ut malum, sed potius ut impe-



impeditivum est majoris mali: immò taliter inducens non intendit malum, sed potius commutationem majoris mali in id, quod minus est: hæc autem commutatio vel consultatio non est mala respectu illius, qui, ut supponitur utrumque malum impedire non potest, tametsi vellet: ergo &c. Unde *ad Confirmationem* negatur *conseq. & paritas*: ideò enim ego committendo leve mendacium peccarem, quia in meo arbitrio stat mentiri vel non, ideoque & possum & teneor non mentiri: è contra verò minimè stat in meo arbitrio impedire utrumque peccatum proximi: ergo non delinquo, dum proximo jamiam resolute ad committendum majus malum suadeo minus, non quidem absolute, uti jam dictum fuit, sed potius conditionatè, ut siquidem velit peccare &c.

Nec refert, quòd illud minus peccatum 368. sit fortassis alterius speciei, prout fornicatio ab adulterio differt, & ebrietas ab homicidio; nam majus peccatum suo modo comprehendit malitiam minoris, & aliquid ultra: neque etiam in tali casu, ut jam dictum est, suadetur minus malum absolute, sed potius hypotheticè & ex supposito, quòd utrumque impediri nequeat: hanc Sententiam velut probabilem tenent multi & gravissimi quidem DD. videndi apud Cardenam 2. *Crisi differt.* 23. n. 148. eam-

Ee 4

que

probabilem agnoscunt Cardenas, Gobat in *Quin. tr. 5. c. 13. n. 26.* Dianapart. 5. tr. 7. *resol. 18. la Croix lib. 2. n. 223.* Fateor tamen oppositam sententiam esse tutiorem, & æque probabilem, sin minus probabiliorem, loquendo de eo, qui suadet, vel inducit ad minus malum omnino diversæ rationis à majori malo, utputa ad ebrietatem, ne committatur homicidium, vel abortus procuretur &c. Ideoque hanc opinionem insinuare volui velut probabilem; minimè tamen consulere.

## §. II.

Proponuntur & breviter resolvuntur Casus practici  
de Scandalo.

## CASUS PRIMUS.

**T**itia perbene novit Maritum suum furtis ac rapinis deditum, atque ex iisdem familiam alere, tantum nihilominus absuit, ut eum dehortaretur, quin potius sibi fuerit congratulata, eò quòd speraverit post pauca futurum, ut Maritus suspendatur, ipsa verò ab hoc onere matrimonii sibi intolerabili liberetur, cum potestate transeundi ad secunda vota. At verò spes  
hac

hac fefellit; nam Maritus quidem deprehensus fuit & incarceratus, non tamen ad mortem sed ad virgas & perpetuam relegationem è Patria condemnatus fuit. Titia proin & Marito & mediis tum ad propriam, tum ad prolium etiam sustentationem necessariis destituta, hanc quarendam censuit corporis ac pudoris sui prostitutione: hunc in finem liberius denudare solet mammas, ut alliciat, itémque familiaris, aut verius loquendo, licentiosius conversari cum altero sexu, & frequentius uni alterivè concedere usum proprii corporis. Quamprimum verò animadvertit se concepisse, quarit occasionem conveniendi Maritum, utpote non ita procul in consinibus demorantem, eidémque offert usum corporis, quatenus hóc modo adulteria perpetrata palliet, & proles nascitura non alteri, quám Marito imputetur. Jam ad præsentem facti speciem ex dictis in conferentia 10. à. n. 298. facile (ni fallor) erui potest, an vel quomodo Titia peccaverit contra charitatem proximo debitam, omit-tendo correctionem fraternam: facile insuper ex dictis confer. 11. n. 331. erui potest, quomodo peccaverit optando suo Marito infamæ mortis supplicium: controversia proin ad præsentis conferentiæ argumentum magis propria moveri potest 1. an Titia tutâ conscientia potuerit uti rebus furtivis ad suam suarúmque prolium sustentationem, utputa carnibus ad comedendum, lanâ ad vestien-

Ec 5

dum

*dum, pecuniis furtivis ad providendum aliis necessitatibus domesticis? 2. An vel quomodo peccet liberius denudando mammas? &c.*

369. *¶* Ad primum quæsitum hujus Casus Si Titia aliunde non habet media, quibus se suasque proles honestè sustentare possit, satis probabile arbitror, eam tutâ conscientia uti posse illis rebus furtivis ad sustentandam familiam; idque hac ratione: quia Maritus nedum prolibus, sed etiam Uxori debet alimenta juxta *omnes per L. si cum dote. §. 2. sin autem. ff. soluto matrim.* ergo Titia ceu uxorata potest ea prætere de à Marito; quòd autem is nolit dare alia, quàm furtivè obtenta, per accidens se habet respectu Titia, quæ, utpote inevitabili necessitate pressa, acceptando hæc censi debet merum permissivè se habere in ordine ad peccata seu furta à Marito commissa: quemadmodum quævis uxor potest à Marito prætere de debitum conjugale, tametsi certò prævideat, quòd ille non sit redditurus sine peccato, utputa sine pollutione aut dispersione seminis extra vas. Confirmatur hoc à pari; nam juxta communem Doctorem opinionem, cui etiam subscribunt Diana *part. 5. tr. 7. resolut. 13.* Sporer *tr. 5. c. 1. sect. 3. n. 99.* Babenstuber *tr. 5. diff. 1. art. 6. n. 25.* ob rationabilem causam (quam subministrat ipse famulatus seu subjeccio) coqui & coquæ Dominis suis jejunium

nium violaturis licitè præparant carnes, easque ministrant, eò quòd hæc actio natura suâ non ordinetur ad peccatum, sed solum ad substantiam actûs comestionis, spectantis ad nutrimentum Dominorum, cui per accidens conjungitur peccatum Dominorum, quòd famuli & ancillæ moraliter loquendo impedire nequeunt, & hoc ipsò non tenentur: ergo similiter, si Maritus nolit præbere alimenta, nisi furtivè hinc inde ablata, Titia Uxor utpote gravi necessitate pressa, ea licitè acceptat, de reliquo permissivè se habens ad peccata Mariti, quippe quæ moraliter loquendo impedire nequit.

Dixi tamen; *Si Titia aliunde non habeat* 370.  
*media &c. &c.* Certum quippe est, quòd per se loquendo nefas sit consumere, & consumendo moraliter destruere rem alienam Domino rationabiliter invito, juxta illud *Tobia 2. v. 21. videte ne fortè furtivus sit* (hædus) *reddite eum Dominis suis: quia non licet nobis aut edere ex furto aliquid, aut contingere.* Neque etiam negari potest, quin hujusmodi consumptio nata sit præbere occasionem pluribus furtis à Marito continuaudis: ergo cum ex dictis n. 365. tantò amplius vitanda sit omnis cooperatio ad peccatum proximi, quantò illud est majus, vel quantò propinquius, cooperatio ad illud accedit, concludendum planè est, quòd  
 Titia

Titia omni modô moraliter possibili teneatur abstinere à consumptione alimentorum furtivè ablatorum : atqui hoc poterit , si aliunde habeat media ad suam , suarûmque prolium sustentationem necessaria : ergo &c.

371. R. Jam ad alterum quæsitum in hoc casu. Titiam mortaliter peccâsse, & toties quidem, quoties moraliter interruptis vicibus denudando mammas, vel licentiosius conversando cum personis alterius sexus studuit eos allicere ad venerea; tum quia finem pessimum sibi præfixit; tum etiam quia talis denudatio, utpote de se fortiter attractiva ad venerem, est scandalosa & graviter peccaminosa; quam ob causam Elizalde in *Regul. moral. lib. 8. q. 13. §. 9.* relatus à la Croix *lib. 2. n. 248.* meo judiciô rectè ait : *homines videntes mulieres - - nudas, credere dicereque possunt: istæ amari & appeti à nobis volunt & placere nobis : hæc autem est maxima motio & tentatio, & per se ad hoc ipsum ordinata : ergo est grave peccatum &c.* Quæ doctrina vel maxime confirmatur ex nostro casu, ubi Titia refertur ex hac ipsa intentione denudâsse mammas, quod utique culpa gravi minimè vacat. Hinc etiam in Confessionali tenebitur hanc circumstantiam explicare, quandoquidem regulariter loquendo mulier non præsumitur induxisse virum ad peccatum carnale cum scandalo, sed

sed fuisse inducta, ideòque nec Confessarius hoc peccatum scandali satis colligere poterit, nisi à fæmina explicetur, prout bene advertit Laymann *lib. 2. tr. 3. c. 13. n. 6.* Sporer *ubi supra c. 1 sect. 2. n. 20.* aliique plures. Cæterum quomodo Titia deliquerit adulterando, prolésque spurias imputando, seu etiam supponendo Marito &c. & qualem inde contraxerit Obligationem restituendi damna &c. videri potest ex iis quæ diximus in *Theolog. Sacrament. part. 3. Conferent. 18. n. 437. ac. seq.*

## CASUS SECUNDUS.

**S**empronius miles Veneri aquè, ac verbis lascivis deditus sape sapius in præsentia aliorum proferre assolet verba impudica & ad venerem allectiva, quibus aliis audientibus potuisset scandalum dedisse, tametsi probabiliter suspicetur, eos non fuisse scandalizatos ed quòd (ut ipse ait) similia non libenter audiverint: insuper (accusandi, aut gloriandi potius causa dicam, nescio) fatetur, se nuper faminam quandam ad concubitum sese insinuantem repulisse dicens: hodie ob certam causam nolo, sed cras me iterum convenias &c. Quaritur jam 1. Utrum Sempronius effutiendo illa verba impudica in illis circumstantiis censendus sit peccasse peccato scandali? 2. An peccaverit peccato scan-

*scandali ex eo, quòd jusserit faminam altero die reverti seu redire?*

372. R. ad primum quæsitum, minimè prorsus dubitandum, quin Sempronius graviter peccaverit peccato scandali; tum quia supponitur assuetus similibus verbis impudicis: qui autem pessima & detestabili hac consuetudine semel imbuti sunt, passim solent talia proferre coram aliis sine distinctione personarum, ideòque sæpius, quàm par est, coram innocentibus, quibus per similia verba sin minùs ad lapsum ipsum, certò tamen ad tentationes seu occasiones labendi materiem subministrare solent tanquam verissima & apùssima instrumenta diaboli. Neque etiam tam facilè à culpa immunis esse existimari debet Sempronius ex eo, quòd dicat, alios non libenter audiisse similia &c. esto enim ex hoc arguere liceat, illos actu non consensisse, neque etiam complacendo prolapsos fuisse in aliquam turpitudinem; nihilominus certum est, quòd hujusmodi verba coram innocentibus prolata ex se scandalosa sint, id est, nata præbere occasionem ruinæ spiritualis: atqui peccatum scandali activi non consistit in actuali ruina aut lapsu proximi, sed potius in dicto, vel facto inductivo ad ruinam spiritualem: ergo ex eo, quòd alii similia verba impudica non libenter audierint, Sempronius minimè excusari debet à pec-



à peccato scandali : profectò etiam Christus Dominus non libenter audiverit illa verba à S. Petro non quidem mala , sed bona intentione prolata : *absit à te Domine, non erit tibi hoc* ( ut scilicet patiaris ) & tamen JESUS illico *conversus dixit Petro: vade post me Satana* Scandalum es mihi, *quia non sapis ea, quæ Dei sunt, sed ea, quæ hominum.*

Ergonè, inquires, Sempronius tenetur in confessione exprimere nedum consuetudinem illam scandalosè loquendi, sed insuper etiam numerum, quoties scilicet talia verba protulerit, nec non & numerum personarum, coram quibus similia protulit?

R. Certum esse, quòd teneatur exprimere 373.  
 pessimam illam consuetudinem, quippe quæ voluntariè retenta meritò reputatur distinctum peccatum à discursibus inhonestis. Certum insuper est, quòd teneatur per se loquendo dicere; quoties moraliter interruptis vicibus similia verba lasciva protulerit in iis circumstantiis, in quibus potuisset audientes pertrahere ad ruinam spiritualem; quandoquidem hæc sint numerò distincta peccata: distinctio autem numerica peccatorum exprimi debet in confessione, prout disertè docet Concilium Tridentinum §. 14. de Sacram. penit. cap. 5. & can. 7. Insuper etiam juxta probabiliorem ac tutiorem sententiam DD. tene-

tenetur exprimere numerum personarum, utpote valde augmentantem gravitatem peccati : quia tamen plerumque hujusmodi hominibus lubricis talis expressio moraliter loquendo impossibilis est; hinc sufficiet dicere : scandalo fui pluribus, tot & tot vicibus &c. vel etiam tot ac tot vicibus turpia loquendo aliis audientibus scandalo fui &c. Videatur Sporer *tr. 5. c. 1. sect. 2. n. 19.*

374. R. jam ad 2dam partem quæsi in hoc casu. Sempronius resolvendo se ad fornicationem altera die comittendam, & in hunc finem mulierem substituendo &c. absque dubio mortaliter deliquit contra virtutem castitatis, non tamen contra virtutem charitatis peccatô scandali. Ratio hujus est : quia secundum dicta scandalum activum essentialiter consistit in dicto aut facto de se inductivo ad ruinam spiritualement alterius : atqui Sempronius dictô suo non induxit fæminam ad ruinam spiritualement ; hæc enim antecederet propriæ libidinis æstu jamiam determinata fuerat ad fornicationem ; quandoquidem hac intentione convenit Sempronium more solito, proptereaque ipsa potius, quam Sempronius culpam scandali contraxisse censeretur debet. Hac de causa R. D. Augustinus Michel in *sua Theol. canon. morali tom. 2. part. 1. q. 3. §. 7. n. 14.* recte concludit, quod famulus Hero jam de se deter-

determinato and fornicandum succollet, ut possit ascendere per fenestram &c. vel si jam actu rixantem adjuvet in ordine ad occisionem Adversarii &c. si ad amasiam scienter deferat litteras amatorias aut invitatorias ad peccandum &c. peccet quidem eodem gravi peccato quo Dominus contra virtutem castitatis, non tamen peccato scandalii; quia Dominum non induxit ad peccandum, sed tantum adjuvit in ordine ad exequendum peccatum.

### CASUS TERTIUS.

**C**Ajus domum suam locaverat cuidam vidua quam crediderat esse personam honestam: at verò contra omnem suam expectationem paulò post ab aliis inquilinis audire cogeatur, eandem à nonnullis juvenibus immò & maritis multum suspectis frequentari, & quidem tempore nocturno, quò factum, ut rumor vel potius murmur per totam viciniam volet, & eadem vidua passim jam malè audiat: hac de re Cajus majoris affecurationis capefcenda causâ quondam in angulo ejusdem domus tempore nocturno sese abdidit & revera deprehendit, sparsum rumorem suo non carere fundamento; ast ne hoc quidem contentus omnimodæ veritatis deprehendendæ causâ postea ab eadem vidua simulate petiit usum corporis, ad quem cum se promptam ac para-

R. P. Elbel, Pars II. de Fide &c. Ff tam

*tam sine mora obtulisset, Cajus illam severissime reprehendit, plenusque indignatione domum se recepit. Jam verò dubitat 1. utrum tutâ conscientia præfatam viduam possit protinus in sua domo tolerare? 2. An non reipsa peccaverit illam sollicitando ad concubitum, tametsi nunquam habuerit animum peccandi, sed potius explorandi mentem illius;*

375. R. ad primum quæsitum. Cajus non peccabit relinquendo viduam illam meretricem in domo sua, saltem usque ad terminum, quò juxta consuetudinem loci domicilia commutari solent, Ratio est: tum quia supponitur domum suam bona fide locasse, tum etiam quia vidua vi hujus jam obtinuit quoddam jus inhabitandi, quò sine periculo graviorum incommodorum & majoris prostitutionis privari nequit, vel quia alibi domicilium non statim inveniret, vel etiam quia Cajus alioquin censu justè percipiendo omnino carere deberet. Ex quibus liquet, quòd dictam viduam absque gravi suo incommodo nequeat domo expellere: at, qui sine gravi suo incommodo nequit impedire peccatum proximi, potest se permissivè habere in ordine ad illud: ergo Cajus tutâ conscientia potest viduam illam protinus saltem ad tempus relinquere in domo sua; eò præsertim, quòd locatio domûs res sit de se omnino indifferens,

Dixi

Dixi, Cajum posse relinquere viduam 376.  
 illam *saltem ad tempus*; practicè enim lo-  
 quendo fin minus de jure, saltem de con-  
 silio omnimodis suadendum erit Cajo, ut  
 elapsò termino locationis amoveat mere-  
 tricem illam ad tollendum scandalum, cùm  
 enim interea possit aquirere alium inquil-  
 num honestum, planè non videtur conve-  
 niens, ut dictam viduam ( nisi emendatam )  
 toleret in domo sua, eò præsertim, quòd  
 ex hujusmodi tolerantia haud modica in-  
 famia redundaret in ipsum possessorem do-  
 mus, ac si vellet quodammodo favere operi  
 meretricio &c. Idque vel maximè dicen-  
 dum foret, casu quo hæc domus ratione  
 fitùs esset magis accommoda ad alliciendos  
 homines ad hujusmodi commercium car-  
 nale, aut tollerantia hujus meretricis mul-  
 tùm noceret aliis fæminis honestis; tunc  
 enim requireretur causa exulans magni pon-  
 deris, qualem adhuc sufficientem existimat  
 Tamburinus in *decalog. lib. 5. c. 1. §. 4. n. 34.*  
 si eadem domus non posset locari aliis ho-  
 nestioribus, propterea que Dominus seu  
 possessor deberet carere cenlu inde perci-  
 piendo &c.

¶ Jam ad alterum quæsitum hujus Ca- 377.  
 sus. Cajus sollicitando Viduam ad usum  
 corporis, per se loquendo mortaliter pec-  
 cavit, esto id non fecerit animo peccandi,  
 sed potius animò explorandi mentem dictæ

E f 2

Vidua.

**Viduæ.** Ratio de se liquet: quia sollicitatio alicujus ad actum intrinsicè malum est mala ex sua natura. Parum autem refert, quòd Cajus non habuerit animum peccandi; nam exterius saltem monstravit, se hujus esse intentionis, & monstrando dictam Viduam, utut demum habituâliter malè dispositam excitavit ad actualem consensum in peccatum mortale, copulam scilicet carnalem: atqui hoc non vacat culpa gravi juxta communem DD. videndam apud Sporer ubi *supra* n. 44. Michel l. cit. n. 13. & alios passim ergo &c.

### §. III.

## Corollaria ex dictis inferenda.

378. **C**olliges ex hætenus dictis primò, à peccato gravi excusandam esse uxorem, quæ ad evadendam gravem offensam Mariti una alteravè vice Sacrum non audit, vel non jejumat &c. Item 2. non peccare faminam, quæ Sacrum etiam obligatorium intermittit ex eo, quòd sciat juvenem lascivum ex suo aspectu prolapsurum in impuram complacentiam &c. præsertim si non habeat occasionem alibi audiendi Sacrum &c. possunt, inquam similia facere ob evitandum
- Scan-

scandalum pusillorum , ad quod declinandum lex naturalis videtur fortius adstringere, quàm lex positiva humana ad audiendum Sacrum &c. Non peccat fœmina (Idixi) intermittendo similia ob rationes mox datas: probabilius nihilominus videtur, quòd de rigore nec ad unum teneatur, neque ad alterum; vix enim in priori casu continget, ut Maritus possit esse rationabiliter invitus: in posteriori autem casu culpa non fœminæ Sacro interessenti, sed potius impotenti libidini adolescentis imputanda est, proptereaque Jllsung *tr. 3. n. 111.* aliique plures Doctores meritò negant in tali Casu fœminam obligari ad abstinendum ab ingressu Ecclesiæ &c.

Colliges 2dò, à fortiori ad evitandum scandalum pusillorum intermitti, posse immò verò, ubi id sine difficultate fieri potest, quandoque etiam debere intermitti, vel ad tempus differri opera illa, quæ sunt de Consilio duntaxat, vel aliunde merum permissa. Ex. gr. Fœmina aut Matrona honesta sciens se ardentè amari, & quoties conspicitur ab hoc vel illo lascivo juvene, carnaliter concupisci: non sine gravi offensa Dei &c. omnino consultò faciet, immò ex charitate etiam tenetur abstinere à familiari etiam honesta conversatione cum illo, neque se ejusdem conspectui sine multum rationabili causa offerre: tenetur insuper

F f 3                      absti-

abstinere à superfluo vel etiam à minùs honesto ornatu, quando scit, hunc hætenus exstitisse causam excitativam lascivi amoris, Ratio horum est: quia magnò charitatis præcepto adstringimur ad præcavenda vel etiam impedienda aliorum peccata, quantum commodè possumus, veluti ex communi omnium Catholicorum tradunt Castropalao *tr. 6. disp. 6. pu. 16. n. 6.* de la Croix *lib. 2. n. 245.* Ob eandem rationem.

380. Colliges 3tiò, fæminam peccare adeundo hoc templum vel hoc Sacrum, cui novit interesse lascivum corrivalem, à quo carnaliter concupiscetur, vel sollicitabitur &c. peccat, inquam, si æquè faciliter vel sine permagno incommodo posset accedere aliud templum vel interesse alteri Sacrificio; quia scilicet non satagit pro viribus impedire peccata proximi & offensam Dei.

81. Dixi tamen: *Si æquè faciliter, vel sine permagno incommodo posset accedere aliud templum &c.* Enimverò quòd cum notabili difficultate; incommodò, vel etiam detrimento propriæ salutis aut bonorum spiritualium non teneatur abstinere à tali accessu in templum &c. Apud omnes inconfesso est; tum quia oportet habere majorem curam salutis propriæ, quàm alienæ; tum etiam; quia si talis juvenis diutiùs perstiterit in suo luto, seu amore lascivo, lapsus inde consequetur;

secu;



secuturi jam non infirmitati, sed potius malitiæ inveteratæ imputari debebunt; ob quam declinando neque charitas nos obligat; præsertim si cum incommoditate vel detrimento propriæ salutis fieri deberet. Videatur Sporer *loc. cit. n. 37. & 38.*

Colliges 4tò<sup>o</sup>, fæminis sub reatu mortalis 382. culpæ abstinendum esse à cultu lascivo & notabili nuditate corporis utpote de se provocativa & valde attractiva ad venerem, puta mammis usque ad pectus denudatis, aut vestitu ante ventrem nimis tenui, ait Sporer, quæis ego accensendas arbitror fæminas vestitu nimis curtò, & nequidem ad genua usque protenso utentes &c. Ratio similium est: quia tales vestitus ex se sunt valde scandalosi, & vix ad aliud nati quàm ad præbenda innumera scandala sine commoditate, quin potius cum permagna incommoditate illis vestibus utentium, quàm vel maximè tempore brumali sentiunt. Et certè (nî fallor) experientia constat, in iis locis, ubi talis abusus viget, semper plura peccata carnalia committi, quàm in aliis, ubi honesto vestitu & corpore bene tecto incedunt. Meritò proin P. Paulus Mezger *tom. 3. tr. 10. disp. 22. art. 5. n. 22.* ait hujusmodi mulieribus, lascivo scilicet cultu utentibus, denegandum esse absolutionem Sacramentalem, nisi abstinere promittant. Alii nihilominus fæminas sic nudè inceden-

tes in locis ubi talis consuetudo ( nisi tamen consuetudo, & non abusus potius dici mereatur ) jamiam viget, excusant à mortali, licet omnes fateantur introductrices talium vestimentorum in aliquam provinciam à peccato mortali excusandas neutiquam esse, & omnes prorsus à Confessariis seriò dehortandas. Videantur de hoc Laymann *lib. 2. tr. 3. c. 13. n. 11*. Sporer *loc. cit. n. 39*. Bubenbaum apud de la Croix *lib. 2. n. 243*. Babenstuber *tr. 5. disp. 1. art. 6. n. 23*.

383. Colliges igitur licet administrari seu etiam vendi posse res de se ita indifferentes, ut ad bonum vel malum usum applicari queant. Et quidem casu quo liquidò constat, eas non desiderari ad malum usum, nemo prorsus dubitat; major tamen controversia & difficultas consurgit, quando proximus moraliter quasi praevidetur, aut perpensis omnibus circumstantiis prudenter creditur abusus tali re v. g. gladio, veneno &c. Quocirca tamen respondendum videtur cum distinctione. Velenim materia illa, aut instrumentum quodcumque de se indifferens, supponitur proximè deservire ad malum usum uti gladius furioso ad occidendum &c. Vel remotè duntaxat, uti carnis aut vini administratio ad frangendum jejunium? Si prius, dicendum, quòd non liceat similia vendere præcisè ob lucrum cessans ex venditione: & certè prorsus nunquam licebit

bit vendere talem rem ad usum seu etiam finem malum v. g. medicamentum ad procurandum abortum, gladium ad occidendum inimicum &c. Si verò supponatur posterius, licebit talem materiam remotè duntaxat se habentem ad peccatum vendere ex illo duntaxat motivo, ne lucro justo inde capiendo frauderis, præsertim si alii supponantur adesse, qui sine scrupulo venderent. Hac de causa excusantur caupones & laniones, dum carnes aut vinum præbent illis, quos advertunt legem temperantiæ aut jejunii transgressuros. Excusantur itidem, qui meretrici fucum, aut vestem, quibus forsitan abutetur, vendunt; quia administratio talium, utpote de se merùm indifferens, merùm remotè se habet ad ipsum peccatum, quod proinabutenti minimè verò administranti debet imputari in tali casu. Videatur Illsung *cit. tr. 3. n. 112.* vel Viva *ubi supra ad proposit 51. n. 6.* Tannerus *tom. 3. disp. 1. q. 9. dub. 5. n. 144.* Tamburinus *ubi supra §. 4. n. 38.*

At quid, inquires, si dubitetur duntaxat, utrum Emptor petat hanc rem v. g. mercurium vel Arsenicum &c. ad bonum, vel verò ad malum usum?

¶ Rursus cum distinctione. Nam si <sup>384.</sup> dubites merùm negativè, ita scilicet ut non habeas prudens motivum dubitandi ex circumstantiis loci, personæ, temporis, aut

F f §

modi

modi petendi &c. collectum aut colligendum, sine scrupulo poteris vendere; nemo enim præsumi debet malus, quousque talem sese probaverit.

At verò casu quo ex circumstantiis mox recensitis, vel aliunde occurrit prudens motivum dubitandi de abusu, major procul dubio requiritur cautela & causa gravior vendendi seu etiam administrandi, quamvis causa ista non debeat esse adeò gravis, inquit Viva ubi suprà n. 7. Quocirca tamen Pharmacopæis, Claustrariis & aliis; hujusmodi officialibus præcipitur singularis cautela.

385. Colliges 6tò graviter peccare illos peccato scandali, qui componunt, scribunt vel describunt, repræsentant in Theatris, vel pingunt turpia seu lasciva, & ad venerem provocantia, utputa 1. imagines nudas alterius Sexus. 2. qui scribunt aut scriptas litteras ad concubitum aut turpem amorem invitatorias scienter deferunt ad concubinam. 3. peccat itidem famulus, qui hero suo fornicaturo januam meretricis aperit, vel eum in eandem domum comittatur, eò fine ut Dominus custodiâ vel auxilio famuli stipatus liberiùs indulgere possit veneri &c. Secus quòad hoc ultimum dicendum foret, si comitatus famuli se habeat per modum meri obsequii sine ullo influxu in peccatum Domini, vel cooperatione ad illud

illud. Secus itidem dicendum foret, si famulus merum dubitet, nec sit certus, an herus bono an vero malo fine hanc vel illam domum frequentet, vel an litteræ, quas deferre jubetur, aliquid mali contineant; *in dubio enim non debet, præsumi delictum l. meritò ff. pro socio.* Videantur de his Busenbaum apud de La Croix *l. 2. n. 243.* Felix Potestas *Exam. Confess. tom. 1. part. 2. c. 2. à n. 361.*

At quid, si Dominus metu mortis famulum, aut fur vel latro eodem metu alium quempiam adigat, ut sibi sit auxilio v. g. in asportanda cista furtiva, vel in inferendo alio damno temporali v. g. in incendio domus vel segetum? &c. licebitne huic parere sine peccato?

R. Id nullatenus ne metu quidem mor- 386.  
tis fas esse existimant Conink. *disp. 31. de charit. dub. 7. n. 104.* eumque secutus R. D. Michael *cit. q. 3. §. 7. n. 20.* hac ratione: quia directe cooperari vel exequi actionem intrinsece malam, ab alio intentam intrinsece malum est, & eo ipso nullatenus cohonestabile: atqui: ergo &c. Hoc tamen non obstante ego probabilior arbitror Sententiam Castropalaj *tr. 6. disp. 6. pu. 11. n. 10.* Molinæ *tom. 1. de just. disp. 115.* & aliorum plurium, asserentium id esse licitum ob evadendam mortem. Ratio hujus opinionis est: quia  
urgen-

urgente periculo vitæ ad evadendam hanc extremam necessitatem posset famulus se ipso alteri auferre rem temporalem sine crimine furti, quandoquidem Dominus in talibus circumstantiis nequeat rationabiliter esse invitus: ergo à fortiori ad salvandam vitam propriam potest adjuvare alterum auferentem. Unde liquet, quòd talis ablatio respectu famuli nequeat dici furtum, vel actio intrinsecè mala; nec mirandum, quòd eadem actio physicè individua à duobus procedens moraliter loquendo possit esse aut dici mala respectu unius, non item respectu alterius, prout pluribus exemplis demonstrari posset. Secus tamen meritò dicendum putat Sporer *tr. 5. c. 1. sect. 3. n. 62.* Si Dominus à suo servo petat adjuvari ad multilationem vel occisionem innocentis; qui cum innocens non sit Dominus membrorum vel vitæ (uti est vel esse potest respectu aliorum bonorum temporalium) hinc nequit consentire in sui mutilationem vel occisionem, proptereaque cooperatio famuli semper maneret illicita, veit intrinsecè mala.

387. Colliges 7timò fas esse peccatum proximi permittere vel etiam ad illud ansam positivam de se merè indifferentem præbere eò præcisè fine, ut deprehensus corrigatur seu emendetur imposterum v. g. Maritus habens uxorem gravissimè suspectam

etiam

Etiam de adulterio , potest tutâ conscientia exeundo eidem relinquere occasionem conveniendi adulterum , eo fine ut in flagranti deprehensa corrigatur. Item Dominus vel Pater familias habens servum aut filium de infidelitate aut furtivis ablationibus suspectum , nedum tacendo vel dissimulando ad tempus potest v. g. exire, sed etiam pecuniam suo modo expositam relinquere, vel clavem non subtrahere de arcula, è qua creditur probabiliter ablaturus pecuniam &c. Ratio est: quia Pater familias hōc modo non concurrit formaliter ad ipsum peccatum, sed solū occasionem vel materiam peccandi relinquendo , ad ipsum peccatum permissivè se habere censerī debet ob rationabilem causam, ut scilicet majora mala tum sibi, tum famulo etiam aut filio imminētia impediāt, & delinquens efficacius corrigatur.

Dixi tamen , similia fieri posse *eo fine* , 388.  
*ut delinquens emendetur.* Neutiquam enim fas est similia permittere vel etiam positivam causam præbere eo præcisè fine , ut deprehensus mulctam solvere cogatur ; quia cū mulcta exigī non valeat, nisi supposito peccato sicut tamen emendatio delinquentis potest intēdi etiam non suppositō novo delicto ; hinc , is , qui causam positivam vel ansam præbet ad obtinendam mulctam convincitur velle ipsum  
 pee-

peccatum velut quoddam præsuppositum ad exigentiam mulctæ. Et ita tenent Sanchez *lib. 10. de matrim. disp. 12. n. 52.* Bonacina *disp. 2. de peccatis q. 4. pu. 2. §. un. n. 28.* Castropalao *de charit. tr. 6. disp. 6. pu. 5. n. 2.* fæda ergo ( inquit perbene Sporer *tr. 5. c. 1. sect. 3. n. 68.* ) & iniquissima est praxis proditorum certæ urbis , ubi prohibitum est bibere in Cellariis Ecclesiasticorum sub quinque florenorum mulcta insingulas mensuras ; qui potitantibus sese immiscent , & ad liberiùs bibendum alliciunt ad majus suum lucrum, scilicet ad mediam partem mulctæ captandam.

389. Colliges denique octavò. eum qui proximo innocenti fuit scandalo , teneri saltem ex charitate ad tollendum scandalum & ad procurandam emendationem ejusdem sive verbis & factis & exemplis , enimverò si secundùm dicta superiùs *confer. 10. n. 299.* quivis christianus ex lege generali charitatis & speciali præcepto fraternæ correctionis tenetur corrigere errantem vel peccantem , profectò consequens est, quòd ex charitate fraterna tantò ampliùs quilibet stringatur ad procurandam emendationem proximi, quantò efficacius meminit se priùs eidem dedisse causam ruinæ spiritualis. Utrum aut ex justitia pariter teneatur ad procurandam emendationem?
- non




non ita certum est , immò longè probabilius , quòd non , nisi per vim vel fraudem proximus fuit inductus ad peccandum. Et ita tenent Laymann , Lessius , Azorius , Lugo *disp. 9. de just. sect. 1. à n. 8.* alique Recentiores præsertim. Ratio est : quia nemo tenetur ex justitia ad compensationem damni alieni , nisi huic intulerit injuriam : atqui juxta *Reg. 27, Jur. in 6to scienti & volenti non fit injuria* : ergo si alium absque vi vel fraude , merùm consulendo aut suadendo induxisti in peccatum , non teneris ex justitia , sed ex charitate duntaxat ad procurandam emendationem delinquentis. Unde etiam *L. Consilii. ff. de Reg. Jur.* dicitur : *consilii non fraudulentum nulla est obligatio* ( scilicet ex justitia ) Et rursum *L. 2. ff. mandati habetur* : *Nemo ex consilio obligatur , etiamsi non expediat ei , cui datur , quia liberum est cuique apud se explorare , an expediat sibi consilium.* Videantur , quæ diximus de Restitut.

*Confer, 7. n. 200.*

*& 201.*



CON-



# CONFERENCE DECIMA TERTIA

De virtute Religionis in genere & de Oratione.

## SUMMARIUM.

390. Quid intelligitur nomine Religionis in genere?
391. Et quid nomine virtutis Religionis in specie?
392. Objectum immediatum hujus virtutis est cultus DEI.
393. Recensentur breviter undecim actus Religionis.
394. Quid sit devotio, & quid, esse devotum?
395. Quid sit oratio propriè dicta?
396. Et quænam conditiones vel qui actus ad hanc sint necessarii?
397. Oratio alià dicitur mentalis, alià vocalis.
398. Terminativè & ultimativè solus Deus orandus est: respectivè tamen etiam sancti utiliter orationibus implorantur.
399. Omnis Viator, sive justus sit, sive peccator

tor nedum utiliter potest, sed etiam tenetur orare.

400. Recensentur breviter nonnulli Casus, vel potius circumstantiæ temporum, in quibus tenemur orare.
401. Similiter pro omnibus Viatoribus nondum constitutis in termino &c. tam amicis, quàm inimicis etiam orandum est.
402. Bona spiritualia ad animæ salutem conductia absolutè sunt petenda à Deo, temporalia verò sub conditione, si scilicet, & in quantum conducunt vel non obstant salutis animæ.
403. Oratio debet fieri humiliter, piè seu devotè, & constanter.
404. Resolvitur Casus I. Cuiusdam personæ, quæ orando sæpius à Deo postulavit, ne supposito etiam lapsu in fornicationem evaderet prægnans, vel diffamaretur coram mundo.
405. Quæ tandem contrarium animadvertens & experta, per octo circiter menses ne unicum quidem Pater aut Ave dixerat.
406. Licet verò propterea, defectu scilicet orationis, plura fortassis peccata inciderit, non tamen ob id duplex peccatum semper commisit?
407. Resolvitur Casus II. de quodam, qui preces vi confœderationis debitas pro defuncto ad aliquod tempus distulit, eo quòd olim ab eodem fuerit offensus.
408. Et quid tenendum de illo malefactore, qui recitando Pater noster ad illa verba: dimitte nobis -- sicut & nos dimittimus &c. positivè solebat excludere inimicum suum?
409. Occurritur breviter cuidam difficultati contra datam resolutionem factæ.
410. Resolvitur Casus III. Cujusdam sponsæ,  
*R. P. Elbel. Pars II. de Fide &c. Gg quæ*

quæ Deum, cœlitésque implorare consueverat, ne sponsus mutato animo Monachum induens à sponsalibus resliret.

411. Propterea tamen non videtur arguenda alicujus peccati,
412. Bene verò ex eo, quòd Sanctorum Patrocinium imploraverit eò fine, ut Parens sponsi velut unicum nuptiarum obstaculum brevimeretur.
413. Virtus Religionis inter virtutes morales præstantissima est;
414. Et sæpesæpius aliarum etiam virtutum actus imperare solet.
415. Recensentur breviter nonnulla principalia impedimenta devotionis.
416. Quid causæ sit, cur sæpius frustra videamur orare?
417. Ad omnem orationem præter intentionem saltem implicitam *orandi*, insuper necessariò requiritur attentio interna.
418. Hæc attentio potest esse triplex, scilicet vel 1. materialis, vel 2; litteralis, vel etiam spiritualis seu mystica.
419. Omnis voluntaria distractio sive directa sive etiam indirecta seu interpretativa est peccaminosa.
420. Non item distractiones, quas sæpiùs quidem quàm par est, involuntariè patimur.
421. Oratio oblata pro pluribus non est tantæ efficaciz, quantæ est illa, quæ offertur pro uno tantùm vel pro singulis in particulari.

## §. I. Præ-

§. I.

Præmittuntur & breviter resolvuntur quæsitæ scitu necessaria ad debitè resolvendos Casus præcticos tangentes Virtutem Religionis, & Orationis.

**Q**Uæres primò, quidnam intelligatur nomine Religionis in communi?

R. Nomen Religionis ut sic alii à *religando* derivatum volunt; eò quòd Religio nos Deo specialiter religet seu adstringat: alii à *Relegendo*, eò quòd ea, quæ ad cultum divinum spectant, sæpiùs relegenda sint &c. Reipsa autem tripliciter sumitur I. pro virtute, qua Deo debitum cultum exhibere nitimur. II. pro certa quadam formula cultus divini omnibus communi; quo sensu dicimus in hac vel illa Religione aut Provincia vigere Religionem catholicam, in alia non &c. III. Sumitur non minùs frequenter pro statu Religioso, id est, pro certo quodam & stabili modo vivendi, quo Professores ejusdem sese per tria vota substantialia, paupertatis scilicet, castitatis & obedientiæ adstringunt ad perfectius serviendum DEO observando in hunc finem certas quasdam Regulas &c. Et in hoc sensu dicitur alia Religio Seraphica

Gg 2

phica S. P. N. Francisci, alia Religio Sancti Benedicti, alia Sancti Dominici &c. &c.

Quæres jam 2dò, quid sit Religio propriè talis in specie?

391. R. Religio propriè talis rectè describitur : quòd sit virtus moralis, inclinans ad debitum cultum Deo tanquam primo rerum omnium principio exhibendum. Ita Lactantius *lib. 4. divin. institut. c. 28. communissimè* receptus à Doctoribus Herincx *part. 3. tr. 4. disp. 1. n. 1.* Sporer *tr. 2. decalog. c. 7. sect. 1. n. 2.* Dicitur 1. *Virtus*; quia est bona qualitas mentis &c. Dicitur 2. *moralis*, ut pro hoc noscatur differre ab aliis virtutibus, Theologicis præsertim, quæ secundum dicta superius suis locis, immediate tendunt in Deum, non sic hæc virtus Religionis; unde etiam additur; *ad debitum cultum* (id est honorem ac venerationem &c.) & quidem *tanquam primo rerum omnium principio*, ideòque cum debita animi submissione, & agnitione nostræ erga eundem dependentiæ ac subjectionis ad contestandam scilicet supremam Dei excellentiam &c.

Quæres 3tio, quodnam sit objectum Religionis?

392. R. Objectum immediatum Religionis (sive ut alii loquuntur) *objectum quod*, est cultus Deo debitus: hoc objectum alio nomine appellatur *materiale*; quia est quasi materia, circa quam occupatur hæc virtus:  
idem

idem cultus quâ Deo ceu supremo Domino. Debitus dicitur objectum formale; quia scilicet Deo ceu supremo Dominatori à suis creaturis debetur cultus & omnimoda subiectio. Denique *objectum* cui est ipse Deus, quippe cui ob supremum in nos dominium & excellentiam debetur talis cultus & veneratio vel potius adoratio, prout in confrentia proxima amplius dicitur. Ratio horum est; quia virtus Religionis est inter omnes virtutes morales præstantissima, esto non sit Theologica: licet proin pro suo objecto immediato non possit habere Deum immediatè, necessum tamen est, ut circa aliquid Deum proximè contingens occupetur: atqui hoc est cultus Deo ceu supremo Domino, principio & ultimo fini nostro multiplicibus ex titulis debitus: ergo &c. Videantur Lessius *lib. 2. de J. & J. c. 36. dubit. 2.* Herincx *loc. cit. n. 2.* Reiffenstuel *tr. 5. Theolog. moral. dist. 1. n. 6.*

Quæres 4to, quinam, & quot universim sint actus Religionis propriè talis?

R. Actus Religionis propriè talis mox 393. descriptæ à Doctore Angelico 2. 2. q. 82. art. 4. & aliis Doctores communiter enumerantur undecim, scilicet 1. devotio. 2. oratio. 3. adoratio. 4. Sacrificium. 5. oblatio. 6. primitiæ. 7. decimæ. 8. Votum 9. iuramentum. 10. adiuratio. & 11. laus Dei. Quocirca (nâ fallor) sapienter advertit Spo-

rer *loc. cit. n. 6.* I. Devotionem esse actum Religionis immediatum & elicitum, ac semper internum, reliquos verò actus mox recensitos esse actus Religionis mediatos & imperatos, è quibus alii sunt merè interni, uti oratio aliique affectus merùm mentales: alii verò in & externi simul, uti est Sacrificium & oblatio. Notat insuper II. ad actus mox recensitos referri debere omnes prorsus observationes sacras & ceremonias ad cultum DEI ordinatas, uti sunt erectio Altarium, celebratio festorum; observatio jejuniorum, usus rerum ab Ecclesia benedictarum, & vel maximè usus Sacramentorum; quia omnes hujusmodi actus, quatenus ad cultum DEI referuntur, sunt actus specialiter virtutis Religionis. Labet jam unum alterumvè actum ex recensitis paulò amplius dilucidare, reliquorum verò, qui non pertinent ad primum præceptum decalogi, explicationem differemus ad propria loca.

Quæres proin stò, quid sit Devotio, & quid, esse devotum?

394. *¶* Devotio sumpta pro actu Religionis est actus creaturæ rationalis offerentis se ipsam ad servitium DEI. Ratio hujus facile colligitur ex ipsa nominis ethymologia, quòd à devovendo derivatur. Si verò sumatur devotio pro ipso habitu, rectè dicitur, prompta voluntas faciendi & exequendi

ea



ea, quæ ad obsequium vel servitium DEI pertinent: & hæc quidem acceptio moderno sæculo videtur usitatioꝝ; nam illi, qui quantumvis per vota solemnia Deo adstricti parum curant de servitio & cultu divino &c. non devoti, sed potiùs indevoti coram plebe habentur. Videantur *DD. citati.*

Quæres 6tò, quid sit Oratio? & quænam conditiones vel actus ad veram orationem requirantur?

R. Ad primum membrum hujus quæsit. 395. Oratio propriè dicta est actus virtutis Religionis, quo homo DEO velut auctori omnium bonorum supplicat pro aliquo bono impetrando. Ita in re Communissimè Doctores, quos vix non iisdem terminis imitatur Marchantius noster tribunal *tom. 2. tr. 2. part. 2. tit. 2. q. 1.* Bonitas hujus descriptionis ampliùs patebit ex dicendis. Illud solum animadvertendum est, quòd hic descripserimus orationem propriè & rigorosè sumptam; nam largiùs loquendo sumi quandoque solet pro pio animi motu in Deum; quo sensu S. Damascenus *lib. 3. orthodox. fid. c. 24.* ait: *oratio est ascensio mentis in Deum* &c. quin immò in sensu adhuc latiori alii nomine orationis intelligunt quamcunque actionem bonam facta cum pia erga Deum intentione seu mentis devotione; & in hoc sensu Venerabilis Beda in

illud *Luc. 18. c. oportet semper orare, & non deficere* ait: *semper orat, qui semper secundum Deum operatur.*

896. *R.* Jam ad 2dum membrum ejusdem quæsitum. Ad veram & propriè dictam orationem quatuor actus suò modo concurrere debent, scilicet duo ex parte intellectus, & duo ex parte voluntatis se tenentes. Ex parte intellectus supponi debet I. practica cognitio divinæ excellentiæ, potentiæ & bonitatis, vi cuius & vult, & potest nobis benefacere II. Itidem supponi debet practica cognitio nostræ ad Deum subjectionis, dependentiæ, exigentiæ & infirmitatis, secus enim nunquam Deum sincerè deprecemur pro impetrando tali vel tali beneficio, quemadmodum non solemus rogare hominem, qui vel non potest, vel non vult nobis benefacere, aut cuius ope non indigemus.

Porro ex parte voluntatis ad orationem essentialiter requiritur I. desiderium impetrandi aliquod bonum, & II. explicatio, seu practica propositio hujus desiderii per modum deprecationis seu piæ petitionis, vi cuius nitimur Deum commovere ad conferendum nobis illud bonum: atque in duobus his actibus, uti jam dictum fuit, essentialiter sita est oratio propriè dicta, juxta probabilem opinionem Scotistarum. Liqueat proin ex his, quid Theologo morali respondendum.

dendum sit ad illam quæstionem speculativam potius, quàm practicam: utrum scilicet oratio pertineat ad intellectum, an verò ad voluntatem potius?

At, inquires, quotuplex est oratio?

R. Oratio ut sic communissimè dividi 397.  
solet I. in *mentalem tantum*, & in *mentalem & vocalem simul* & II. in publicam & privatam. Ita ex *communi* DD. Herincx, Sporer Babenstuber *tr. 5. disp. 2. a 2. n. 3.* Declaro breviter singula membra. Oratio *mentalis tantum* est, quæ non voce, sed mente sola formatur, utpote exercendo erga Deum affectus internos circa mysteria fidei, perfectiones divinas &c. desiderandòque, ut ab omnibus agnoscat, laudetur &c. Oratio autem *mentalis & vocalis simul* dicitur illa, quæ verbis seu vocibus internum mentis affectum exprimentibus efformatur: & bene omnino dicitur hæc oratio mentalis & vocalis simul, nam præciso internò mentis desiderio, vel affectu oratio merùm vocalis seu verbaliter prolata nec nomen veræ orationis meretur, neque etiam fructum; tales enim Oratores meritò sibi dictum existimare possunt illud Isaïæ 29. *Populus hic labiis me honorat, cor autem eorum longè est à me.* Unde & quidam Poëta perbene cecinit: *Si mens non orat, frustra quoque lingua laborat.* Oratio publica vocatur ea, quæ nomine totius Ecclesiæ per Ministros Ecclesiæ Deo

G g 5                      offer;

offertur, prout fit in SS. Missæ Sacrificio, processionibus publicis &c. *Oratio autem privata*, quam quisque privatim sive mententium, sive etiam voce depromit juxta illud monitum Doctoris Gentium 1. *Tim.* 2. *Volo ergo viros orare in omni loco.*

Quæres 7timò, quis sit orandus?

398. *N.* Solus DEUS velut supremus & absolutus Auctor omnium bonorum tam naturæ, quam etiam gratiæ & gloriæ orandus est absolute & terminative; Nihilominus respectivè, id est, tanquam Patroni & intercessores nostri apud DEum ceu Auctorem & absolutum Dominum omnium bonorum nostrorum utiliter & Sanctè omnino rogari possunt nedum Beatissima Virgo Maria aliique Angeli & Sancti in cœlis, verum etiam probabiliter animæ in purgatorio detentæ. Hæc responsio inter Doctores catholicos est *communissimè recepta*, immò de fide, exceptò ultimo membro, circa animas in purgatorio detentas. Ratio prioris est: quia solus DEUS est absolutus & supremus Dominus, cui soli competit libera potestas auctoritative omnia bona dispensandi, & de omnibus disponendi ad libitum Sanctissimæ & ordinatissimæ voluntatis suæ: ergo ipse solus rectè à nôbis rogatur & invocatur terminative, id est, tanquam terminus ultimus ad quem nostra dirigitur oratio, & à quo

quo ceu fonte omnium bonorum expectamus miseriæ & indigentia nostræ sublevationem. Ratio autem posterioris non una duntaxat, sed plures de invocatione Sanctorum paulò inferiùs *Conferent* 14. n. 431. dabuntur. Quòd autem animæ in purgatorio utiliter rogari queant, vel inde probabiliter suaderi potest; tum quia supponuntur actu constitutæ in gratia & amicitia DEI, ideoque tametsi miseriæ & indigentias nostras in individuo fortassis non cognoscant, nihilominus in genere saltem possunt orare, immò verosimiliùs orant pro iis, qui eisdem benefaciunt, vel suffragia eorundem implorant; tum etiam quia Sancti Angeli nostri Custodes eis nostras orationes deferre, vel alio modo DEUS ipse nostras indigentias, nostraque desideria illis manifestare potest. Videatur de hoc P. Sporer *tr. 2. decalog. cap. 7. sect. 3. n. 13.* vel Bellarminus *lib. 2. de purgatorio cap. 15.*

Quæres 2tavo, quibus orandum, & quando vel quàm necessariò?

¶ ad primam partem hujus quæsit. 399. Omnis viator usu rationis præditus, sive justus sit, sive peccator, utilissimè orat. Ratio colligitur ex illo Matth. 7. *Omnis qui petit, accipit.* Et licèt peccator utpote inimicus DEI non mereatur de condigno exaudiri, nihilominus de congruo exaudiri solet,

solet, modo sincerè DEum deprecetur, & ratio hujus est: quia impetratio ceu effectus orationis propriè dictæ non innititur justitiæ vel statui gratiæ supplicantis, sed divinæ misericordiæ & liberali promissioni DEI, qui dives est, ac pius in omnes tam justos, quàm impios; qua ratione S. Augustinus *tr. 44. in Joan.* dixit: *si peccatores DEus non exaudiret, frustra ille publicanus oculos in terram demittens, & pectus suum percutiens diceret: DEus propitius esto mihi peccatori.*

400. R. jam ad 2dam partem ejusdem quaesiti. Omnibus adultis ratione præditi oratio est necessaria ad salutem; quia juxta modernum ordinem divinæ providentiæ DEus non solet nobis conferre auxilia gratiæ ad salutem necessaria, nisi ea humiliter orando postulamus juxta illud *Matth. 7. petite & dabitur vobis.* Tametsi autem difficile videatur assignare certum tempus, quò urget præceptum orationis, convenienter tamen & omnino probabiliter assignantur sequentia 1. urget eo tempore, quò peccator tenetur se reponere in statum gratiæ. 2. urget tempore gravis tentationis, si hæc alio congruenti remedio repelli non valeat. 3. urget in manifesto mortis periculo, 4. urget, quando Reipublicæ imminet gravis pressura, quæ aliter non, nisi orationis præsidio amoveri potest. 5. urget,

get, quotiescunque aliquod auxilium divinum speciale nobis videtur necessarium ad salutem tum animæ tum corporis etiam, quidquid demum sit, utrum in similibus casibus præceptum orandi obliget per se, vel per accidens, duntaxat. Profectò (ut præscindamus ab obligationibus particularibus Clericorum, vel aliorum sive ex voto, sive aliunde ad certas orationes adstrictorum) non desunt Doctores, qui peccati venialis saltem contemnunt illos ingratißimos mortalium, qui mane aut vespere, ante vel post mensam Deo ceu omnium bonorum Largitori debitas non rependunt gratias. Videatur *Michel tom. 2. part. 2. q. 3. §. 3. à n. 12.* *Suarez lib. 1. de orat. c. ult. n. 16.* *Castropalao tr. 7. disp. 1. punct. 8. n. 3.* vel *Lessius lib. 2. de justit. c. 37. dubit. 3. n. 12.*

Quæres 9nò pro quibus orandum sit?

ꝛ. Orandum esse pro omnibus nondum constitutis in termino, ideòque non tantum pro nobis ipsis, quamdiu in hac miseriarum valle versamur, sed & pro aliis, nedum amicis, sed etiam inimicis. Ratio hujus desumi potest ex illo *Jacobi s. orate pro invicem, ut salvemini.* & rursum *Matth. s. ait Christus: orate pro persequentibus & calumniantibus vos &c.* deinde omnes indigent gratia DEI & auxiliis supernaturalibus ad salutem necessariis: ergo omnino conveniens est, ut nedum pro nobis, sed & pro

pro aliis tam amicis, quàm inimicis oremus. Conveniens inquam est, ut pro inimicis etiam oremus, etsi præceptum orationis per se non obliget: in casu tamen, quo proximus noster specialiter indigeret orationis nostræ subsidio, per accidens saltem ex charitate teneremur pro eo orare: tenemur similiter nullum ex orationibus præsertim communibus excludere, prout amplius patebit ex dicendis. Videatur de hoc Herincx de Religione *disp. 1. n. 25.* vel Sporer *n. 18.*

Quæres denique 10. quid sit orandum seu postulandum à DEO? & quomodo?

402. R. ad primam partem hujus quæsit.

Bona ad salutem animæ necessaria, utputa dona supernaturalia gratiæ ac virtutum sunt à Deo postulanda absolutè: è contra bona temporalia & naturalia non sunt absolutè postulanda sed sub conditione expressa, vel saltem tacita, si scilicet, & quantum ad DEI Gloriam, animæ salutem, vel usum salutarem nobis sunt proficua. Ita Filliucius *tr. 23. c. 2. n. 46.* & 50. Laymann *lib. 4. tr. 1. c. 1. c. 8.* Ratio est: quia illud genus bonorum, quod ad consecutionem vitæ æternæ nobis est necessarium, & per se, est à nobis absolutè petendum, quemadmodum salutem ipsam, ad quam ordinati sumus, jubemur absolutè petere, & in eum pro viribus tendere, è contra  
illud



illud, quod per accideus quasi ad salutem animæ ordinatum est, ita scilicet, ut sæpe-  
sæpius nobis possit esse impedimento salu-  
tis, non est absolutè à nobis postulandum,  
ne fortè illo abutamur, & salute excida-  
mus : atqui bona supernaturalia sunt no-  
bis ad salutem necessaria, bonis verò natu-  
ralibus sæpesæpius abutimur & possunt  
nobis reddi exitialia : ergo hæc conditio-  
natè, illa verò absolutè à nobis postulanda  
sunt,

¶. jam ad alteram partem ejusdem quæ-403.  
siti. Præfata bona sunt à DEO postulan-  
da 1. humiliter. 2. piè seu devotè 3. instan-  
ter secundum divinæ providentiæ leges :  
*humiliter* quidem tum *quia oratio humilian-  
tis se nubes penetrabit. Eccli. 35. v. 21.* tum  
etiam *quia DEus superbis resistit, humilibus  
autem dat gratiam 1. Petr. 5. v. 5.* Piè seu  
*devotè* ; secus enim oratio non foret actus  
Religionis, sed irreverentiæ potius erga  
divinam Majestatem, & hoc ipsò indigna-  
tionem potius mereretur, quàm gratiam,  
*Instante* denique seu perseveranter fieri de-  
bet juxta monitum Apostoli *Coloss. 4. Ora-  
tioni instate* Unde S. Augustinus *serm. 5,  
de verb. Dom. c. 5.* ait : *ideò DEus tar-  
diùs nonnunquam dat, quæ petimus, ut tan-  
dem ferventius & perseverantiùs orantes plus  
etiam impetremus, ac petimus.* Hinc tandem  
additur : *secundum divinæ providentiæ leges ;*  
secus

secus enim oratio non esset ordinata, quin immò cum sæpè sæpius nesciamus quid nobis conveniat, posset non rarò contingere, ut effectus obesset magis, quàm prodesset animarum nostrarum saluti. Videantur de hoc fusius agentes Castropalao *part. tr. 7. disp. 1. pu. 7. n. 6. seqq.* Reiffenstuel *tr. 5. dist. 1. à n. 53.* Michel *ubi supra §. 3. à n. 5.* Herincx *de Reliq. disp. 1. n. 28.*

## §. II.

Proponuntur & breviter resolvuntur Casus practici  
de Oratione:

### CASUS PRIMUS.

**T**itia tota quasi desperabunda fatetur, se jam inde ab octo & amplius mensibus ne unicum quidem Pater noster vel Ave Maria dixisse, eò quòd pluribus annis instanter DEum rogaverit, ne permetteret se labi in quandam impudicitiam, multò minùs in fornicationem, vel certè non in publicam infamiam, quæ ex hoc Crimine vel potiùs imprægnatione subsequi assolet, & nihilominus stantibus etiam tot precibus ad DEum fufis nedum crimen fornicationis, sed & infamiam publicam modò incurrerit. Quaritur jam ad nostrum propositum 1. an Titia non peccaverit rogando

do Deum, ne supposito etiam lapsu in fornicationem evaderet gravida? 2. An vel qualiter peccaverit ex eo, quod jam ab octo & pluribus mensibus ne unicum quidem Pater aut Ave Maria dixerit?

R. ad primum quæsitum. Titia proba- 404.  
biliter non peccavit ex eo, quod Deum rogaverit, ne supposito etiam lapsu in fornicationem imprægnaretur aut diffamaretur. Ratio hujus est: quia supposito etiam lapsu non imprægnari, revera huic puellæ bonum fuisset, quatenus hōc modo infamiam publicam inde subsequenter evitasset: neque etiam supponitur postulasse à Deo, ut is modō illicito impediret conceptionem, vel aliud quidpiam in actu conceptionis illicitum fieret, sed ut ex alio accidente ( quorum procul dubio multa etiam sine peccato intervenire possunt ) non evaderet gravida. Et quis, amabo! quis conjugatam peccati alicujus condemnabit ex eo, quod optet, vel Deum roget ( prout revera sæpius faciunt ) ne velit permittere, ut ex concubitu conjugali concipiat, ne scilicet prolem nimis copiosam alere vel educare cogatur? Certè si talis fæmina voveret v. g. dare eleemosynam sub conditione: *si non conceperit ex tali congressu*, votum esset validum, & supposita conditione adimplendum, prout disertè docent Cajetanus. 2. 2. 4. 88. art. 2.

*R. P. Elbel. Pars II. de Fide &c. H h § sed*

§ *sed quid dicendum.* Arriaga , Navarrus, eosque secutus Laymann. *l. 4. tr. 4. c. 2. n. 7. in fine* : atqui votum non esset validum , nisi objectum hujus fuisset honestum & licite appetibile : ergo &c. &c.

405. R. jam ad 2dum quæsitum. Titia per se loquendo graviter peccavit ex eo, quod per tot menses ne unicum quidem Pater vel Ave dixerit. Ratio est : quia præceptum orandi , vel certè non nimis diu differendi orationem *per se obligat* : atque Titia orationem in morali hominum existimatione diu nimis distulit ; cùm enim singulis diebus tot tentationes occurrant , & tot pericula amittendi gratiam divinam, cùmque quotidie in omnibus dependeamus ex adjutorio Dei , profectò sana ratio dicta , Deum voluisse, ut ad Eundem, à quo omne auxilium , orando & obsecrando recurramus sæpiùs. Meritò proin Castropalao *cit. tr. 7. disp. 1. pu. 8. n. 3.* ait , dilationem unius mensis ( quidni & octo mensium ) gravem esse : idipsum docent Suarez *lib. 1. de orat. c. ult. n. 16.* Lessius *lib. 2. de just. c. 37. dubit. 3. n. 12.*

Sed quid , inquires , si Titia interim defectu orationis incidisse supponatur plura peccata v. g. fornicationis , judicandum nè erit vel concludendum , quod semper commiserit duplex peccatum , unum scilicet  
con-

contra virtutem Religionis, & alterum  
contra virtutem castitatis?

R. cum P. Herincx *cit. n. 18.* & R. D. 406.  
Michel *loc. cit. n. 16.* Negative. Ratio  
est: quia obligatio orandi seu invocandi di-  
vinum auxilium in casu particulari necessi-  
tatis non oritur per se ex præcepto aut vir-  
tute Religionis, sed merum per accidens,  
in quantum scilicet oratio supponitur ne-  
cessaria per modum mediæ ad evadendum  
lapsum in peccatum fornicationis ideoque  
neglectus orationis constituit moraliter  
unum peccatum, sicut revera voluntas non  
orandi in tali casu censetur voluntas pec-  
candi v. g. contra castitatem. Satisfaciet  
proin Titia in confessione exponendo nu-  
merum & speciem peccatorum v. g. for-  
nicationis, nec erit necessum addere, quod  
hæc inciderit defectu orationis, licet secun-  
dum dicta teneatur confitendo dicere,  
quod per tot & tot menses orationem om-  
nem neglexerit, idque ex contemptu quasi  
& desperatione &c.

## CASUS SECUNDUS.

**S**Empronius dum nuper obitum cujusdam quo  
vi confederationis certas preces persolvere  
debisset, ex litteris intellexisset, dicta suffra-  
gia consulto distulit, eò quod meminert se ab  
eodem olim haud leviter fuisse offensum, ob

H h 2

eam

*eam verò injuriam se melius vindicare non posse, nisi hoc modò, quatenus scilicet defunctus ex dilatione suffragiorum diutius cogere-  
tur luere in purgatorio. Quomodo Sempronius deliquisse censendus est?*

407. R. Censendus est in hoc facto vel potiùs omissione facti peccasse mortaliter. Ratio est: quia ex lege generali charitatis (nil dicam de obligatione particulari Sempronio vi confederationis incumbente) quivis tenetur proximo suo etiam inimico non malè, sed bene velle, immò quantum in nobis est, omne damnum grave ab eo pro viribus propulsare seu avertere: hoc enim modò Christus nos dilexit: hoc modò diligimus nosmetipsos, & hoc eodem modò jubemur diligere proximum *Joan. 15. c.* atqui Sempronius respectu defuncti id non fecit; sed potiùs contrarium voluit. Adde insuper, quòd appetitus inordinatus gravis vindictæ sit mortaliter malus secundum omnes: atqui ex hac facti specie liquet, quòd Sempronius differendo suffragia eo fine ut defunctus, à quo olim offensum se meminit, diutius detineretur in purgatorio, inordinatam vindictam & gravissimam quidem appetierit; quandoquidem fide divina jubemur credere, pœnas purgatorii esse gravissimas, easdemque animas in extrema miseria ac necessitate versari, quas nihilominus suffragiis nostris suble-

sublevare possumus, iminò Sempronius, ut supponitur, vi confœderationis debuisset: ergo hoc negligendo ex præfato finè, censendus est peccasse mortaliter, Meritò proin P. Sporer *tr. 2. in delcalog. c. 7. sect. 3. §. 3. n. 18.* ait, excusandos non esse à peccato mortali, qui nunquam vellent pro illis animabus, & maximè sibi conjunctorum orare, mox subdens: *praxis facillima est, si nihil speciale velis orare, in orationis dominicæ ultima petitione: libera nos à malo &c. piè te reflectas ad miseras illas animas.*

At, inquires, quomodo peccasse censendus est ille malefactor, qui jamiam condemnatus ad mortis supplicium, noluit ignoscere cuidam alteri, à quo proditus fuerat, proptereaque ubi recitando orationem dominicam, pervenit ad illa verba: *& dimitte nobis sicut & nos dimittimus &c.* at non huic NB. velut inimico meo &c. quem nominetenus semper solebat exprimere?

¶. Etiam iste censendus est peccasse 402. mortaliter; tum quia contra expressum mandatum Christi Domini *Matth. 11. v. 25. & 26.* noluit ignoscere suo inimico, ideòque seipsum reddidit indignum venia & gratia reconciliationis; tum etiam quia ex appetitu vindictæ illum exclusit à communi oratione, de mente Christi pro om-

nibus perfolvenda, quod planè nullus Doctorum teste Herincx *cit. disp. 1. n. 25.* à culpa mortali excusandum cenfet; etfi non ignorem, Caftropalaum *tr. 7. disp. 1. pu. 6. n. 6.* dubitare, an talis exclusio à communi oratione mortaliter an verò venialiter duntaxat fit mala, fi scandalum & vindicandi affectus fupponatur abefle; quod tamen in noftro cafu minimè fupponi potefl.

Dices tamen contra hoc: plus quàm certum efl, non omnes confecutoros falutem æternam: ergo nec possumus, multò minùs tenemur orare pro falute omnium; quin immò talis oratio non minùs inepta, quàm præfumptuofa eflfet. Unde & Chriftus Dominus non pro omnibus oraffe, fed potius aliquos pofitivè exclufiffe legitur *Joan. 17. v. 9. Ego, inquiens, pro eis, rogo, NB. non pro Mundo rogo, fed pro his, quos dedifti mihi.*

407. *℞. concesso anteced. difting. Confeq. ergo non tenemur orare pro falute omnium collectivè fumptorum, trans. diftributivè fumptorum neg. confeq. Cùm enim nobis ex certa revelatione non conftet, quinam ex massa totius humani generis fint falvandi velut electi, & quinam tanquam reprobi damnandi fint; hinc omnino prudenter & Sanctè faciamus, dum omnibus ac fingulis gratiam, beatitudinemque postulamus. Im-*  
mo



mo verò tametsi de aliquo homine in particulari nobis ex revelatione divina constaret, cum damnatum iri; quia tamen non minùs certum est, neminem condemnari nisi ob demerita; hinc iuxta ordinem voluntatis divinæ etiamnum pro tali possemus DEum interpellare, quatenus eidem velit dare auxilia gratiæ, quibus mediantibus suam operetur salutem; in hoc enim nihil prorsus reperitur contrarium divinæ voluntati, quippe quæ vult *omnes homines salvos fieri* 1. *Timoth. 2. v. 4.* Illud verò exemplum Christi Domini nihil obstat: gratis enim concedimus, quòd nemo teneatur quovis tempore orare pro omnibus, sed possit pro suo libitu (præcisa omni alia obligatione) orare modò pro illo, sicut Christus *loc. cit.* oravit specialiter pro suis Electis, non verò pro Mundo seu pro Reprobis: illud solùm negamus, quòd è communibus orationibus à DEO vel Ecclesia pro omnibus institutis, liceat aliquem excludere, eò præsertim, quòd nulla rationabilis, & satis ponderosa causa videatur excogitabilis, quæ sufficiat ad co-honestandam hanc exclusionem. Videantur Suarez *lib. 1. de orat. c. 15. à n. 6.* Valentia 2. 2. *dist. 6. q. 2. pu. 8.* Castropalao *part. 2. tr. 7. disp. 1. pu. 6. n. 5. & 6.*

## CASUS TERTIUS.

**C**Aja desponsata DEUM ac Calites diu quasi noctūque orando sollicitat, quatenus ex parte sponsi velint conservare, immò & augmentare amorem sponsalitiū, ne fortassis ille mutatio animi proposito à sponsalibus resiliat, aut munda prorsus valedicens Monachum induat. Et quia nuptias celebrare non licet prius, quàm Parens sponsi vel vita exceſſerit, vel filio suo (sponſo scilicet) officium suum sponte resignaverit; hinc eadem Caja Sanctum Antonium, aliòsque Sanctos Patronos suos sapissimè interpellat, velint meritis suis & intercessionibus rem eò deducere, ut dictus Parens vel brevè moriatur, vel certè officium, quod hætenus gesserat, filio suo resignet. Quæritur jam, an Caja hæc & similia tutà conscientia à DEO calitibusque orando prætereundum possit.

410. R. Primò Caja implorando DEI, Cælitumque opem ad impetrandum ex parte sponsi augmentum amoris sponsalitii (honesti tamen, uti suppono, non item carnalis & lascivi) non peccat, modò id faciat ordinatè, id est, cum debita resignatione in divinam voluntatem, & conditionatè potius, quàm absolutè, scilicet si ad DEI gloriam & ad animæ salutem conducat vel expediat. Ratio hujus resolutionis facile colligi potest ex dictis n. 401. quia orando licitè

licite petimus à DEO bona etiam temporalia, in quantum hæc conducunt ad DEI gloriam vel animæ salutem: atqui amor sponsalitiis sicut & augmentum hujus respectu Cajæ erat quodam bonum, in quantum per modum medii conduxit ad assequendum honestum & favorabile matrimonium: ergo Caja hoc petendo à DEO & cælitibus non peccavit: peccasset tamen gravissime & Sacrilegè, si postulasset augmentum amoris etiam lascivi, valde communis inter hujusmodi personas, prout illico amplius constabit ex dicendis n. 412.

Dices fortassis contra datam resolutionem. Status Ecclesiasticus aut Monachalis est longè perfectior statu matrimoniali, ideoque & DEO gravior; ergo Caja inordinate, & hoc ipso illicite postulavit à Deo, ne sponsus contempto Mundo & statu conjugali Monachum indueret.

R. Negando Conseq. esto enim status 411.  
Monachalis sit perfectior, respectu Cajæ tamen non fuisset melior, quin potiùs obstitisset affectuioni honesti matrimonii. Rursus status matrimonialis quantumvis de se minùs perfectus, potest nihilominus comparative ad hanc vel illam personam particularem esse magis conveniens, tum ad animæ salutem, tum etiam ad bonum familiæ, vel totius Ecclesiæ, propterea que jam sæpiùs dispensatum fuit cum Clericis in voto

H h s

casti-

castitatis in ordine ad contrahendum matrimonium, & ad propagandam familiam, prout videre licet apud Sanchez *de Matrim. lib. 8. disp. 8. n. 6.* Gobat. *Theolog. exp. tr. 9. n. 149.* Lessium *de J. & J. lib. 2. c. 40. n. 141.* Kugler *de Matrim. n. 1662.* & alios plures. Neque etiam semper tenemur orando à DEO petere ea, quæ sunt majoris perfectionis; secus enim, ut de se liquet, quævis Virgo, aut Juvenis teneretur potius à Deo postulare statum Monachalem, quam matrimonialem, quòd quàm absurdum, quàmque à veritate alienum sit, nemo prudentum non videt.

412. R. Jam 2dò ad eandem facti speciem. Caja implorando DEI Sanctorumque Patronorum suorum opem in ordine ad impetrandam mortem Parentis &c. probabilissimè peccavit mortaliter, nedum contra virtutem charitatis proximo debitæ: sed vel maximè etiam contra virtutem Religionis peccatò Sacrilegii. Ratio horum haud difficulter erui potest ex dictis *n. 333.* Enimverò optare cuipiam mortem ob emolumentum temporale nobis inde eventurum, graviter repugnat charitati: in hunc autem finem DEUM, cœlitesque interpellare, idem est, ac illos velle facere auctores peccati, quod utique gravissimè pugnat contra reverentiam DEO cœlitibusque debitam: atqui Caja hoc fecit; ergo dupliciter peccavit,

vit. Nec refert, quòd mortem Parentis videatur non absolute, sed disjunctivè potius, id est, vel mortem, vel resignationem officii desiderasse 1. nam per hoc satis patenter manifestavit, perinde sibi esse, sive per resignationem officii, sive etiam per mortem Parentis liceat transire ad connubium; quod cum sit bonum longè inferioris ordinis quàm vita Parentis, inordinate postulatur per hujusmodi medium, veluti constare potest ex dictis *loc. cit.* graviterque repugnat reverentiæ Sanctis debitæ. Unde non abs ratione Suarez *lib. 1. de orat. c. 23. n. 4.* Herincx *ubi suprâ n. 27.* Sporer *loc. cit. n. 19. in fine* docent, semper peccari mortaliter, quando à DEO petitur res etiam venialiter duntaxat mala; est enim gravissima & blasphema in DEum irreverentia petere ejus concursum vel auxilium ad rem quamcunque malam, sicque ipsum facere auctorem mali.

§. III.

Corollaria ex dictis inferenda.

Colliges ex dictis primò, virtutem Religionis inter morales esse præstantissimam; esto enim virtutes Theologicæ, utpote immediate DEum respicientes quàm tales nobiliores sint ( præstantia enim virtutum desu-

desumi solet ab objecto præsertim formali, in quod tendere solent vel inclinare ) quia tamen nulla alia virtus moralis tam propè accedit vel tendit in DEum, sicut virtus Religionis, quippe quæ secundum dicta n. 292. pro suo objecto immediato habet DEI cultum, immò circa DEum ipsum velut *objectum*, Cui cultus exhibendus est, quod non habent aliæ virtutes morales, hinc meritò aliis præfertur. Inde

414. Colliges 2dò, ab hac virtute Religionis aliarum etiam virtutum tam moralium, quàm Theologicarum actus utpote fidei, spei &c. imperari posse. Ratio est: quia actus similium virtutum possunt assumi velut medium in ordine ad colendum DEUM, quem cultum virtus Religionis immediate respicit velut suum objectum, uti niox dictum, atqui DEus colitur nedum virtutibus fidei, spei & charitatis sed aliis insuper virtutibus moralibus, præsertim misericordiæ, justitiæ &c. ergo huiusmodi actus possunt præcipi virtute Religionis.

415. Colliges 3tiò, virtutem Devotionis multipliciter impediri, vel omnino extingui posse: potissima tamen ( teste Herincx *disput.* 1. de Relig. n. 11. ) sunt 1. immoderata rerum temporalium sollicitudo, 2. terrenarum consolationum nimia cupido. 3. indiscreta de ultimo vitæ suæ termino, id est, de adipiscenda beatitudine anxietas. 4. tanta in laboribus

boribus occupatio , ut animi recollectio-  
nem & spiritualia exercitia non compatiatur :  
subinde tamen reperire est tales , qui labores  
suos sive manuales , sive liberales cum hu-  
militate DEO offerentes & consecrantes,  
majorem aliis devotionem sentiunt, teste eo-  
dem Herincx , qui utpote summis laboribus  
per complurium annorum curricula occupa-  
tus, & functus id ipsum expertus fuerit. Plu-  
ra, alia impeditiva devotionis prudens lector  
facilius experientiâ, quàm lectione discet.

Colliges 4tò , minimè mirandum esse, 416.  
quòd multi videantur sibi frustra suas ora-  
tiones fundere aut fudisse, tametsi Christus  
Dominus multis in locis, singulatim *Matth.*  
*7. v. 8. omnis enim, qui petit, accipit,* itemque  
*Joannis 16. v. 23. Si quid petieritis Patrem*  
*in nomine meo, dabit vobis &c.* & alibi plu-  
ries videatur promississe infallibilem oratio-  
nis effectum. Non , inquam , mirandum  
est, quòd multi videantur orare, & tamen  
nihil impetrare ; quia mox allegatæ promil-  
siones Christi intelligi debent velut conditio-  
natæ , prout innuunt verba *in nomine meo*,  
id est Salvatoris &c. ideoque ad hoc, ut  
oratio sortiatur infallibilem effectum, neces-  
sum est, ut oretur humiliter, piè, & instan-  
ter &c. secundum dicta *n. 403.* atqui cer-  
tum est, quòd quamplures non observent  
dictas conditiones: ergo minimè miran-  
dum , quòd videantur frustra orare, juxta  
illud

illud Jacobi 4. v. 3. *petitis & non accipitis, eò quod malè petatis.* Tametsi autem non raro videamur frustra orare; nihilominus divina pietas nostras orationes frustra minimè patitur; nam teste mellifluo Doctore S. Bernardo *sermon. 5. in quadages. de tripl. modo orat. unum indubitanter è duobus sperare possumus; quoniam aut dabit, quod petimus, aut quod nobis noverit esse utilius.* Videatur de hoc Sanctus Doctor.

417. Colliges igitur, ad omnem Orationem, etiam liberam seu non præceptam præter intentionem saltem virtuales aut implicitas orandi, insuper 2dò necessariam esse internam attentionem & reverentiam. Ratio prioris est: quia recitatio quarumcunque demum precum sine omni intentione orandi seu DEum colendi, non est verus actus Religionis, consequenter, nec vera oratio, prout ex hæcenus dictis clarè liquet. Ratio autem posterioris est: quia lumen naturale dicat, cum DEO seu ultimo fine & supremo immò infinitæ Majestatis Domino reverenter ac submissè agendum esse: at ubi nulla intervenit attentio interna aut reverentia, hoc non fit. Unde S. Bonaventura *lib. de perfect. vita c. 5.* ait: *indecent est valde, ut quis cum DEO loquatur ore, & aliud meditetur corde.* Et certè qui cum aliquo Principe aut Magnate loquitur, attendere debet ad ea, quæ loquitur, & interim cum



cum aliis non miscere sermones, quāto magis cum DEO loquens debet esse attentus?

Quocirca illud breviter advertas velim 418.  
1. Doctōribus satis communiter distingui triplicem attentionem. Prima vocatur *superficialis* seu etiam *materialis*, quando scilicet ad sola verba attenditur, ne committatur aliquis error. 2da dicitur *litteralis*, quando attenditur ad sensum verborum, seu quid verba significant. 3tia denique (quæ est omnium optima) appellatur *spiritualis* qua scilicet attenditur ad DEum seu terminum, & ad finem orationis, potestque ab omnibus etiam idiotis, aut linguæ ignavis, in qua officium divinum recitatur, prout apud Moniales contingere assolet, haberi. Ita post Divum Thomam 2. 2. q. 83. à 13. Filliucius tr. 23. c. 3. n. 74.

Colliges 6to, omnem voluntariam distractionem in oratione esse saltem venialiter peccaminosam, sive dein directè sit volita, sive etiam indirectè (quod tunc contingit, dum quis perfectè advertit se de hoc vel illo objecto ab oratione longè alieno cogitare, ideoque esse distractum, & tamen negligit cor suum seu mentem ad DEum revocare) Ratio patet ex dictis: quia omnis huiusmodi distractio fit cum quadam irreverentia erga DEum: ergo cum offensa levi saltem divinæ Majestatis. Quin immò


immò P. Herincx *disp. 1. de Relig. n. 31.* voluntarias distractiones durante oratione jure divino præcepta, condemnat peccati mortalis; quod tamen procul dubio intelligendum putaverit de distractionibus ad longum tempus captatis; secus enim cum de La Croix *lib. 6. part. 2. n. 443.* Diana, Bardi & aliis satis probabile existimò, quamcunque distractionem internam, etiam sub consecratione vel communione (modò absit periculum erroris) non esse nisi venialiter malam; partim quia secundum probabilem sententiam Doctorum essentia orationis subsistit cum distractione interna; partim etiam quia intentio virtualis orandi, quæ semper adhuc manet, sufficienter dirigit omnes illas actiones, facitque, ut sint actus Religionis.

420. Dixi insuper, *omnem voluntariam distractionem &c.* Nam distractiones, quas sæpius quidem, quàm par est, etiam contra voluntatis inclinationem patimur, non sunt peccaminosæ, eò ipso quòd non voluntariæ, quin potius possunt esse occasio meriti, si cum patientia & humilitate sufferantur: quod vel maxime notari velim à quibusdam scrupulosis, qui ob quamlibet distractionem putant se graviter peccare, nec satisfacisse suo officio: tales enim non debent facile quidquam repetere, etsi in fine psalmi vel horæ advertant, se fuisse distractos

Etos, præsertim cum in repetitionibus eadem imperfectiones intercurrere soleant. Quare mente ad Deum revocata tunc pergendum est sine ulla turbatione vel anxietate; ait sapienter Herincx *part. 3. tr. 4. disp. 2. n. 39.*

Colliges demum 7<sup>mo</sup>, orationem oblatam aut factam pro multis non esse tantæ efficacæ & virtutis, quantæ fuisset, si pro uno duntaxat vel pro singulis in specie fuisset oblata. Ratio est: quia tametsi efficacia orationis ultimatè fundetur in divina promissione & liberalitate, certum nihilominus est, quod à DEO etiam attendatur moralis valor ipsius orationis, prout vel ex eo haud obscure colligere licet, quod oratio fervida pluris valeat apud DEUM, quàm tepide peracta: atqui moralis valor orationis, dum pluribus applicatur dispersus quasi, procul dubio minor est pro singulis, quàm si uni tantum fuisset applicatus: quia singuli in petitione illa communi confuse & indistinctè intelliguntur, non item in petitione vel applicatione particulariter facta. Unde etiam Ecclesia sæpe orat pro aliquo peccatore speciali, quod non esset consultum, si oratio fusa ad Deum pro omnibus, singulis æqualiter prodesset, prout bene advertit Castropalao *l. cit. punct. 7. n. 11.* Videatur Suarez *lib. 1. de orat. c. 27. n. 6.* Vel Azorius *tom. 1. lib. c. 33. q. 7.*

*R. P. Elbel Pars II. de Fide &c.* Ii CON-



# CONFERENCE DECIMA QUARTA.

De Adoratione DEI, cultù-  
que Sanctorum, & Sacrarum  
Reliquiarum.

## SUMMARIUM

- 422. Adoratio genericè sumpta, est exhibitio re-  
verentiæ alteri factæ in recognitionem suæ ex-  
cellentiæ.
- 423. Et hæc communiter partiri solet in Latriam  
Hyperduliam, & Duliam.
- 424. Deo T. O. M. debetur cultus latriæ, seu ado-  
ratio latrevtica.
- 425. Eadem adoratio debetur Christo ; nec non
- 426. Augustissimo Eucharistiæ Sacramento.
- 427. Qualis cultus debeatur humanitati Christi ?
- 428. Sanctissimum Nomen JESU pariter adoran-  
dum, seu colendum est cultu latrevtico re-  
spectivo.
- 429. Sancti in cœlo, velut singulares DEI amici  
licite, & ultissimè coluntur ab unversa Ecclesia  
Catholica.

430. Beatissimæ Virgini sine labe conceptæ debitus est cultus hyperdulæ.
431. Reliquis verò Sanctis debetur cultus dulciæ: qui etiam à nobis utiliter invocantur velut Patroni & intercessores apud Deum.
432. Satisfit breviter nonnullis objectionibus hæreticorum oblatrantium.
433. Imagines Christi & Sanctorum nedum licite exponuntur in Ecclesiis, sed etiam coli debent à fidelibus cultu Earundem Prototypis respectivè debito.
434. Occurritur rursus oblocutionibus Adversantium.
435. Quidnam intelligatur nomine Ss. Reliquiarum Christi, & aliorum Sanctorum?
436. Iisdem pariter debetur cultus respectivus.
437. Diluuntur brevissimè fundamenta hæreticorum contradicentium.
438. Resolvitur breviter Casus I. de quodam acatholico converso, qui nullum Sanctum invocare voluit.
439. Confessarius hoc inaudiens bene fecit, eidem pœnitentiæ causâ injungendo certas quasdam preces ad B. Virginem, aliosque Sanctos fundendas.
440. Homines cum fama sanctitatis defuncti, esto nondum Canonizati aut beatificati supponantur, nihilominus licite invocantur orationibus privatis.
441. Resolvitur Casus II. Cujusdam personæ, quæ certas quasdam recolas seu Reliquias de Venerabili Abbatissa Maria Joanna de Roveredo in multa veneratione habet;
442. Immò verò Ejusdem effigiem domi suæ supra quoddam altariolum collocare, & coram eadem genuflectere solet.

443. Nupet insuper à quodam Sacerdote postulavit, quatenus vellet quoddam Sacrificium Missæ offerre in honorem Ejusdem Venerabilis Matris : & quid Sacerdoti in tali casu agendum fuerit ?
444. Resolvitur Casus III. de quodam famulo, qui Domino suo furtivè auferendo quandam cistulam Sacris Reliquiis refertam, procul dubio graviter deliquit.
445. Utrum vel quando in tali furto possit dari parvitas materiæ ?
446. Utrum idem famulus aliis distribuendo particulas falsas & fictitias de S. Cruce, & quidem loco verarum peccaverit ?
447. Crux sacra sicut etiam particula sacrae crucis colendæ sunt cultu latriæ respectivo.
448. Quomodo colendus sit Ss. Sanguis JESU Christi, qui hinc inde in diversis Ecclesiis asservatur ?
449. Crux sacra Reliquiis partim approbatis, partim etiam non approbatis seu authentizatis licite exponitur publicæ venerationi fidelium.
450. Non item sine cruce solæ Reliquiæ partim authentizatae, & partim non authentizatae seu approbatae.
451. Cuilibet fidelium fas est sacras Reliquias etiam non authentizatas penes se reverenter deferre v. g. in Capsula.
452. Neque ab iisdem abstinendum, eò quòd simus homines fragiles peccatis obnoxii.
453. Quo cultu Ceræ Papales ( vulgo Agnus Dei dictæ ) proseguendæ sint ?

J. I.

Præmittuntur, & breviter resolvuntur Quæsitæ scitu necessaria  
ad debitè resolvendos Casus præ-  
dictos circa adorationem DEI,  
& Christi &c. &c.

**Q**Uæres primò, quid sit Adoratio in genere, & quotuplex ?

R. ad primam partem hujus quæsitæ. 422.  
Adoratio est exhibitio reverentiæ, quâ  
alium reveremur, ipsi nos submittendo  
tanquam Superiori in recognitionem suæ  
Excellentiæ. Ita in terminis Matthæucci  
*in cautela Confessarii lib. 3. c. 3. n. 62.* in  
re verò communis est Doctorum. Dicitur  
autem : exhibitio reverentiæ alteri *tanquam*  
*Superiori* &c. In hoc quippe differt ado-  
ratio ab honore, quòd honor sit pariter  
contestatio seu testificatio de alterius excel-  
lentiâ, at non necessariò *tanquam Superiori*,  
unde & æqualem, immò & inferiorem no-  
bis honorare possumus : at verò adoratio  
fieri nequit, nisi Superiori, id est, tali quem  
velut Superiorem agnoscimus, cujus & ex-  
cellentiam contestamur, sive dein prostra-  
tione corporis, sive inclinatione capitis,  
aut genuflexione, sive denique pectoris tun-  
sione vel alio modò.

I i 3

R. jam

423. R. jam ad alteram partem ejusdem quaesiti. Adoratio ut sic communiter quidem & recte dividi solet in Latriam, Duliam, & cultum politicum, quo quis testatur alterius excellentiam pure naturalem & creatam; verum cum haec politica adoratio ad forum nostrum non pertineat; hinc, eam politicis relinquimus, adorationem ut sic à theologis recte dividi in Latriam, Hyperduliam, & Duliam, Latria est cultus soli Deo debitus ob infinitam ipsius excellentiam, Hyperdulia est cultus creaturae debitus propter excellentiam supernaturalem & sanctitatem singularem. Dulia verò est cultus Sanctis debitus ob creatam excellentiam sanctitatis, quam habent. Ratio autem hujus divisionis recte desumitur ex diversitate excellentiarum: cum enim adoratio secundum dicta consistat in contestatione excellentiae alterius tanquam superioris, jam verò soli Deo competat suprema & infinita excellentia; singularissima autem excellentia competat tunc humanitati Christi ob unionem hypostaticam, nec non B. Virgini Mariae ob dignitatem Maternitatis Filii Dei &c. alia denique sit excellentia Sanctorum seu sanctitatis, quae ceteris creaturis supereminet; hinc meritissimo jure adoratio ut sic partiri solet 1. in Latriam soli Deo debitam 2. in Hyperduliam humanitati Christi secundum se sumpta.

ptæ.



ptæ debitam, nec non B. Virgini Mariæ. 3. denique in Duliam reliquis Sanctis debitam, prout amplius patebit ex dicendis.

Quæres jam 2dò, qualis adoratio debeat- 424-  
tur Deo ?

R. DEO Triuno, & soli quidem, debetur adoratio latrevtica, seu cultus latriæ. Ratio hujus liquet ex proximè dictis: soli quippe Deo triuno competit excellentia suprema & infinita tanquam Principio ac ultimo fini nostro: ergo huic soli debetur adoratio latrevtica ceu cultus supremus. Quin immò hoc verbum *Adorare*, prout perbene notavit Perrerus in c. 32. *Gen.* teste Sporer tr. 2. *decalog.* c. 8. *sect.* 1. n. 5. in vulgari christianorum usu ac sermone denotat solum DEI cultum latreyticum, proptereaque Sanctos colere quidem, non tamen adorare nos profitemur, sumendo adorationem strictè pro cultu latrevtico; quo sensu *Deuter.* 6. & *Matth.* 4. dicitur: *Dominum DEUM tuum Adorabis, & illi soli servies.*

Quæres 3tiò, qualis cultus seu adoratio debeatur Christo ?

R. Christo debetur cultus latriæ, & qui- 425-  
dem absolutus. Ita cum S. Thoma 3. p. q. 25. a 2. *Communissimè DD.* Ratio est: quia illi debetur cultus latriæ & quidem absolutus, cui inest Divinitas: atqui Christo utpote constituto ex Natura divina & humana

simul inest Divinitas, immò *omnis plenitudo divinitatis* juxta Apostolum Coloss. 2. 9. ergo huic debetur, Unde etiam *Hebr. 1.* dicitur *adorent eum omnes Angeli Dei.*

426. Quod verò hic de adoratione Christo debita diximus, illud ipsum dictum intelligas velim de Venerabili & Augustissimo Eucharistiæ Sacramento, quippe in quo verè & realiter Christum Dominum ceu verum DEUM & hominem contineri, fides vera nos docet. Hac de causa Concilium *Trident. ss. 13. cap. 5. & can. 6. de eod. Sacr.* ait: *si quis dixerit in Sancto Eucharistiæ Sacramento Christum unigenitum DEI Filium non esse cultu latriæ etiam externo adorandum: vel non publicè, ut adoretur, populo proponendum, & ejus adoratores esse idololatrias, anathema sit.*

At, inquires, qualis cultus debetur humanitati Christi secundum se præcisè spectatæ?

427. R. Si humanitas Christi spectaretur præcisè secundum se, id est seorsum quasi & à Verbo D. separatim sumpta, esset colenda duntaxat cultu hyperdulæ; quia ut sic spectata habet quidem excellentiam supernaturalem maximam super omnes creaturas ratione unionis hypostaticæ, non tamen infinitam, veluti paulò supra n. 423. jam insinuavimus. Verùm enim verò cum humanitas Christi semper subsisterit, & etiam  
annum

annum subsistat subsistentiâ Verbi, ideò-  
que realiter unita divinitati; hinc practicè  
loquendo semper adoranda est cultu latriæ;  
id, quod hodie dum confirmat perpetua pra-  
xis Ecclesiæ, quippe quæ in communibus  
orationibus ad Christum fufis nunquam au-  
ditur dicere: *ora pro nobis*, sed semper: *mi-  
serere nobis*. Unde & Concilium Ephes.  
*auth. 8.* definivit: *siquis audet dicere, as-  
sumptum hominem coadorari oportere quasi  
alterum alteri, & non potius una adoratione  
honorificat Emanuelem secundum quod factum  
est Caro Verbum; anathema sit. Rursus ex 5.  
Synodo (quæ fuit 2. Constantinopol.) can. 9.  
habetur: si quis non una adoratione DEUM  
Verbum incarnatum cum propria ipsius carne  
adorat, sicut ab initio DEI Ecclesiæ traditum  
est; anathema sit.*

Quæres 4to, utrum etiam Sanctissimum  
Nomen JESU sit adorandum?

R. Hoc Sanctissimum Nomen adorandum est & colendum cultu latriæ respectivo, 428.  
Ita communiter Catholici contra Calvinistas  
præsertim Puritanos. Ratio est: quia hoc  
Sanctissimum Nomen nobis repræsentat &  
quodammodo innuit ipsum Christum Salva-  
torem nostrum tanquam verum Deum &  
hominem: ergo huic respectivè debetur idem  
cultus, qui absolutè debetur Christo: atqui  
Christo debetur cultus latriæ absolutus: ergo  
cultus latriæ respectivus debetur ejusdem No-

mini. Hac de causa Apostolus *Philipp. 2.* ait : *in nomine Jesu omne genu flectatur &c.*  
 Quæres 5tò, utrum Sancti à nobis licite colantur seu honorentur?

429. R. Affirmative. Ita *omnes Catholici* contra Calvinum, Lutherum, aliòsque hæreticos seu Sectarios. Ratio est : quia ille recte colitur, cui competit singularis excellentia, velut ex hætenus dictis liquet, cum cultus aliud nihil sit, quàm quædam contestatio excellentiæ in alio repertæ : atqui in Sanctis ceu specialibus Dei amicis reperitur singularis prærogativa excellentiæ supernaturalis, scilicet gratia & Sanctitas à DEO participata, sicut & intima amicitia cum DEO, qua perpetuò fruuntur : ergo &c. Hinc Doctor Angelicus *3. part. q. 25. a. 6.* ait : *Sanctos DEI in veneratione habere debemus tanquam membra Christi, DEI Filios & amicos, & nostros intercessores.* Idipsum constat innumeris aliis tum Sanctorum Patrum, tum etiam S. Scripturæ testimoniis, confirmaturque nunquam interruptâ SS. Ecclesiæ Romano-Catholicæ praxi, prout constabit ex proximè dicendis 431.

Quæres 6tò, qualis cultus debeatur Beatissimæ Virgini Mariæ ?

430. R. Huic debetur cultus Hyperdulix. Ita tota Ecclesia contra Bezam, aliòsque Sectarios. Ratio est : quia Sacratissima hæc semperque illibata Virgo excellentia Sanctitatis & do-
- norum

norum gratiæ supernaturalium superat, & longè antecellit omnes Angelos & puros homines : ergo meretur cultum huic excellentiæ proportionatum, superiorem quidem reliquis omnibus Sanctis, inferiorem tamen Christo ceu vero DEO & homine simul : atqui iste est cultus hyperdulæ ergo &c.

Quæres 7<sup>timò</sup>, qualis cultus sit debitus reliquis Sanctis ?

R. Reliquis Sanctis à Sancta Matre Ecclesia vi Canonizationis solemnisi aut Beatificationis declaratis ut talibus, rectè impenditur cultus Dulæ etiam publicus: rectè insuper iidem Sancti à nobis invocantur. 431.  
Hæc responsio quoad utramque partem nondum est inter Catholicos communiter recepta, sed etiam de fide, utpote jam sæpius per diversa Concilia signanter in *Synodo 7. general Act. 7.* nec non per Concilium Trident. SS. 25. c. 2. *de invocat & venerat* SS. declarata, innumerisque SS. Patrum testimoniis roborata, prout passim videre licet apud DD. nostros. Ut proin ab hæreticis sine nota temeritatis & pertinaciæ negari sanè non possit. Ratio prioris jam fuit data n. 429. Ratio autem posterioris, quòd scilicet iidem Sancti à nobis licetè invocentur, non quidem velut *per se* largitores & auctores bonorum, neque ut Mediatores immediati apud DEum (nam unus est Mediator DEI & hominum

minum *Iesus Christus* 1. *Timoth.* 2. ) sed velut Mediatores mediati sive subalterni duntaxat, quatenus videlicet ipsi meritis Christi interpositis à Patre nostro cœlesti nobis impetrent, seu etiam impetrare nos juvent ea, quæ postulamus :

Ratio inquam validissima hujus desumitur à pari; nam I. licet invocare homines, ut pro nobis orent apud DEUM; sic enim 1. *Reg.* 7. *dixerunt* ( filii Israel ) *ad Samuelem*, *ne cesses clamare pro nobis ad Domium DEum nostrum, ut salvet nos.* Item *Job.* 42. v. 8. dicitur : *Servus meus Job orabit pro vobis, faciem ejus suscipiam.* Denique ad *Rom.* 15. 30. ait Apostolus : *obsecro ergo vos fratres -- ut adjuvetis me in orationibus vestris pro me ad DEum.*

II. Licet invocare Angelos Sanctos, prout manifestè eruitur ex illo *Gen.* 19. v. 21. ubi Angelus ad rogantem Loth dixisse fertur : *ecce etiam in hoc suscepi preces tuas, ut non subvertam urbem, pro qua locutus es :* ergo Loth Angelum invocavit seu rogavit, ne subverteret &c. Immò & Angelum pro Jerosolyma intercessisse disertè narrat *Zach.* 6. 1. v. 12. Idipsum habetur *Josua* 5. 13. & alibi locorum sæpius.

III. Etiam licitè invocantur Sancti defuncti, uti habetur *Baruch* 3. 4. ubi *universus populus legitur DEUM rogasse* sequentibus verbis : *Domine omnipotens Deus Israel, au-*  
di

*di nunc orationem mortuorum Israel &c.* Ex quibus brevissimè contrà hæreticos conficitur sequens argumentum : licitum est invocare homines adhuc viventes , utprò nobis vel apud DEum , vel apud hominem alium intercedant , prout quotidiana experientia probat : licitum insuper est invocare Sanctos Angelos , & homines cum fama Sanctitatis defunctos , quorum intuitu DEUM multa nobis contulisse beneficia, immòindies conferre, constat ex hætenus dictis : ergo similiter fas est Sanctos in cœlis jamjam existentes , meritisque abundantes invocare , quippe qui apud DEum multò potentiores sunt , quàm nos homines in via adhuc degentes, nec minori erga nos charitate præditi , quibus proin nec voluntasintercedendi pro nobis deficit, neque facultas: vel dent nobis Adversarii aliquam disparitatem.

At verò , inquiunt Hæretici, I. Soli Deo debetur honor invocationis , ut habetur *Matth. 4. 7. 10.* II. Unus est Mediator DEI & hominum Christus JESUS 1. *Timoth. 2. 7. 5.* III. Christi merita sunt infinita & ipse solus sufficit ad omnia nobis impetranda. IV. Sancti de vivis nihil sciunt ; ad quid ergo juvet eos interpellare ? V. *Apocal. 22. 7. 9.* Legitur Angelus Joannem avertisse ab invocatione , dicens : *vide ne feceris , conservus enim tuus sum , DEum adora :* ergo  
Sancti

Sancti nedum inutiliter, sed ineptè etiam & illicitè invocantur.

432. R. Simpliciter ad hæc omnia negando conseq. Ut verò constet, quo modò singulis objectionibus in particulari occurrendum, Respondeo breviter ad I. distinguendo ant. Soli DEO debetur honor invocationis, *tanquam auctori* bonorum in cuius potestate est conferre vel non, conced. *tanquam intercessori*, neg. ant. cum conf. Ad II. R. disting. Unus est Mediator immediatus *meditatione redemptionis*, qui nos Patri suo reconciliavit, conced. *mediatione interpellationis tantum*, ita ut præter hunc nullus alius pro nobis intercedere valeat apud Deum, neg. ant. cum conf. Secus enim nec liceret invocare hominem, ut pro nobis roget Deum. Ad III. R. disting. ant. Christi merita sunt infinita *in actu primo*, conced. *in actu 2dò*, ita ut nulla indigeant applicatione nostra vel sanctorum cooperatione seu etiam intercessione impetranda, neg. conf. Et licèt verum sit, quòd absolutè loquendo ipse solus sufficiat ad omnia nobis impetranda: ex hoc tamen ineptè infertur, quòd nullum alium præter Christum liceat interpellare, quemadmodum (ut ad hominem loquar) ex eo, quòd Imperator vel Rex tuus solus per seipsum sufficeret ad te temporaliter beatificandum, ineptè concluderes: ergo, nullo alio intercessore indigeo &c. Ad IV. R. disting. ant. Sancti de nobis nihil



hil sciunt *sine revelatione* à Deo iisdem communicata, con. *supposita tali revelatione*, quam sin minus de omnibus nostram salutem concernentibus, tamen de nonnullis procul dubio habent, præsertim si specialiter in eum finem à nobis invocentur, negant cum conseq. Secus enim quomodo possent in cœlis gaudere super uno peccatore in terris pœnitentiam agente ut habetur *Luc. 15. 7.* nisi Deo revelante cognoscerent talem pœnitentiam? Si autem possint immò actu cognoscant talem pœnitentiam, quidni etiam agnoscant nostras preces? Ad V. R. in illo loco, prout ex littera liquet, nihil agi de invocatione, sed de adoratione, Quòd autem adorationem Joanni interdixerit, vel ideò contigit, quia Joannes, tunc existimavit, illum qui sibi apparuit, esse DEum, proptereaque adorationem propriè dictam seu cultum latrevticum soli Deo debitum eidem deferre voluit; vel si supponatur interdixisse etiam adorationem minùs propriè dictam seu cultum dulcè, dicendum, quòd id fecerit propter dignitatem Apostolatûs, & eminentiam Sanctitatis officiique in Joanne perspectam: absolute autem hujusmodi adorationem Angelorum non esse illicitam, clarè colligitur ex illo *Genes. 19. v. 1.* ubi dicitur, quòd cùm Loth vidisset duos Angelos, *surrexit, & ivit obviam eis, adoravitque*

que pronus in terram, nec propterea ab Angelis fuit reprehensus.

Quæres 8tavò, qualis cultus debeatut SS. imaginibus Christi & Sanctorum ab Ecclesia Canonizatorum &c. &c.

433. R. Dictæ imagines nedum in Ecclesiis aliisque piis seu etiam honestis locis licite ponuntur (prout quotidiana fidelium praxis probat) sed insuper honorari & coli debent cultu respectivo earundem Prototypis debito, ita scilicet, ut imagines Christi & Dei cultu latriæ respectivo; imagines B. Virginis cultu hyperdulæ, reliquorum verò Sanctorum imagines cultu dulæ respectivo colendæ sint. Ita fides Catholica contra Wiclefum, Carolstadium & Calvinistas reprobantes omnem prorsus usum imaginum, nec non contra Lutheros, admittentes quidem usum imaginum in ordine ad conservandam memoriam, minimè tamen in ordine ad aliquem cultum iisdem exhibendum, utpote quem prorsus superstitiosum existimant, prout constabit ex dicendis proximè. Jam verò hujus asserti nostri ratio fundatissima hæc est: quia quidquid Sacrum & Sanctum est, eo ipsò veneratione est dignum seu colendum, prout nedum ratio naturalis dicit, sed & Sacra Scriptura satis clarè innuit *Exod. 3. & Act. 7. 33.* ubi Dominus legitur dixisse ad Moysen: *solve calceamentum*

tum

*tum pedum tuorum : locus enim , in quo stas terra Sancta est.* Similiter 1. Reg. 6. Deus legitur septuaginta viros & plures de populo bethsamitico percussisse , eò quòd Arcam Dei utpote Sanctam non satis reverenter conspexissent &c. atqui imagines Christi & Sanctorum Sanctæ sunt ; quandoquidem ex institutione sua peculiarem habeant relationem ad Christum & Sanctos ; imago quippe propria & suo modo peculiaris est illius, cujus est imago, proptereaque Adversarii volentes nolentes coguntur fateri , quòd dum imago alicujus honoratur vel dehonatur, etiam ille cujus imago est, censeatur in morali hominum existimatione honorari vel dehonari : ergo imagines Christi & Sanctorum honorandæ sunt, oppositum verò faciendo hæretici pessimè faciunt , quemadmodum malè facerent dehonorando effigiem v. g. August. Imperatoris , prout ipsimet negare minimè possunt. Hac de causa ( ut brevitatis causâ præscindam ab auctoritate Sanctorum Patrum etiam primitivæ Ecclesiæ, qui Sanctorum imagines verbò & exemplo honorari docuère , prout videre licet apud R. P. Julium Cæsarem *in suo Epitom. controvers. demonstrat. 25. cap. 1.* nec non ab innumeris miraculis , quibus D. O. M. venerationem hanc Religiosissimam contestatam ac probatam voluit ) lubet duntaxat in me-  
*R. P. Elbel, Pars II. de Fide &c.* K k dium

dium & confirmationem hujus doctrinæ adferre verba concilii Tridentini SS. 25. *de invocat. & venerat.* SS. ibi : *imagines porro Christi ( inquit ) Deiparæ Virginis & aliorum Sanctorum in templis præsertim habendas & retinendas, eisque debitum honorem & venerationem impertiendam - - quoniam honos, qui eis exhibetur, refertur ad Prototypa, quæ illa repræsentant &c. &c.*

At, inquit Adversarii. I. *Exod. 20.* ( & rursus *Deuter 5. v. 8.* ) Deus prohibendo ait : *non facies tibi sculptile, neque omnem similitudinem, quæ est in cælo desuper, & quæ in terra deorsum, nec eorum, quæ sunt in aquis sub terra, non adorabis ea, neque coles : ergo &c.* II. Catholici idem faciunt hodie, quod olim Judæi & Idololatæ ; quemadmodum enim nos in imagine Dei Sanctorumve protestamur venerari non ipsum lignum vel lapidem, sed Eum, cujus imago est, ita prorsus Idololatæ non idola sua, sed in idolis v. g. vitulo aureo Deum honorare voluere : ergo nulla est differentia inter catholicum & idololatram III. Si nos Catholici in imaginibus nil aliud veneremur, quàm Prototypon, tunc unam imaginem v. g. Christi Domini, seu etiam B. Virginis deberemus æquè venerari quàm aliam : at, hoc non facimus, nam unam votivis peregrinationibus vel etiam tabulis votivis seu anathematibus

tibus honoramus, alteram non: ergo &c.  
IV. Denique (iniquiunt) homo est perfectior imago Dei, quàm alia quævis inanimata vel etiam animata creatura, & tamen hominem adorare propter prototypon nefas foret: similiter nefas est adorare aliam quamcunque imaginem inanimatam &c. &c. Hæc sunt principalia fundamenta Adversariorum; ad quæ tamen facillimè

℞. ad I. Explicando textum allatum & 434. distinguendo: non facies -- non adorabis ea, adoratione *Deo soli debita*, id est, *culu latriæ*, con. *adoratione* vel potius *cultu duliæ* quem solum Sanctis aliis (præter B. Virginem &c.) debitum dicimus, neg. ant. cum conseq. Nec obstat, quòd in cit. textu sub disjunctiōe dicatur: *neque coles*: esto enim imago merùm materialiter spectata non mereatur cultum, meretur tamen hunc ipsum Prototypon, cujus est imago, veluti liquet in humanis: unde redit eadem distinctio: non licet colere *cultu latrevtico*, con. *cultu duliæ* aut (respectivè) *hyperduliæ*, neg. ant. cum conseq.

Ad II. Negando ant. contrarium enim clarè liquet, de Judæis quidem *Psal. 105. fecerunt vitulum in Horeb, & adoraverunt sculptile*, & NB. *obliti sunt DEUM, qui salvavit eos.* De Gentilibus similiter liquet ex illo *Psal. 95. Dii gentium dæmonia &c.*

K k a item

ginem DEI omnes æqualiter participemus, ideoque in hoc passu nullus sit excellentior altero: ergo non est, cur unus alterum adoret sed magis convenit, ut omnes adoremus DEum, ad cuius imaginem & similitudinem omnes creati sumus.

Quæres denique 9nò, utrum etiam Sanctorum Reliquiis debeatur aliquis cultus aut veneratio ?

Ante responsionem supponendum est, <sup>435.</sup> nomine Reliquiarum Christi intelligi lignum Crucis, sudarium, spinas ex corona, sanguinem &c. Per Reliquias autem Sanctorum intelliguntur Eorundem ossa, Sanguis, vestimenta, aljavè mortificationis instrumenta, quibus carnem suam rede gère in servitutem spiritûs &c. Rursus solent Doctores distinguere inter Reliquias Principales & non principales. Principales (teste Felice Potestas *Exam. Confess. tom. 1. p. 2, c. 6. n. 1519.*) sunt Caput, crus, brachium, aut illa pars corporis, in qua passus est Martyr, dummodo integra sit, & non parva, legitime ab Ordinario vel Ecclesiæ auctoritate approbata (huc insuper referri debent Crux Christi, spinæ & similia passionis instrumenta) écontra auricula, digitus, vestes Sanctorum &c. inquit idem Felix Potestas, non sunt Reliquiæ insignes. His suppositis & notatis,

¶. Ad præsens quæsitum. Reliquiæ Christi

sti & Sanctorum in veneratione habendæ sunt & colendæ cultu respectivo: illæ quidem latriæ, istæ verò hyperdulæ aut dulæ &c. Ratio hujus responsionis inter Catholicos receptissimæ est; quia Deus ipse honorat Sanctorum suorum Reliquias, patrandò per illas aut ad illarum præsentiam miracula; ergo & nos illas debemus revereri. Ant. constat ex S. scriptura 4. Reg. 2. DEus Eliæ pallio stetit, & divisit aquas Jordanis. Item 4. Reg. 13. ad præsentiam Cadaveris Elisæi suscitavit mortuum. Rursus Act. 19. legitur per cinctoria & sudaria Pauli Apostoli sanasse ægrotos. Denique idipsum probant historiarum monumenta plena miraculis, quæ DEus fecit per Sanctorum suorum Reliquias, quibus omnibus fidem negare nemo potest, nisi stolidissimus & pertinacissimus ingenio. Profectò si Adversarii nolint credere auribus; oculis saltem credere debebunt, dum quorundam Sanctorum corpora & arida ossa odorato liquore, & salutari oleo perfusa atque manantia viderint, prout in multis orbis Christiani partibus monstrantur. Sapienter proin hæc veritas Catholica antiquissima Ecclesiæ praxi, & SS. Patrum testimoniis (apud R. P. Julium Cæsarem in suo *Epitome Controvers. demonstr.* 24. §. 1. videndi) roborata, etiam pridem in Synodo VII. Act. 3. & 7. necnon in Concilio Lateran; sub Innocentio

centio III. definita, denuo contra Sectarios nostri temporis in Concilio Trid. ss. 25. de *Vener. SS. Reliq.* instaurata fuit sequentibus omnino verbis: *Sanctorum Martyrum, & aliorum cum Christo viventium Sancta corpora: quæ viva fuerunt membra Christi, & templum Spiritûs Sancti, ab ipso ad æternam vitam suscitanda & glorificanda, à fidelibus veneranda sunt: per quæ multa beneficia à DEO hominibus præstantur &c. &c.* Cæterum quod cultu respectivo duntaxat venerandæ sint, constare potest ex dictis n. 433. de Sacris imaginibus: est enim utrobique par ratio.

Dices fortassis cum aliquo Hæretico I. In Scriptura Sacra nihil prorsus habetur de colendis Sanctorum Reliquiis: ergo hic cultus omnino reprobandus est: omnis quippe cultus arbitrarius à Paulo condemnatur *Coloss. 2. 23.* II. Quin potius contrarium Scriptura Sacra innuit, dum *Luc. 11. 47.* perhibet Christum Legis peritis dixisse: *væ vobis, qui edificatis monumenta Prophetarum: patres autem vestri occiderunt illos.* Ex quo liquet illos Prophetas fuisse Martyres Sanctos & tamen &c. ergo &c. III. Ex divina voluntate corpus Moysis defuncti occultatum fuit Judæis, ne illud colerent, prout constat ex Epistola Catholica S. Jacobi Apostoli: ergo ne Sanctorum quidem Reliquiæ vel ossa sunt collenda. IV. Per cultum Reliquiarum



rum diminuitur cultus & honor divinus : ergo. &c. V. Denique cum Reliquiis committuntur innumeræ fraudes & deceptiones, dum verarum locô falsæ hinc inde sparguntur, prout vel ex hoc haud obscurè convincitur, quòd subinde de uno Sancto ( sicut & de S. Cruce Christi ) tam multæ circumferantur, ut si veræ essent, planè necessarium fuisset, vel eundem Sanctum plura habuisse corpora, vel certè corpus gigantæum ; hinc non immeritò natum est commune illud verbi verbum : *multorum Reliquia in terris honorantur, quorum anima in inferno cruciantur.*

437. R. Ad I. disting. ant. In scriptura nihil habetur *per modum præcepti*, transl. *per modum exempli*, neg. ant. cum conseq. Nam *Exod. 13. 19.* legitur, quòd Moyse discensurus ex Ægypto honorificè transtulerit ossa Patriarchæ Joseph : nec dubitandum, quin aliis præceperit, ut eadem ossa in veneratione haberent : an propterea Adversarii nostri Moylem condemnabunt superstitionis ? Negari proin debet, quòd hic cultus sit merè arbitrarius, utpote nedum exemplis SS. Scripturæ, sed & miraculis innumeris à DEO intuitu Sacrarum Reliquiarum patris confirmatus.

Ad II. R. disting. ant. Christus legitur intonuisse væ : &c. eò quòd Legis periti ædificarent Prophetarum sepulchra, idque  
in

*in honorem eorundem Prophetarum* velut SS. Martyrum , neg. *in honorem suorum Majorum* , qui Prophetas injustè occiderant, concedo, hoc enim Christus Dominus innuit dum *l. cit. vers. 48.* alt: *profectò testificamini* , quòd *consentitis operibus Patrum vestrorum* ( qui scilicet Prophetas occiderunt ) Ex quo liquet , quàm longè alieni scribæ & Pharisæi ædificantes dicta sepulchra fuerint ab intentione SS. Ecclesiæ Romano-Catholicæ.

Ad III. disting. ant. Corpus Moysis defuncti fuit Judæis absconditum, eo fine ut non colerent *!cultu dulia nego. cultu latrevitico & superstizioso* , utpote soli DEO, & nulli alteri debito, concedo. Cùm enim populus ille ad superstitiones fuerit promtissimus in tantum, ut etiam Vitulum aureum locò DEI habuerit, profectò fuisset maximum periculum, ne pariter videns Sacras Reliquias Moysis dicerent : *Hi sunt DII tui Israel, qui te eduxerunt de terra Ægypti Exod. 32 v. 4.* Hujusmodi periculum longè abest à nobis, veluti ex doctrina hætenus tradita , & inter Doctores Catholicos plebèmq; Christianam communissimè recepta quivis Adversariorum à furo passionis alienus facillè capiet.

Ad IV. R. negando ant. Nam per cultum SS. Reliquiarum potius augetur cultus DEI, quia non colimus eos, nisi in quantum

K k §

fuerunt

fuerunt & actu sunt singulares DEI amici: talis verò cultus ultimè redundat in DEum, quemadmodum honorifica illa translatio officium Joseph Patriarchæ suo modò redundavit in honorem Patriarchæ Jacob, ceteri Parentis optimi.

Ad V. disting. ant. Cum Reliquiis committuntur innumeræ fraudes, *contra mentem & intentionem Ecclesiæ*, conced. *juxta mentem Ecclesiæ*, neg. ant. cum conseq. Nam Ecclesiæ diligentissimè solet inquirere in veritatem SS. Reliquiarum: ex eo autem, quòd subinde malitiâ unius alteriusvè fraus contingat, Sacrarum Reliquiarum cultus reprobari non debet, quemadmodum nullus prudentum indicat Sacramentorum usum, immò & aliorum contractuum, negotiationumvè usum esse reprobandum, eò quòd in similibus per hominum malitiam fraudes irrepere soleant, aut possint.



§. II.

Proponuntur, & breviter resolvuntur Casus practici de invocatione Sanctorum, nec non de veneratione Sanctorum Reliquiarum.

CASUS PRIMUS.

**T**Itius è Lutheranò factus Catholicus sapiùs quidem videbatur immò & audiebatur ferventer orare, ita tamen, ut suas preces nunquam direxerit ad aliquem Sanctorum, sed ad solum DEum, eundem pro obtinendis beneficiis interpellando per Christum Dominum nostrum. Hujus rei causâ, dum quondam ab uxore sua fuisset quodammodo correptus & interrogatus, cur ergo Sanctos nunquam invocet? respondit, DEum solum posse, & velle hominibus benefacere, proptereaque sibi non opus esse aliorum Sanctorum patrocinio. Paulo post uxor de Salute sui Mariti non nihil sollicita rem hanc narravit Confessario Titii, qui huic in proxima confessione injunxit certas preces de B. Virgine Maria, nec non & litanias de omnibus Sanctis pœnitentiæ locò dicendas.

Quaritur jam ad hanc facti speciem primò, quid de fide seu etiam fidelitate Titii tenendum sit? 2. An Confessarius bene egerit dictam pœnitentiam.

*uitentiam injungendo, & an Titius potuerit obligari adeandem persolvendam?*

438. R. Ad primum quæsitum, de Titio merito dubitari, immò probabilius ex data responsione concludi posse, eum non esse bonum Catholicum: tametsi enim verum sit, quòd DEUS solus seu se solo possit, immo & velit nobis benefacere, hancque ob causam ipsum solum velut fontem & auctorem omnium bonorum ultimato invocandum esse juxta dicta *in conferent. priori n. 398.* ac proin Sanctorum invocationem non esse simpliciter necessariam ad salutem; quia tamen Titius hætenus nullum prorsus Sanctorum invocare voluit, quin potius protestatus fuit, Eorundem patrocínio se non indigere &c. profectò satis clarè manifestavit, in pectore suo etiamnum aliquid de Lutheranismò latere, seque flocci pendere Sanctorum patrocínium velut inane commentum; quod utique Sanæ Fidei & Orthodoxæ Doctrinæ repugnat, docente Concilio Trident. SS. 25. *in decreto de invocatione Sanctorum, bonum atque utile esse simpliciter Eos (Sanctos scilicet) invocare, & ob beneficia impetranda à Deo per Filium Ejus Jesum Christum Dominum nostrum, qui solus noster redemptor & salvator est, ad eorum orationes, opem, auxiliúmque confugere &c. &c.*

R. jam

R. jam ad 2dum quæsitum , Confessarium omnino prudenter & bene fecisse preces de Sanctis pœnitentiæ causâ dicendas injungendo ; Cum enim Titius in fide fuerit suspectus ( velut ex proximè dictis liquet ) debuit sine dubio Confessarius Ejus dispositionem , mentemque circa cultum & invocationem Sanctorum explorare : atqui hoc vix alio modo commodiori præstare potuisset , quàm injungendo dictas preces ; tum quia per hoc medium consuluit honori conjugis, cujus delationem Maritus inde nequaquam potuit colligere ; tum etiam quia unâ simul consulit reverentiæ Sacramenti & pœnitentis salutis : reverentiæ quidem, quia si pœnitens Sanctorum invocationem, cultumque contempsisset , procul dubio talem pœnitentiam non acceptasset, consequenter Sacramentum non fuisset frustratum : Salutis autem ; quia peragendo talem pœnitentiam cum ingenti salutis emolumento potuit magis ac magis disponi, seu etiam excitari ad cultum Sanctorum. Cæterum extra controversiam esse debet, quòd Titius hanc pœnitentiam debuerit acceptare, quippe quæ gravitati delictorum, ut suppono , fuit commensurata, simulque reverentiæ Sacramenti, nec non salutis pœnitentis summopere proficua : tales autem pœnitentias quivis pœnitentum tenetur acceptare, veluti ex professo diximus in Theologia

logia Sacramentali *part. 2. confer. 9. n. 227.*

At, inquires, quid tenendum de illis, qui invocant, quos nōrunt cum fama sanctitatis mortuos quidem, nondum tamen ab Ecclesia canonizatos aut beatificatos.

440. R. Si id faciant cultu privato duntaxat, minimè culpandi, quin potius laudandi sunt: secus si illis vellent deferre cultum publicum, utputa precibus à tota Ecclesia ad DEum directis eos invocandi, eorumvè nomina lytaniis inferendo &c. &c. Ratio est: quia universaliter loquendo ( prout illico patebit lex proximè dicendis ) cultus privatus laudabiliter & utilissimè quidem desertur hominibus cum fama Sanctitatis defunctis, non tamen cultus publicus: atqui invocatio illorum importat quendam cultum: ergo si hæc privatim fiat, laudabiliter, si autem publicè in sensu proximè dicto & mox ampliùs declarando fiat; culpabiliter omnino fit; quia contra constitutiones SS. Pontificum, uti mox dicetur.

## CASUS SECUNDUS.

**S***Empronia devota fœmina multa partim fama volante audiërat, partim etiam legërat de insigni Sanctitate Venerabilis Matris Abbatissæ Roveredana Mariæ Joannæ de cruce, quam ob rem longo tempore desideravit.*

vit, tandémque obtinuit de eadem nonnullas recolas seu etiam Reliquias sacras, utputa numisma Sacra, coronulam precariam & similia: Quin & nuper sibi procuravit quandam effigiem Ejusdem Venerabilis Matris jacentis in pheretro vultu admodum rubente instar, dormientis (absque radiis tamen,) prout paulò post felicissimum obitum suum visa fuit; hanc verò effigiem Sempronia domi suæ supra quoddam altariolum collocatam venerari assollet, flexisque coram eadem poplitibus haud infrequenter ejusdem patrocinium implorare; & quia firmiter sibi persuasum habet, se nuper intercessione hujus insigne quoddam beneficium obtinuisse, hinc à quodam Sacerdote (oblato eidem congruo stipendio) petit, quatenus is vellet offerre quoddam SS. Missæ Sacrificium tum in gratiarum actionem, tum etiam in honorem ejusdem Venerabilis Matris, de cujus Sanctitate dubitandi locus jam nullus videtur superesse. Dubitatur nihilominus ad hanc facti speciem 1. an, vel qualem cultum præfatis Reliquiis Sempronia potuerit licite exhibere? 2. An memoratam effigiem licuerit ponere supra alteriolum, eandemque flexis etiam poplitibus venerari? 3. Denique an Sacerdos tutâ conscientia potuerit acceptare stipendium pro Sacro ad memoratam intentionem offerendo & applicando, & quid huic specialiter fuerit observandum?

R. ad



441. R. ad primum Sempronia potuit dictis Reliquiis deferre *cultum privatum*, immò nedum licitum, sed & pium ac laudabile est hujusmodi Reliquias v. g. vestes, scripturas, instrumenta mortificationis aut pietatis, utputa libros, imagines &c. secum portare, ad collum suspendere, osculari, aliòvè simili cultu privato venerari. Ita Fagnanus in c. *cùm ex eo* 2. de Reliq. & venerat Sanctior. n. 11. quem sequitur R. P. Reiffenstuel lib. 3. decret. tit. 45. §. 2. n. 29. & 30. Ratio est, quia in cit. cap. 2. ab Ecclesia solum interdicitur, ne quis præsumat *cultum publicum* exhibere Servis DEI nondum Canonizatis aut beatificatis: ergo à contrario cultus privatus censerì debet licitus.

442. R. jam ad 2dum quæsitum ejusdem Causus affirmative. Esto enim ad tollendos seu etiam præcavendos abusus, qui in hac materia potuerant irrepere, immò hinc inde privatis erroribus irrepsère, Urbanus VIII. *Bulla Sanctissimus* 39. itèmque Bullâ *Cælestis Jerusalem* 134. videndis tum in Bullario Cherubin tom. 4. tum etiam apud Reiffenstuel loc. cit. §. 1. n. 19. esto inquam dictus Pontifex gravissimè prohibuerit, ne imagines defunctorum, qui cum fama Sanctitatis aut insignis pietatis mortui quidem, nondum tamen ab Ecclesia Canonizati, aut Beatificati fuère cum aureolis, radiis, seu splendoribus pingantur, vel taliter pictæ

pietæ habeantur, sive dein publicè, sive privatim & in occulto asserventur, vel verò in templis, Sacrariis, vel Oratoriis quibuscunque, præsertim ubi Sacrificium Missæ vel alia officia peraguntur &c. licitum nihilominus est eorum imagines sine radiis, splendoribus, aut aureolis depictas vel sculptas domi suæ habere, easque ibidem etiam videntibus aliis venerari : nam ut perbene advertit Reiffenstuel in *Theolog. mor. tr. 5. dist. 1. n. 39.* nomine cultus privati intelligitur ille, qui non exhibetur tanquam institutus ab Ecclesia vel nomine Ecclesiæ, sed fit ex peculiari devotione colentis, sive dein privatim, sive publicè, videntibus scilicet aliis fiat : atqui Sempronia non colit dictam imaginem nomine Ecclesiæ, & imago ipsa supponitur depicta sine radiis seu splendoribus &c, licet supponatur picta vultu nonnihil rubente & viventis instar, prout post felicem transitum suum eadem Venerabilis Mater cunctis videntibus apparuit : ergo licitè omnino hoc fit. Vide etiam, si placet, Lantusca in *theatro Regular. V. Beatificatio n. 2.*

R. Ad 3tium quæsitum ejusdem Casus, 443: Sacerdos potuit equidem acceptare stipendium congruum cum intentione celebrandi Sacrum tum in gratiarum actionem pro obtento beneficio, tum etiam in honorem dictæ venerabilis Matris Roveredanæ, ita  
*R. P. Elbel. Pars II. de Fide &c. Ll. 1a.*

tamen , ut Missam debeat sumere de festo aut feria eo die currente , non autem de ipsa Venerabili Joanna , aut de communi Virginum cum memoria seu invocatione Ejusdem. Ratio est : quia Missa fit nomine Ecclesiæ , ideóque censetur cultus publicus : atqui non licet cultu publico venerari Sanctum aut Sanctam nondum publica auctoritate Ecclesiæ albo Sanctorum vel beatificatorum insertam , veluti habetur *cap. 1. & 2. de Reliq. & Venerat. Sanctor.* nec non ex constitutionibus Urbani VIII. proximè allegatis : ergo non licet legere Missam de Venerabili Matre , vel cum speciali oratione de eadem , licet ex privata Sacerdotis intentione possit Sacrificium applicari quodammodo ad honorem illius : quæ intentio fit potius ex privata devotione ; prout etiam fieri censetur , dum sacerdos Missam applicat pro aliquo excommunicato non tolerato , &c. Videatur Sanchez *lib. 2. in decalog. c. 43. à n. 3.* vel Bonacina *disp. 3. in decalog. q. 1. n. 2.* Reiffenstuel *Theolog. mor. tr. 5. dist. 1. n. 41.*

### CASUS TERTIUS.

**C**Ajus è Germania nostra Romam usque comitatus fuit quendam magnum Dominum , cui á servitiis exstitit ; at verò dum in Patriam reverterentur , idem Cajus itineris & ser-

*servitii hujus pertasus, clanculo Dominum suum deseruit, unà secum furtivè asportans quandam cistulam, in quo diversæ Sanctorum Reliquiæ, nec non quædam Sanctæ Crucis particula continebatur unà cum autenticis. Porro Cajus dictas Sacras Reliquias hinc inde suis amicis obtulit, reservando sibi Sacratissimam Crucis particulam, cujus loco alias nonnullas ex communi ligno formatas particulas aliis præsertim simplicioribus hinc inde distribuit & quidem lucri capiendi causa. Jam verò facti hujus pœnitens sciscitatur à quodam Theologo*  
*1. quomodo peccaverit auferendo memoratam cistulam, in qua noverat, diversas Sanctorum Reliquias latere? Et 2. an vel quomodo peccaverit distribuendo falsas S. Crucis particulas lucri capiendi causâ?*

**N.** Ad primum quæsitum. Cajum auferendo cistulam illam indubitanter commisisse peccatum mortale & quidem Sacrilegium. Ratio est: quia supponitur abstulisse rem, & quidem Sacram Domino rationabiliter invito: atqui tale furtum est Sacrilegium: ergo. Nec refert, quòd Sacræ Reliquiæ non sint pretio humano æstimabiles &c, hæc enim circumstantia non minuit, sed potius aggravat malitiam hujus furti Sacrilegi, prout bene advertit Castropalao *part. 2. tr. 8. disp. 1. pu. 6. n. 19.* Sylvester *verb. Reliquiæ q. 2. Sanchez lib. 2. mor. cap. 43.*

n. 23. Azorius 1. p. l. 9. c. 8. q. 9. & alii plures.

Ergonè inquires, non datur parvitas materiæ in ablatione SS. Reliquiarum?

445. R. Posse quidam dari, & suppositis certis conditionibus, scilicet 1. si auferatur pars valde exigua. 2. si in Ecclesia sint aliæ ejusdem Sancti partes (quibus de causis excusari possunt personæ, Sanctorum corpora conglabantes & ornantes, quæ plerumque aliquid clepere assolent, haud secus, quàm Sartores de panno &c.) 3. si Reliquia furtivè ablata non sit rara. Ratio horum est; quia gravitas hujus furti non tam ex quantitate, quàm ex qualitate Sacrarum Reliquiarum dimetienda est; at, si S. Reliquia non sit adeò rara, vel in eadem Ecclesia ejusdem Sancti plures contineantur &c. Dominus non censetur graviter invitus, vel certè rationabiliter esse non potest: bene verò si S. Reliquia sit admodum rara, veluti judiciò Dianæ *part. 5. Resolut. 35.* & Felix Potestas *Exam. Confess. tom. 1. part. 2. n. 1522.* est minima pars Sacræ spinæ, seu coronæ spinæ, aut Sanctæ Crucis, quippe quæ tum ob dignitatem è corpore Christi participatam, tum etiam ob raritatem meritò magni æstimari solent à verè fidelibus.

446. R. Jam ad 2dum quæsitum ejusdem Causæ, Cajum procul dubio mortaliter peccasse locò verarum particularum de Sancta Cruce

Cruce falsas hinc inde distribuendo : quis-  
quís enim falsas Reliquias distribuit, DEO  
Sanctis ipsique S. Religioni haud exiguam  
injuriam facit, veluti mox infra *n. 464.* pate-  
bit. Cùm verò Cajus feratur falsas illas par-  
ticulas distribuísse lucri capiendi causâ; hinc  
à Confessario vel à Theologo desuper con-  
sulto specialiter indagari debet, an id fecerit  
cum pacto oneroso, scilicet vendendo illas  
particulas, an verò sine omni pacto & ob  
meram spem aliquid per modum eleemosy-  
næ propterea adipiscendi ? Si primum, di-  
cendum, quòd incurrerit labem Simonix :  
esto enim supponatur re ipsa vendidisse par-  
ticulas non Sacras seu falsas, simulavit tamen  
exterius se velle pro pretio temporali ven-  
dere rem spiritualem, & ad talem contra-  
ctum alios simpliciores induxit cum scan-  
dalo, non sine gravi & perniciofa dece-  
ptione, & hóc ipso teneretur restituere  
pretium acceptum. At verò si absque  
omni pacto cum mera spe aliquid per mo-  
dum eleemosynæ obtinendi id fecit, equi-  
dem à labe Simonix immunis erit, non tamen  
ab omni peccato; tum quia proximum  
suum decepit: tum etiam quia sinistram in-  
tentionem habuit, & contra prohibitionem  
*Concilii Trident. §. 25. in decret. de cult. &  
Venerat. SS.* per hujusmodi particulas tur-  
pem quæstum quodammodo intendit. Vi-  
deatur de hoc Palao *loc. cit. pu. 6. n. 18.*

## §. III.

## Corollaria ex dictis inferenda.

447 **C**OLLIGES ex hæcenus dictis primò, nedum Christi Crucifixi effigiem verasque seu authenticas Sacratissimæ Crucis particulas, aliæque passionis instrumenta, ut puta clavos, lanceam, spinas &c. sed & alias cruces ex quacunque demum materia efformatas, sive eisdem sit affixa seu etiam appicta Christi effigies, sive non, licitè à nobis adorari seu etiam coli cultu latriæ respectivo. Ratio horum jam fuit data superiùs n. 431. quia imagini debetur idem honor & cultus respectivus, qui absolute debetur prototypo; & licet communibus crucibus, id est, quavis materia sine effigie Crucifixi efformatis, deberetur cultus inferior latriæ (quem Doctor Seraphicus 3. dist. 9. art. 1. q. 4. *honorem venerationis* appellat; quia tamen hujusmodi cruces non solum efformantur in ordine ad repræsentandam Crucem Christi, sed potius ad repræsentandum ipsum Christum pro nobis in cruce mortuum; hinc laudabilissimè à verè fidelibus honorantur cultu latriæ respectivo.

At, inquires, quò cultu honorandus est sanguis Jesu Christi, qui hinc inde in diversis Ecclesiis visitur & asservatur?

R. Jux-

R. Juxta Vasquetii, Palai aliorumque 448. opinionem honorandus est cultu patriæ respectivo ; eò quòd aliquando fuerit pars corporis Christi unita divinitati, licet defuncto non amplius sit : è contra alii putant Eum esse honorandum cultu patriæ absoluto, eò quòd probabiliter etiamnum sit unitus divinitati juxta notissimum illud S. Damasceni effatum : *quod Verbum semel assumpsit, nunquam dimisit.* Nec refert, inquiunt, quòd non sit actu pars corporis Christi ; nam sanguis ille sacratissimus in passione Christi per plateas Jerusalem hinc inde dispersus actu non amplius existit pars corporis Christi, & tamen meruit honorari cultu patriæ. Ita Valentia & alii nonnulli haud improbabiler : placet nihilominus quoad hoc judicium nostri V. P. Cherubini Mayr in suo *Trismegisto continuato, ubi dist. 3. c. 1. n. 246.* ait, in praxi optimè facturum, qui hunc SS. sanguinem honorat vel adorat cum intentione illum adorandi sicut & quantum adorari potest ac debet : hòc quippe modo nec deficiet, neque etiam excedet in modo adorandi.

Colliges 2dò, non esse illicitum crucem 449. diversis Reliquiis etiam non approbatis, vel etiam partim approbatis ornatam exponere publicæ venerationi. Ratio est : tum quia usus id jamiam obtinuit : tum etiam quia cum crux Reliquiis ornata in altari colloca-



tur, non Reliquiæ, sed crux adoranda proponitur: quod autem unus fortassis vel alter Reliquias suo modò adoret, merùm per accidens contingit, & ad cultum privatum, non ad cultum publicum referre debet. Ita Sanchetius *lib. 2. in decalog. c. 43. n. 17.* Eumque secutus Castropalao *loc. cit. disp. 1. pu. 6. n. 11.*

Dices. Nefas foret publicæ venerationi exponere Reliquias partim approbatas, partim etiam non approbatas: ergo similiter nefas est, exponere crucem ornatam Reliquiis partim approbatis, partim non approbatis.

450. *R. Negando consequ. & parit.* Nam ubi solæ Reliquiæ exponuntur publicæ venerationi, tam approbatæ, quàm non approbatæ sine ulla differentia proponuntur publico cultui, quod posterius per Concilium Trident. *SS. 25. cap. 2. de invocat. & venerat. &c.* graviter fuit prohibitum: At verò ubi crux Reliquiis ornata exponitur, sola crux, uti jam dictum fuit, non item Reliquiæ censentur exponi publico cultui fidelium. Ita rursus Sanchez *loc. cit. n. 12.* Castropalao *n. 12.* Bonacina *disp. 3. q. 1. punct. 4. n. 5.*

451. Colliges 3<sup>tiò</sup> cuilibet fidelium per se loquendo fas esse sacras Reliquias, esto non recognitas ab Episcopo vel authentizatas penes se reverenter portare v.g. in quadam capsula; idque partim quòd hoc nullo jure fuerit pro-

prohibitum, partim insuper, quòd talis devota gestatio mirum in modum deserviat, tum ad repellendos inimici infernalis tentationes; tum etiam ad excitandam fidelium devotionem: secus dicendum foret, casu quo subesset periculum, ne Sacrae Reliquiæ aliqua fœditate aut oblcænitate polluerentur. Videantur *Valentia tom 3. disp. 6. q. 11. pu. 6. in fin.* vel *Bonacina disp. 3. de adorat. q. 1. pu. 4. n. 7.*

Dices fortassis cōtra hoc. Quicumque portans SS. Reliquias peccat, præsertim graviter, irrogat irreverentiam Sacris Reliquiis: ergo cū omnes simus fragiles, nec sit homo, qui faciat bonum & non peccet *Eccle. 7. 21.* consultius omnino videtur abstinere à portatione SS. Reliquiarum.


*R. disting. ant.* irrogat irreverentiam gravem & necessario in Confessione explicandam, *neg.* (nisi supponatur in contemptum SS. Reliquiarum peccare) irrogat irreverentiam levem & non necessario exprimendam, *conced & nego conseq.* Nam perjurio, furto, fornicatione &c. SS. Reliquiæ per se & directe non offenduntur, neque irreverenter tractantur, sicuti nec specialiter coluntur ex eo, quòd portans Sacras Reliquias faciat aliquod opus bonum; cū ergo aliunde Earundem portatio serviat ad excitandam devotionem, quivis fidelium ad hanc allici potius debet, quàm absterri.

Videatur Azorius 1. part. lib. 9. c. 8. q. 6.  
vel Sanchez lib. 2. decal. c. 40. n. 27. & 28.

453. Colliges denique 4tò, etiam illas ceras papales, quas quilibet Pontifex primo & septimò Pontificatûs sui anno infrà octavam Paschæ benedicere solet, & ob figuram Agni Eisdem impressam vulgò *Agnus DEI* appellari solent, magno in honore habendas esse, immò & cultu latriæ respectivo venerandas.

Ratio est: tum quia præferunt imaginem Agni, qui pro nobis occisus fuit, & dignus accipere honorem & gloriam Apoc. 5. 12. tum etiam quia propter preces Ecclesiæ in earundem benedictione adhiberi solitas, habent magnam virtutem contra fulgura, grandines, incendia &c. nec non ad repellendos dæmonum insultus. Unde neque pretio (nisi quantum eorum materia vel labor & expensæ ad transportam factæ valent) vendi debent, neque etiam minio, aurove aut alio colore pingi juxta constitutionem Gregorii XIII. *Omni certè studio &c. 8. Kalend. Julii 1572. editam.* Nihilominus quemadmodum Sanctorum Reliquiæ, ita etiam hæc Agnus Dei nedum à Clericis, verum etiam à Laicis tam unius quam alterius sexûs licitè tanguntur, modò id fiat debita cum reverentia; tum quia nullibi hoc prohibetur; tum etiam quia usus id jamiam obtinuit, nec quisquam prudens

dentum facile piaculo sibi ducet hujusmodi contactum : secus si irreverenter vel sine omni prorsus devotione id fieret. Videantur *DD. proximè cit. vel de La Croix lib. 6. part. 1. n. 225.*



# CONFERENCE DECIMA QUINTA

De Superstitione in genere,  
nec non de Idololatria in  
specie.

## SUMMARIUM.

- 454. Superstitio genericè sumpta est vitium Religioni oppositum per excessum.
- 455. Hæc immediatè partitur in duo membra, scilicet in Superstitionem cultus indebiti, & Rei indebitæ.
- 456. Superstitio cultûs indebiti seu incongrui rursus subdividitur in cultum falsum, & superfluum.
- 457. Explicatur brevissimè superstitio cultûs falsi,
- 458. Et Superstitio cultûs superflui.
- 459. Prior species, cultûs scilicet falsi est mortaliter ; posterior autem ex suo genere venialiter duntaxat peccaminosa.

460. Superstitio rei indebitæ, id est, falsi Numi-  
nis rursus sub se continet quatuor Species, sci-  
licet 1. Idololatriam. 2. Divinationem. 3. Va-  
nam observantiam & 4. Magiam.
461. Idololatria propriè dicta est Superstitio,  
quâ divinus honor tribuitur alicui Creaturæ si-  
cut DEO.
462. Et hæc rursus solet dividi 1. in perfectam  
2. in imperfectam, & 3 in simulatam.
463. Undenam Idololatria suam traxerit originem,
464. Resolvitur Casus I. de quodam Religioso  
confectore & commendatore Schedularum lu-  
canarum, seu immaculatæ conceptionis.
465. Non obstetrix condemnanda sit Superstitio-  
nis ex eo, quòd parturientibus assueverit dare  
tres Schedulas cum infallibili Spe felicitis partus,
466. Satisfit breviter cuidam objectioni in con-  
trarium.
467. Resolvitur Casus II. cujusdam militis assueti  
ante solis ortum dicere certam quandam ora-  
tionem eo finē, ut sese redderet eo die invul-  
nerabilem.
468. Reprehenditur damnabilissima praxis, qua  
nonnulli tentant se reddere invulnerabiles de-  
fodiendo quoddammodo cutem inter & carnem  
SS.Eucharistiæ Sacramentum.
469. Discutitur illud inane commentum de her-  
bis, quæ dicuntur habere vim reddendi feras  
vel homines invulnerabiles.
470. Resolvitur Casus III. Cujusdam pœnitentis  
dubitantis an liceat uti virga coryli ad dete-  
genda seu manifestanda maleficia.
471. Quid si talis virga supponatur diversis San-  
ctorum Reliquiis ornata &c.
472. Quid de usu Virgæ avellanæ & aliarum te-  
nendum ?

473. Re-

De Superstitione in genere, nec non &c. §41

473. Recensentur breviter nonnulli casus, in quibus committitur cultus perniciosus.
474. Enumerantur rursus alii, in quibus committi solet cultus superfluus & incongruus.
475. Nec affectus devotionis vel bonæ fidei in similibus satis excusare videntur à peccato superstitionis.
476. Qui in Theatris repræsentant cultum aut Ceremonias Gentilium, neutiquam dici possunt idololatrz.
477. Multò minùs nos Catholici ex eo, quòd Sanctos, imagines vel Reliquias honore congruo veneremur.
478. Vel quòd SS. Eucharistiæ Sacramentum adoremus cultu latriæ debito.
479. Sitné licitum dæmoni propria sponte aliquid asserenti credere, vel eundem de aliis interrogare?
480. Quæ fides adhibenda sit dæmoni, dum exorcismis Ecclesiæ adactus aliquid revelat, vel asserit?

§. I.

Præmittuntur & breviter resolvuntur quæsitæ scitu necessaria ad debite resolvendos Casus practicos de Superstitione & Idololatria.

**Q**Uæres primò, quid sit Superstitio in Genere?

¶ Superstitio est vitium Religioni oppositum per excessum, quò vel Deo cultus indebitus, vel creaturæ cultus Deo debitus exhibetur. Ita in terminis Babentuber

tr.

tr. 5. disp. 2. a. 4. n. 2. allegans D. Thomam 2. 2. q. 92. art. 1. Dicitur autem 1. *Vitium*, & quidem *Religioni oppositum*. Quemadmodum enim aliæ virtutes, ita & virtus Religionis in medio consistit, & per consequens sicut contra alias virtutes, ita & contra hanc peccari potest & solet vel 1. per defectum: & dicitur *irreligiositas* prout infra conferent. 17tima amplius dicitur. Vel per excessum: & vocatur *superstitio*, eò quòd sit quasi quædam *superstitio* seu *superflua observantia* in cultu super statuta seu instituta majorum. Dicitur 2. *oppositum per excessum*, non quidem ex eo, quòd quoad substantiam Deus nimium colatur; (nam cultus verus Deo utpote infinitæ dignitatis exhibitus nunquam dici potest nimius) sed dicitur *excessivus* quoad circumstantias seu etiam modum colendi, quia scilicet non prudenter colitur vel non moderatè, unde & ab aliis appellari solet cultus incongruus. Dicitur denique 3. vel creaturæ cultus Deo debitus: quod fit, quando vel diabolus vel alia creatura colitur locò Dei, vel ut Deus, prout amplius patebit per decursum.

Quæres 2dò, quotuplex sit Superstitio mox descripta?

455. R. Superstitio generatim duplex est, veluti colligere fas est ex descriptione mox data. Enimverò per quamvis superstitionem vel coli-

colitur quidem verus Deus, sed modo indebito vel incongruo : & vocatur superstitio cultus incongrui seu indebiti. Vel colitur creatura locô Dei seu ut Deus, & hæc dicitur superstitio Rei indebitæ aut cultus falsi, Numinis scilicet. Utraque tamen hæc species subalterna superstitionis rursus sub se continet diversas superstitiones specie infima inter se distinctas; Unde

Quæres 3<sup>ti</sup>o. quot dentur species superstitionis ratione cultûs indebiti seu incongrui?

R. Duæ dantur species superstitionis ratione cultûs incongrui. Una vocatur superstitio cultûs falsi : altera superstitio cultûs superflui. Ita cum S. Thoma 2. 2. q. 93. art. 1. & 2. & Communi DD. Reiffenstuel *theolog. mor. tr. 5. dist. 2. n. 6.* Explico brevissimè utramque speciem.

I. Superstitio cultus falsi (ob modum 457. scilicet colendi) appellatur, quando cultus est mendax vel quia falsis, id est, non amplius verum significantibus ceremoniis colitur Deus, vel quia materia aut forma Sacramentorum mutatur, prout faciunt hæretici nostri temporis, vel denique quia quis se fingit publicum Ecclesiæ Ministrum, cum tamen revera talis non sit.

II. Superstitio cultus superflui appellatur, 458. quando quis nititur Deum colere quibusdam circumstantiis seu etiam ceremoniis, quæ neque ad ipsius gloriam neque ad devotionem



nem excitandam, neque juxta institutum aut rubricas, sed potius contra rubricas Ecclesiæ excogitantur vel usurpantur.

Quæres 4<sup>to</sup>, quale peccatum sit superstitio cultus falsi, mox descripti, & quale peccatum superstitio cultus superflui?

459. R. Superstitio cultus falsi quoad illum modum colendi semper est peccatum mortale: superstitio autem cultus superflui ordinariè non excedit gravitatem peccati venialis, modò absit scandalum & contemptus Ecclesiæ. Ita Tamburinus in decalog: lib. 2. c. 6. §. 1. n. 2. Sanchez lib. 2. decalog: c. 37. n. 2. & n. 9. Bonacina tom. 2. disp. 3. q. 5. pu. 1.

Ratio prioris est: quia per cultum falsum Deo irrogatur gravis irreverentia, populusque fidelis graviter decipitur, prout rem perpendenti cuipiam facile patebit. Ratio autem posterioris est, quia cultus superfluus repugnat consuetudini seu etiam ordinationi Ecclesiæ, ideoque involvit aliquam inobedientiam saltem venialiter malam, modò (ut jam dixi,) scandalum absit & contemptus Ecclesiæ. Videatur de hoc Lessius l. 2. c. 43. dubit. 1. n. 5.

Quæres 5<sup>to</sup>, quæ, & quot sint species superstitionis rei indebitæ, seu falsi Numinis?

460. R. Hujus Superstitionis rursus cōmuniter enumerantur quatuor species, scilicet 1. idololatriæ

latria. 2. Divinatio. 3. Vana observantia, & 4. Magia. Ita Herincx *part. 3. tr. 4. disp. 7. de Religion. n. 3.* Reiffenstuel *theolog. mor. tr. 5. n. 5.* & communior Theologorum, licet Filliuc. *tom. 2. tr. 24. n. 4.* superaddat maleficium, quod tamen potius videtur quidam effectus magiæ, ut infra videbimus. Ratio autem hujus divisionis satis congrua inde desumitur; nam vel diabolus honoratur ut quoddam Numen seu Deus; & tunc committitur idololatria; vel invocatur eo fine, ut aliquid occultum revelat &c. & habetur divinatio, vel denique ut in operando dirigat seu aliquid mirum efficiat ob applicationem vanorum mediorum &c. & dicitur vel vana observantia, vel magia; ad quam reduci potest, ac debet maleficium, prout amplius constabit ex dicendis. Jam de prima specie hujus superstitionis, id est, magia, in hac conferentia nonnulla agemus, reliquas species proximis duabus conferentiis discussuri.

Quæres 6to, quid sit Idololatria?

¶ Idololatria strictè sumpta, prout sci- 461.  
licet constituit primam speciem ex enumeratis est superstitio, qua divinus honor tribuitur alicui creaturæ tanquam DEO, vel sicut DEO. Ita ex communi DD. Valentia *tom. 3. disp. 6. q. 11. punct. 1.* Explico brevissimè. Dicitur *superstitio*, locò generis, in hoc enim convenit idololatria cum reli-  
*R. P. Elbel, Pars II. de Fide &c.* M m quis

quis speciebus superstitionis, immò suo modò reliquas omnes excedit; in quantum per nullam aliam tam patulò cultus soli Deo debitus tribuitur creaturæ, sicut per hanc. Additur insuper locò differentia: *quâ divinus honor &c.* ut per hoc significetur, quòd, quemadmodum ad cultum veri Dei, ita & ad veram idololatriam suo modò concurrere debeant tres actus, scilicet 1. quædam apprehensio seu existimatio divinitatis concepta de idolo: 2. quidam affectus internus reverentiæ, quo quis idolo tanquam Numini sese vult submittere, & 3. quædam exhibitio signi externi, quo idololatra vult testificari suam submissionem &c. Dixi etiam ad veram seu propriam idololatriam; nam latè & metaphoricè idololatrare dicitur, quisquis mortaliter peccat & peccando in creatura ultimum suum finem collocat, prout bene advertit noster P. Herincx *loc. cit. n. 4.* Verùm hæc non est particularis species idololatriæ in confessione necessariò exprimenda, cum aliunde per expositionem ipsius peccati mortiferi satis à Confessario intelligi possit.

Quæres 7timò, quotuplex sit Idololatria?

462. R. Triplex communiter à Doctõribus assignat 1. perfecta 2. imperfecta, & 3. simulata. Ita Suarez *de Religion tom. 1. lib. 2. c. 4. & 6.* Laymann *tr. 10. cap. 2. n. 5*  
Per

Perfecta dicitur, dum quis cultum DEO debitum exhibet idolo, eò quòd falso credat, id esse DEum. Imperfecta est, dum quis bene animadvertens huic idolo vel creaturæ nihil inesse divinitatis, nihilominus ex pravo affectu v. g. odii adversus DEum, aut concupiscentiæ aliquid obtinendi v. g. à dæmone aliavè creatura, eidem cultum externum exhibet sicut DEO. Simulata dicitur idololatria, dum quis ob metum v. g. tyranni vel populi cultum soli DEO debitum exhibet idolo vel creaturæ alteri, absque eo, quòd recognoscat in illo quandam excellentiam, aut divinitatem, aut quòd habeat internum affectum colendi ipsam, prout in annalibus Ecclesiasticis legitur de Sancto Marcellino Papa. Verùm has duas posteriores species non esse propriè tales, liquidò constabit ex dictis numero prioribus de idololatria propriè dicta.

Quæres denique 3tavò, unde idololatria suam traxerit originem ?

R. Primam hujus originem fuisse quòd- 363.  
dam inordinatum desiderium, quò parentes quidam acerbo luctu dolentes (ut dicitur *Sapient* 14. v. 15.) de filiis citò sibi raptis, erexerunt quasdam statuas, in quibus filios tanquam præsentem cernerent. Deinceps ipsæ statux tanquam Numine quodam plenæ & animatæ coli cæperunt, & quia diabolus statuis illis, mox ut dedica-

§. II.

Proponuntur & breviter resol-  
vuntur Casus practici de Su-  
perstitione & Idololatria.

CASUS PRIMUS.

**T**itius Religiosus quotannis infrà octavam  
immaculatæ conceptionis notabilem quan-  
tatem Scedularum (quas alio nomine ab  
Authore derivato lucanas appellamus) scriben-  
do conficere & benedicere assuevit, earundem  
verò vim ac multiplicem virtutem mirum in mo-  
dum extulit, ut sequitur. 1. quisquis hujusmo-  
di Scedulam penes se portat, nequit ullo ve-  
neficio infici. 2. si tales Scedulae defodian-  
tur in quatuor angulis horti vel Agri, aut in  
stallis animalium, infantiumvé cunis, neuti-  
quam infici possunt magorum aut sagarum  
infestationibus. 3. Eadem Scedula prosunt  
parturientibus, ita, ut quam Mater paulò ante  
partum sumpsit, postea infans in lucem editus  
vel supra frontem, vel intra labia manus-  
vè non rarò deferre soleat in hunc mun-  
dum &c. hac & alia plura Titius de suis  
Scedulis hinc inde narrare assueverat, apposita  
tamen hac clausula, quòd is, qui eas sumere  
vult per modum medicinae spiritualis, debeat  
illas sumere cum aqua benedicta trium Re-  
gum ut vocant, & insuper in honorem Nati-

M m 3

vitatis

vitatis Christi & immaculatæ conceptionis dicere ter Pater noster & Ave Maria, nec non ter Gloria Patri, addito insuper; Ave, Amen. Hanc miram commendationem multiplicesque virtutes cum quadam vetula obstetrix intellexisset, illico postulavit à Titio sibi copiam fieri ejusmodi Scedularum: qua obtentâ quotiescunque ad aliquam puerperam vocatur 1. ante omnia eidem porrigit tres Schedulas lucanas in aqua trium Regum sumendas. 2. jubet eandem dicere dictas preces ad amussim. 3. denique infallibiliter sperare felicem partûs expeditionem. Jam quæritur, utrum Titius & obstetrix illa non sint arguendi alicujus superstitionis?

464. R. Primò ad hanc speciem facti, Titium conficiendo prædictas Schedulas neutiquam peccasse, certum quippe & exploratum est, memoratas Schedulas nedum ab Ecclesia hætenus fuisse toleratas, verum insuper à viris prudentiæ, discretionis ac Religionis zelo insignibus commendatas; neque verò dubitandum: quin earum intuitu Beatissima Virgo Maria sine labe originaria concepta devotè se invocantibus plura contulerit beneficia, prout experientia multiplici comperit habemus. At verò, an Titius non sit arguendus alicujus superstitionis ob commendationem seu deprædicationem nimiam dictarum Scedularum, major est ratio dubitandi: videntur enim plures circumstantiæ

tiæ superstitionem sapientes concurrere : Cur enim infrà octavam, & non alio tempore confici deberent? Cur in aqua trium Regum & non in alia benedicta? Cur ter & non sæpius dici Gloria Patri, & Pater noster & Ave? Cur superaddi deberent illa duo verba *Ave, Amen*? Deinde: ubi scriptum aut revelatum à Deo legitur, quòd nullus tali Scheda munitus, valeat intoxicari? quòd animalia, horti, infantes &c. nequeant infici veneficio? profectò hæc omnia videntur manifestam sapere Superstitionem. Neque dubitandum, quin Titius mortaliter peccasset, si contra mentem propriam asseruisse supponatur, quòd infantes recens nati (de quo certè authenticè non satis constat) non rarò soleant Schedulas lucanas à Matre paulò antè sumptas manibus deferre in hunc mundum: quisquis enim falsis miraculis cultum DEI vel Sanctorum promovere nititur, magnam Deo injuriam irrogat secundùm dicta n. 459.

N. 2dò, Obstetricem longè adhuc probabiliùs condemnandam esse Superstitionis. Si enim supponatur tres Schedulas porrigere parturienti & jubere, ut dicat Pater & Ave &c. eò quòd existimet vim omnem & efficaciam positam esse in ipso numero ternario Scedularum vel orationum, tunc liquidò constat de Superstitione juxta *communissimam DD.* videndam apud

Sporer *tr.* 2. *in decalog c. 9. sect. 3. n. 27.* Sin verò non numero Scedularum, sed fidei potius ac devotioni oratricis, vel potius potentissimo patrocínio ac meritis B. Virginis Mariæ attribuendum arbitretur beneficium felicitatis partus, bene quidem faciat, at non videtur eximenda ab omni nævo Superstitionis ex eo, quòd jubeat mulierem *infallibiliter expectare* felicem expeditionem partus. Ratio est: quia cum præter Sacramenta & Sacramentalia nihil omnino sit ex Sacris verbis vel rebus, quod infallibilem habeat effectum (prout Sapienter advertit Tamburinus *in decalog l. 2. c. 6. §. 1. n. 45.* Felix Potestas *tom. 2. part. 2. c. 6. n. 259. & alii DD.*) illa autem sumptio Scedularum nec Sacramentum sit, nec quid Sacramentale, planè sequitur, quòd si obstetrix vel parturiens ex hac sumptione vel etiam oratione infallibiliter expectet felicem partus expeditionem, hanc expectare debeat ope dæmonis tacite invocati sub larva pietatis. Unde enim, amabo! unde præfatarum Scedularum usui competeret tanta vis, & quidem infallibiliter? profectò non ex natura sua, ut de se liquido constat, neque etiam ex authentica institutione DEI, vel Christi vel Ecclesiæ: quia de hac nullibi constat: ergo ope dæmonis tacite invocati iste effectus infallibilis expectetur, necessum



cessum est. Secus procul dubio dicendum est, ubi dictæ Schedulæ lucanæ sumuntur duntaxat ex devotione cum quadam pia confidentia in merita & præpotens patrocinium B. Virginis Mariæ, quippe quæ clientibus suis in necessitate constitutis piè admodum succurrere assolet, ubi id ad DEI gloriam & animæ salutem expediens judicat. Et hæc quidem dixerim non eo fine, ut vel Schedulas ipsas, vel Scedularum hōc modo sumptarum usum improbem, sed ne usus de se laudabilis tandem vertatur in abusum Superstitiosum summopere vituperabilem. Videatur Herincx *part. 3. tr. 4. disp. 7. n. 25.* vel Marchantius *tom. 2. tr. 2. p. 3. tit. 1. §. 2. q. 2. dub. 1. &c. 2.*

At verò, inquires, Magister cœlestis Christus jubet nos firmiter credere, quòd simus obtenturi, quidquid petièrimus: *habete fidem DEI*, ait: *Marci 11. 22. omnia quacunque orantes petitis: credite, accipietis. & evenient vobis*, Similiter Jacobus Apostolus in sua Epistola *c. 1. v. 6.* jubet nos postulare à Deo *absque hesitatione in Fide*: cur ergo obstetricem hanc Superstitionis alicujus condemnemus ex eo, quòd jusserit parturientes infallibiliter exspectare felicem partûs sui expeditionem?

R. ad hanc instantiam conformiter ad <sup>466.</sup> dicta superiùs *n. 416.* hujusmodi promissio-

Mm § fiones

siones à Christo factas intelligendas esse *sub conditione*, quòd scilicet simus obtenturi à Deo, quidquid petiêrimus, si nimirum id quod orando petimus, sit expediens ad nostram salutem & DEI gloriam; non autem esse intelligendas *absolutè* ita, ut quidquid petiêrimus sive bonum & conduciens, sive etiam malum & excludens à salute &c. simus obtenturi: hoc enim posterius non peteremus in nomine Salvatoris &c. atqui certum est, quòd etiam felix expeditio partûs non semper conducat ad animarum salutem: ergo hanc nulla mulier potest infallibiliter expectare. Cæterum gratis omnino fatemur, obstetricem non esse condemnandam alicujus Superstitionis, si sub præfata conditione duntaxat jubeat mulieres expectare felicem partûs expeditionem, idque cum pia confidentia in patrocînum B. Virginis Mariæ, non autem in numerum Schedularum, vel orationum. Cum verò aliunde multiplici experientia compertum habeamus, in his & similibus casibus aut circumstantiis, ubi præscribitur certus numerum orationum &c. & quidem cum infallibili expectatione effectûs, plerumque sive dein ex simplicitate, sive etiam ex malitia muliercularum irreperere quasdam observantias supersticiosas; hinc à Confessariis vel simpliciter dehortandæ sunt, vel melius erudiendæ, ne scilicet spem suam

suam collocent in ipso numero vel circumstantiis, sed in DEO potius &c. &c.

## CASUS SECUNDUS.

**S**empronius miles Emeritus ingenuè fatetur se eo tempore, quo olim castra secutus fuerat, parùm, vel nihil omnino orasse, præter unicam orationem, quam singulis diebus infalibiliter ad Deum fudit vel ante solis ortum vel post ortum quidem, ast facie erga solem conversa; huic, cùm quidam Theologus contradixisset, asseverando nulli prorsus orationi competere vim reddendi quempiam invulnerabilem; ille subridendo dixit: vos nescitis quidquam, neque intelligitis utpote nunquam experti: mihi certò constat, quòd per eandem orationem non me solum, sed & alios commilitones, immo & canem meum reddiderim prorsus invulnerabilem, prout non semel sed sæpius experientia probavit. Quid iudicii de Sempronio concipiendum?

R. Judicandum & concludendum esse, 467. quòd Sempronius vixerit in malo statu, quamdiu medio illo usus fuit. Certum quippe & exploratum esse debet, quòd nulla prorsus oratio ab Ecclesia defacto approbata habeat hanc vim, reddendi quempiam invulnerabilem; non enim ex natura sua, ut de se liquet; neque etiam ex institutione Dei, vel ordinatione Ecclesiæ; unde

unde enim de hoc constat? ergo quisquis vi talis orationis infallibiliter expectat effectum tam insolitum & naturaliter impossibile, convincitur illum expectare aliunde: atqui non à Deo, vel ab Angelo bono, quippe qui non volunt ullatenus cooperari ad hujusmodi Superstitiones, utpote contrarias voluntati divinæ: multò minùs ab homine &c. ergo à diabolo: id quod vel inde patenter colligere licet cum Superstitione fuisse factum; nam si Sempronius credidisset soli orationi tantam inesse vim, planè nec ante solis ortum orasset, nec post ortum faciem versus solem convertisset. Sapienter proin advertit Ills ung. tr. 5. disp. 3. n. 284. fin. hujusmodi media apparenter pia tantò magis impiè adhiberi, quantò magis vertuntur in contemptum DEI: vel enim creditur DEUS se solo posse efficere effectum postulatum intuitu orationis absque aliis ceremoniis? & hòc ipso frustra aliæ ceremoniæ adhibentur, Vel creditur non posse sine hujusmodi ineptiis & impertinentibus ceremoniis aut superstitiosis verbis? & hoc modò contemnitur non sine permagna injuria, quasi is non posset absque cooperatione diaboli aliquid operari. Vanissimæ ergo & prorsus supersticiosæ sunt orationes etiam ad Deum fusæ cum dictis ceremoniis, vel etiam in ordine ad effectum invulnerabilitatis.

Quod

Quod verò de oratione diximus, idip- 468.  
sum intelligas velim dictum de damnabi-  
lissima illa praxi, quâ nonnulli impiè &  
sacrilegè abutuntur SS. Eucharistiæ Sacra-  
mento, utputa illud carnem inter & ossa  
defodiendo, sibique quodammodo incor-  
porando eo fine, ut sint perpetuò invulne-  
rabiles: damnatissima inquam est hæc  
praxis, utpote Reverentiæ tanti Sacramenti  
summopere injuriosa & sacrilegè supersti-  
tiosa: non enim institutum legitur ad red-  
dendum hominem corporaliter illæubilem,  
sed potius ad conservandam vitam Spiritua-  
lem animæ.

Nec refert, quòd unus fortassis aut alter  
sacrilegè abutens hoc Sacramento testetur  
se fuisse invulnerabilem: præsumendum  
quippe est, hunc effectum non à DEO  
( utpote averfante & detestante omnem  
impietatem & commercium diabolicum )  
provenisse, sed potius à diabolo, qui simi-  
libus Sanctuariis tantò dexterius novit abuti  
adpalliandum technas suas, quântum ob  
eorum Sanctitatem aptiora vidit ad per-  
suadendum hominibus, præsertim simpli-  
cioribus, nihil prorsus malitiæ sub iisdem  
posse latere.

At, inquires, constat multiplici experien-  
tia, nonnullas feras, Damas præsertim &  
cervos à venatoribus non potuisse trajici  
glandibus; quod planè prudenter refundi

ne-

nequit, nisi in virtutem herbarum, quibus ejusmodi feræ vesci solent : ergo cogimur fateri, dari media, quibus homo naturaliter sese valeat reddere invulnerabilem, seu, ut vulgò dicitur, *fest machen*.

469. *Æ*. Negando conseq. Dato enim, quòd aliquæ feræ à Venatoribus non potuissent glandibus trajici, hoc sanè nullatenus adscribi deberet virtuti herbarum, sed dæmoni potius : aliisvè hominibus malignis, quibus dæmon promisit se conservaturum animalia, ne occidi possit hoc vel illo modo &c. Memini sanè me olim à quodam virò fide dignissimo & omni Exceptione majori audivisse, se quondam vacantiarum tempore cum aliis pluribus interfuisse venationi, in qua venator comparere fecerat leporem, qui licèt à pluribus jaculatoribus fuisset petitus grandine plumbea & hujus impetu ac virtute à nonnullis susque deque versus à nullo tamen vulnerari, multò minùs occidi potuit. Constat similiter de aliis venatoribus, quòd arte magica, seu diabolica potius feras in districtu territorii sui contentas reddiderint invulnerabiles in tantum, ut à nullo feripeta potuerint occidi : quis autem prudentum non videat, hujusmodi effectus non herbarum virtuti sed potius diabolicæ arti esse adscribendos ? Id quod amplius

Confirmatur 1, Certum quippe est, quòd quem-

quemadmodum nullum prorsus animal ex sua natura est immortale ; ita pariter nullum ex sua natura sit invulnerabile : tibi ergo asseveranti, vel potius somnianti id posse fieri, incumbit probare quodnam sit illud herbarum genus ; quod si daretur in rerum natura, procul dubio jam pridem fuisset à Monarchis vel Principibus comparatum pro suis exercitibus tempore prelii seu conflictus usurpandum ab omnibus, velut medium omnibus loricis amplius proficuum ad conservandum exercitum. 3. Causæ naturales uniformiter operari solent : ergo si supponas herbam tanta virtute præditam, profectò omnes feras ejusdem saltem speciei v. g. cervos &c. de ea comedentes, deberet pariter reddere invulnerabiles in quocumque demum territorio existant : at hoc in æternum non probabis, cùm experientia contrarium probet. Denique 3. eadem experientia compertum habemus, quòd si Venator aut seripeta utatur glande vitrea, vel alia de plumbo quidem, sed benedicta, illico possit hujusmodi feras trahere : vel si gladium, pugionemve ter infingat terræ, aut eo mediante tei crucem efformet in aere, possit transfigere talem feram redditam invulnerabilem, prout hisce meis oculis aliquando vidi : at, hoc, ni fallor, evidens argumentum est, hujusmodi illæfibilitatem non ex aliqua causa naturali, sed

sed à morali potius, vel ab ipso dæmone proficisci, quippe qui virtute pacti cum Saga vel mago initi solet feras, vel etiam homines conservare invulnerabiles, non simpliciter, sed sub certis conditionibus tantum, utputa nisi tale vel tale instrumentum fuerit adhibitum, quò facto hujusmodi homines relinquit temporaliter, quatenus tantò securius illos capiat æternaliter gehennalibus flammis secum involvendo.

### CASUS TERTIUS.

**C**ajus vehementer dubitat, utrum in sua domo non lateat quoddam maleficium ed potissimum, quod cum tota familia sua immò & pecoribus continuis quasi infirmitatibus obruatur, quamdiu domi se continent: è contra verò foribus egressi sin minus ex tota, magna saltem ex parte sublevari se sentiant. Cum verò plura jam media spiritualia adhibuerit ad avertendum hoc malum, at sine effectu; hinc sciscitatur è confessorio, an non sibi liceat accersere quendam communi de plebe fabrum ferrarium, qui mediante quadam virgula naturali dicitur jam plura detexisse maleficia non sine ingenti solatio maleficatorum. Quid Confessarius Cajò respondebit?

470. R. Confessarius respondeat Cajò, id neutiquam esse licitum, & ob id omnimodis abstinendum, tum à vocatione fabri, tum



tum etiam ab usu virgæ in hunc finem, Ratio est : quia certum omnino videtur, usum hujus virgæ esse superstitiosum ; vel enim hæc virga haberet ex sua natura vim detegendi maleficia, vel eam haberet ex institutione divina aut humana ? atqui non ex sua natura ; quia causa naturalis uti supponitur hæc virga, nullam prorsus connexionem habere potest cum maleficiis, utpote consistentibus in composito quodam morali, id est, in quibusdam rebus v. g. crinibus, acubus, ovorum testis &c. quæ ex natura sua nullam prorsus habent vim, sed sunt tantum quædam signa ad quorum positionem diabolus vi pacti cum Saga &c. iniiti solet nocere hominibus maleficiatis : ergo quicumque demum utitur tali virga in ordine ad detegendum maleficium, convincitur velle hunc effectum præstare ope alterius, & quidem agentis rationalis : atqui non ope Dei vel Angeli boni aut Ecclesiæ, quandoquidem nullibi constat, quòd DEUS voluerit hanc vim maleficia detegendi conferri virgæ naturali : ergo ex tacita saltem invocatione & ope ipsius dæmonis &c.

At, quid, si talis virga supponatur artificiosè terrebrata, diversisque Sanctorum Reliquiis exornata, qualem quidam homo pariter plebeus fertur habere, licebitne hujusmodi virgam adhibere in ordine ad detegenda maleficia ?

*R. P. Elbel Pars II. de Fide &c. Nn 8. Li.*

471. R. Licebit probabiliter, modo id fiat absque infallibili expectatione eventus, sed potius cum pia quadam fiducia in patrociniū ac merita Sanctorum, quorum SS. Reliquiæ in virga continentur. Ratio est: quia secundum communissimam DD. opinionem jam superius insinuatam fas est uti precibus & exorcismis Ecclesiæ in ordine ad dissolvenda opera dæmonis: quidni ergo pariter fas sit, uti tali Virga, vel potius Sanctorum Reliquiis in virga contentis ad eundem finem, modo in iisdem non collocetur vis aut fides infallibilis, multò minùs in ipsa Virga secundum se sumpta.

Dices adhuc. Dantur certæ virgæ, quas meritò dixeris divinatorias, eò quòd iis mediantibus possint inveniri seu etiam detegi thesauri, nec non venæ subterraneæ diversorum metallorum & aquarum: ergo similiter dari possunt virgæ, quæ naturaliter indicent maleficia latentia.

472. R. Etiam id quòd de virgis divinatoriis asseritur, verosimiliùs omnino esse falsum: esto enim à nonnullis Doctoribus permittatur usus similium virgarum cum hac limitatione, si scilicet natæ sint in loco vicino venæ subterraneæ v. g. metalli aut aquæ &c. eò quòd ob naturalem sympathiam habeant vim sese inclinandi, & inclinando se indicandi venam latentem v. g.  
auri

auri &c. multò tamen probabiliùs mihi videtur: quòd ne hanc quidem vim habeant ex sua natura; tum quia tales virgæ solent subinde flecti, ubi non sunt metalla, &c. è contra non flecti, ubi sunt. Dein flecti solent ad nimis multa, quæ planè diversas habent naturas & exhalationes: ergo non agunt velut causa naturalis, quippe quæ semper eodem modo agit in iisdem circumstantiis. Et certum omnino esse debet, usum hujusmodi virgarum esse Superstitiosum, si adhibeantur (prout hodie fieri solet à militibus vel furibus) 1. indifferenter undecunque demum natæ vel arreptæ, vel 2. ad detegendos quosvis thesauros aut res latentes, etiamsi ibi nullum esset aurum vel argentum, sed vestes duntaxat aliavè mobilia. Item 3. si adhibeantur ubi vis locorum, etiam supra terram, præsertim cum ceremoniis superstitionis & impertinentibus. 4. Denique certum esse debet, per hujusmodi virgam v. g. coryli, vel aliam quamcunque naturaliter detegi non posse limites agrorum aut sylvarum, neque latrones vel homicidas, neque res perditas vel furto ablatas; nam quòd hic vel ille lapis, hæc vel illa columna lignea &c. sit limen agri aut territorii &c. pendet merè ab arbitrio hominum ponentium & instituentium hæc signa, & ex illorum intentione, quæ sunt quid morale: atqui causæ naturales, uti esse deberet virga Coryli, vel alia

Nn 2

quæ-

quæcunque, non attingunt moralia, quandoquidem cum his nullam prorsus habeant connexionem naturalem: similiter quòd hic homo sit latro vel homicida, aut quòd hæc pecunia sit perdita aut furtiva, est circumstantia merè moralis, quæ non immutatur vis, aut modus naturalis agendi, quem habet virga. Videantur de hoc Sporer *tr. 2. decalog. c. 9. sect. 3. n. 32*, vel de la Croix *lib. 3. part. 1. n. 35*.

## §. III.

## Corollaria ex dictis inferenda.

473. **C**olliges ex hætenus dictis primò, superstitionem cultûs perniciosi committi in sequentibus casibus, 1. Si quis hisce temporibus vellet Deum colere cultu aut ceremoniis Veteris Legis, jam pridem abrogatæ, vel 2. Si non Sacerdos vellet fungi officio veri Sacerdotis. 3. Si quis fidelibus proponat falsas Reliquias, aut falsis miraculis seu etiam beneficiis conetur promovere cultum Dei, vel 4. Si referendo falsas seu apocriphas sententias aut historias velut contentas in Sacra Scriptura, velit populum permoveere ad pœnitentiam &c. Idipsum denique 5. tenendum est de iis, qui vel formam aut materiam alicujus Sacramenti mutant.

mutant. Nam omnes isti supra cultum Deo debitum & approbatum aliquid suo modò statuunt, & quidem Deo ac vero cultui divino præjudiciosum, veluti ex dictis n. 459. constare potest; consequenter per se loquendo graviter delinquant, esto non semper peccent graviter vel ob simplicitatem, vel ob fidem bonam in eorundem simplicitate fundatam. Videatur Sanchez *lib. 2. decalog. c. 37. n. 2. & 9.* Vel Tambur. *lib. 2. decalog. c. 6. ff. 1. n. 33. & seqq.*

Colliges 2dò, cultûs superflui condem- 474  
nandos esse illos, qui v. g. preces fundendo adhibent certum candelabrum vel potius cereorum numerum cum certo colore ac situ, aut cum certa corporis situatione v. g. versus aut contra solem. Item 2. qui gallinam albam potius, quàm nigram offerunt, vel 3. Missam libentius audiunt à Sacerdote hujus quàm alterius nominis, &c. 4. qui diebus sabbathinis non volunt nere aut suere, nec tamen ab aliis operibus servilibus abstinent. 5. Qui in officio divino, & potissimùm in celebratione SS. Missæ Sacrificii exercent ceremonias superfluas, immò expressè contrarias Rubricis ab Ecclesia præscriptis, ut puta dicendo *Gloria* aut *Credo*, ubi non essent dicenda, vel formando plures *crucis*, &c. Hæc enim & similia contrariantur legitimo cultui divino ab Ecclesia instituto: ergo sunt superflua & vitiosa, licet subinde

N n 3

fiant

fiant sine peccato. Formali præsertim gravi secundum proximè dicta.

475. Dixi : *sine peccato formali & gravi &c.* Neque enim omnimodis excusandi sunt ex eo, quòd protestentur, se id facere ex mera devotione : Deus enim non rectè colitur cultu reverentiæ divinæ, vel legibus ab Ecclesia præscriptis contrario : timendum proin, ne hujusmodi devotuli falsa pietate delusi existiment, se obsequium præstare Deo, cùm tamen potiùs offensam incurrant. Vid. Bonacina *tom. 2. disp. 3. q. 5. punct. 1. n. 4.* vel Laymann *lib. 4. tr. 10. c. 1. n. 5.*

476. Colliges 3tò, nullius idololatriæ arguendos esse illos actores, qui in scenis gentilium ritus repræsentantes, Jovi, aliisve idolis thus immolant, & nescio quas ceremonias, vel potiùs ineptias exercent ; Enimverò ex omnibus circumstantiis dant intelligere, se id non practicare animo serio, seu animo idolum colendi, sed potiùs illudendi, aut certè exhibendi duntaxat Gentilium ritus ineptos. Sayrus *in clav. Reg. lib. 4. c. 4. n. 7.*

477. Colliges 4tò, nos Catholicos ab hæreticis imprudenter incusari vel redargui velut idololatrias, ex eo, quòd Sanctos velut speciales Dei amicos honore debito prosequamur, vel Eorundem SS, Reliquiis congruum deferamus cultum Ratio ex hætenus dictis facilè patebit cuivis sano & à face passionis alienato intellectui: nullus enim

quoniam prudentum iisdem exhibet *cultum latræ*, utpote soli Deo debitum, neque ullus sanæ mentis Catholicus ipsis exhibebit cultum *veluti Deo*, sed cultum dulciæ tantum, & quidem respectivum, juxta dicta superius n. 436. Vid. Valentia tom 3. disp. 6. q. 11. punct. 5. & 6.

Colliges igitur, Catholicos multò minùs 478.  
alicujus idololatriæ redargui posse, aut debere ab hæreticis ex eo capite, quòd SS. Eucharistiæ Sacramentum adorent cultu latrevtico. Ratio est: quia ille cultus adhibetur vero Christo sub speciebus Eucharisticis contento (neque enim adoramus panem vel vinum, utpote quorum substantia vi consecrationis omnino destruitur, neque etiam ipsas species velut motivum adorandi, sed ad summum per accidens velut terminum) atqui vero Deo debetur, & hoc ipso rectè impenditur cultus latræ: ergo etiam idem cultus debetur Venerabili & augustissimo SS. Eucharistiæ Sacramento. Hac de causa Concilium Trident s. 13. de S. Euch. Sac. can. 6. rectè definit: *Si quis dixerit, in Sancto Eucharistiæ Sacramento Christum unigenitum DEI filium non esse cultu latræ etiam externo adorandum --- & Ejus adoratores esse idololatræ; anathema sit.*

Colliges igitur ab illis, qui dæmoni propria 479.  
sua sponte aliquid asserenti fidem adhibent, non quidem committi idololatriam propriè,

bene tamen improprie dictam. Ratio est, quia hoc modo dæmon velut mendaciorum pater ultra omne prorsus meritum honoratur, ob fidem ejusdem revelationi datam, quam certè nullatenus meretur, tametsi in hoc non videatur intervenire tanta irreverentia, quæ mortalem conscendat malitiam. Similiter si quis ex levitate animi vel curiositate dæmonem in Energumeno loquentem uno aut altero verbo imperativo interroget rem vanam & inutilem, non peccat, nisi venialiter, modò id non faciat animò discendi aliquid ab ipso; nam hoc esset, expectare beneficium, & communicare cum illo, inquit de la Croix *lib. 3. part. 1. n. 26.*

480. Colliges tandem 7<sup>timò</sup>, ea, quæ dæmon SS. Ecclesiæ exorcismis compulsus edisserit, absque peccato idololatriæ credi posse; tum quia Minister Ecclesiæ exorcizando diabolum non habet cum eodem quoddam commercium illicitum, nec eum colit, sed potius torquet; tum etiam, quia Deus non potest illum cogere ad mendacium. Attamen non facile fides eidem adhibenda est; quia adhuc dum relinquitur dubium, an à Deo fuerit coactus, an verò propria malitia ductus ad hoc vel illud asserendum, prout sapienter monet Lessius in *auctar. V. Magia, c. 6.* Unde, si dicat, hunc vel illum esse magum, &c. non licet propterea apprehendere accusatum, nisi accedant alia indicia, inquit



inquit Gobat *tr. 11. theolog. experim. n. 794.*  
Multò minùs ei credendum erit, si dicat, se  
à Deo missum ad populi instructionem, ut  
qui non credunt Concionatoribus & Paro-  
chis, saltem sibi, diabolo scilicet, credant,  
idque esse extremum remedium, quò Deus  
uti voluit ad conversionem populi; nam  
hoc prorsus vanum est, & techna dæmo-  
nis, volentis errores suos cum vera doctrina  
insinuare, uti advertit idem Lessius, cùm-  
que secutus de la Croix *loc. cit. n. 25.*



# CONFERENTIA

## DECIMA SEXTA

### De Divinatione, & vana ob- servantia.

#### SUMMARIUM.

481. Divinatio est superstitio, qua ex pacto cum  
dæmone occulta prædicantur aut manifestan-  
tur.
482. Alia fieri solet cum pacto explicitè, alia  
cum pacto implicitè inito cum dæmone.
483. Divinationis cum pacto expresso recensentur  
breviter novem species.
484. Cum pacto autem implicito adhuc plures  
succinctè explicantur.

quidem velit, non tamen improbare aut deserere exercitium hujus artis?

505. Resolvitur Casus II. de quodam Juvene, qui dum in nocte Sancti Andreæ conatus fuit in quodam profluente perspicere imaginem futuræ conjugis, in flumen præceps prolapsus fuit.

506. Quid judicii ferendum de iis, qui ex inspectione certorum speculorum tentant prospicere futurum maritum, vel auctorem furti commissi, aliavè similia?

507. Et quid de illo, qui nocte natalitia retrò januam Ecclesiæ sese collocavit super tripodem eo fine, ut dignosceret, quænam è fæminis introeuntibus esset saga, vel non?

508. Resolvitur Casus III. de quadam conjugata, quæ caligis sui Mariti clam insuerat quendam fasciculum herbarum eo fine, ut à lusu excessivo deinceps averteretur.

509. Utrum hæc à Confessario fuerit obliganda ad tollendum rursus eundem fasciculum?

510. An eidem fuerit permittendum dicere orationem S. Christophori (utì vocant) eo fine, ut impetraret pecunias, vel alia necessaria sustentationis media?

511. Consulere Ægyptios seu Cingaros (utì vocantur) de futuro vitæ statu, fortuna &c. vanum est, ac per se illicitum.

512. Fas nihilominus est, uti scientia ope demonis semel acquisita, modò is ad usum aut praxim concurrere non debeat.

513. Etiam in usu rerum sacrarum sæpius, quàm par est, irrepere solent vanæ quædam observantiæ;

514. Immo verò (quod damnabilius) etiam in Sacrosancto Missæ Sacrificio.

- §15. Quæ superstitiones committi soleant per vetulas incantatrices ?
- §16. Pulveris sympathici usus an sit permittendus à Confessario ?
- §17. An fas sit transplantare Sanguinem humanum v. g. in arborem eo fine, ut membrum tabescens recuperet pristinum vigorem ?
- §18. Usus artificialium, an sit licitus in ordine ad procurandos effectus extraordinarios ?
- §19. Quando certò constat, medium esse superstiosum, certò peccatur, esto is, qui utitur, protestetur, se nolle habere quoddam commercium cum dæmone.

## §. I.

Præmittuntur & breviter resolvuntur quæsitæ scitu necessaria ad debite resolvendos Casus præcticos de Divinatione & vana observantia.

Quæres primò, quid, & quotuplex sit Divinatio?

481. R. ad primum. Divinatio (prout hic sumitur) est Superstitio, qua ex pacto cum dæmone occulta prædicuntur, seu etiam manifestantur. Ita ex communi DD. Sententia Delrio lib. 4. disquisit. mag. c. 2. q. 1. Laymann lib. 4. tr. 10. c. 3. n. 1. Sporer tr. 2. in decalog. c. 9. sect. 2. n. 12. Explico brevissimè. Dicitur 1. *Superstitio*; quia est vitium Religioni oppositum per excessum.

sum. Dicitur 2. *qua ex pacto cum dæmone* &c. per quod divinatio differt tum à Prophetia, quæ immediate à DEO vel infundi solet, vel revelari; tum etiam à naturali conjectatione, quæ per industriam vel observantiam hominum gignitur, veluti de Astrologis & Medicis constat. Insuper per hæc verba quodammodo insinuatur malitia divinationis, eò quòd per hanc cultus soli DEO debitus quodammodo attribuitur diabolo. Dicitur 3. *occulta*; id est ab hominum notitia procul remota, sive de futuris contingentibus, sive de præsentibus vel præteritis &c. Unde additur 4. *prædicuntur seu etiam manifestantur* &c. divinatio quippe non in sola interna notitia consistit, sed signis insuper ac verbis externe prolatis perfici solet, veluti experientia probat.

¶. jam ad secundum. Divinatio ut, sic 482. duplex est *secundum omnes*. Una, quæ fit cum expressa dæmonis invocatione, sive hoc fiat verbis, sive etiam factis, utputa usurpando tale factum, cui dæmon respondere seu etiam occulta manifestare noscitur. Altera, quæ fit cum tacita invocatione dæmonis, prout fieri assuevit, dum vana verba vel facta usurpantur, & ex talibus occulta manifestantur. Rectè autem dicuntur vana, eò quòd ex se, sine interventu dæmonis, nequeant manifestare occulta, prout  
am-

amplius patebit ex dicendis de vana observantia *Conferentia sequente*. Castropalao *part. 3. tr. 17. disp. 1. pu. 3. n. 5.*

Quæres 2dò, quæ & quot sint species divinationis cum invocatione expressa dæmonis, & quot cum invocatione tacita?

483. R. 1. Divinationis cum invocatione expressa dæmonis communiter enumerantur novem species, quarum distinctio desumitur ex diversitate modorum, quibus solet dæmon respondere seu occulta manifestare; vel enim dæmon invocatus apparet variis imaginibus aut corporibus assumptis seu etiam efformatis ex aëre sicque manifestat occulta: & hoc dicitur *Præstigium*. Vel 2. per somnia certo situ aut ceremoniis decumbentis captata & dicitur *Somnium*. Vel 3. adhibitis certis signis aut carminibus mortui videntur resurgere & loqui occulta manifestanda &c. (quod nemo præter dæmonem facit) & dicitur *Necromantia*. 4. Subin diabolus vi pacti cum eo initi docet per homines arreptitios: & dicitur *Pytonismus*. Vel 5. dæmon manifestat similia per certa signa apparentia in corporibus terrestribus, utputa, in lapidibus, plumbo fuso, aut bivii &c. & dicitur *Geomantia*. 6. *Hydromantia* verò appellatur dum per signa apparentia in aqua, 7. *Aeromantia*, dum per signa apparentia in aëre; 8. *Pyromantia*, dum per signa in igne appa-

apparentia in igne manifestat &c. Denique 9nò. *Auruspicium* dici solet, dum diabolus per signa apparentia in intestinis seu etiam arteriis Sacrificatorum animalium responsa dat, prout olim dedit cæcæ gentilitati, veluti post alios observat P. Sporer. *cit. n. 13.*

¶ jam 2. Divinationis cum pacto implicito seu tacita invocatione dæmonis rursus duæ sunt species generales scilicet Sortilegium, de quo paulò infrà *a n. 492.* & Augurium latè sumptum. Hoc posterius rursus subdividitur 1. in astrologiam judiciariam, de qua rursus *n. 486.* dicetur 2. in augurium propriè dictum, dum scilicet ex animalium seu etiam avium cantu aut vocibus divinantur occulta. 3. in *484.* *auspicium*, cum ex avium volatu &c. 4. in omen, dum ex hominis sententia præter intentionem prolata 5. in onyrocriticam, dum ex somniis habitis &c. 6. in physiognomiam, dum ex totius hominis signis &c. 7. in metoposcopiam, dum ex fronte &c. 8. in Chiromantiam, dum ex manuum lineis occulta prædicuntur &c. piget profectò plures hujusmodi ineptias recensere; tum quia Doctores in iisdem recensendis neutiquam conveniunt; tum præsertim, quia fusior earum explicatio ad praxin parum, vel nihil conducit, quandoquidem de se patulum sit, quamlibet speciem per se loquen-

loquendo esse mortaliter peccaminosam & illicitam. Quia tamen de nonnullis posset esse dubium, in quibus circumstantiis illicitè usurpentur; hinc principales enucleatiùs ventilabimus in hac Conferentia. Jam verò

Quæres 3tiò, quale peccatum sit Divinatio?

485. *x.* Divinatio superstitiosa (de qua sola hic loquimur) ex suo genere est peccatum mortale, & nedum jure divino *Deuteron. 18.* sed & humano, *Can. qui divinationes II. c. 26. q. 5.* & *Can. si quis Clericus &c. ibidem.* prohibita sub infligenda excommunicationis pœna. Ita Doctores *unanimiter.* *Valentia tom. 3. disp. 6. q. 12. punct. 3. & 4.* *Laymann ubi suprâ c. 3. n. 4.* *Sanchez &c.* Ratio est: tum quia omnis divinatio includit formalem contemptum Dei, dum ea, quæ à Deo peti deberent, à dæmone postulantur, vel hujus suggestu aut delusione potiùs divinantur; tum præsertim, quia involvit commercium cum dæmone, hoste infensissimo Dei, totiusque humani generis, quod planè recta ratio naturalis & natura humana abhorret, dictatque illud commercium explicitum rem esse prorsus detestabilem, neque in hoc facile reperietur ignorantia invincibilis, licèt fateri cogamur (experientia teste) in illa divinatione, quæ fit cum pacto implicito duntaxat, subin non peccari nisi venialiter, idque

que triplicipotentissimum ex capite, vel quia  
1. simpliciores non ita apprehendunt mali-  
tiam hujus taciti commercii cum dæmone,  
ideòque excusari possunt à gravi culpa ratio-  
ne ignorantiae; vel, quia prudentiores et-  
iam non adhibent veram fidem; vel deni-  
que 3. quia ex mera levitate ac joci causâ sub-  
inde tentant aliquid de futuro aut præterito  
occultum indagare per vanum medium,  
quò casu non tam superstitionis, quàm va-  
nitatis cujusdam de se venialis condemnan-  
di sunt, veluti sapienter advertunt Valentia,  
Sanchez, Laymann, *lib. 4. tr. 10. c. 3. n. 4.*  
Babenstuber *tr. 5. disp. 2. art. 4. n. 23.* Felix  
Potestas *tom. 2. part. c. 6. n. 253.* & alii  
plures.

Ergone, inquires, omnis divinatio ex a-  
stris petita illicita est & graviter peccami-  
nosa?

R. Minimè gentium; non enim illicita 486.  
est, sed honesta & laudabilis divinatio astro-  
logiæ naturalis, illa scilicet, vi cujus Astro-  
logi ex astrorum concursu seu etiam influxu  
prælagiunt effectus quosdam naturales, seu  
necessario eventuros, utputa eclypses solis,  
vel lunæ, &c. vel etiam contingentes, &  
per alias causas naturales impedibiles, utpu-  
ta tempestates, pluvias aeris serenitatem,  
ventos, &c. Illa proin Astrologia dunta-  
xat velut noxia & superstitiosa reprobanda  
est, quam judiciariam vocant, eò quòd qui-  
R. P. Elbel. *Part II. de Fide &c.* O o dam



dam Phantastici volentes sapere plus quàm oportet, ex puncto nativitatis ( licèt incertissimo ) vel potiùs ex situ astrorum seu etiam constellatione &c. gestiunt præsagire nedum temperamentum , vel etiam inclinationem hominis recens nati, verùm insuper alia plura contingentia futura ab arbitrio humano dependentia , utputa officia, dignitates, electionem status , v. g. matrimonium, Religionem, &c. aliosve effectus fortuitos, uti sunt incendia , submersionem, deprædationem, bella, magnatum fata , &c. quo in genere nonnulli valde excedunt , licèt vanitatis potiùs , quàm superstitionis propterea arguendi &c. Hæc , inquam, & similia ex astris seriò velut certò ac infallibiliter , immò & probabiliter duntaxat futura divinare , graviter illicitum est , & nedum in Scriptura Sacra *Isaia 47.* sed & à jure *Ecclesiast. cap. Illos 26. q. 2. & cap. Non liceat. 26. q. 5.* itémque per Bullam *Sixti V.* jam pridem graviter prohibitum. Ratio est : quia hæc divinatio judiciaria nequit fundari in astris ceu causis quibusdam naturalibus ; secus enim actum foret de nostra libertate quoad actus humanos ab arbitrio nostro dependentes. Neque fundari potest in astris velut signis quibusdam : quis enim, amabo ! quis inquam astra hæc velut signa instituit, aut vim portendendi futura contingentia libera iisdem indidit ? Certè nec  
Deus.

Deus, nec Angelus bonus, vel ullus mortali-  
um : undenam enim tibi de hoc constat ?  
restat proin, quòd debeas illa apprehendere  
velut signa quædam à diabolo instituta ex  
tacito saltem pacto: ergo sunt graviter illi-  
cita. Ita Suarez *de Religion. tom. 1. lib. 2.*  
*c. 11. n. 17.* Laymann *loc. cit. n. 5.* Sanchez  
*lib. 2. decalog. c. 38. n. 30.* Quin immò  
similia contingentia ex astris vel conjecturali-  
ter tantum prædicere, prohibuit idem Six-  
tus V. in motu proprio *Cæli & terræ &c.* ju-  
bens, ut contra tales ab Inquisitoribus pro-  
cedatur, etiamsi id se non certò affirmare  
asserant, aut protestentur: tametsi non igno-  
rem Castropalaum, Sporer de la Croix,  
aliòsque plures DD. existimare hunc rigo-  
rem pro solo foro ex - non item interno  
esse attendendum quantum ad illos, qui con-  
jecturaliter præcisè similia divinare gestiunt.  
Videatur Kreslinger *in addit. ad Theolog.*  
*mor. R. P. Reiffenstuel tr. 5. distinct. 2. q. 3.*  
*post n. 19.* Vel Felix Potestas *Examen tom. 2.*  
*part. 2. n. 245.*

Ad, inquires, quid de divinatione illate-  
nendum, quæ petitur ex physiognomia  
hominis ?

Ante responsionem notandum breviter, 487.  
à Doctõribus distingui inter duplicem phy-  
siognomiam, Philosophicam scilicet, & a-  
strologicam. Philosophica ( ab aliis natu-  
ralis ) dicitur, vi cujus ex corporis disposi-

tionem, vultus, manuumque, vel potius lineamentorum dispositione fit quædam conjectatio prudens, v. g. de robore corporis, sana vel adversa valetudine, phlegmate, hominisque naturali propensione v. g. ad iracundiam, vel ad Melancholiam &c. &c. Astrologica appellatur, vi cujus ex iisdem lineamentis aut signis corporis prædicuntur alia non habentia connexionem, v. g. prospera vel adversa fortuna, promotiones ad officia honorifica, divitiæ, paupertas, nuptiæ, status vitæ, aliivè eventus fortuiti, vel à libera hominis electione dependentes, immò & de præsentibus v. g. quod sit adulter, fur, homicida, &c. &c. Hoc prænotato

488. *¶* ad quæsitum. Divinatio desumpta ex physiognomia philosophica & naturali licita est: non item illa, quæ petitur ex physiognomia astrologica. Ratio utriusque facile conjecturari potest ex dictis; nam divinatio prior petitur ex signis habentibus naturalem connexionem cum effectu v. g. propensione ad iram vel melancholiam: ergo ex his prudenter & probabiliter, esto non infallibiliter possunt prædicti similes effectus: è contra posterior divinatio petitur ex signis nullam prorsus habentibus connexionem, uti jam insinuatum est: ergo ex his fieri nequit, nisi imprudens & superstitiosa divinatio, per se loquendo mortaliter peccaminosa.

rosa. Secus dicendum, si supponatur fieri ex mero joco, prout semel factum fuisse memini, dum quidam alteri maritato (quem ex aliorum relatione noverat esse mœchum) ex lineamentis manuum divinavit, quòd ancillam præferat uxori, &c. &c.

Quæres 4tò, sitne semper illicita divinatione ex somniis petita?

Ante resolutionem rursus animadvertendum est, dari triplex somniorum genus; 489.  
aliud enim provenire potest ex causis naturalibus, utputa ex occupationibus vel cogitationibus tempore vigiliæ habitis, vel etiam ex temperamento seu humorum constitutione aut commotione; enimverò Sanguinei læta; Colerici verò, qui scilicet flava bile abundant, sæva, lites, jurgia, cædes &c. Melanholici, quia atra bile abundant, tristitia, morbos scilicet, infirmitates, oppressiones, &c. Denique Phlegmatici aquarum submersiones, ambulationes graves somniare solent, sicut Medicorum persuasio fert. 2. Aliud somniorum genus datur, quod à diabolo immittitur per commotionem phantasie, dum in hac diversas species excitare solet, prout olim fecit in uxore Pilati, quæ propterea maritum admonuit sequentibus verbis *Matth. 27. 19. Nihil tibi & justo illi: multa enim passa sum hodie per visum* (id est, somnium à diabolo immissum, uti exponunt Interpretes) *propter Eum.*

3. Tandem aliud datur somniorum genus à Deo immissum, prout legitur in Sacra Scriptura *Judic. 7.* de Gedeone; de Josepho & Magis *Matth. 1. & 2. cap. &* alibi sæpius. Jam hõc notato

490. R. 1. Illicitum quidem ac superstitiosum est, ex somniis etiam naturalibus conjecturare futura contingentia libera, vel effectus merè fortuitos, non item bonam aut pravam affectionem animi. Similiter 2. quando sufficientibus, & quasi moraliter certis indiciis constat, somnium fuisse immissum à diabolo, nulla huic adhibenda est fides, benè verò, si moraliter constet, illud fuisse immissum à Deo. Ita sanè *satis communiter* Doctores quoad utramque partem, prout videre licet apud Delrio *disquisit. mag lib. 4. c. 3. q. 6. conclus. 3.* Suarez *de Relig. tom. 1. lib. 2. c. 13. à n. 6.* Sporer *tr. 2. in decalog. c. 9. n. 18. & 19. &c. &c.* Ratio prioris partis hujus resolutionis est: quia somnia naturalia solent proficisci à bona vel prava affectione naturæ, temperamenti, seu etiam phlegmatis, ideoque cum hoc habent naturalem connexionem, non item cum futuris merè contingentibus: ergo ex similibus prudenter quidem & absque omnis superstitutionis nota fas est colligere temperamentum naturale &c. non item futura merum contingentia. Ratio autem posterioris est; quia, qui fidem adhibet somnio à dia-

diabolo sibi immisso convincitur velle habere quoddam commercium cum eodem, velut suo Magistro ac directore : è contra verò qui omnibus perpensis prudenter judicat somnium sibi à Deo fuisse communicatum, nedum prudenter potest , sed etiam tenetur illius ductum sequi : quis enim verè fidelium dubitet DEI consilia esse sequenda ?

At, inquires, undenam discernendum erit, sitne somnium à diabolo potius , quàm à DEO immissum ?

R. Equidem in hoc discernendo magna<sup>491.</sup> discretionem & cautela utendum esse, nequis à diabolo sese in Angelum lucis transformante fortassis decipiatur. Quem in finem juvabit præ oculis habere sequentes duas regulas. 1. *Si somnium impellit ad opus bonum, præsumere licet illud fuisse à DEO : è contra si impellat ad malum vel ad aliquid præsumptuosum &c. potius concludendum est, illud fuisse à diabolo immissum & causatum.* 2da Regula hæc est : *si quis post somnium se sentiat animò perturbatum, animò perplexum, minùs promptum ad servitium DEI & alia exercitia spiritualia &c. suspicari licet , illud somnium fuisse ingestum à diabolo - è contra si se inde sentiat allacriorem ad opera pietatis & ad amorem DEI &c. prudenter præsumet illud somnium fuisse à DEO vel ab Angelo quodam bono causatum : Diabolus enim ad*

bonum excitare non solet, sicut vice versa Deus & Angeli boni ad malum minimè, bene verò ad bonum operandum nos solent impellere. Tandem si dubium prudens relinquatur, sitne fornicium à DEO, vel potius à diabolo causatum, illud vel omnino contemnendum, vel certè cum viro quodam discreto, id est, Spiritu discretionis pollente (invocato prius DEI auxilio) discutiendum erit, prout sapienter monet Del-Rio *lib. 4. disquis. mag. c. 3. q. 6. post. 5. conclus.* Vide, si placet, Valent. *tom. 3. disp. 6. q. 12. punct. 3.* Vel Reiffenstuel *tr. 5. dist. 2. n. 23.*

Quæres 5to, an ergo usus Sortium semper sit illicitus?

492. Ante responsionem nota, nomine Sortium intelligi actionem, qua aliquid fit eo fine, ut inde deveniatur in notitiam alterius: Ex. gr. ut ex projectione taxillorum innotescat, quisnam jaciendo plus effecerit, idèoque & vicerit, ut eidem potius debeatur quàm alteri id, de quo sortiuntur, ut puta vestis, pecunia &c. hòc modo milites leguntur misisse sortem, & sortièdo inter se divisisse vestimenta Christi. *Matth. 27. v. 35.* Triplex porrò Sortium genus à Doctòribus communiter recensetur: primum appellant *divisòrium*, quò indagatur quidnam cuius tribuendum de bonis communibus v. g. de hæreditate &c. 2dum dici-

dicitur *consultorium*, quô mediante indagatur divina voluntas circa agibilia vel non agibilia, v. g. an status religiosus sit amplectendus? 3.tium vocatur *divinatorium*, quò intenditur notitia de occultis v. g. quisnam sit auctor homicidii vel furti commissi &c. &c. *hoc. not.*

¶ jam ad quæstionem propositam 1, Sortes divisi- 493.  
voriæ licitæ sunt, præterquam in electionibus Ecclesiasticis. 2. Sortes verò consultoriæ rariùs usurpandæ, denique 3. Sortes divinatoriæ nunquam sunt licitæ, & hoc ipso nunquam usurpandæ. Ita Sanchez, Bonacina, Filliucius *tr. 24. c. 4. à n. 94.* Sporer *tr. 2. in decalog. c. 9. sect. 2. n. 21. & seqq.* Reiffenstuel *tr. 5. dist. 2. n. 25.* & alii Doctores communiter.

Ratio primi est: quia Sortilegium divisorium revera nil aliud importat quàm contractum, quô plures ad rem aliquam jus habentes inter se conveniunt & volunt, ut sit illius, cui fors obtigerit: atqui in hoc pacto de se nulla prorsus malitia apparet: ergo non sunt reprobandæ sortes divisi-  
voriæ: dixi tamen: præterquam in electionibus Ecclesiasticis; nam in his debet eligi persona dignior, non autem respici fortuna vel fors melior. Unde etiam C. *fin. de Sortileg.* Pontifex concludit hisce verbis: *sortis usum in electionibus* ( Ecclesiasticis scilicet ) *perpetua prohibitione damnantes.*

O o s

Ratio



Ratio 2di est : quia regulariter loquendo DEus vult, ut suam voluntatem indagemus vel ab Ecclesia vel per directionem Superiorum, Confessariorum, aut Concionatorum &c. non autem per sortes. Nihilominus in casu, quô talis modus, consulendi scilicet Superiorem &c, non suppetit, simulque necessitas vel alia causa honesta ac ponderosa id suadet, fas erit mediante sorte v. g. aperitione libri Evangeliorum, vel alterius devoti ascetæ, invocato prius auxilio divino, explorare quodammodo mentem divinam, prout nedum Sanctissimus Patriarcha noster Franciscus trina aperitione libri Evangeliorum fecisse legitur, sed & alii plures Sancti. Ratio 3tii hæc est : quia sortes divinatoriæ utpote de se impropportionatæ ad investiganda hujusmodi occulta, semper includunt pactum saltem implicitum cum dæmone : ergo sunt illicitæ. Hæc de causa c. 1. & 2. de sortileg. sub gravibus pœnis prohibetur, ne per sortes inquiratur Author furti, vel quid impostorûm futurum sit. Videatur Reiffenstuel cit. tr. 5. dist. 2. n. 25.

Quæres 6tò. quid sit vana Observantia, & quomodo differat à Divinatione?

494. R. ad primam partem hujus quæsit. Vana Observantia est superstitio, quâ media inutilia & impropportionata adhibentur in ordine ad aliquem effectum extraordinari-

narium. Ita in re *communis* DD. prout videre licet apud Valentiam, Filliucium, Herincx & alios passim. Dicitur autem hæc observantia *vana*, tum quia media de se sunt inania & destituta virtute in ordine ad talem effectum; tum quia non raro frustra & vanè, utpote sine effectū, adhibentur, diabolo non servante vel non potente servare pactum &c. vel denique vana dici meretur, eò quòd semper plus nocumenti Spiritualis inferat vano observatori, quàm conferat emolumenti temporalis, prout bene notârunt *Doctores cit.*

¶. jam ad alteram quæsitam partem. Vana 425.  
Observantia à divinatione differt per hoc, quòd hæc posterior sit quodammodo speculativa, quippe quæ tota quanta occupatur circa cognoscendos, conjiciendos, seu etiam prædicendos ac divinandos eventus occultos: è contra prior vana scilicet observantia, sit prorsus practica, utpote occupata circa applicanda diversa media in ordine ad præstandos effectus extraordinarios. Ex gr. docet Ariolus te fore infelicem illo die, quò surgens pedem sinistrum præ dextro exponis è plumis, vel quò persona primò tibi in platea obvians est vetula &c. tu verò captata hac instructione diligenter observas, ne pedem sinistrum prius quàm dextrum exponas, aut dum vetula tibi primò occurrit, domum illico te recipis.

pis &c. in hoc casu Ariolus dicitur vanus divinator, tu verò vanus observator. Exemplum hoc nî fallor, ad captum appositè in rem nostram deservit. Cæterum quod malitiam concernit, nihil prorsus inter se differunt, tam enim divinatio, quàm etiam vana observantia ex suo genere est mortaliter peccaminosa, ob commercium vel pactum saltem implicitum cum dæmone in utraque contentum, licet divinatio sæpius post se trahat peccatum scandali, quàm vana observantia, quippe quæ non ita frequenter fieri solet coram aliis, at certè non petit fieri, sicut vana divinatio.

Quæres 7timò, quæ & quot sint species vanæ observantiæ?

496. R. Vanæ observantiæ communiter enumerantur tres species, scilicet 1. Ars notoria. 2. Observantia sanitatum, & 3 observantia eventuum. Ita rursus satis communiter Doctores. Ad has enim species cæteræ omnes congruè revocari possunt, prout constabit ampliùs ex dicendis, sive deinceps cum pacto ex - sive cum implicito contingant; in malitia enim substantiali superstitionis prorsus conveniunt, licet materialiter inter se differant, prout observant Suarez *lib. 2. de superstis. c. 14. n. 10. & c. 15. n. 2.* Castropalao *disp. 1. de superstis. pu. 8. n. 6.* Jam lubet brevissimè explicare seu etiam

citam declarare singulas species mox recensitas.

I. Ars notoria dicitur vana observantia 497.  
in ordine ad consequendam scientiam infusam de rebus occultis per media inutilia, utpote per inspectionem quarundam figurarum in speculo, velaëre vel aqua apparentium, aut per prolationem verborum ignotorum &c. Hac parte teste Sporer, Reiffenstuel, Sylvio, Herincx & aliis, uti solent Anabaptistæ, dum post sumptum poculum suæ cœnæ subito scripturarum aliarumvè rerum hæctenus ignoratarum scientiam assequuntur, dæmone illis procul dubio suggerente, prout vel inde haud obscurè colligere fas est, quòd Ecclesiæ exorcismis adorti eadem scientiâ non sine illorum confusione fuerint sæpiùs destituti, veluti refert Marchantius noster *tom. 2. tr. 2. part. 3. tit. 1. q. 2. §. 2.* Huc pariter revocandam existimo vanissimam illam Cabalistarum observantiam, qua ex computatione partim certorum verborum aut litterarum, partim etiam numerorum &c. tentant acquirere scientiam de futuris contingentibus, etiam á mero hominis arbitrio dependentibus, falsò sibi persuadentes iisdem litteris ac numeris quandam vim sive naturalem sive supernaturalem ex sympathia astrorum vel aliunde obtentam, competere in ordine ad portenta illa occulta :

culta: sed quàm inaniter hoc sibi persuadeant, constabit ex dicendis n. 502. & 503.

488. II. Vana observantia sanitatum est superstitio, quâ adhibentur media inania & inutilia ad sanandos homines aut jumenta &c. velut contingit dum ad recuperandam vel etiam conservandam sanitatem, vulnorum curationem aut mitigationem dolorum usurpantur verba, signa, ceremoniæ inutiles seu etiam incantationes &c. quæ neque ex sua natura, nec à DEO, nec denique ab Ecclesia habent vim in ordine ad talem effectum.

499. III. Denique vana observantia eventuum est superstitio, quâ ex fortuito & casuali eventu homo sibi vel alteri aliquid prosperi aut adversi conjectans, suas actiones moderatur vel regulat juxta illam divinationem, ut si domo egressus anum aut leporem sibi primò obviam habuit, aut canem ullulantem, picamvè picitantem audivit, proptereaue in malum omen illud accipiens, ocyus domum se contulit &c, Nec dubitandum, quin omnes ac singulæ species mox recensitæ ex suo genere mortaliter sint peccaminosæ, idque propter implicitum saltem commercium cum diabolo in hisce observantiarum generibus involutum. Nihilominus experientia teste fateri cogimur, simpliciores non rarò à mortali peccato posse ac debere excusari; vel quia

quia non apprehendunt malitiam superstitionis sub tali facto latitantis; vel certè quia absque firma fide vel certa expectatione, eventus similia practicant ex mera animi levitate, prout jam suprà *num.* 485, animadvertimus.

Quæres denique quid, undenam colligi debeat vel possit dictarum observantiarum vanitas aut malitia superstitiosa?

R. Vanitas artis notoriæ dignosci potest, 500. vel ex eo, quòd adhibeantur verba vel signa ignota frivola, vel falsa, aut diabolorum nomina, puta Beelzebub, Astaron, Zabulon &c. vel si quidem adhibeantur nomina & verba de se sancta, nihilominus admisceantur circumstantiæ vanæ, inutiles, & omnino impertinentes ad ejusmodi effectum, uti rectè observant Laymann, Delrio, Gobat, Sporer & alii. Vanitas porro sanitatum & eventuum deprehendi potest ac debet ex eo, vel quòd medio adhibito nec ex se neque aliunde, à Deo scilicet competat vis producendi effectum expectatum; vel certè exinde, quòd tametsi videatur de se habere aliquam vim seu etiam connexionem cum illo effectu, utputa sanitate aut eventu, &c. nihilo secius aliæ nonnullæ circumstantiæ accedere seu etiam per modum necessariæ conditionis observari debeant, ex. gr. quòd medicina contra febrim debeat esse confecta tali hora, tali loco, à persona hujus

hujus nominis, vel sumi in summo silentio, facie versus januam versa &c. quid enim hæc & similia conferant ad efficaciam medicinæ? Vide de hoc Sporer *tr. 2. c. 9. sect. 3. n. 30.* Filliucium *tr. 24. c. 6. n. 158.* Vel Reiffenstuel *tr. 5. dist. 2. n. 34.*

At, inquires, quid, si dubitetur, an hoc vel illud medium non habeat vim ex sua natura, vel certè ex institutione divina in ordine ad effectum expectatum, licebitne illud adhibere?

501. R. Ubi certò, aut certò probabiliter constat, quòd medium ex sua natura præcisè non habeat virtutem producendi effectum, solúmque dubitatur, an non habeat vim ex institutione DEI vel hominum, &c. neutiquam fas est uti tali medio: è contra tamen 2. ubi omnibus perpensis prudenter dubitatur, utrum medium illud ex sola sua natura non habeat virtutem sufficientem ad hujusmodi effectum de se & naturaliter possibilem, ex rationabili & urgente causa licitè adhibetur, modò non accedant aliæ circumstantiæ vanæ & superstitiosæ, simulque utens tali medio protestetur, se nolle effectum illum assequi, si non possit aliter, nisi ope dæmonis obtineri. Ita quoad utramque partem tenent Sporer *cit. 31. & 33.* Laymann *lib. 4. tr. 10. c. 4.* Tamburinus *in decalog. lib. 2. cap. 6. §. 1. n. 63. & 68.* Sanchez. *lib. in decalog. c. 40. n. 43. & 44.*

Ratio

Ratio prioris est hæc: quia ubi causa sua-  
pta natura certò agnoscitur esse impotens  
seu destituta vigore producendi effectum,  
ibi effectus aliunde expectari debet: atqui  
in hoc casu expectari nequit à Deo, quippe  
qui nullibi legitur appromississe talem con-  
cursum extraordinarium, & hoc ipso neque  
ab alio Angelo bono: ergo ab Angelo  
malo, Ratio autem posterioris est hæc:  
quia nemo prudentum negare potest, dari  
à parte rei mirabiles & quasi innumerabiles  
rerum naturalium, v. g. lapidum, herbarum  
virtutes &c. quæ nos penitus latent, vel  
quarum dare non possumus rationem con-  
venientem, veluti de virtute magnetis in  
ordine ad attrahendum sibi ferrum constat,  
& de aliis pluribus: ergo in casu, ubi aliun-  
de causa naturalis videtur & noscitur habere  
virtutem operatricem in ordine ad effectum,  
& solùm dubitatur, an habeat de se sufficien-  
tem, neque aliunde accedunt vanæ obser-  
vantia &c. planè non videtur, cur non ex  
gravi causa saltem fas sit uti hujusmodi re-  
medio, præsertim cum protestatione, quòd  
utens nolit obtinere effectum ope dæmonis:  
quandoquidem per talem protestationem  
prorsus excluditur omnis cultus, & omne  
commercium cum dæmone ineundum, ve-  
luti advertunt Doctores proximè allegati  
& citati:

*R. P. Elbel. Pars II. de Fide &c. Pp III.*



## §. II.

Proponuntur, & breviter resolvuntur Casus practici de Divinatione, & vana Observantia.

## CASUS PRIMUS.

**T**itius in arte cabalistica fundatissimum sese existimat, quam ob rem semel & iterum periculose satis decumbens per eandem artem suam exploravit, essetne ex hac infirmitate desessurus, nec ne? Confessarius in iisdem circumstantiis utpote valde periculosus ab amicis Titii accersitus eidem nitebatur persuadere, ut mediante confessione sacramentali, aliisque consuetis Ecclesiæ Sacramentis satageret se disponere ad beatam mortem; ast, nil minus persuadere potuit, Titio itentidem replicante, se per artem suam cabalisticam certò certius cognovisse, nondum sibi imminere horam mortis. Confessarius verò dubitare cepit, quid de Titio judicandum, vel cum eodem in his circumstantiis agendum?

502. R. Confessario concludendum fuisse, quòd Titius in malo statu nedum corporis, sed & animæ versetur, & hòc ipso conandum, ut Titio persuaderet seriam detestationem hujus artis revera superstitionis: certum quippe

quippe est, quodd vi hujus artis cabalisticæ non infallibiliter, immò ne quidem conjecturaliter aut probabiliter divinari possit mors, aut sanitas recuperanda vel non recuperanda, veluti plurimis rationibus fundatissimis probat Delrio *diquisit. magic. lib. 1. c. 4. q. 3.* Neque enim ulla verba vel litteræ neque etiam numeri aut cifrae ( quibus cabalista uti solent ) neque eorundem combinatio aut computatio ullam habent vim aut connexionem naturalem cum sanitate ( quemadmodum nullam habent cum divitiis obtinendis ) nec potest iisdem attribui vis aliqua artificialis vel supernaturalis: quo enim auctore hanc obtinuissem? Et certè, sanitas semel deperdita recuperari nequit sine mutatione seu alteratione, mediantibus qualitatibus activis facienda: atqui qualitates activæ exigunt & supponunt subjectum dispositum, & ad operandum idoneè præparatum, tale autem subjectum non sunt, neque esse possunt verba vel litteræ, aut numeri, eorumvè combinatio: ergo si ex his expectetur sanitas recuperanda, prorsus superstitiose & vi impliciti saltem pacti cum dæmone expectari debet.

Nec dicat Cabalista, se sanitatem non expectare recuperandam per artem cabalisticam, sed vi hujus duntaxat explorare, sitne per alia medicamina eandem recuperaturus vel non?

Nam

P p 2

Contra

503. Contra hoc inane effugium redit idem argumentum : Verba litteræ , numeri , eorūque combinatio æquè parū habent connexionis naturalis vel artificialis aut divinæ &c. cum medicamentis necessariis vel proficuis, quàm cum ipsa sanitate, vel cum peritia aut solertia Medici; ergo quemadmodum sanitatem ipsam nullatenus conferre valent , ita nec ex iisdem conjecturari possunt medicamenta vel medicorum peritia aut solertia &c. ac per consequens nec ipsa sanitas recuperanda, vel non recuperanda. Mihi certè videtur hæc fraus diabolica non collimare in alium finem, quàm ut Cabalisticam faciat negligere omnem curam salutis æternæ, quò securiùs eundem tandem pertrahat ad tartara: profectò quisquis ambit hac arte de futuris contingentibus præsertim à mero arbitrio humano dependentibus notitiam sibi comparare infallibilem , tacitè convincitur velle de similibus instrui vel dirigi ab aliqua alia causa occulta , & quidem ratione prædita: atqui non à Deo vel alio Angelo bono: ubi enim constat de de promissione vel infallibili assistentia DEI? &c, ergo ab Angelo malo seu dæmonio.

Atquid , inquires adhuc , si Titius velit quidem confiteri , nolit tamen hanc artem cabalisticam detestari , ejusvè exercitium deserere?

✱.

¶ Si tam firmiter huic inhæreat, ut eidem 504.  
etiam vim infallibilem divinandi futura attribuat, & desuper admonitus simpliciter nolit ab ea desistere &c. velut indispositus & vanus divinator absolutionis capax non est, prout ex hæcenus dictis liquidò constare potest. Nihilominus casu quo Confessarius animadverteret hujusmodi pœnitentem hæcenus bona fide exercuisse suam artem, nec unquam apprehendisse gravitatem malitiæ sub ea latentis: & à fortiori si pœnitens ipse supponatur nunquam adhibuisse fidem firmam huic artificio, sed potius ex curiositate similia practicasse, aliunde verò videatur difficulter persuadendus ad omnimodam fugam & detestationem illius, hæud imprudenter acturum existimo, si dissimulata interim veritate eundem relinquat in bona fide, & præmissa generali detestatione omnium peccatorum eundem absolvat sacramentaliter, velut in casu simili diximus superius, *confer. 1. n. 34. & in Theolog. Sacr. part. 2. confer. 18. n. 464.* Præstat enim in similibus casibus desperatis dissimulata veritate relinquere pœnitentem in bona fide, & peccare materialiter, eidemque administrare Sacramentum quodammodo dubium, quàm omnino nullum, vel veritate declarata dare quodammodo causam peccatis formalibus deinceps ab eodem committendis. Videatur Stoz *lib. 1. part. 3. n. 428.* vel de la Croix *l. 3. part. 1. n. 36.*

## CASUS SECUNDUS.

**S**empronius post maturam deliberationem statuerat ducere uxorem, dubius autem quamnam ex pluribus puellis sibi oblati deberet amplecti, intempesta nocte Sancti Andrea, dum luna clariùs incescit, faciemque quodammodo pratulit, Sempronius ad ripam cuiusdam fluminis se contulit (audierat enim ab alio quodam amico, se undecimam inter & duodecimam in eodem profluente velut in speculo quodam visurum imaginem futura sponsæ) at verò dum Sempronius super ripam stans superiori corporis parte nonnihil se inclinavit, quatenus formam puellæ ex aquis reluscentem perfectiùs contemplari posset, ripa inopinatò sub pedibus dilabente velut plumbum in flumen prolapsus fuit. Denique utut agrè emersus & frigore algens hanc suam curiositatem detestatus fuit, grates millenas referens DEO, qui è tam evidenti vita discrimine ipsum liberavit. Jam ad nostrum propositum dubitare licet, sitnè Sempronius culpæ gravis condemnandus ob hoc factum?

§ 95. R. Minimè dubitandum, quin Sempronius in hoc facto mortaliter peccaverit: quis enim prudentum vel primo etiam contuitu non illico apprehendat, hoc medium prorsus esse superstitiosum, utpote omni prorsus virtute tam naturali quàm super-

natu-

naturali etiam destitutum in ordine ad hunc effectum. Et amabo! ad quid illa circumstantia, quod inspectio debeat fieri in hac nocte, scilicet Andree? ad quid, quod undecimam inter & duodecimam? Profecto sola aqua sine adminiculo alterius speciei impressæ non habet vim exprimendi, seu etiam repræsentandi effigiem futuræ sponsæ vel sponsi; at impressio illa speciei nec à Deo nec à bono Angelo, neque ab alio homine in iis circumstantiis prudenter expectari potuit; ergo à solo dæmone, qui similibus sese immiscere solet, non alio fine, quam ut homines decipiat, ac secum in barathrum æternæ damnationis involvat.

Quod autem de inspectoribus aquarum §96. hic dictum fuit, idipsum intellegas velim de inspectricibus certorum speculorum, eo fine, ut in iisdem prospiciant futurum maritum, vel ut deprehendatur author furti, homicidii, maleficii positi &c. Cum enim nullum profus sit speculum habens ex sua præcisè naturâ sine interventu alterius speciei impressæ vim repræsentandi similia objecta; hujus autem speciei impressio à nullo alio, præterquam à diabolo prudenter expectari possit vel debeat, uti jam dictum fuit, hinc evidenter convincitur velle quoddam commercium cum humani generis hoste, quisquis tali medio utitur: quod vel inde amplius colligi potest; nam plerumque

que debent ab inspectricibus observari nonnullæ aliæ circumstantiæ prorsus vanæ, v. g. quòd inspectio fieri debeat à tali persona, hujus & non alterius nominis, hac & non alia hora, cum tali situatione, vel (quod adhuc pejus) cum plena & perfecta denuatione corporis &c. &c. è quibus omnibus secundum dicta n. 500. haud obscurè deprehendi ac colligi potest vanitas, & superstitionis hujus malitia, licèt rursus fateri cogamur, similia subinde à simplicioribus practicari absque peccato mortali formaliter tali; ob rationes jam superius n. 485. & 499. datas.

At verò, inquires adhuc, quid de illo tenendum, qui nocte natalitia fertur sese locasse supra tripodem retro januam seu portam Ecclesiæ, eo fine, ut hac ratione dignosceret, quænam ex foeminis intrantibus Ecclesiam esset saga vel non?

107. R. Auctor hujus facti nedum perniciosæ curiositatis, sed & damnabilis superstitionis est arguendus; tum quia medium hoc vel nullius prorsus potuit esse efficaciam in ordine ad discernendas sagas, vel certè si quam habuisset efficaciam, eam non aliunde, quàm à diabolo habuisset; tum etiam, quia factum hoc attentavit nedum tempore, sed & loco vel maximè incongruo, & quidem cum evidentissimo periculo temerè judicandi de proximo etiam innocente: quis enim ob-
- liga-

ligabit diabolum , ut nocentem potius , quàm aliam innocentem tibi proponat velut Sagam? hoc autem factò nunquid graviter delinques eandem habendo , vilipendendo &c. velut Sagam? &c. Hoc ipsum tenendum arbitror de alio quòdam, qui, quotiescunque vetulam obviam sibi habuit , assueverat secretò ergo illam pronuntiare certum quendam versiculum barbaricum, nullius scilicèt prorsus significacionis : & casu quo fœmina vel minimnm quid oblocuta fuisset , eam habere pro Saga seu lamia : hoc enim sine permagna temeritatis nota fieri non posse , quisque prudentum facîle capiet ob rationem proximè datam.

### CASUS TERTIUS.

**C**Aja de concilio alterius cujusdam fœminæ in caligas sui mariti secretò insuit certum quendam herbarum fasciculum eo fine , ut deinceps ab inordinato lusu, cui hætenus nimium quantum deditus fuerat , retraheretur. Et quod mireris : fatetur insuper Caja se id practicasse effectù tam prospero, ut ab eo tempore advertat maritum prorsus aversum ab omni lusu. Verùm cum cum obdictam causam multa contraxerint debita , ut propterea jam cogantur vivere in perpetua egestate & miseria ; hinc sciscitatur ulterius, an sibi non liceat

P P S

di-



dicere illam satis notam orationem S. Christophori eo fine : ut pecunias vel alia media sustentationi necessaria obtineant ? Jam ad nostrum propositum circa præsentem facti speciem dubitatur 1. Utrum vel qualiter Caja peccaverit , insuendo caligis sui mariti fasciculum herbarum ? An non teneatur illum tollere , vel verò sufficiat præcisè mutare animum , credendo scilicet , quòd dictæ herba non habeant vim retrahendi maritum à lusu inordinato ? 3. Denique quidnam de illa oratione Sancti Christophori tenendum sit ?

§ 98. R. ad primum quæsitum, Cajam procul dubio graviter peccasse , quandoquidem illud medium certò certius fuit supersticiosum , utpote omnino improporcionatum in ordine ad effectum intentum ; nam abstinentia vel cessatio mariti ab inordinato lusu dependebat præcisè à libero ipsius arbitrio : atqui fasciculus herbarum caligis insutus naturaliter non potuit immutare arbitrium seu voluntatem mariti ; quia quæ naturaliter moveri non solet , nisi præsupposita cognitione objecti : objectum autem ( fasciculus scilicet herbarum latenter insutus ) nunquam fuit cognitum à marito : ergo non potuit habere vim naturalem.

Neque illa prorsus videtur ratio asserendi , quòd fortassis occultæ quædam exhalationes dictarum herbarum habuerint vim immutandi intellectum , & consequenter

ter etiam retrahendi voluntatem ab inordinato lusu &c. Naturaliter enim loquendo illæ exhalationes prius debuissent immutare aliquem sensum: quandoquidem juxta sanam Philosophiam nihil esse possit in intellectu, quod non prius fuerit in aliquo sensu: atqui nullibi constat, neque est prudens ratio asserendi, quod vis dictarum herbarum, utpote prorsus incognitarum marito immutaret aliquem sensum, ac per consequens etiam intellectum aut voluntatem: ergo &c.

N. ad 2dum quæsitum, Cajam à Confessario fuisse persuadendam & suo modo obligandam, ut è caligis sui Mariti auferat dictum fasciculum herbarum, idque propterea, ne habeat occasionem in sua persuasionem sinistra ulterius perseverandi. Profectò si firmiter credeat dictis herbis nullam competere vim retrahendi maritum ab inordinato lusu, nullam pariter sentiet difficultatem eas tollendi: si verò supponatur etiamnum perseverare in hac sinistra persuasionem, velut superstitiosa & vana observatrix privari debet beneficio absolutio-  
nis. Tametsi in rigore loquendo existimem, quod in hoc casu sufficeret deponere sinistram persuasionem, nec simpliciter necessum, ut fasciculus herbarum tollatur; tum quia is supponitur nemini esse nocivus; tum etiam quia Caja poterit sibi persuadere  
sua

suadere maritum non propter herbarum fasciculum, sed propter alias rationes v. g. infortunium, aliavè incommoda mutasse animum, ita, ut nolit amplius ludere. Hac de causa Sporer, aliique plures Doctores bene advertunt, universaliter loquendo non bene argui: hic vel ille usus fuit medio superstitioso v. g. ad febrim depellendam, & ex eo tempore sensit se liberatum: ergo medium illud juvit &c. Non, inquam, bene hoc infertur; potuit enim contingere, ut eo tempore, quò medium illud Superstitiosum fuit applicatum, naturaliter cessaret materia peccans, unde febris ortum duxerat: quidni ergo similiter contingere potuisset, ut eodem tempore, quò Caja applicavit medium superstitiosum, maritus ex alio motivo, uti jam dictum fuit, lusum execraretur?

§ 10. R. jam ad 3tium quæsitum, neutiquam approbandum vel etiam permittendum fuisse usum illius orationis ad S. Christophorum; quandoquidem hæc in rei veritate non est, nisi magica quædam incantatio cum implicito saltem pacto aut invocatione diaboli; nam tales solent sperare ac credere post certum tempus vel numerum orationum S. Christophorum (verius dixeris diabolum) sibi compariturum, & ministraturum subsidia pecuniaria &c. ubinam autem hoc scriptum vel à DEO revelatum  
le.

legitur? Licitè quidem & sanctè pro quavis necessitate sublevanda ad Deum recurrimus, & hunc in finem Magister cœlestis Christus Dominus noster orationem dominicam nos docuit, quam cum pia in Deum ceu Patrem nostrum cœlestem fiducia quilibet tantò utiliùs, quantò frequentius orare poterit: hujus ergo usum ac frequentiam Confessarius efficaciter inculcet, alterius verò omnino prohibeat ob rationes jam datas. Vide, si lubet, Castropalao *part. 3. tr. 17. disp. 1. pu. 10. n. 9.* Vel Matthæuci *in cautel. Confessar. lib. 1. c. 17. n. 98. & seqq.*

### §. III.

## Corollaria ex dictis inferenda.

**C**OLLIGES ex hætenus dictis primò, illi- 511.  
citum esse consulere Cingaros, uti vocant, aut cingaras de futuris contingentibus, utputa de statu deligendo, de prospera, vel sinistra fortuna &c. Ratio est: quia consulendo datur iisdem occasio vel potius motivum vel ope dæmonis divinandi vel certè mentiendi; cùm aliunde notitiam de futuris contingentibus habere non possint, nisi à dæmone. Esto autem talis consultatio ex joco ( uti plerùmque  
assue-

assuevit ) facta, culpam venialem excedere non videatur, potest nihilominus fieri mortalis, si vel consulens animo serio consulat, & responsis firmam fidem adhibeat, vel certè prævideat cingaram dæmonem invocaturam, utendo medio superstitioso, vel animo serio responsuram &c. &c. Sanchez *lib. in decalog. c. 38. n. 48.* Matthæucci *loc. cit. n. 112.*

- §12. Colliges 2dò, non esse illicitum uti scientia ope dæmonis acquisita v. de effectu aut virtute naturali alicujus rei, modò dæmon ad actualem usum concurrere non debeat. Ita *ex communi DD.* tenent Sanchez *cit. c. 42. n. 20.* Suarez *tom. 1. de Relig. l. 2. c. 15. n. 24.* Tamburinus, Sporer &c.

Ratio hujus est : quia scientia de se est bona, quantumvis illicitè acquisita. Hinc fit, quòd si à dæmone didicisti, quænam medicamenta naturalia serviant ad hunc vel illum morbum depellendum, licitè ea applices &c. vel si nòsti, quo medio aut via naturali tolli valeat maleficium, licitè illud tollas, ferè quemadmodum meretrix licitè utitur pecuniis opere suo meretricio male adeptis.

- §13. Colliges 3tiò, etiam in usu sacrarum rerum, utputa orationum, gestatione sacrarum Reliquiarum &c. intervenire posse vanam observantiam v. g. quòd oratio debeat

beet dici facie erga solem vel lunam versa &c. hac vel illa hora &c. Hæc inquam & similia innumera non nisi superstitionem sapiunt; cùm tales circumstantiæ prorsus nihil conferant ad efficaciam orationis. Confessario proin incumbit, ut fideles quos animadvertit hisce superstitionibus deditos, bene instruat, docendo ac demonstrando, quòd similes circumstantiæ prorsus sint vanæ ac inutiles, adeoque spem & fiduciam suam non in hisce ineptiis ac insaniis falsis, sed potius in Dei bonitate ac clementia nec non in Sanctorum meritis vel eorum, quorum SS. Reliquias colunt, intercessionem collocare debeant, prout sapienter monet Matthæucci *loc. cit. n. 195.* Hinc ulterius

Colliges 4tò<sup>1</sup>, graviter delinqui ab iis § 14.  
qui SS. & tremendo Missæ sacrificio abutuntur, sive procurando, ut illud legatur ex malo fine, sive ut adhibeantur aliæ circumstantiæ supersticiosæ velut necessariæ in ordine ad obtinendum aliquem effectum v. g. Sanitatis, illæsiabilitatis seu invulnerabilitatis &c. Hujus sacrilegæ superstitionis condemnandi sunt sequentes  
1. qui curant tot & tot præcisè Missas v. g. tres & non plures legi, & quidem tribus diebus continuis, tribus Sacerdotibus hujus & non alterius nominis, accensis tot & tot candelis &c. 2dò qui certas scripturas,

volunt subito depellere morbum- 3. qui vel quæ per prolationem certorum verborum volunt canes reddere mutos, aut sanguinem sistere, ne amplius diffuset v.g. ex naribus aut vulnere corporis &c. &c. Ratio similium facile potest erui ex dictis: nam pactum saltem implicitum cum dæmone sub schemate similium verborum latens facile potest colligi tum ex eo, quod circumstantiæ prorsus vanæ adhibeantur, (ad quid enim insufflatio verborum in aurem animalis ratione destituti & nil prorsus intelligentis?) tum etiam, quia dicta verba de se sacra non habent vim infallibilem impetrandi tales effectus insolitos. Et licet me non lateat, à multis Doctoribus non improbari usum similium verborum seu etiam versiculorum ex Psalmis &c. si cum pia in DEum confidentia & sine infallibili expectatione à DEO desiderentur dicti effectus; existimo nihilominus hanc praxin, utpote plenam periculo, omnimodis à Confessario esse dissuadendam, vel ex eo duntaxat capite, quod pauci intra terminos piæ duntaxat confidentiæ sint substituri, præsertim si semel effectum ad prolationem dictorum versiculorum fuerint experti. Videatur de la Croix lib. 3. p. 1. n. 29.

At inquires, quid tenendum est de pulvere Sympatico, quo nonnulli curare solent vulnera distantium?

*R. P. Elbel, Pars II. de Fide &c. Qq R.*

§ 16. R. Ab aliquibus Doctõribus usum hujus pulveris approbari cum hac tamen limitatione : modo vulneratus non nimiũ distet v. g. ultrà trecentos passus &c, tum quia probabile est, dari aut possibilem esse *actionem in distans*; tum quia fortassis idem pulvis potest diffundere nonnullas qualitates per medium, quemadmodum cadavera defunctorum (teste S. Thoma aliisque multis DD.) per multa milliaria solent emittere quendam odorem vel potius fætorem : hac de causa credo in casu urgente permitti posse usum hujus pulveris cum limitatione jam insinuata, præsertim si utens protestetur, se nolle quodcunque cum Cacodæmone habere commercium, neque etiam desiderare effectum sanitatis, nisi hæc naturaliter restitui vel obtineri possit.

Alii tamen Doctores satis communiter damnant usum hujus pulveris velut superstitiosum, eò quòd incredibile videatur, quòd qualitates hujus pulveris tam longè, per muros etiam & media corpora interjecta undequaquam sese diffundere valeant : hæc opinio procul dubio tutior est, proptereaque usus ejusdem pulveris non facile approbandus à Confessario.

§ 17. Colliges ex his 6tò, id, quod de cura mediante pulvere sympatico mox diximus, pariter tenendum esse de transplantatione (utí vocant) sanguinis, dum scilicet Chy-

RUF



rurgi sanguinem humanum e membris tabescentibus v. g. brachio, pede &c. extractum infodiendo transplantant in arborem eo fine, ut membra tabescentia recuperent pristinum vigorem ad instar arboris reslorescentis. Mihi probabilius immò prope modum certum & indubitabile videtur, quòd hoc medium prorsus vanum sit. & inane : quid enim virtutis aut vigoris corpori humano tabescenti conferat sanguis in arborem, præsertim multum distantem transplantatus ? vel quid arbor distans corpori ? Nec immeritò S. Thomas aliique plures Doctores, quos sequitur Burghaber *centur. 1. cas. 46.* certæ superstitionis damnant eos, qui pueros aut chartulas nomine puerorum inscriptas mittere solent per fissuram arboris, ut sanentur à rupturâ 1. item 2. qui ferrum, quò læsi sunt, infingunt lardo porcino : ut sanentur ; vel qui 3. arborem vel etiam rem ligant locò vulneris sanandi &c. &c. Qui plus hujusmodi ineptias & superstitiones observantias ( nam omnes recensere impossibile foret, nec capi possent libelli hujus angustiiis ) nôsse desiderat, adeat R. P. Del-Rio *lib. 3, disq. magic. part. 2. q. 4. sect. 9.* Gobat *théolog. experiment. tr. 11. à n. 923.* vel de la Croix *lib. 3. part. 1. n. 29. & seqq.*

Colliges 7timò, superstitionis pariter § 18. condemnandos esse illos, qui ad procu-

Q. q. à

tan-

randos vel obtinendos effectus extraordinarios adhibent artificialia quæ talia, utputa imagines astronomicas, annulos, characteres, numeros arithmeticos. Ita Del-Rio *lib. 1. c. 3. q. 1.* Valentia *tom. 3. disp. 6. q. 10. pu. 2.* Sanchez aliique plures. Ratio est: quia artificialia, utpote destituta qualitatibus alterativis nequeunt esse principium naturale alicujus operationis vel immutationis. Nec dici valet, quòd habeant quandam virtutem naturalem ab astris sibi impressam: unde enim amabo! unde constat de tali impressione? vel quis artifex ex astris hunc influxum infallibilem impetrabit? Profectò cum quodvis artificiale quæ tale sit voluntarium, dicendum potius foret, astra immediate influere in arbitrium artificis, & non in artefactum: at, hoc æquè absurdum est quàm illud: utpote omni fundamento destitutum, veluti colligi potest ex dictis ad casum primum hujus Conferentiæ: ergo &c.

§ 19. Colliges denique 8tavò, nunquam prorsus fas esse uti medio, de quo certò constat, esse superstitiosum, & omni virtute in ordine ad talem effectum destitutum.

Ratio est: quia superstitio utpote intrinsecè mala nullo casu nulliusvè necessitatis intuitu cohonestari potest. Unde in simili contingentia nulla prodest protestatio, quòd nihil cum dæmone velis habere commerc-

mercii &c. opere enim ipso contrarium monstras, utpote gnarus tali medio nullam competere vim ex sua natura, neque etiam ex aliqua Ordinatione divina, & tamen (uti supponitur) eodem uteris in ordine ad effectum: à nullo alio, quàm à dæmone præstandum.



# CONFERENTIA DECIMA SEPTIMA

## De Magia & Maleficio.

### *SUMMARIUM.*

520. Nomine Magiæ ut sic intelligitur ars mira operandi; quæ dividi solet in naturalem & superstitiosam.
521. Magia Superstitiosa rursus ex duplici fineditur vel Magia simpliciter vel maleficium.
522. Utraque hæc species absque dubio est mortaliter peccaminosa.
523. 524. & 525. Breviter explicatur, quidnam Sagæ aut magi valeant. 1. circa Elementa. 2. circa corpora humana, & 3. quid circa animas, vel in animas hominum?
526. Esto Sagæ non semper, fortassis tamen sæpius transferuntur à dæmone de-loco in locum per aëra.

527. Non ergo audiendi sunt Lutherus, Melancthon & alii, existimantes id duntaxat fieri vel absolvi in mera imaginatione, nec esse, nisi diaboli illusionem.
528. Respondetur breviter ad principale fundamentum AA.
529. Maleficium rectè dicitur: ars sive potestas nocendi aliis.
530. Hoc rursus à DD. distinguì solet in philtum amoris, veneficium.
531. Quænam remedia sint adhibenda contra maleficia?
532. Nunquam fas est solvere maleficium per aliud novum maleficium, bene tamen per ablationem signorum.
533. Quidnam agendum sit, casu quo dubitatur, an magus vel saga possit medio naturali vel licito solvere maleficium?
534. Quid si posset quidem, dubitetur tamen, an non mediò superstitioso sit soluturus?
535. & 536. Solvuntur breviter duæ objectiones in contrarium.
537. Resolvitur breviter Casus I, de quodam lascivo, qui mediante philtro nixus fuit puellam honestissimam in suam trahere sententiam.
538. Quid Confessario agendum fuerit cum tali juvene pœnitente?
539. An Maleficium ab eo depositum potuerit tuto conscientia in eodem loco relinqui, an verò debuerit auferri?
540. Resolvitur Casus II. Cujusdam pœnitentis, qui ad recuperandam pecuniæ summam furtivè sibi ablatam justus fuit à quodam ariolo infigere clavum cistulæ, è qua pecunia fuerat subtracta.
541. Prorsus illicitum ac superstitiosum est percutere seu etiam comburere animalia veneficio
- in-

infecta, eo fine, ut saga eundem dolorem senti-  
tiens cogatur deinceps abstinere à nocumentis  
inferendis.

542. Fas nihilominus est, ponere tale signum  
contrarium, quò diabolus cogatur abstinere  
deinceps à maleficio continuando, seu damno  
inferendo &c. &c.

543. Sitnè licitum ponere signum contrarium, de  
quo dubitatur, an non sit superstitiosum?

544. Resolvitur Casus III, de quodam puero de-  
cenni, qui parochus suo ingenuè fassus fuit, se  
à Cacodæmone didicisse artem magicam.

545. Parochus huic illicitè præcepisset, ut artis suæ  
probam monstraret ad oculum.

546. Potuit tamen tutâ conscientia uti balneo, ut  
liberaretur à veneficio, quò ab eodem puero fue-  
rat infectus.

547. Quomodo vel quibus de punctis puer iste,  
vel alius quicumque magus in simili casu specia-  
liter sint examinandi?

548. Quâ via, quibusvè mediis ad frugem me-  
liorem sint reducendi?

549. Opera magorum, quantumvis videantur mira,  
non tamen sunt vera miracula.

550. E quibus indiciis colligendum sit, an inter-  
venerit verum miraculum à DEO, an verò ope-  
ratio merè naturalis, aut diabolica?

551. Judex illicitè peteret à mago vel Saga pro-  
ductionem v. g. muris aut ranæ in testimonium  
artis magicæ &c.

552. Similiter illicitum est vertere Scopam, vel  
projicere pulvinar versus januam eo fine, ut  
Saga cogatur remanere in cubiculo usque dum  
agnoscatur Persona.

553. Sitnè licitum in ordine ad se liberandum ab  
infectione dæmonis repercutere Sagam, esto

Qq 4

illa

illa propterea à dæmone esset graviter percutienda, aut intoxicanda novo maleficio ?

554. Quid denique agendum cum pecuniis à diabolo obtentis, & an licitè à mago expendantur ?

## §. I.

Præmittuntur & breviter resolvuntur quæsitæ scitu necessaria ad debitè resolvendos Casus practicos de Magia, & Maleficio.

**Q**Uæres primò, quid sit Magia ? & quotuplex ?

520. *R.* ad primam partem hujus quæsitæ, nomine magiæ ut sic seu in genere communiter intelligi *artem operandi mira*: communissimè autem dividi solet in naturalem & superstitiosam seu diabolicam. Naturalis dicitur, dum hominum inventione aut ingenio mediantibus causis naturalibus (applicando scilicet activa passivis) admirandi quidam effectus, utpote transcendentes communem naturæ ordinem, producantur. Et hanc magiæ speciem, etsi de se minimè malam, Doctores communiter dissuadendam monent, eò quòd sit valde periculosa, ac sensum sine sensu viam sternat ad magiam superstitiosam &c. Magia verò superstitiosa (de qua sola impræsentiarum tractabimus) perbene descri-

scribitur, quòd sit ratio seu *ars operandi mira ope demonis*, id est, per signa à dæmone instituta: quemadmodum enim magia naturalis utitur causis naturalibus: ita Superstitiosa utitur quibusdam signis, quibus dæmon suo modo allicitur, vel vi pacti cogitur ad præstandum id, quòd magus aut saga petit,

¶ ad alteram partem ejusdem quæsit. § 21.  
Magia Superstitiosa seu diabolica ratione finis à mago aut saga intenti rursus est duplex; vel enim magus suam artem exercet eo præcisè fine, ut sibi magnum acquirat nomen: vel sese ostendet, uti fecisse leguntur magi in Ægypto coram Pharaone producendo serpentes &c. & tunc dicitur simpliciter *magia*: vel exercet illam in ordine ad inferendum Proximo damnum; & tunc appellatur *maleficium* seu etiam *veneficium* vuluti Herincx noster & alii Doctores communiter docent, & mox ampliùs patebit ex dicendis à n. § 29.

Quæres add; quale peccatum sit Magia?

¶ Magia est ex suo genere peccatum § 22. mortale. Ita *omnes*. Ratio est: quia nunquam exercetur sine expressa vel saltem tacita invocatione & commercio cum dæmone: atqui hoc commercium gravissimè repugnat tum legi divinæ, tum etiam rectæ rationi nobis congenitæ: ergo &c. Nunquam proin in hac arte dari potest excusa-

Qq 5

tio

transferre integras segetes, vel integra pomaria de loco in locum, transponendo scilicet superficiem terræ aut terram, in qua arbores aut segetes erant plantatæ &c. Ratio horum est: tum quia gaudent maxima celeritate ac potestate seu virtute movendi hæc corpora sublunaria de loco in locum; tum etiam quia pollent notitia rerum naturalium v. g. quò modo tonitrua aut grandines confici debeant: proin facillimo modo possunt nubes in aliis etiam regionibus collectas coadunare ad locum, ubi magus demoratur, easdemque vel in pluvias resolvere, vel inducto frigore ita indurare, aut densissima grandine in terram decidant &c.

R. 2dò, Circa corpora hominum Magi § 24. vel potius dæmones possunt sequentia.

1. Ea celerrimo motu transferre de loco in locum. 2. Eadem corpora transformare quodammodo, saltem extrinsecè, mutando scilicet figuram, & ex aëre vel crassis vaporibus terræ aliam v. g. lupi circumponendo &c. vel substituendo veram bestiam lupi loco hominis subitò in alium locum translati & hoc etiam modo hominem reddere invisibilem &c. 3. Possunt causare varios morbos in humano corpore, vel 4. viceversa infirmatum aut vulneratum sanare &c. intellige semper: *per se loquendo & permittente DEO.*

R. jam



§ 25. R. jam ad idem quæsitum 3tiò. Circa animas hominum corporibus conjunctas dæmones, & ope ipsorum magi omnia possunt, quæ ex dispositione corporis & imaginatione dependent; utputa incitare ad amorem, ad odium, ad libidinem; potest enim diabolus efficere, ut objectum amandum semper observatur phantasie amantis, vel objectum odiosum phantasie odientis, prout multiplici experientia constat & amplius patebit ex dicendis à n. 537.

Circa animas tamen à corporibus jamiam separatas seu solutas, nec dæmones (nisi in damnatas, puniendo illas juxta mensuram delictorum) neque etiam magi aliquid possunt v. g. excitando eas ab inferis: Hinc si magus aut Saga faciat spectrum quoddam apparere, minimè credendum est, quòd sit anima alicujus hominis defuncti, sed potius dæmon ipse sub tali forma latitans. Neque obstat illud, (inquit rectè Babenstuber *cit. n. 68.*) quod 1. *Reg. 28.* de Samuele narratur; nam si verè apparuit anima Samuelis, id non factum est vi artis magicæ, sed ex peculiari ordinatione divina ad majorem terrorem & confusione[m] impii Saulis. Videatur de his Suarez *tom. 1. de Relig. l. 2. c. 16.* Filliucius *tr. 24. c. 7. à. n. 171.* vel Sayrus *in clavi Reg. lib. 4. c. 6. à. n. 14.*

Quæ-

Quæres 4tò , sitnè verum , quòd Sagæ vel striges aliquando realiter ac physicè per dæmonem transferantur de loco in locum?

R. Vix prudenter dubitari posse , quin §26. subinde saltem portentur per aëra de loco in locum , ita ut corporaliter interfint nefariis conventibus , & nescio quæ detestabilia ac nefanda scelera committant. Ratio est: quia in primis negari nequit , diabolum pollere hac potestate loco motiva: ex parte autem lamiarum seu strigum nulla prorsus apparet repugnantia. Adde insuper , quòd hæc corporalis præsentia , & præsertim commixtiones illæ nefandissimæ , quas solent habere frequentissimas tum inter se , tum etiam cum ipso dæmone , longè efficacius alliciant , & quodammodo pertrahant aut cogant ad omne nefas : unde minimè ambigendum , quin Cacodæmon hoc mediò sæpessèpiùs utatur ad hunc finem , esto fortassis subinde interveniant nonnullæ illusiones dæmonis v. g. *circa situm loci ad quem , vel circa apparatus convivii , epularum &c.* Denique veritatem hujus opinionis probant experientiæ & quasi innumeræ historiæ , prout videre licet tum apud Delrium *disquis. mag. lib. 2. q. 16.* tum etiam apud Sprengerum *in malleo malefic. part. 2. q. 1. c. 3.* Binsfeldium *de Confess. malefic. pag. 202. & seqq.* omnibus

hominibus, vel brutis nocuerint: iniurias verò ab ipsis DEO illatas per idololatriam, blasphemias, sodomiam, &c. tanquam merè illusorias insuper haberi, & non curari Ita Babenstuber *tr. 3. disp. 2. art. 4. n. 71.* & sapienter omnino: nam si iudex nolit animadvertere in sagam propter idololatriam, blasphemias, sodomiam, &c. eò quòd hæc & similia à parte rei non faciant, sed potius à dæmone illusæ credant, se fecisse, planè non video, cur idem iudex non debeat pariter existimare, sagas à parte rei non nocuisse hominibus aut brutis, sed solum vi illusionis diabolicæ credere, quòd talia damna intulerint, quo semel datò planè non apparet, cur ob hæc scelera potius quàm ob illa debeat animadvertere in sagam.

At, inquires, *cap. Episcopi 26. q. 5.* dicitur quòd *Satanas - - mentem (sagarum) quam captivam tenet, in somniis deludens, modò læta, modò tristia, modò cognita, modò incognita personas ostendens, per devia quaque deducit, &c.* moxque subditur: *quis verò tam stultus & hebes sit, qui hac omnia, qua NB. in solo spiritu fiunt, etiam in corpore accidere arbitraretur?* ergo non vere ac realiter sed in solo spiritu, id est phantastica illusionè dæmonis transferuntur.

*¶. in cit. capitulo* solum reprobari, quòd § 28. *sagæ cum Diana Dea paganorum, &c. vere & realiter transferantur per aera &c. pro-*  
ut

ut legenti contextum ejusdem capituli patebit, minimè autem docere, quòd omnia illarum peccata in sola phantasia vel imaginatione absolvantur. Unde in forma breviter responderi potest distinguendo consequens : ergo non verè ac realiter per aëra transferuntur cum, vel per Dianam paganorum Deam, *conced.* non transferuntur per diabolum, saltem sæpius &c. uti jam dictum fuit, *neg. consequent.* Reliquia Adversariorum fundamenta confutata videri possunt apud Azorium *tom. 1. lib. 9. c. 25. q. 3.* Suarez, Sayrum, Del-Rio, Babenstuber *n. 71.* & alios proximè cit.

Quæres 5to, quid sit Maleficium? & quæ vel quot species ejusdem?

- § 29. *℞.* ad primam quæsitam partem. Maleficium est ars, sive potestas nocendi aliis ex pacto expresso vel tacito cum dæmone. Ita Filliucius *tr. 24. c. 8. n. 181.* Tambur, *lib. 2. in decalog. c. 6. §. 2. n. 1.* & alii *DD. communiter.* Ratio hujus descriptionis facile potest colligi ex dictis; nam maleficium convenit cum magia mox descripta, *nec* aliter ab ea differt, quàm quòd magia tendat ad potentiam dæmonis seu etiam magi &c. ostendendam aut magnificandam : ars verò malefica seu maleficium potius inferatur in ordine ad nocendum aliis.
- § 30. *℞.* jam ad alteram quæsitam partem. Duæ danter species maleficii; è quibus prior vocatur

catur *maleficium amatorium*, vel (ut alii loquuntur) *philtrum*: posterior verò dicitur *veneficium*. Per *philtrum* seu etiam *maleficium amatorium* hominum animus flecti solet ad amorem carnalem & lascivum, proptereaque sæpius quàm par est inter conjugatos excitari solent rixæ, dum amor unius flectitur ad alienam personam. *Veneficium* verò appellatur illud, quò malefici utuntur ad nocendum aliis, sive in propria eorum persona, utputa occidendo, ægritudines immitendo, præsertim sterilitatem vel impotentiam &c. sive in aliis rebus mobilibus aut immobilibus, utputa, destruendo segetes aut vineas, subvertendo ædificia, vel occidendo animalia &c. Ita *Communiter DD.* nominatim *Filliucius loc. cit. n. 182.* *Babenstuber ubi supra n. 73.*

Quæres 6tò, quænam remedia contra homines maleficos, vel potius contra ipsa maleficia sint usurpanda?

R. Duplicis generis remedia licitè & utiliter possunt adhiberi, scilicet vel 1. naturalia (quæ ordinariè à Medicis contra diversas ægritudines pro exigentia rerum præscribi solent, esto hæc plerumque non sint tam efficacia, casu quo infirmitas etiamnum in factò esse dependet à maleficio, eò quia diabolus facile potest impedire eorum vim & efficaciam, aut certè re-  
R. P. Elbel, Pars II. de Fide &c. Rr strin-

stringere influxum &c.) Vel 2. supernaturalia seu spiritualia, quæ prioribus sunt magis efficacia, cujusmodi sunt 1. magna fides & firma in Deum Divorūque protectionem fiducia. 2. susceptio baptismi, si maleficiatus supponatur hætenus nondum fuisse baptizatus. 3. sincera ac dolorosa confessio peccatorum; cum enim peccata nostra non raro Deum moveant, ut diabolo permittat potestatem nocendi, consequens erit, ut si per veram peccatorum retractationem divina Nemesis placetur, denuo diabolica potestas coerceatur. 4. devota sumptio seu participatio SS. Eucharistiæ Sacramenti. 5. Exorcismi ab Ecclesia approbati, quorum quanta sit vis & efficacia contra malignos dæmones, frequens monstravit experientia. 6. Aqua benedicta à ministris Ecclesiæ, quippe quæ ob preces Ecclesiæ pariter magnam habet vim ad evertendas dæmonis infestationes. 7. Reliquiæ Sanctorum, Cerei Sacri, item panis & sal benedictus, aliæque similes res ab Ecclesia benedictæ. 8. Signum salutiferæ & sanctæ Crucis ad cujus contuitum dæmones terreri ac fugere assolent. 9. Invocatio SS. Nominis JESU, B. Virginis Mariæ, S. Angeli Custodis & aliorum Sanctorum. 10. Oratio, præsertim conjuncta jejunio. Lessius *lib. 2. de J. & J. c. 44. n. 28.* Bonacina, Reginaldus & alii.

Quæ-

Quæres 7timò, Sitnè licitum accersere maleficum, ejusvè opera uti in ordine ad solvendum maleficium, quò bestia vel etiam homo fuit infectus?

R. Cum distinctione. Nam ubi constat, § 32. quòd maleficium à mago tolli non possit sine novo maleficio, id est sine nova invocatione aut pacto cum dæmone, quo is cogatur aliquid de novo operari &c. non licet accersere maleficum ejusvè opera uti, esto is aliunde supponeretur paratus ac promptus ad hoc præstandum. Econtra verò, ubi certò aut certè probabiliter constat, maleficium tolli posse sine novo maleficio, sive dein præcisè auferendo signa magica, utputa ligaturas, acus, fragmenta testarum, vitrorum, ovorum &c. sive etiam signa positivè contraria apponendo, ast eo præcisè ex fine, ut diabolus cogatur abstinere à maleficio inferendo seu etiam continuando, licitè potest accerseri maleficus, ejusque opera peti. Ita cum communi Doctorum Sayrus in *clav. reg. lib. 4. c. 6. n. 26.* Sporer *tr. 2. in decalog. c. 9. sect. 4. n. 40.* & seqq. Sanchez *lib. 2. in decalog. c. 41. n. 6.* & 13. Suarez *tom. 1. de Relig. l. 2. c. 18. n. 10.* Ratio prioris est: quia maleficium ponere est actio intrinsecè mala & nullo, quantumvis honesto fine cohonestabilis: atqui nunquam fas est petere ab alio actionem de se & intrinsecè malam, esto is sup-

Rr 2

po

ponatur ad hoc paratus, quemadmodum à meretricè etiam paratissima non licet petere usum corporis; quia hoc modò petens cooperatur ad malum, & est causa peccati, quatenus causat actuale exercitium seu etiam voluntatem alterius quadammodo excitat ad peccandum: ergo &c. nunquam fas est à mago petere solutionem maleficii, quando hoc solvi ab eo nequit sine novo maleficio. Ratio autem posterioris est: quia dum maleficio solvi potest sine novo maleficio, potest talis solutio nedum licitè prætendi, sed & magus aut maleficus tenetur ex iustitia (si ipse prius posuit) vel saltem ex charitate erga proximum, si non posuit quidem, possit tamen licitè, illud tollere.

At quid, inquires, si dubitetur, an magus vel quiscunque demum alius sciat aliquod medium licitum & honestum auferendi &c. licebitne illum accersere, vel ejus opera uti?

533. R. Non licet illico uti opera, sed oportet prius illum examinare, qua ratione vel quibus mediis maleficio velit solvere? Quod si recuset explicare modum solvendi, præsumendum erit (nisi aliunde de probitate viri constet) eum non soluturum sine novo maleficio, eò præsertim quòd per media naturalia rariùs tolli queant: supernaturalibus autem Laici præsertim de probitate



bitate morum aliunde suspecti, uti non solent. At verò casu quo explicat modum tollendi, rursus prudentum iudicio disquirendum erit & examinandum, an in tali non lateat aliquod novum maleficio, fraus dæmonis, vel vana observantia, sive quoad substantiam ipsam, sive quoad ceremonias. Denique si omnibus examinatis supponatur remanere dubium, existimarem, quòd possit solutio peti, cum expressa tamen protestatione, ne fiat novò maleficio, vel nova dæmonis operatione. Insuper sapienter advertit Lessius, Laymann l. 4. tr. 10. c. 4. n. 9. Sporer tr. 2. decalog 6. 9. sect. 4. n. 42. Del-Rio & alii plures, de eo, qui maleficio posuit, facilius præsumendum esse, quòd sciat modo licitò, ut puta ablatione signorum &c. illud tollere, quàm de alio, qui illud non posuit; nam tales plerùmque nova, dæmonis invocatione comparare debent notitiam vel de maleficio ipso, vel certè de modo solvendi. Videatur Sporer loc. cit. in fine, sed quid, si magus sciat quidem medium licitum illud solvendi, dubitetur tamen, an non illicito potius & superstitioso cum nova Dei offensa sit usus. ?

¶ In hoc casu adhuc licitè peti posse § 34. solutionem à mago aut malefico; quemadmodum ob rationabilem causam licitè peti potest mutuum ab eo, qui quidem posset

Rr 3

dare,

dare, certò certius tamen prævidetur non daturus sine usura. Et ratio est, quia si magus possit licite, & tamen nolit, nisi medio illicito uti ad opus de se bonum: uti est solutio maleficii &c. tunc malitia hæc soli mago, non item solutionem petenti imputari debet, quippe qui hanc nec intendit neque petit, sed solam solutionem modo licito & honesto faciendam. Videantur dicta superius *conferent. 12. n. 365.*

Dices contra resolutiones proximè datas, præsertim *num. 532.* Qui tollit signa magica eo fine, ut diabolus cogatur non amplius nocere, &c. effectum desideratum expectare nequit è causa naturali, neque à voluntate humana, neque etiam per miraculum à voluntate DEI aut Sanctorum: ergo necessum est, ut illum expectet à diabolo: at, hoc semper est illicitum, ergo &c.

§ 35. R. Cum P. Herincx *part. 3. tr. 4. disp. 7. de superstit. n. 36.* hunc effectum sperari posse à DEO, quippe qui juxta ordinarium agendi modum non permittit diabolo hominibus nocere, nisi per malitiam seu malevolentiam aliorum hominum certa quædam signa malefica ponantur, quibus proinde signis sublati de per se à Deo sperari potest cessatio damnorum vel nocumentorum à diabolo aliàs inferendorum. Ex quo patet, negandam esse Majorem.

Dices

Dices rursus: quisquis modò præfato tollit signa magica, videtur saltem sese immiscere, & quandam habere partem cum pacto diaboli, quippe qui statuit positis hujusmodi signis nocere, iisdemque ablatis cessare à damno inferendo: at omne pactum cum dæmone peccaminosum est, &c. ergo &c.

R. Rursus *neg. Major.* Nam in primis § 36. necessum minimè est, ut dæmonem inter & maleficum duplex intercesserit pactum, sed potuit intervenisse unicum, scilicet *quòd positis signis velit nocere maleficiato*; quibus sublatis ordinariè & regulariter loquendo non ampliùs permittitur à DEO, ut noceat. Deinde casu quò belli dux inaudit, quendam è suis cum hostibus iniisse pactum, quòd iisdem velit dare signum aggrediendi seu etiam impugnandi urbem, &c. idemque belli dux hujusmodi signum tollat, vel ne ponatur, impediatur, planè dici nequit, quòd voluerit habere quoddam cum hostibus pactum, sed dici potius debet, quòd pactum cum hoste à suo subdito initum velit annihilare seu destruere: idem ergo judicium ferendum est de eo, qui signa malefica tollit eo fine, ne diabolus deinde nocere possit. Videatur Herincx *loc. cit. n. 37.* Kresslinger *addit. post. num. 49. ad tr. 5. dist. 2. theolog. mor. R. P.* Reiffenstuel, vel Sporer *part. 2. theolog. decalog. c. 9. n. 41.*

Rr 4

§. II.

## §. II.

Proponuntur & breviter resol-  
vuntur Casus practici de Ma-  
gia & Maleficiis.

## CASUS PRIMUS.

**T**Itius lascivus juvenis amore cujusdam honestæ puellæ captus, cum eandem nec promissis, nec blandimentis aliisvè lenociniis in suam sententiam pertrahere potuisset, tandem ope æmonis impetrandum censuit, quod suis viribus impossibile apprehendit. Et verò vix-  
dum ad instructionem cujusdam magi certas quasdam schedulas, nec non laminam metallicam diversis figuris ac characteribus insignitam clam defoderat subtus limen habitaculi, in quo præfata puella demorari consueverat, dum ecce ! eadem puella quasi in rabiem acta illico velum capitis sui abjecit, & inconditis clamoribus ac gestibus vociferando nil aliud identidem ingeminando expressit, quàm nomen dicti juvenis, cujus infano amore nedum jam capta sed & à sensibus penitus alienata videbatur. Paulò post à parentibus suis Sancto Hilarioni præsentata, deprehensa fuit à diabolo obsessa, qui SS. Ecclesiæ exorcismis compulsus dictavit, se à lascivo illo juvene coactum fuisse ad possidendam hanc puellam, neque etiam inde  
disces-

*discessurum, usque dum maleficiū seu phyltrum amoris subtus limen reconditum tolleretur, At verò sanctus vir, ne vel maligno hosti fidem, vel potestatem justò majorem attribuere videretur, relicto etiam philtro partim meritis ac precibus suis, partim etiam SS. Ecclesiæ exorcismis diabolum compulit ad deferendam hanc creaturam, teste R. P. Stengelio tom. 2. c. § 9. §. 11. Jam ad nostrum propositum quari potest 1. an, vel quomodo Titius peccaverit in hoc facto? 2. quid eidem à Confessario fuerit præcipiendum? 3. an illud phyltrum amoris potuisset aut debuisset auferri.?*

*¶ ad primum quæsitum, Titium procul § 37. dubio gravissimè peccasse, & quidem multipliciter 1. contra charitatem proximo debitam ratione scandali dati, dum puellam ad lasciviam pertrahere conatus fuit, atque hòc ipso 2. contra castitatem sin minùs in effectū, saltem in affectu deliquit. 3. insuper gravissimè deliquit contra virtutem Religionis peccato superstitiosæ & magicæ observantiæ, dum phyltrum amoris ex pacto diaboli confectum defodit subtus limen habitaculi, propterea quæ minimè dubitandum, quin incurrerit casum reservatum, secundum dicta in theolog. Sacram. part. 2. confer. 13. n. 353. idque à fortiori dicendum, si perversus ille juvenis supponatur hoc maleficiū defodisse eo fine, ut puella à diabolo possideretur; quo casu gravissimè peccasset*

Rr 5

set

set nedum contra charitatem, verum insuper contra justitiam. Videantur ea, quæ in casu haud multum absimili diximus *part. 1. theolog. decalog. confer. 22. n. 641.*

§ 38. R. ad 2dum quæsitum. Si supponatur Titius (idem dic de alio quocunque simili) verè pœnitens redire ad Confessarium, huic incumbet accuratè indagare in omnes circumstantias mox annotatas, præsertim an positivè intenderit nedum seducere puellam, verum insuper reddere subjctam, seu etiam obsessam à diabolo? Jubeatur seriò detestari sua peccata, præprimis commercium illud diabolicum; quod, cùm efficaciter ab eodem fieri nequeat, nisi amoveantur illa signa diabolica; hinc 3. obligandus est ad illa auferenda & comburenda, quàm primùm moraliter loquendo id potuerit; secus enim non esset capax absolutionis, veluti rem consideranti facile patebit. Sanchez *lib. 2. mor. c. 41. n. 22.* Suarez *lib. 2. de superstit. c. 17. n. 13.* Herincx noster *part. 3. tr. 4. disp. 7. n. 39.*

§ 39. R. Jam ulterius ad 3tium quæsitum, illud phyltrum amoris potuisse sine omni peccato auferri; quia auferens propterea dici nequit novum cum dæmone pactum inire vel initum ratificare, sed potius annullare ac destruere, veluti constat ex proximè dictis *n. 536.* Nolim tamen per hoc improbare factum S. Hilarionis, quippe qui tanti procul

cul dubio meriti apud Deum existit, ut relictis etiam signis magicis diabolum nedum à possessione puellæ deturbare, verum insuper ab inferendo deinceps quocunque damno compescere potuerit, prout sapienter notat Castropalao *tr. 17. disp. 1. punct. 11. n. 11. in fine.* Cæterum quænam remedia spiritualia contra diabolum ipsum ejusdemque opera maligna sint adhibenda, quibusvè armis hostis ille antiquus humani generis sit retundendus, videri potest tum ex dictis *n. 531.* tum ex iis, quæ tradit R. P. Del Rio *disquis. mag. lib. 6. c. 2. sect. 3. per tot.* ad quem Lectorem benignum remittimus.

## CASUS SECUNDUS.

**S**empronius tentatis quampluribus (at sine effectu) mediis spiritualibus, ut pecuniam furtivè sibi subtractam denuo recuperaret, tandem consuluit quendam ariolum, à quo jussus fuit eidem cistulæ vel arculæ, è qua pecuniæ fuere subtractæ, adhibitis nonnullis ceremoniis ac precibus, clavum infigere, & ni fur pecuniam ablatam restitueret, alterâ die profundius intrudere, tertio denique die eandem cistulam mediante clavo omnino penetrare, quò factò fur eodem clavo confixus infallibiliter mortem opeteret. At verò hoc remedium Sempronio nonnihil videtur suspectum; unde sciscitatur è Confessario, an sine peccato superstitionis eo uti possit. Quid respondendum interroganti?

R. Ne-

540. ¶. Nedum usum hujus medii certò certius  
superstitiosum esse & prorsus damnabilem,  
sed & consultationem arioli fieri non po-  
tuisse à Sempronio sine gravi peccato. Ra-  
tio prioris est: quia secundum dicta *num.*  
532. nunquam fas est solvere malefícium  
mediante novo maleficio; non enim licet  
facere malum, ut eveniat bonum: atqui,  
intrudere clavum cistulæ eo fine, ut eodem  
clavô torqueatur fur, & cogatur restituere  
vel omnino deperire, est ponere novum  
malefícium, & moraliter loquendo dæmo-  
nis opem implorare; ut ille furem pungen-  
do cogat ad restituendum aut moriendum,  
prout clarè colligi potest ex dictis *loc. cit.*  
& vel inde satis patet ad oculum, quòd  
clavus cistulæ infixus naturaliter loquendo  
nequeat furem pungere aut torquere, multò  
minus ejusdem corpus utpote distans pene-  
trare; ergo ope altioris virtutis id exspe-  
ctetur, necessum est: atqui non ope Dei vel  
alicujus Sancti Angeli, vel hominis: ergo  
ope diaboli. Ratio autem posterioris est  
hæc: quia quicumque ariolum consulit, ei-  
dem præbet occasionem, immò quodam-  
modo movet vel ad novum cum diabolo  
commercium, vel certè ad exercitium seu  
executionem artis diabolicæ, aut certè ad  
mendacium: at, hæc omnia absque pec-  
cato fieri nequeunt, saltem per se loquendo,  
tametsi non ignorem, hujusmodi consulta-  
tio-



tiones subinde à simplicioribus fieri absque formaliter gravi peccato; vel quia ignorant ariolum habere quoddam commercium cum diabolo, vel quia sperant ab eo aliquod medium naturale percipere, aut certè quoddam consilium absque peccato practicabile, prout fortassis etiam Sempromius noster fecit.

At, inquires, quid de Rustico illo tenendum, qui ob infestationem hominum maleficorum plura perdidit animalia, utputa equos, gallinas &c. neque etiam è lactè potuit ampliùs excludere Butyrum, proindeque ad se servandum indemnem equidem mortui ungulam præcisam projecit in ignem, gallinam pariter mortuam cuidam mappulæ involutam totis percussit viribus: denique & lac superposuit igni eo fine, ut Saga vel magus cogerentur eundem dolorem ignis aut verberum sustinere à diabolo, & hac viâ absterrentur ab ulteriori infestatione: quid iudicii de his factis?

R. Conformiter ad dicta superiùs, hæc §41.  
& similia fieri non potuisse absque peccato mortali, ob tacitam saltem invocationem & implicitum commercium cum diabolo, quod ipsò facto attentare meritò censetur, quisquis tali medio utpote certò certius superstitioso utitur, juxta comunissimam DD. sententiam apud Castropalao, Sanchez,  
Tam-

Tamburinum, Sporer, Matthæucci in cautel. Confess. l. 1. c. 17. §. 14, n. 92.

Dices fortassis : si Rusticus nōset certò, diabolū cum mago aut Saga fecisse hoc pactum, quòd velit impedire exclusionem Butyri, quamdiu supra vas coagulatorium non fuerit efformatum signum crucis, vel quamdiu in illud non fuerit injectum numisma v. g. S. Benedicti &c. aut infrà illud vas positus cultellus. Rursus, si constaret, diabolū inisse tale pactum, quòd ad positionem hujus vel illius signi à Saga factam, tamdiu velit infantem infestare, quamdiu is non fuerit collocatus super tripodem, aut per scalam devolutus &c. procul dubio liceret Rustico, aut cuicunque alteri similia facere eo animò ac fine, ut Butyrum excludatur, aut infans ab infestatione liberetur : quidni ergo & illud prius liceat, scilicet projicere ungulam in ignem &c. &c.

- §42. R. Neg. paritatem. In priori etenim casu solvitur maleficium per novum maleficium, id est, novam invocationem, cooperationem, & commercium cum diabolo ; quod semper nefas est : è contra in casu posteriori non fit novum maleficium, sed potius destructio prioris maleficii, & pacti diabolici ; non enim ponitur talis actio vel signum contrarium eo fine, ut diabolus invocetur aut honoretur, sed ut cogatur desistere ab infestatione, & v. g. infan-

infantem, vel lac relinquere in suo esse naturali: quô supposito Butyrum naturaliter excludetur: atqui, ponere huiusmodi signum contrarium, modò de se honestum sit vel indifferens, vacat omni culpa juxta *communissimam Doctorem*, quam tenent Castropalao *part. 3. tr. 17. disput. 1. pu. 11. n. 8.* Sanchez *lib. 2. decalog. c. 41. n. 25.* Filliuc. *cit n. 195.* Sporer *tr. 2. in decalog. c. 9. n. 41.* Tambur. *lib. 2. c. 6. §. 2. n. 13.* Hac de causa cohonestari potest praxis Judicum, qui maleficos torquendos jubent vestibus exui, abradi capillos eorum aut lavari &c. ne tormenta non sentiant; potuit enim diabolus cum Saga tale pactum injisse, quòd eam velit reddere illæibilem, quamdiu non fuerit lota, vel exuta vestibus &c. ergo à Judice licitè ponuntur hujusmodi signa contraria, non quidem eo fine, ut cum Cacodæmone pactum ineat, vel conditionem ab eo positam adimpleat, sed potius ut pactum dissolvat, & quodammodo dæmonem impediat, quò minùs Sagam aut magum reddat illæibilem aut insensibilem &c.

At quid, si dubitetur, an non tale signum contrarium sit superstitiosum?

¶. In tali casu abstinendum prorsus existimant Sanchez aliique multi & gravissimi DD. eò quòd sine periculo Superstitionis adhiberi non valeat, Nihilofecius alii Docto-

Etiores probabiliter licitum existimant, saltem cum protestatione, quòd non adhibeatur talis actio vel signum eo fine, ut diabolus aliquid de novo operetur, sed ut à Deo coerceatur, ne ulterius nocere pergat. Videatur de hoc Herincx *disp. 7. de superst. n. 38. Lessius c. 44. dub. 6.*

## CASUS TERTIUS.

**C**Ajus puer decem circiter annorum D. Parocho suo ultrò fatetur, se à Cacodamone artem magicam didicisse, jamque ab uno & altero anno frequentasse conventicula Sagarum nocturno tempore celebrari solita; hinc 2. nominatenus recenset nedum locum in quo, sed & Personas plures alterius Sexus Domino Parocho haud incognitas, quæ convenire solent: narrat insuper 3. chorearum, conviviorum, & epularum delicias; nec non 4. ceremonias & varios ritus, quibus diabolum in contemptum DEI & amulationem fidelium flexo etiam polite honorare & adorare coguntur. 5. fatetur insuper, quòd jam sapiùs excitârit horribiles, grandines, ventos ac pluvias, cum ingenti segetum fructuumque campestrium detrimento. 6. pariter sat multa pecora se intoxicasse asserit. Quò verò dictis suis majorem conciliaret fidem, cooperante sibi diabolo (quem suam matrem appellare consueverat) eundem D. Parochum de repente claudicare fecit,

fecit, postea verò jussit, ut ad recuperandum gressum sese lavaret in aqua naturali, mixta prius eidem modica quantitate aqua benedicta, quò facto R. D. Parochus illico pristinam sanitatem recuperavit. Casum hunc non fictum sed factum narrante eodem, cui accidit, intellexi, & quia valde practicus est, ad nostrum propositum eundem nedum proponendum, sed & paulò enucleatius ventilandum duxi. Itaque dubitare licet primò, an ad depositionem dicti pueri R. D. Parochus potuerit prudenter credere, eum esse imbutum, & versatum in arte magica, fœminasque ab eo recensitas esse Sagas seu stryges? 2. An non ad capiendum certius experimentum potuerit à puero petere, ut is in confirmationem dictorum subito excitaret ventos ac pluvias, saltem sine detrimento aliorum, vel ut in sua præsentia sine mora produceret, ranas aut mures? 3. an ad recuperandum gressum tutâ conscientia potuerit uti balneo illo aqua benedicta mixto? 4. denique quid circa hunc pœnitentem (si tamen verè pœnitens supponatur fuisse) R. D. Parochus debuerit observare aut examinare?

R. ad primum quæsitum. R. D. Parochus prudenter omnino sibi persuadere potuit, hunc puerum arte magica esse infectum & imbutum; tum quia quivis Confessarius tenetur pœnitenti tum pro-tum contra se etiam loquenti credere; tum quia propria confessio est optima probatio l.

R. P. Elbel Pars II. de Fide &c. Ss cùm

*cum precum Cod. de lib. caus.* tum denique, quia repentina illa claudicatio, nec non subitanea pristini gressûs recuperatio ad usum blanei præscripti firmissimum sanè præbent argumentum cujusdam artificii magici à puero attentati : & certè nihil prorsus impossibile seu implicatorium in tota hac depositione pueri deprehendi valet ; cùm ergo aliunde notum sit, dari hodiedum stryges ac magos, qui ope dæmonis similia praticare solent, planè non video, qua ratione vir prudens huic depositioni fidem negare deberet. Secus arbitror de ferendo judicio circa mulieres ab eodem puero denunciatas ; cùm enim sagæ ac magi diversis illusionibus à dæmone decipiantur, representatione scilicet diversarum personarum eo fine, ut & innocentes in suspicionem criminis conjiciantur : immo verò, cùm Sagæ ac magi veluti flagitiosissima dæmonis mancipia exemplo magistri sui omni possibili modo nocere conentur proximo ; hinc ob solam depositionem cujusdam Sagæ neutiquam fas est ferre firmum judicium, quòd scilicet illæ personæ à puero denuntiatae revera sint stryges, esto fortassis Parochus haud imprudenter faceret, declinando quodammodo (ita ut alii non advertant) consortium talium personarum, præsertim ubi aliunde accedent alia non levia indicia de talibus personis. Vi-  
deantur

deantur de hoc R. D. Augustinus Michel  
*theolog. canon-mor. tom. 1. p. 2. appendic.*  
*2. pu. 5. n. 4. Tannerus tom. 3. disp. 4. q. 5.*  
*dub. 2. Diana 4. part. tr. 6. resol. 30. ubi*  
*rectè docent, neminem aliàs bonæ vitæ*  
*aut famæ à Judicibus sæcularibus capi pos-*  
*se ex sola denunciatione Sagarum, nisi alia*  
*gravia indicia accedent, cujusmodi recenset*  
*Bonacina disp. 3. q. 5. pu. fin. & ex eodem*  
*Michel loc. cit.*

℞. ad 2dum quæsitum negativè. Ratio §45.  
 liquet: quia, cùm similia à puero fieri ne-  
 queant sine novo maleficio vel invocatione  
 dæmonis, planè sequitur, quòd quisquis il-  
 lum ad similia provocat, ponat causam scan-  
 dali, quin immò aliquo modo cooperetur  
 ad illud commercium diabolicum, utique  
 non sine gravi peccato. Videatur Sanchez  
*lib. 2. in decalog. c. 41. n. 4. Castropalao ubi*  
*suprà de superstit. disp. 1. pu. 11. n. 6.*

℞. ad 3tium quæsitum affirmativè. Ratio §46.  
 hujus resolutionis liquet ex dictis suprà n.  
 532. & 542. tum scilicet, quia talis ablutio est  
 res de se omnino indifferens; tum etiam, quia  
 non supponitur fieri eo fine, ut diabolus ali-  
 quid de novo operetur vel sanitatem confe-  
 rat, sed solum, ut à continuatione maleficii  
 cesset, quò facto natura restituatur pristino  
 statui & convalescet: at, cuilibet fas est per  
 media indifferentia vel licita tendere ad recu-  
 perationem sanitatis: ergo &c.

S s 2

℞. jam

547. R. jam ad 4tum quæsitum. R. D. Parochus (idipsum intelligas velim de quocunque alio Confessario) respectu talis pœnitentis duo præcipuè observare debet, primò, examinando indagare in Sentinam malorum seu peccatorum, quæ magi aut sagæ ordinariè committere solent. 2dò, præscribere media salutaria, quibus pœnitens in viam salutis reducatur. In ordine ad assequendum primum intentum, necessum erit interrogare quantum ad primum punctum: quo tempore sese mancipaverit diabolo? item, an illo statim tempore agnoverit malitiam hujus mancipatus? Quoad 2dum: Caveat Confessarius indagare in numerum vel nomina personarum, quas dictus puer asseruerat interfuisse conventiculis diabolicis; hoc enim non pertinet ad integritatem confessionis, quin potius præbere posset ansam detractionibus, sinistris judiciis, vel suspicionibus &c. Quantum ad 3tium oporteret quidem expiscari numerum, quoties scilicet convenerint? quos ritus, aut ceremonias diabolo exhibuerint? verùm cum hoc plerùmque ab hominibus tam inveteratis in malitia recenseri nequeat; hinc Confessarius debebit esse contentus, si pœnitens fateatur, quoties circiter per septimanam, vel mensem, vel annum convenerint, & an diabolum velut Deum coluerint? Singulariter verò notet Confessarius



rius quoad hoc punctum esse interrogandum, an pœnitens verè & ex animo abjuraverit SS. Trinitatem, B. Virginem, aliosque Sanctos, ita scilicet, ut judicaverit diabolo potiùs, quàm Deo ac Sanctis honorem esse tribuendum &c, an verò id fecerit ex mera malitia & voluntatis perversitate, ita scilicet, ut bene apprehenderit honorem non diabolo, sed DEO potiùs & Sanctis tribuendum? nam si hoc posterius judicavit, non esset hæreticus, nec incurrisset casum Bullæ Cœnæ, bene verò, si illud prius. Quantum ad 5<sup>um</sup> & sextum interrogari debet, quoties circiter grandines causaverit, quot pecora intoxicaverit, quæ vel quanta circiter damna aliis causaverit; nam per se loquendo teneretur nedum ad tollenda maleficia hinc inde posita, verùm etiam ad resarcienda omnia damna, licet plerumque hujusmodi homines ob pauperiem & impotentiam physicam vel moralem excusentur ab onere restitutionis uti rectè advertit Michel *loc. cit. pu. 4. num. 5.* Vid. Suárez *lib. 2. de superst. c. 14. n. 12. & c. 17. n. 13.* Filliuc. *tr. 24. c. 7, n. 180.* Bonacina *disp. 3. q. 5. pu. 5.*

Porrò in ordine ad assequendum secundum intentum imò, necessum erit excitare pœnitentem ad veram detestationem peccatorum suorum & ad sinceram compunctionem, exponendo eidem gravitatem

Ss 3                      flagi-

flagitiorum, simulque proponendo periculum animæ, & æternæ damnationis, certò certius incurrendæ, nisi seriò resipuerit, 2dò, declarando eidem infinitam Dei misericordiam, quâ ad resipiscendum vocatur, nec non immensum amorem JESU Christi Salvatoris nostri, tam boni & misericordis Domini, qui pretiò sanguinis sui & vult & potest quantumvis maximum peccatorem recipere ad pristinum statum gratiæ, modò is velit cooperari divinæ vocationi: ècontra ingerat eidem tadium diaboli mancipatus & crudelitatis, quâ suos sibi adhærentes nedum in hac, sed potissimum in altera vita tractare, eorumque servitia non nisi pœnalibus flammis accruciatibus per totam æternitatem compensare solet. 3tiò, conetur illum excitare ad firmam spem, quòd scilicet non obstante chyrographo vel subscriptione &c. facta diabolo, nihilominus possit resipiscere & redire in gratiam, immò pertingere ad omnimodam Sanctitatem, veluti constat exemplis sancti Anastasi, Anastasiæ, Cypriani &c. & multorum aliorum ex primis Christianis, qui libros magicos Apostolis comburendos tradidisse leguntur *Act. 19. v. 19.* 4tò jubeatur fortiter contemnere dæmonis insultus, quibus tales conversos multipliciter & fortissimè quidem infestare assolet, quos cum patientia supportare oportebit.

5. fin-

5. singularissimè verò Confessarius instruat talem pœnitentem de modo eliciendi frequentissimos actus charitatis erga Deum ceu summum bonum, contritionis de peccatis commissis, abrenuntiationis sathanæ, cultûs erga Beatissimam Virginem velut speciale refugium peccatorum & advocatam, nec non aliorum Sanctorum, præsertim Cypriani & Athanasii &c. de quibus proximè dictum. 6. denique jubeatur pœnitens sese munire spiritualibus armis & auxiliis, ut puta frequentando Sacramenta pœnitentiæ & Eucharistiæ, utendo aqua benedicta nec non Sanctorum Reliquiis. &c. &c.

### §. III.

## Corollaria ex dictis inferenda.

**C**olliges ex hætenus dictis primò. opera Magorum & sagarum (quantumvis mira videantur & insolita) non esse, neque dici posse vera miracula. Ratio est: quia theologicè loquendo miraculum illud duntaxat dici meretur, quod ita rarum & insolitum est, ut simpliciter excedat virtutem totius naturæ, seu omnium causarum naturalium: atqui opera magorum &c. nunquam excedunt totam virtutem causarum naturalium, quandoquidem omnia perficiantur vel motu naturali, vel applicatio-

ne activorum naturalium ad passiva &c.  
Videatur Delrio *lib. 2. disq. magic. q. 7.*

At, inquires fortassis, undenam igitur colligendum, sitne effectus aliquis verè miraculosus, vel naturalis, vel verò superstitiosus?

¶ 50. R. Circa hoc dignoscendum universalem regulam statui nequiquam posse, nihilominus juvabit multum notasse sequentia principia Theologica.

I. DEUS ordinariè non facit miracula, nisi per homines Sanctos; unde si patrator mirabilium vel aperte sit improbus, vel suspectus de probitate vitæ ac morum, non facile credendum est, eum divina virtute, sed potius ope diaboli adjuvari.

II. DEUS hodieum rarò facit miracula, neque id statis vicibus vel ad cuiusvis libitum: ex quo consequens videtur, pro suspecto habendum esse illum, qui ex hoc vel illo medio semper pollicetur certum & infallibilem effectum, sive corporalem, utputa morborum curationem, periculorum evasionem &c. sive Spiritualem v. g. quòd homo non possit damnari, neque mori subitanea morte, vel sine prævia Confessione &c.

III. DEUS non facit miracula sine gravi causa, gloriam scilicet suam, hominumve utilitatem v. g. persuasionem veræ fidei &c. concernente. Ex quo prudenter colligere licet, quòd si effectus aliquis merè inutilis, vanus,

vanus, aut soli curiositati deserviens expectetur per medium aliunde ex sua natura minus proportionatum, talis effectus superstitiosus potius, quam miraculosus censendus sit.

IV. DEUS non operatur miracula, nisi modis decentibus & honestis: ubicunque ergo foedæ, frivolæ vel ineptæ circumstantiæ concurrere debent in ordine ad aliquem effectum insolitum, minimè ambigendum est, quin effectus ille sit superstitiosus, & non DEO, sed Diabolo velut Auctori adscribendus.

V. Denique DEUS in operandis miraculis non adstringit se certis verbis aut modis, sed modo isto, modò illo utitur pro suo beneplacito. Ex quo colligendum, meritò suspectam esse habendam illam operationem, quæ certis verbis aut ceremoniis dicitur alligata, ita, ut secus neutiquam expectari debeat vel possit. Videantur de his Fagundez in 2. *præcept. lib. 8. c. 4.* vel R. D. August. Michel tom. 1. part. 2. *appendic. 2. punct. 3. n. 13. & seqq.* ubi præsens punctum fusiùs declarat.

Colliges 2dò, quòd, quemadmodum Pa- 551.  
rocho aut Confessario non licet petere à Saga vel mago, ut in confirmationem vel probam artificii sui bene apprehensè producat v. g. ranam, aut ventos vel pluvias &c. veluti dictum fuit n. 545. ita pariter neque

S s §

judici-

judicibus permissum vel permittendum esse, ut malefico præcipiant, vel alio modò cogant, quatenus is maleficium positum auferat certa quadam benedictione &c.

Ratio est: quia talis benedictio vel ceremonia superstitiosa re ipsa nil aliud est, quàm novum cum dæmone commercium, vi cuius is à mago cogitur, vel ad aliquid de novo operandum, vel à maleficio & infestatione cessandum: commercium verò cum diabolo esse nefarium, jam constat ex dictis. Videatur Sanchez *lib. 2. in decalog c. 41.*

*n. 10.*

- § 52. Colliges 3tìò, non esse licitum vertere Scopam in tuo cubili eo fine, ut experiaris, sitnè scœmina ad te ingressa lamia seu Saga, vel non. Neque etiam 2dò fas est projicere pulvinar è lecto eo animo & intentione, ut lamia supra illud cogatur sedere, usque dum agnoscat, quænam sit &c. Ita R. P. Kresslinger *addit. post num. 51. tr. 5. dist. 2. Theolog. mor. R. P. Reiffenstuel.* Ratio prohibitionis similium est (ait idem Doctor) quia hoc modò non solvitur prius pactum (quod alias liceret) sed præterea novum involvitur, cum Sagæ per similia non præcisè in statum naturalem redigantur, sed præterea aliquid de novo facere cogantur, ad quod non, nisi mediante novo diabolico pacto adstringi possent. Ita ille.

Sed quid, inquires fortassis, si ego  
sciam

sciam v. g. ex relatione Sagæ, dæmonem cum eadem hoc pepigisse fœdus: si tu percusseris Titium, ego eundem intoxicabo: at verò, calu quo ille te percusserit, ego Eum non inficiam, quin potius te (Sagam scilicet) percutiam aut torquebo: liceretne in hoc casu Sagam repercutere;

¶ Si certò tibi constaret de tali pacto, 453. minimè dubitarem, quin adhuc Sagam licitè repercuteres, non quidem animò, ut pactum dæmonis adimpleas, vel eundem ad aliquid operandum cogas, sed præcisè, ut ab infestatione te liberes. Ratio est: quia repercussio hæc res est de se indifferens, & à te ponitur præcisè eo animo, ut diabolus te non vexet: quòd autem ille statuerit Sagam percutere supposita tua repercussione, id respectu tui merè per accidens se habet: posset enim hostis malignus cessare ab infestatione præcisa omni percussione vel afflictione Sagæ aliunde etiam non teneris cum tanto tuo incommodo impedire afflictionem Sagæ, cum charitas potius consulat, ut tuæ, quàm alienæ saluti vel incolumitati invigiles. Dixi tamen: si certò tibi constet &c. nam in dubio potius præsumendum foret, quòd diabolus alios quoque præter Sagam voluerit involvere pacto aut commercio suo: & certum esse debet ex hæctenus dictis, quòd in talí casu nefas foret repercutere Sagam eò animo, ut

652. *Confer. XVII. De Magia & Maleficio.*

ut diabolus adigatur ad affligendam Sagam.  
Videatur de hoc Sanchez *in decalog. lib. 2.*

*c. 41. n. 21.*

- § 54. Colliges denique 4<sup>to</sup>, Sagam vel magum licite uti posse pecunia à dæmone obtenta, modo constet, esse veram pecuniam, nec alteri subtractam. Ratio est: quia potuit contingere, ut dæmon talem pecuniam vel è fundo maris extraxerit, vel deprompserit ex thesauro, cujus nemo amplius habet dominium: ergo si supponantur veræ esse pecuniæ, licite expenduntur, esto à diabolo malè fuerint partæ seu obtentæ, quemadmodum v. g. meretrix pecuniam opere suo promeritam absque ullius injuria licite expendit ad usum honestum juxta *communissimam DD.* Dixi tamen rursus: *modo constet esse veram pecuniam, nec alteri subtractam* &c. Solet enim dæmon non raro dare pecunias apparentes duntaxat, quæ postea evanescent, aut in carbones vel stercora converti solent: liquet autem de se, quòd tales absque injuria aut damno proximi pro veris expendi non possint: similiter si constaret, pecuniam fuisse alteri furtivè subtractam, deberet restitui Domino suo. Videatur Laymann *lib. 4. tr. 10. c. 4. n. 8.* Sanchez *lib. 2. decalog. c. 38. n. 96.* Vel Babenstuber *tr. 5. disp. 2, art. 4. n. 84.*

CON-





# CONFERENTIA DECIMA OCTAVA

De Tentatione DEI, & Sa-  
crilegio,

## *S U M M A R I U M.*

- 555. Irreligiositas per defectum quid sit, & quot  
ejus membra vel Species ?
- 556. Quid intelligatur nomine tentationis in ge-  
nere ?
- 557. Et quid sit tentatio DEI in Specie ?
- 558. Hæc tentatio potest esse vel formalis, vel  
virtualis tantum & interpretativa
- 559. Utraque tamen ex suo genere est mortaliter  
peccaminosa.
- 560. Nihilominus posterior subin evadit veniali-  
ter duntaxat mala.
- 561. Sacrilegium est rei Sacre violatio seu in-  
digna tractatio.
- 562. Aliud dicitur personale, aliud locale, &  
aliud reale.
- 563. Quidam intelligatur nomine personæ Sa-  
cræ ?
- 564. Sacrilegium personale quatuor modis con-  
tingere potest.
- 565. Et hæc Sacrilegia utpote Specie morali in-  
ter

ter se differentia necessariò explicanda sunt in confessione.

566. Quid intelligatur nomine loci Sacri?  
 567. Sacrilegium locale tribus modis fieri assolet.  
 568. Quidnam intelligatur nomine rei Sacræ?  
 569. Sacrilegium reale quinque modis potest committi.  
 570. Peccatum Sacrilegii ex suo genere est mortale;  
 571. Non rarò tamen per accidens quasi fit veniale tantùm.  
 572. Resolvitur Casus I. de quodam Prædicatore Evangelico, qui hæreticis convertendis ex Zelo indiscreto videtur promississe miraculum à DEO impetrandum.  
 573. & 574. Satisfit duabus instantiis contra resolutionem hujus casus factis.  
 575. Resolvitur Casus II. de quodam homine lascivo, assueto diebus festivis in Ecclesia oculos pascere aspectibus impudicis, & Sponsam suam sollicitare &c.  
 576. Nec non secretò sese polluere in eodem loco.  
 577. Quid tenendum vel agendum cum illis, qui se accusant de s. v. flatibus in Ecclesia emissis?  
 578. Resolvitur Casus III. Cujusdam custodis Ecclesiæ, dubitantis, an sua Ecclesia non sit habenda pro polluta, eò quòd quædam mulier ab altera percussa, è naribus haud modicum Sanguinem effuderit in eadem?  
 579. Item, an non fuisset polluta, casu quo idem custos & alteram mulierem usque ad confusum Sanguinis effusionem nervo bubulo coegisset, aut percussisset?  
 580. Utrum Ecclesia polluat, casu quo vulneratio aut læsio sit quidem intra, effusio aurem

San- ②

## *De Tentatione DEI, & Sacrilegio. 655*

Sanguinis, vel mors ipsa consequitur extra parietes Ecclesiæ?

- 581. Qui irreverenter orando præsumunt impetrare à DEO id, quod alii devotè orantes; item qui sine prævio studio vel justa causa cathedram conscendentes prædicare præsumunt, DEum tentare meritò reputantur.
- 582. Idem censendum de iis, qui absque justa causa martyrii periculo sese exponunt.
- 583. Item qui purgationem à crimine per ferrum candens, vel aquam bullientem attentant.
- 584. Obstrictus voto simplici, probabiliter non committit Sacrilegium strictè dictum, esto carnaliter peccet contra illud.
- 585. Benè verò ille qui peccat cum persona voto solenni obstricta, aut in Sacris constituta.
- 586. Non item Novitius, nullum habens votum, neque Ordinem majorem.
- 587. Auferens rem non Sacram è loco sacro, esto non depositam in Custodiam Ecclesiæ, probabilius committit Sacrilegium.
- 588. Potest insuper Sacrilegium committi peccato omiſſionis.

### *J. I.*

**Præmittuntur & breviter resolvuntur quæſita ſcitu neceſſaria ad debite resolvendos Casus practicos de Tentatione DEI, & Sacrilegio.**

**Q**Uæres primò, quid ſit Irreligioſitas per defectum, & quæ vel quot ſint ejus membra aut ſpecies?

**¶. Con-**

555. R. Conformiter ad dicta superius, nomine irreligiositatis intelligi quendam defectum contra virtutem Religionis; quemadmodum enim virtus Religionis occupatur circa cultum DEO debitum, ita vitium Religioni oppositum, id est, irreligiositas ut sic opponitur cultui DEO debito, idque vel positivè, seu per excessum, vel negativè, id est, per defectum: & quia de irreligiositate per excessum hactenus jam egimus, restat, ut deinceps agamus de irreligiositate per defectum, quæ sub se comprehendit sex membra sequentia, scilicet 1. tentationem DEI. 2. Sacrilegium. 3. Simoniam. 4. Blasphemiam. 5. Perjurium, & 6. Violationem Voti. De prioribus tribus in hoc tractatu agemus, posterioribus dilatis in proximum: qui DEO adjuvante aget de 2dò præcepto decalogi,

Quæres 2dò, quid sit Tentatio ut sic seu generatim sumpta, & quid tentatio DEI?

556. R. Tentatio ut sic dicitur *dictum vel factum ad capiendum de aliquo experimentum* v. g. an sit prudens, doctus, fortis, in sua arte peritus &c. Porro alia dicitur *tentatio seductionis*, id est, facta in ordine ad seducendum, seu etiam inducendum ad peccatum, quò sensu Diabolus nos tentat, dum ad quovis malorum genus allicit: alia verò appellatur *tentatio probationis*, quæ absque omni sinistro affectu solius experimenti

menti capiendi causâ fieri potest: & in hoc sensu Deus dicitur tentâsse Patriarcham Abraham, Job, Tobiam & alios Sanctos, ut eorum obedientiam, patientiam, vel constantiam, amoremvè experiretur. Videatur Sporer *tr. 2. in decalog. c. 10. sect. 2. n. 6.*

¶ jam ad alterum membrum. ejusdem 557.  
quæsitum. Tentatio Dei proprietatis est dictum vel factum, quô quis absque justa causa explorat, an Deus sit v. g. justus, misericors, omniscius, &c. vel alia quadam perfectione præditus. Ita post S. Thomam 2. 2. p. 97. art. 1. Herincx noster *part. 3. tr. 4. disp. 8. n. 3.* Reiffenstul *theolog. mor. tr. 5. dist. 3. n. 3.* Dicitur autem quô quis *absque justa causa &c.* Nam ubi talis intervenit, non erit tentatio Dei dicenda, utputa si honor DEI, aut salus propria vel proximi v. g. ad tuendam fidem veram id exigat, vel si quis habeat donum miraculorum vel sanitarum &c. &c. E contra qui sine justa causa id facit, DEO irrogat gravem injuriam, sicut & in humanis servus contra observantiam suo domino debitam delinqueret, qui sine causa de Ejusdem virtute vellet capere experimentum, ait Herincx. Illud porrò circa descriptionem datam observandum venit, quòd *per experimentum divina perfectionis* Doctores hic intelligant omne extraordinarium opus vel auxilium Dei supra communem rerum ordinem præ-  
*R. P. Elbel. Pars II. de Fide &c. T t Stan-*

standum, quô divina potentia vel sapientia exploratur &c.

Quæres 3tiò, quotuplex sit tentatio Dei?

558. R. Duplex est, scilicet 1. formalis sive expressa, & 2. implicita sive interpretativa. Ita rursus *communis DD.* formalis dicitur, quando quis dubitans de aliqua perfectione DEI, eo fine positivè aliquid facit, ut experiatur, an Deus habeat illam perfectionem v. g. ad explorandam Dei potentiam, impugnat fidem, vel Ecclesiam persequitur, volens experiri, an Deus possit eam defendere, prout à nonnullis hominibus perversissimis, ut à Nabuchodonosore, Juliano Apostata &c. factum legitur. Implicita verò seu interpretativa tentatio Dei appellatur, quando quis expressè quidem non dubitat de aliqua perfectione Dei, neque intendit de illa capere experimentum, nihilominus facit aliquid, quod suapte natura videtur referri non posse, nisi ad experiendam aliquam Dei perfectionem; ut si quis contempta & recusata omni medicina expectet à solo Deo sanitatis restitutionem, vel si flumen sicco pede transire tentet &c. prout pluribus exemplis mox infra adferendis amplius patefiet.

Quæres 4tò, quale peccatum sit Tentatio Dei?

559. R. Nedum formalis seu expressa, sed & virtualis seu implicita tentatio Dei sine justa causa

causa facta est peccatum mortale ex suo genere. Ita communissime DD. Suarez, Sanchez, Reiffenstuel, Sporer, Illsung, *tr. 5. disp. 3. a. 2. n. 287.*

Ratio prioris est: quia, ut jam visum fuit, tentatio formalis & expressa procedit ex quadam incredulitate & dubitatione de divina perfectione, quam tentator sine causa justa explorare nititur: atqui per hoc præter peccatum infidelitatis, quam tentatio formalis involvit, gravissima injuria Deo irrogatur, prout haud obscure colligi potest ex punitione Judæis, Dominum Deum tentantibus; irrogata, *Psal. 77. Unde & Deut. 6. & Matth. 4. dicitur, non tentabis Dominum Deum tuum.*

Ratio autem posterioris est: tum quia nedium formalis, sed & virtualis tentatio Dei adversatur excellentissimæ virtuti morali, scilicet Religioni; tum quia ponendo actionem aliquam, quæ ex sua natura non nisi ad explorandam aliquam perfectionem Dei referri posse videtur, irrogatur Deo gravis injuria, uti post Suareziū & alios bene notat Babenstueber *tr. 5. disp. 2. a 5. n. 8.*

Dixi tamen: *ex suo genere esse peccatum mortale*; negari enim minimè potest, quin tentatio implicita saltem sæpius contingat absque peccato mortali, idque vel propter ignorantiam & simplicitatem, aut inconsiderationem; vel propter levitatem

materiae seu etiam periculi , cui tentator sese exponit utputa si leviter infirmatus nolit uti medicamenti congruis &c.

Quæres 1<sup>to</sup> , quid sit Sacrilegium , & quotuplex ?

- § 61. R. ad primam partem hujus quæsitæ. Sa-  
crilegium ethymologicè , id est , secundum  
nomenclaturam sumptum idem dicit , ac *rei  
sacra legium* , id est , furtum , Reipsa autem  
bene describitur , quòd sit rei sacrae violatio  
seu etiam indigna tractatio rei sacrae quæ talis.  
Dicitur autem 1. *violatio* &c. per quod Sa-  
crilegium genericè convenit cum aliis pec-  
catis. Dicitur 2<sup>do</sup> , *rei sacrae* , id est , aucto-  
ritate publica ad cultum Dei deputatae , seu  
etiam consecratae &c. Additur 3<sup>to</sup> , *quæ  
talis* , &c. In ordine enim ad dignoscen-  
dam malitiam Sacrilegii oportet attendere  
primò ad quid persona , locus , vel etiam  
res sit sanctificata ? 2<sup>do</sup> , an aliquid factum  
sit contra illud , ad quod talis res vel persona  
fuit sacrata : atque hinc fit , v. g. sacer-  
dos utpote consecratus Deo , nedum ad  
serviendum , sed etiam ad castè serviendum ,  
&c. fornicando committat Sacrilegium ,  
non item alteri , v. g. detrahendo , quia ad  
hunc finem non fuit specialiter consecratus.  
Similiter ager Ecclesiae est sanctificatus &  
Deo dicatus , quoad hoc , quòd sit exemp-  
tus ab oneribus laicorum , non item , ut nul-  
lus per eum transeat , vel in eodem loco du-  
ellet ;



ellet: quô rursus fit, ut si quis laicorum oneribus agrum talem aggravare contendat, Sacrilegium incidat, non item si in tali agro duellet. Videatur de hoc Matthæucci in *cautela Confess. l. 1. c. 17. §. 17. n. 123.* vel *Valentia tom. 3. disp. 6. q. 15. punct. 1.*

¶ jam ad alteram partem ejusdem quæ-<sup>562.</sup> sit, Sacrilegium triplex dari potest, scilicet 1. personale, 2. locale, & 3. reale. Ita omnes. Ratio hujus divisionis est facilis, nam triplex datur genus rerum sacrarum, 1. persona, 2. locus & 3. res, prout à loco & persona distincta, & hæc omnia inhonorari, seu etiam indigna tractatione violari possunt, veluti experientâ multiplici constat: atqui ex violatione personæ sacræ Sacrilegium personale, ex violatione loci sacri locale, & demum ex violatione, seu indigna tractatione rei sacræ Sacrilegium reale committi meritò reputantur, veluti patet ex dictis: ergo &c. &c.

Quæres 6tò, quod modis vel actionibus contingat Sacrilegium personale?

Ante responsionem notandum, nomine personæ sacræ hic intelligi omnem personam per sacram ordinationem, vel per statum Religionis ejusvè aliquam participationem ad cultum DEI dicatam: ideòque nedum Sacerdotes aut Clerici in sacris constituti, sed & fratres laici (ab aliis conversi vocantur) nec non & Moniales, utpote per-

solenne votum castitatis Deo singulariter consecratæ, sub nomine personæ sacræ comprehenduntur, veluti Herincx, Henno, & alii *DD.* communiter advertunt. Hôc notato

§ 64. *R.* ad quæstionem. Sacrilegium personale quatuor modis potest contingere, 1. inferendo manus violentas in Clericum vel Religiosum, utputa percutiendo, mutilando, vel occidendo aliamvè atrocem injuriam eidem inferendo contra privilegium Canonis, *si quis suadente* 17, q. 4. 2. Personas Ecclesiasticas subjiciendo judicio fori sæcularis, vel ad illud trahendo, contra privilegium fori *cap. 1. & seqq. de foro. compet.* 3. Ab iisdem personis Ecclesiasticis tributa vel gabelas exigendo, contra privilegium immunitatis *cap. 4. X. de immunit. Ecclesiast.* 4to demum luxuriosè violando corpus personæ Deo sacratæ, vel per Ordinem sacrum vel per votum solenne castitatis &c. sive dein hoc fiat per concubitum, sive per pollutionem, sive denique per tactus impudicos, &c. &c. Ita rursus *communis DD.*

§ 65. Quocirca cum Filliuccio *tr. 24. c. 9. n. 228.* animadvertendum existimo, hæc sacrilegia specie morali inter se differre, eo quod præceptis formaliter diversis, id est, diversis ex motivis factis opponantur, consequenter iudex sæcularis Clericum percutiens primum, dein violenter illum detinens  
seu

seu incarcerans contra SS. Canones, non satisfaceret in confessione generaliter duntaxat dicendo, se manus violentas in Clericum injecisse, sed deberet insuper exprimere, id contigisse nedum percutiendo, verum insuper jurisdictionem in eundum exercendo, quæ posterior injuria longè diversa est ab illa priori, proptereaque diversa seu distincta censura solet affici ab Ecclesia.

Quæres 7timò, quot modis vel actionibus committatur Sacrilegium locale?

Ante responsionem supponendum est, <sup>166.</sup> nomine Ecclesiæ ceu loci sacri intelligi Ecclesiam, sacellum, altare, & quemcunque locum ad Missam vel officium divinum peragendum publica auctoritate deputatum, non item oratoria privata vel Eremitoria, esto fortassis celebratio Missæ in his fuerit permessa: non enim propterea hoc gaudent privilegio immunitatis.

Porro quòd ad locum sacrum bene notandum est, nomine hujus in ordine ad effectum refugii seu asyli capiendi intelligi, nedum Ecclesiam cum suis capellis, sed etiam cœmeterium, sacristiam, campanile, immò & monasterium totum &c. quia hoc immunitatis privilegium loco sacro concessum est aliquid favorabile, & hoc ipso latè interpretari debet: è contra verò in ordine ad incurrendam speciem Sacrilegii nomine loci sacri intelligitur sola Ecclesia, vel Capellæ

in eadem contentæ, &c. non item sacristia, vel campanile, aut monasterium: quia hæc materia velut odiosa strictè interpretari debet. De qua videri possunt Laymanni lib. 4. tr. 10, c. 7, n. 5. Bonacina disp. 3. q. 6. pu. un. n. 9. Augu, Michel ubi supra appendic. 2, §. 10. n. 5. vel Felix Potestas Exam. Confess. tom. 1. part. 2, c. 4, n. 554. His notatis

- § 67. 2. Sacrilegium locale committi potest tribus modis. I. exercendo actum in loco sacro, per quem Ecclesia polluitur, prout fit 1. per voluntariam & culpabilem occisionem hominis, c. *præposuisti de consecr. Eccl.* 2. per voluntariam & mortaliter malam effusionem humani sanguinis, c. *un. de consecr. Eccles.* in 6to, & 3. per culpabilem effusionem seminis humani, immò & probabilissimè per copulam conjugalem absque necessitate in loco sacro exercitam. 4. per sepulturam hominis excommunicati saltem non tolerati, & 5. per sepulturam hominis non baptizati in loco sacro, c. *consulvisti de cons. Eccl.* & c. *Ecclesiam de cons. dist. 1.* De quibus videri potest D. August. Michel theolog. canon. mor. tom. 1. part. 2. appendic. 2. pu. 5. §. 10, n. 7, 8, & 9.

II. Sacrilegium locale committitur exercendo in Ecclesia actum profanum, utputa 1. iudicium ferendo in causa sanguinis aut pœnæ corporalis, cap. *cum Ecclesia, de immunit. Eccl.*

*Ecclesiast.* 2. exercendo ibi mercatum, *c. decet, de immunit. Eccl. in 6to.* 3. committendo Furtum, five dein auferatur res sacra de loco sacro, five res sacra de loco non sacro, five res non sacra in loco sacro, *c. quisquis. 17. q. 4.*

III. Committitur violando immunitatem loci sacri, quod fieri censetur 1. Ecclesiam infringendo, aut bonis suis spoliando, *c. Sacrilegium. c. quisquis 17. q. 4. & c. conquesti de sent. excomm.* 2. fieri etiam censetur extrahendo per vim delinquentes, qui ad illam confugerunt, modò non commiserint tale delictum, quod non gaudet immunitate Ecclesiastica, vel potiùs jure asyli, *c. diffinit. c. miror. 17. q. 4.* 3. fieri potest materiam dirutæ Ecclesiæ convertendo ad usus profanos, *c. ligna. de consecrat. d. 1.* Videatur de his Filliuccius *tr. 24. c. 9. à n. 235.* Felix Potestas in *Exam. Confess. tom. 1. p. 2. c. 3. n. 554. & seqq.*

Quæres 8vò quot modis vel actionibus committi soleat Sacrilegium reale ?

Ante responsionem rursus advertendum est, nomine rei sacræ intelligi rem ad cultum divinum consecratam vel publica auctoritate deputatam, uti sunt 1. Sacramenta Ecclesiæ, præsertim SS. Eucharistiæ, cujus violatio importat gravissimam speciem Sacrilegii. 2. Sacra vasa ad usum Sacramentorum deputata, item sacros liquores, ut

T t 5

puta

puta Cryfma, Oleum infirmorum, aquam benedi&ctam, nec non Cruces Christi & SS. imagines, vel Reliquias, nec non nomina Dei, Christi & San&ctorum, item Sacra Scriptura Canonica &c. 3. Omnia, quæ ad ornatum Altarium & Ministrorum pertinent, uti sunt Pallæ, Corporalia & Paramenta ecclesiastica. 4to denique rebus sacris aliquo modo, licet remotius & minus proprie accensentur bona mobilia, deputata ad congruam sustentationem Ministrorum Ecclesiæ, templorum fabricam, itemque pia legata, vel alia deposita in Ecclesiis, &c. quæ licet in rigore loquendo non sint res sacræ seu consecratæ, quia tamen publica auctoritate ad cultum divinum præ cæteris deputatæ sunt; hinc eorum violatio seu indigna tractatio in jure passim appellatur Sacrilegium. Videatur Suarez *l. 3. c. 6. an. 7.*

- § 69. R. Hoc solet committi quinque modis sequentibus. 1. abutendo Sacramentis, vel ea indignè administrando, puta in statu disgratiæ, vel scienter indigno, &c. vel alia ratione vilipendendo, conculcando, &c. more hæreticorum aut sagarum &c. 2. profanando vasa sacra vel ornamenta, utpote calices sacros, vel vestes consecratas &c. 3. violando seu etiam indignè tractando imagines San&ctorum. 4. abutendo Sacræ Scripturæ textibus ad errores confirmandos, uti faciunt hæretici. 5. non solvendo decimas, ut-

utpote ab Ecclesia consecratas ad cultum divinum. Vide Valentia *tom. 3. disp. 6. q. 15. pu. 1.* Sporer *tr. 2. in decalog. c. 10. à n. 29.* vel Babenstuber *cit. art. 5. n. 16.*

Quæres denique 9nò, quale, vel quantum peccatum sit Sacrilegium?

¶. Sacrilegium est ex suo genere peccatum mortale. Ita omnes. Ratio est: quia secundum dicta Sacrilegium adverfatur excellentissimæ virtuti morali, simulque unaquæque species habet materiam satis gravem, veluti inductione facile potest ostendi; nam percussio Clerici, vel usus jurisdictionis à sæculari in eum usurpatæ, nec non violatio castitatis &c. (quæ sunt de prima specie) sunt peccata ex se mortalia. Similiter effusio humani sanguinis aut seminis, itemque furtum & violatio immunitatis Ecclesiasticæ (quæ ad 2dam classem pertinent) rursus sunt peccata de se gravia. Denique indigna administratio aut receptio Sacramentorum, nec non abusus Sacrorum vasorum vel S. Scripturæ &c. graviter repugnant rectæ rationi, ut de se liquet, consequenter ex suo genere sunt peccata mortalia.

Dixi: ex suo genere &c. ut per hoc innuerem, Sacrilegium subin committi posse absque peccato mortali, idque duplici ex capite: primò ob levitatem materiæ &c. non enim quævis aut quantumcunque levis per-

percussio Clerici, aut furtum rei Sacrae &c. juxta rectam rationem dici debet mortaliter peccaminosum. 2dò, ob inadvertentiam seu indeliberationem; nam ubi actus de se non est plenè liberè factus, peccatum mortale non committitur, veluti diximus in *part 1. Theolog. Decalog. Conferent. 2. n. 32. & 53.*

## §. II.

Proponuntur, & breviter resolvuntur Casus practici de Tentatione DEI, nec non de Sacrilegio.

## CASUS PRIMUS.

**T**itius Zelosus Concionator cùm è pulpito sapius pro fide Catholica egregie dixisset, quin tamen vel unum hareticum (quorùm ingens numerus non rarò interfuit concionibus) suis rationibus vel argumentorum eloquentiæ, vè pondere ad fidem catholicam pertrahere potuisset, tandem (nesciò quo spiritu ductus) sese obtulit ad probandam, seu etiam demonstrandam veritatem fidei catholica quodam miraculo, modò haretici adpromitterent se Religioni Catholicae accessuros, posteaquam in hujus confirmationem quoddam portentum seu miraculum coram perspexissent. Alii è contra viri prudentes dissuadere Titio similia promissa.



edò quòd per hæc DEUS potiùs tentaretur, & Religio Catholica periculo exponeretur &c. at ille respondit, quamplures Sanctos similia miracula à DEO postulâsse & impetrâsse, prout de S. Antonio Paduano legitur, similiter D. Petrum bina vice per aquas ad Christum properâsse, tametsi illud more aliorum Apostolorum potuisset facere navigio : denique & Elisæum ignem è Cælo avocâsse, esto hoc non fuisset necessarium, hodiedum autem manum Dei non esse abbreviatam &c. Quid de hoc Zelo Titii?

R. Hunc Zelum ab aliis viris prudentibus meritò fuisse reprobatum velut indiscretum & immaturum. Cùm enim veritas Fidei Catholicæ hodie satis sit probata nedum rationibus ex antiquitate, unitate, sanctitatèque doctrinæ petitis ; verùm insuper innumeris miraculis, quorum claritas & evidentia ipsorum etiam Adversariorum oculos fugere nunquam posset, modò ipsimet nollent opponere pertinaciæ suæ umbraculum &c. hinc sanè minimè opus est, ut ad convincendam pertinaciam, vel ad cuiuslibet placitum DEUS hodie fidem nostram novis confirmet miraculis. Unde R. P. Illsung tr. 5. disp. 3. n. 287. narrat, alium quendam Prædicatorem Evangelicum, ut fidem Christianam populo infideli persuaderet, tentâsse eo inspectante super aquas sicco pede incedere, sed navigio liberari

berari debuisse, ne undis hauriretur, moxque sapienter resolvit, hunc Prædicatorem Deum graviter tentasse, & hoc ipso ( nisi per Zelum non secundum scientiam exercitum excusetur ) graviter peccasse: quemadmodum enim magnam irreverentiam Principi inferret, qui Eum à sapienter decretis sine necessitate recedere quodammodo cogeret, aut reculantem contemptui exponeret; ita gravem irreverentiam DEO irrogat, qui Deum vel ab ordine suæ providentiæ dimovere vult ad faciendum mimiraculum sine necessitate, vel ipsum apud populum infidelem trahere in suspicionem alicujus impotentiae aut malevolentiae, quod scilicet Deus vel non posset vel non vellet patrare miraculum ab altero præsumptuose promissum in fidei contestationem.

§73. Nec obstat ( inquit idem Doctor ) quod etiam Sancti viri videantur nonnunquam petivisse à Deo miracula sine necessitate; nam quotiescunque Deus scitur hujusmodi miracula patrâsse, inde velut à posteriori certo colligitur, ea ex divino instinctu petita, atque à Deo ad speciales fines ordinata fuisse.

At, inquires, Christus ipsè suis Prædicatoribus hanc gratiam miraculorum adpromississe legitur *Marci 16. v. 17.* sequentibus omnino verbis: *signa autem eos, qui crediderint, hac sequentur, in nomine meo demonia ejici-*

*ejicient, linguis loquentur novis &c.* quis ergo hodie dum Concionatorem Apostolicum temeritatis aut præsumptionis arguat, eo quòd in confirmationem veræ fidei novum à Deo miraculum prætendat?

¶. Equidem Christum Dominum hanc 574  
gratiam miraculorum adpromississe, at Apostolis seu discipulis ad promulgandum Evangelium primum missis in exordio nascentis Ecclesiæ, quo tempore utique ad persuadendam hominibus hanc novam doctrinam Evangelicam aliunde satis difficilem & nunquam antehac cognitam necessaria fuere miracula. Ast verò, posteaquam fides Evangelica per Orbem universum jam satis fuit promulgata, & per tot sæcula innumeris miraculis luce meridiana clarioribus confirmata, minimè sanè necessum est, ut vel ob hæreticorum aut infidelium pertinaciam convincendam, vel ob Zelum non secundum scientiam exercitum ( melius præsumptionem diceremus ) illico nova patret miracula, veluti more suo sapientissimè animadvertit D. Georgius *hom. 29. in Evang. post initium*, dicens: *hæc ( signa ) necessaria in exordio Ecclesiæ fuerunt. Ut enim ad fidem cresceret multitudo credentium, miraculis fuerat nutrienda; quia & nos, dum arbuscula plantamus, tamdiu eis aquam iufundimus, quousque ea in terra jam coaluisse videamus, : & si semel radicem fixerint, irrigatio*

*tio cessabit &c.* Similia ex aliis refert Cornelius à lapide in eundem locum.

## CASUS SECUNDUS.

**S**empronius diebus festivis Ecclesiam diligenter quidem accedit, non tamen animo honorandi Deum, sed videndi & conveniendi sponsam suam, cujus in aspectu nedum oculos impudicè pascere, morosèque delectari assolet, sed insuper sese secreto polluere in eodem loco sacro: finitis denique divinis certis quibusdam signis eandem invitare & sollicitare assuevit ad concubitum, non quidem in Ecclesia, sed in alio tertio loco complendum, quem & sponsa plerumque acceptat, nisi impossibilitas moralis vel aliæ circumstantiæ id prohibeant. Jam ad nostrum propositum quæritur 1. an Sempronius committat speciale peccatum Sacrilegii ex eo, quòd diebus festivis, & quidem in loco sacro soleat oculos pascere, morosè delectari, ad concubitum invitare soleat &c. &c. 2. dubitatur singulariter, an non commiserit Sacrilegium, eò quòd in Ecclesia sese polluerit, licet non notoriè, sed secreto?

575.      R. ad prius quæsitum. Sempronius probabiliter non commisit Sacrilegium ex eo, quòd diebus festivis Ecclesiam frequentaverit animo non honorandi Deum, sed oculos pascendi, & in eodem loco invitandi seu etiam sollicitandi suam sponsam.

Ratio

Ratio est : quia tempus sacrum non venit inter res sacras numerandum : esto enim in illo sacra fiant , tempus tamen ipsum non sacrat. Hinc Castropalao *tom. 1. tr. 7. disp. 2. pu. 2. n. 11.* cum Suarezio ac Lessio recte infert , omissionem sacri , vel laborem servilem in die festivo exercitum , aliave peccata mortalia die festivo commissa , ratione temporis non induere malitiam Sacrilegii. Rursus ex eo , quod ( secluso tamen contemptu & voluntate inhonorandi locum sacrum ) sponsam suam ad concubitum alibi complendum invitare soleat , probabiliter non committit Sacrilegium , et si P. Sporer *tr. 2. in decalog c. 10. sect. 4. n. 28. in fine* haud improbabiler dicat , similia peccata gravem continere irreverentiam contra loci sanctitatem , merito à timoratis explicandam in confessione , prout revera etiam faciunt juxta dictamen recte rationis. Et certum omnino existimat Suarez de Relig *tom. 1. l. 3. c. 7. n. 11.* tactus impudicos in partibus verendis , saltem publicè factos vel attentatos in loco sacro , contrahere circumstantiam Sacrilegii : fortasse tamen ( subdit idem Doctor ) non erit idem de turpi aspectu , aut nutu , aut levi verbo , maxime quando in transitu & sine notabili mora & scandalo fiunt ; quia non videntur materia ita gravis : de quo non potest ferri certa regula , sed id prudenti judicio re-

*R. P. Elbel, Pars II. de Fide &c. Uu lin.*

*linquendum est.* Ita ille. Censeo proin interrogandum ex tali pœnitente, an non apprehenderit specialem malitiam vel irreverentiam, ex eo, quòd in loco sacro similia practicavit, tum verò ex responsis non erit difficile practicum ferre iudicium de gravitate peccatorum, aut de circumstantia Sacrilegii,

576. R. jam ad 2dum, Sempronium commississe Sacrilegium locale toties, quoties voluntariè quantumvis secretò sese polluit in Ecclesia. Esto enim per effusionem humani seminis secretò factam locus sacer non polluat; nihilominus actus ipse ex se indecentissimus est dignitate loci sacri, & summopere contrarius ejusdem sanctitati, atque hoc ipso jure naturali divino (quod dicat sancta esse sanctè tractanda) censeri debet graviter prohibitus. Hac de causa Sacri Canones statuere, ut si talis effusio seminis postea publicetur, Ecclesia habeatur pro violata & profanata, quippe cujus sanctitas per talem actum fuit prostituta & contemptui exposita, donec per reconciliationem quasi jure postliminii honorem suum recuperet. Non latet me quidem, à pluribus Doctoribus teneri, hujusmodi actus impudicos non contrahere malitiam Sacrilegii, nisi fiant publicè, vel cum periculo publicationis; nihilominus cum D. Michel *cit. appendice 2. ff. 10. n. 16. probabi-*

babilius judico, esse sacrilegos, etiam si occultè fiant in loco sacro; non enim ideò præcisè Ecclesiæ sanctitati fit injuria, quia hæc per eos profanatur aut polluitur, sed ex eo potius, quòd ex natura sua sint valde turpes, & ob hanc turpitudinem Sacri Canones voluere, ut Ecclesia habeatur violata & profanata.

Sed quid tenendum de illis, dicet fortassis nonnemo, qui se accusant, quòd in Ecclesia durantibus divinis S. V. Flatus emiserint?

R. Eximendum illis esse hunc scrupulum, ne deinceps forsan ex conscientia erronea peccent, atque dicendum, quòd hujusmodi emissio aut exoneratio (nisi fortassis ex contemptu vel cum Scandalo audientium fieret) omni culpa vacet, tum quia natura frequentius exigit exonerationem à flatibus, hanc proin ob causam semper exire, nimis foret onerosum; fortassis etiam officii ratio non semper permetteret: tum etiam, quia flatus nullam specialem turpitudinem relinquunt post se, vi cujus Ecclesiæ in prudenti hominum existimatione reputari deberet profanata vel prostituta. Secus dicendum foret, si quis in Ecclesia ventrem aut vesicam vellet exonerare aut vertere stomachum, more canum; vel si in eadem præsumeret stabulari equos: cum enim tales actiones ex sua

Uu 2.

natura ſint valde turpes, & permagnam poſt ſe relinquant ſœditatem, proſectò, ſana ratio dicat, eas eſſe inconvenientiſſimas ſanctitati Eccleſiæ, veluti *ex communi* DD. bene docet R. D. Auguſt. Michel l. c. cit. n. 17.

## CASUS TERTIUS.

**C**Ajus certa cujuſdam Eccleſiæ cuſtos, dum nuper poſt prandium inſolitum quendam tumultum in eadem ſua Eccleſiâ percepſſet, quid rei eſſet exploraturus, deprehendit duas mulieres de proprietate ſeu dominio cujuſdam libri precarii nedum verbis contendentes, ſed & rixantes, ita ut una ab altera percuffa copioſum ſanguinem è naribus effuderit. Cajus rei novitate nedum obſtupefactus, ſed & honoris divini zelo inflammatus pròh ſcelus! exclamavit: heri Eccleſiâ mea latratibus canum, hodie rixis & incondito clamore mulierum moleſtatur & proſanatur: diſcedite ſubito mala beſtiâ & foribus Eccleſiâ exeſtote, ſecus mediante nervo bubulo viam vobis monſtrabo & januam. Haud paulò poſt Cajus conſulit quendam theologum interrogando 1. an dictæ mulieres non commiſerint grave Sacrilegium, & an propter rixas, humanique ſanguinis effuſionem Eccleſiâ non ſit habenda pro polluta, ita ut indigeat reconciliatione? 2dò, an ipſe Cajus non bene feciſſet, mediante nervo bubulo



*bulo dictas mulieres instar canum expellendo. & alteram pariter usque ad effusionem sanguinis è naribus aut dentibus percutiendo? Quid Theologus respondebit sciscitanti?*

¶. ad primum quæsitum. Mulieres in 578.  
hoc casu procul dubio commisisse irreverentiam sacrilegam, Ecclesiam tamen propterea non censi debere pollutam, primò: quia ad hoc non sufficit quæcunque effusio sanguinis, sed debet esse injuriosa, & conjuncta cum peccato mortali: hæc autem effusio sanguinis è naribus ob inflictam ab altera muliere aliunde ad iracundiam concitata alapam, esto injuriosa fuerit, probabiliter tamen non fuit, nisi venialiter peccaminosa. 2dò, quia nares sunt organum nimis promptum ad effundendum sanguinem; & hanc ob causam Felix Potestas *Exam. Confess. tom. 1. p. 2. c. 4. n. 571.* absolute asserit, per effusionem sanguinis humani è naribus vel dentibus factam, Ecclesiam non pollui. 3tiò denique in ordine ad hoc, ut Ecclesia censeatur polluta, debet effusio sanguinis (vel seminis humani) esse notoria nedum *notoreitate facti*, hoc est, ita, ut de eadem notabili parti communitatis constet, sed insuper, *notoreitate juris*, ita scilicet, ut super crimine commisso; & inde inducta pollutione emanaverit declaratoria judicis sententia, juxta receptam *DD. opinionem*, videndam apud Laymann *l. 5. moral. tr. 5.*

6. 5. n. 8. Dianam 6. part. tr. 6. miscellan. resolut. 27. & part. 11. tr. 2. resolut. 59. Moyam tr. 3. de Sacr. pœnit. disp. 3. q. 4. c. 2. n. 6. & alios : atqui hæc omnia non contigere in nostro casu ; ergo &c.

179. R. jam ad alterum quæsitum. Tametsi Cajus nervo bubulo dictas mulieres percussisset etiam usque ad effusionem sanguinis e naribus, probabiliter tamen ob id nec Sacrilegium incurrisset, neque Ecclesia fuisset polluta. Ratio horum facile eruitur ex dictis ; qui talis percussio, utpote non malo affectu, sed potius zelô honoris divini facta non fuisset peccaminosa, neque etiam Ecclesiæ injuriosa : at hoc ipso non potuit esse Sacrilega &c. ergo. Profectò Christus ipse legitur Joan. 2. v. 15. fecisse quasi flagellum de funiculis, & ejecisse de templo omnes, qui volebant facere e domo Patris sui ceu domum orationis domum negotiationis. Cæterum an etiam conveniens fuisset, ut Cajus alteram mulierem pariter percuteret usque ad effusionem sanguinis, aliorum judicio ac discretionis relinquo, minimè verò consulo.

Sed quid dicendum, ais, casu, quo quis in Ecclesia alterum lethaliter vulnerat aut lædit, ita tamen, ut iste non intra, sed extra Ecclesiam effundat sanguinem, vel etiam sine omni sanguinis effusione omnino vi læsionis moriatur ;

R. In

¶ In hoc casu adhuc pollui Ecclesiam. § 80.  
Ratio est : quia talis occisio censetur voluntaria & injuriosa, nedum Deo vel homini occiso, sed & Ecclesiæ, utpote in qua data fuit causa mortis, non sine gravi torto sanctitatis loci, esto sanguis humanus neque etiam extra parietes Ecclesiæ fuerit effusus. Similiter si quis extra Ecclesiam positus alium in Ecclesia existentem percutiendo vel gladio aut globo trajiciendo occidat, polluta censetur Ecclesia ; etsi enim in tali casu motus fiat extra, occisio tamen moraliter loquendo censetur fieri intra parietes Ecclesiæ, quemadmodum existens in uno territorio, si trajiciat aut occidat hominem in altero territorio existentem, ibidem etiam deliquisse censetur, ita, ut ratione delicti ab illius territorii judice conveniri possit, & puniri. Videatur Laymann *l. 5. tr. 5. c. 5. n. 7.* Aut Felix Potestas *l. cit. c. 4. à n. 568.* ubi hanc materiam fusiùs tractat.

### §. III.

## Corollaria ex dictis inferenda.

**C**olliges ex hæcenus dictis primò, tenet § 81.  
tatoribus Dei adnumerandos esse sequentes. 1. qui quantumvis irreverenter orantes, nihilominus sperant, se impetraturos à Deo

U u 4

idem

idem, quod alii reverenter ac devotè orantes impetrare solent; tales enim censentur velle experiri divinam potentiam & bonitatem, an scilicet etiam irreverenter orantibus subvenire possit aut velit, licet in hoc Doctores regulariter non agnoscant nisi culpam venialem. 2. iisdem accensendi sunt, qui non coacti iusta causa, sed ex mera desidia negligunt studia Sacrarum Litterarum, & nihilominus prædicare vel cathedram conscendere præsumunt, confidentes temerè, Spiritum Sanctum sibi astiturum & inspiraturum omnia; quod Navarrus c. 11. n. 80. existimat mortaliter malum. Sanchez tamen in *decalog.* l. 2. c. 34. n. 16. cum aliis rectiùs asserit, non esse nisi veniale peccatum, modò absit scandalum, vel aliud periculum v. g. animarum, quod ex tali negligentia vel incuria natum est pullulare. 3tiò, etiam illi censendi sunt tentare Deum, qui paganorum more viventes, christianè tamen & piè morituros se credunt vel exspectant, uti bene advertit Henno tr. in *decalog. disp.* 1. q. 5. art. 1. conclus. 2. circa fin.

- § 82. Colliges 2dò, à peccato tentationis excusandos non esse illos, qui temerè, id est, sine necessitate vel iusta utilitate (quales esse possent, si periclitaretur honor Dei, veritas fidei, vel salus propria, aut proximorum, &c.) sese offerunt, vel etiam exponunt peri-

periculo martyrii, Ratio est: quia tales imprudenter, & ex præsumptione seu nimia confidentia extraordinarium Dei auxilium in perferendis tormentis sibi promittunt, Insuper infidelibus vel tyrannis præbent occasionem scandali, peccandi scilicet contra charitatem, dum eos quodammodo provocant ad martyrizandum; unde minimè dubitandum, quin propterea graviter peccent nedum peccato tentationis contra virtutem Religionis, sed etiam peccato scandali contra charitatem, tum proximo, tum etiam sibi debitam. Dum verò nonnulli Sanctorum leguntur tyrannos quodammodo provocasse ad martyrium sibi inferendum, piè credendum est, eos id fecisse vel ex zelo fidei, vel ex speciali instinctu Spiritus Sancti, & hoc ipso non sine justa causa. Sporer *tr. 2. in decalog. c. 10. sect. 2. n. 7.* Laymann *lib. 4. tr. 10. c. 5. n. 6.* Barbenstuber *tr. 5. disp. 2. art. 5. n. 6.*

Colliges insuper 3tiò, ad tentationem Dei pertinere illas purgationes à crimine ob-  
jecto, quæ olim fieri solebant per ferrum  
candens, vel per aquam ferventem. Unde  
consequenter dicendum, nedum eos, qui  
sponte sese offerunt ad probandam tali mo-  
dò innocentiam suam, sed etiam iudices,  
qui huiusmodi probas expetunt, vel contra  
personam aliquam, quæ noluit aut non po-  
tuit sufferre talem probam, tanquam pro-

Uu 5                      ditam

ditam & convictam de crimine procedunt, sive torturæ eam subijciendo, sive omnino ad pœnam condemnando graviter peccare, uti benè docet Laymann *lib. 4. tr. 10. c. 5. n. 5.* Ratio est: quia usus talium purgationum prorsus est temerarius & præsumptuosus; tum etiam, quia iudex in processu contra reos indiciis ac probationibus uti debet, quæ humano ac naturali modo deprehendi possunt: at, tales non sunt probæ mox recensitæ; cùm Deus nullatenus teneatur personam etiam innocentem conservare illæsam ab ardore ferri candentis, seu etiam aquæ ferventis, neque horum calorem ita attemperare, ut non lædat &c. ergo.

Nec obstat, similes purgationes delictorum sæpe fuisse à Deo variis miraculis confirmatas, veluti constat de Sancta Chuni-gunda, aliisque ex historiis videndis apud Delrium *disquis. magic. l. 4. c. 4. q. 4. sect. 3. & seqq.* id enim accidisse censendum est in casibus, in quibus id fieri licuit ex divino instinctu, vel in quibus Deus singulariter voluit favere innocentiae putatitii delinquentis, uti post Suarezium *tom. 1. de Relig. tr. 3. l. 1. c. 3. n. 8.* rectè advertit Sanchez *in decalog. l. 2. c. 34. n. 12.*

584. Colliges 4tò, eum, qui delinquit contra votum simplex castitatis, committere quidem duplex peccatum mortale in confessione

ne

necessariò explicandum, unum scilicet luxurix contra virtutem continentix, alterum infidelitatis contra votum Deo factum, probabiliter tamen non committere peccatum Sacrilegii. Ratio est: quia per votum simplex persona non fit Sacra, nec Deo specialiter consecrata, sicuti fit per votum solenne Religionis vel susceptionem Ordinis Sacri, vi quorum ex ordinatione Ecclesix saltem censetur corpus specialiter DEO consecratum, proptereaque vi talis lationis committeretur Sacrilegium. Quin immo Filliucius *tr. 24. n. 224.* probabiliter tenet, etiam per violationem voti simplicis committi Sacrilegium, eò quòd etiam per tale votum castitas fuerit DEO quodammodo dicata & consecrata.

Colliges igitò, complicem qui cum persona sive per votum solenne, sive etiam per ordinem Sacrum Deo consecrata carnaliter peccat, semper committere Sacrilegium, esto complex ipse non sit obstrictus ne simplici quidem voto castitatis. Ita ex communi Doctorum Laymann *cit l. 4. tr. 10. c. 7. n. 3.* Ratio est: quia talis complex cooperatur saltem ad violandam rem Sacram, corpus scilicet alterius: ergo quemadmodum solutus peccando cum conjugata, committit verum adulterium, esto ipse ligatus non sit, ita etiam talis complex committit verum Sacrilegium.

Col.

§86. Colliges 6tò, Novitium qui nec votum emisit, neque etiam Ordinem Sacrum suscepit &c. non committere peccatum Sacrilégii peccando contra castitatem, sive deinsecum, sive cum alia persona non sacra peccet; & hoc ipsò non teneri ad exprimendam in Confessione circumstantiam Novitiatus. Ratio est: quia in tali casu non violatur persona sacra, velut hactenus dicta consideranti patebit: ubi autem non intervenit violatio rei sacræ, ibi Sacrilégium non committitur: ergo &c. Vid. Tambur. in *Methodo expedit Confess. l. 2. c. 7. §. 5. n. 33.* aut Filliucius *cit. tr. 24. n. 233, & 234.*

§87. Colliges 7timò, Eos, qui in loco sacro vel è loco sacro rem non sacram, neque etiam in custodiam Ecclesiæ specialiter depositam furando surripiunt, ut puta succidendo marsupium, aut clependo horologium saccale (ut vocant) probabilius committere verum Sacrilégium. Ita sanè communis & probabilior sententia, quam sequuntur Valentia *tom. 3. disp. 6. q. 1 s. pu. 1.* Filliuc. *cit. c. 9. n. 234.* Bonacina *tom. 2. disp. 3. q. 6. pu. un. n. 17.* August. Michel *ubi supra n. 20.* Pontas in *dictionary Casuum V. Sacrilégium. Cas. I.* Ratio est: quia hòc modo vera infertur injuria sanctitati loci, dum ita profanatur, ut homines securè non amplius ibi valeant vacare divinis, sed potius co-

gan-



gantur invigilare atque intendere marsupio aut horologio, quàm divinis, prout in magnis concursibus, ubi devotioni plurimum vacandum esset, non rarò fieri affolet, non sine detrimento honoris divini; quandoquidem multi propter hunc timorem à cultu divino retrahi aut meritò abstergeri possint vel soleant. Unde etiam *can. quisquis* 21, c. 17. q. 4. simpliciter dicitur: *Sacrilegium committitur auferendo sacrum de sacro vel NB. non sacrum de sacro, sive sacrum de non sacro.*

Colliges denique 8tavò, peccatum Sacri- § 88.  
legii nedum committendo, sed etiam omit-  
tendo posse incurri, tametsi pluries commit-  
tendo, quàm omittendo incurratur. Ra-  
tio hujus est: quia etiam per culpabilem  
omissionem res sacræ possunt violari seu in-  
dignè tractari, utputa si fons baptismalis  
non servetur immunis à sordibus, si vasa  
sacra vel instrumenta ad Sacrificium neces-  
saria non purgentur aut laventur, vel, quod  
adhuc pejus, si Ciborium non purgetur,  
ita ut particulæ vel hostiæ consecratæ per-  
mittantur corrodì à vermibus &c. vel ita  
corrumpi, ut decenter non ampliùs possint  
administrari communicaturis &c. De qui-  
bus meritò dicitur *cap. 2. de custod. Eucha-*  
*ristiæ: sunt & alii, qui non solùm Ecclesias*  
*dimittunt incultas, verùm etiam vasa ministe-*  
*rii, & vestimenta Ministrorum, ac pallas al-*  
*taris*

*taris, nec non ipsa corporalia tam immunda relinquant, quòd interdum aliquibus sint hor-  
tori. Videatur Laymann l. 4. tr. 10. c. 7.  
n. 14. vel Illsung tr. 5. disp. 3. n. 300.*



# CONFERENTIA DECIMA NONA.

## De Simonia.

### SUMMARIUM.

- 589. Simonia est studiosa voluntas emendi aliquid spirituale &c.
- 590. Ad hanc tria necessariò debent concurrere.
- 591. Pretium simoniacum (alio nomine *munus* dicitur) est triplex, scilicet 1. munus à manu.  
2. à lingua, & 3. ab obsequio.
- 592. Simonia triplex est, scilicet. 1. mentalis.  
2. conventionalis, & 3. realis.
- 593. Rursus alia dicitur contra jus naturale & di-  
vinum, alia contra jus humanum duntaxat.
- 594. Simonia ex suo genere est mortaliter pecca-  
minosa: nonnunquam per accidens tantum fit  
veniale.
- 595. Simoniam committit, quisquis pro bono  
spirituali dat temporale per modum pretii, vel  
per modum motivi in ordine ad impetrandum  
illud.

596. Aut per modum gratuitæ compensationis prius in pactum deductæ &c.
597. Nunquam fas est pro re spirituali exigere vel acceptare bonum temporale per modum pretii &c. bene tamen per modum stipendii vel sustentationis &c.
598. Bonum temporale tripliciter potest esse annexum bono spirituali scilicet 1. antecedenter 2. concomitanter, & 3. subsequenter.
599. Pro re temporali quæ connexa spirituali, nunquam fas est aliquid temporale accipere &c.
600. Nihilominus res benedictas v. g. calicem, rosaria &c. merè materialiter sumptas, scilicet pro materia aut forma artificiali licet vendere &c.
601. Solvitur quædam instantia contra hanc resolutionem.
602. & 603. An vel qualiter liceat Monasterio aliquid exigere vel acceptare à Novitio aut Novitia professura?
604. An summus Pontifex, & quinam alii incurere possint labem Simonix?
605. Resolvitur Casus I. de quodam Capellano, qui intuitu ulterioris promotionis ad beneficium Ecclesiasticum multis annis extitit à Servitiis cujusdam Comititis.
606. Alius quidam pro eodem beneficio supplicans promiserat se fore gratum illo obtento.
607. Alii Comitissæ promiserunt auri pondus pro intercessione.
608. Qui propterea probabilius inciderunt crimen Simonix.
609. Resolvitur Casus II. de alio quodam Clerico aspirante ad quoddam beneficium & pecuniis corrumpente alium corrivalem, quatenus hac vice abstineret à supplicando;

610. Simulque adpromittente, se ad proximam vacaturam pro eodem laboraturum;
611. Insuper cum Patrono seu Collatore ejusdem beneficii spondendo certavit centum dugatis, se hac vice non minusquàm aliis præteritum iri.
612. Resolvitur Casus III. de alio Clerico, qui ob recommendationem & preces ejusdam Domicellæ obtinuit insignem Parochiam.
613. Quot modis fieri possit vexatio in ordine ad impediendum aliquem à beneficio Ecclesiastico?
614. Fas est, injustam vexam pecuniis redimere ab eo, qui quidem obesse, non item prodesse potest ad idem beneficium:
615. Probabilius tamen ante beneficium obtentum non licet redimere ab illo, qui nedum obesse, sed & prodesse potest.
616. Bene verò licet se redimere à quocunque demum injusto vexatore post plenum jus adeptum semel in beneficium.
617. Ad bene discernendum an Simonia præsertim mentalis fuerit commissâ, oportet graviter advertere, quò animo aut fine temporale bonum fuerit oblatum v.g. Collatori &c.
618. Clerici sub mera spe promotionis suæ obsequia deferentes aut exhibentes non incurrunt labem Simoniz.
619. Neque illi, qui ex pura & putâ gratitudine aliquid temporale pro spirituali offerunt, præsertim post obtentum jam beneficium.
620. Insuper absquè nota simoniz exigi potest salarium pro doctrina theologica vel pro responso morali.
621. Quò titulo pro Sacrificio Missæ, aliisve functionibus spiritualibus liceat recipere vel exigere stipendium?

622. In Electionibus ad officia & dignitates Ecclesiasticas potest committi Simonia etiam à Religiosis & Canonicis.

623. Idque probabilius, tametsi unus alteri fide aliquid promittat v. g. pro suffragio sibi conferendo &c.

## §. I.

Præmittuntur, & breviter resolvuntur quæ sita scitu necessaria ad debite resolvendos Casus practicos de Simonia.

**Q**Uæres primò, quid sit Simonia, & quotuplex pretium iSimoniacum?

R. Ad primam partem hujus quæsit. 589. Simonia à *Simone Mago* (qui oblatis pecuniis voluit ab Apostolis emere potestatem conferendi Spiritum Sanctum *Act. 8. c.*) sic dicta, rectè describitur, quòd sit studiosa voluntas emendi vel vendendi aliquid Spirituale vel Spirituali annexum, pretio temporali. Ita communiter DD. Dicitur 1. *studiosa voluntas*; id est, actus deliberatus voluntatis; tum etiam quia Simonia in sola voluntate interna præcipue potest consistere, veluti constabit ex proximè dicendis. Dicitur 2dò, *emendi vel vendendi*; quæ particulæ juxta S. Thomam 2. 2. q. 100. art. 1. ad 5. accipiendæ sunt latius, id est, pro omni contractu & pacto oneroso, R. P. Elbel. Pars II. de Fide &c. Xx quò

quô datur pretium temporale vel aliquid pretio æstimabile pro Spirituali, sive dein id fiat per veram emptionem aut venditionem, sive per aliquam permutationem vel alium quemvis contractum onerosum. Dicitur 3tò, *aliquid Spirituale*; id est, supernaturale, seu ex natura sua ordinatum ad salutem animæ & finem supernaturalem, sive dein sit tale per essentiam, uti sunt grãtia Sanctificans, & alia dona Spiritus Sancti; sive sit tale causaliter, uti sunt Sacramenta causantia gratiam, sive denique sit tale per effectum, uti sunt actus ordinum & officiorum Ecclesiasticorum. Dicitur 4tò vel *Spirituali annexum*, sive antecedenter, sive concomitanter, sive etiam consequenter, veluti n. 598. amplius declarabitur. Additur tandem 5tò, *pretio temporali*; quo nomine hic intelligitur non solum omnis pecunia, sed etiam omne illud, quod est pecunia æstimabile; simulque innuitur malitia Simonix, in eo consistens, quòd contra omnem reverentiam & virtutem Religionis res Spirituales comparatur rei temporali, perinde, ac si tam vilis esset, uti rei terrenæ pretio æstimari vel æquiparari posset.

590. Ex qua explicatione liquet, nî fallor, ad Simoniam propriè talem tria debere concurrere 1. *materia*, quæ sit res Spirituales vel Spirituali annexa. 2. *pretium temporale*,  
vel

vel aliquid pretio æstimabile comparatum vel commensuratum rei spirituali qua tali; ubi enim datur Spirituale pro Spirituali v. g. calix pro calice, Reliquiæ pro Reliquiis &c. propriè non committitur Simonia, licet talis commutatio circa beneficia Ecclesiastica sine auctoritate legitima facta vel facienda, jure humano graviter sit prohibita velut obnoxia Simonix &c. 3. Necessum est, ut ad veram Simoniam interveniat pactum sive explicitum, sive implicitum saltem, seu tale, vi cuius unus intendit alterum sibi reddere obstrictum seu obligatum ad dandum Spirituale pro temporali, aut vicissim.

¶ 2. jam ad 2dum membrum ejusdem §91, quæsitum. Pretium Simoniacum (quod alio nomine in jure canonico *cap. sunt nonnulli.*

1. q. 1. & *can. Salvator. 1. q. 3.* vocari solet *munus*, non quidem prout *ly munus* idem significat, quod donum gratuitum, sed prout importat debitum ex obligatione) pretium, inquam, hoc Simoniacum, seu munus triplex est, scilicet 1. *munus à manu.* 2. *munus à lingua* & 3. *munus ab obsequio.* Per munus à manu intelligitur pecunia & quidquid pretio æstimatur ab hominibus, puta vestis, animalia, artefacta &c. c. *totum 1. q. 3.* Per manus à lingua intelliguntur laudes, intercessiones vel recommendationes v. g. apud Principem vel populum ex

XX 2

pacto

paſto interponendæ pro eo, vel amicis ejus qui beneficium vel rem ſpiritualem cuiſpiam contulit aut conferre intendit. Denique per munus ab obſequio intelliguntur ſervitia ſeu obſequia temporalia cuiſpiam præſtituta vel præſtanda ſub conditione vel cum paſto beneficii Eccleſiaſtici ſibi conferendi, aut vice verſa &c. Ita *communis Doſtorum* apud Henno & alios.

Quæres 2dò, quotuplex ſit Simonia, & quale peccatum ſit?

§92. R. ad primum membrum hujus quæſiti, Simonia ut ſic eſt triplex: alia dicitur *mentalis*, alia *conventionalis* (ad quam reduci ſolet *confidentialis*) alia denique *realis*. *Simonia mentalis* juxta Laymann, Pichler, de la Croix & alios, non ſumitur hic pro mero actu interno, quò quis intendit committere Simoniam (eſto etiam talis voluntas poſſit ſuò modo dici Simonia mentalis, ſicut voluntas adulterandi dicitur adulterium mentale) ſed committitur tunc, dum quis reipſa dat aliquid temporale pro ſpirituale (vel viciffim) absque eo tamen, quòd exteriùs manifeſtet, ſe per hoc velle alterum obligare, licèt à partè rei habeat animum alterum obligandi aut permovendi ad conferendum ſibi aliquid ſpirituale: & ab hac intentione in mente retenta datio illa exterior appellari ſolet Simonia mentalis: ad quam ſecundùm Pichler & alios ſuf-



sufficit pactum inchoatum ex parte unius, nec requiritur completum vel acceptatum ex parte alterius; secus enim Simon Magus dici non posset commisisse Simoniam.

*Simonia conventionalis* est, quæ fit conventionem expressa vel saltem tacita, dandi scilicet spirituale pro temporali aut vicissim, & hæc quamdiu id, quod promissum fuit nec ab una neque etiam ab altera parte fuit præstitum, dicitur Simonia merè & purè conventionalis, si verò ex alterutra parte tantum fuit præstitum, dicitur Simonia conventionalis *mixta*, scilicet ex conventionali & reali; nam *Realis* appellatur, quæ supposita conventionem seu pacto per mutuam traditionem, rei scilicet spiritualis pro temporali, fuit consummata. Ultra has tres species communiter à Doctoribus recensetur *Simonia confidentialis*, quæ committitur circa beneficia Ecclesiastica, dum scilicet unus beneficium Ecclesiasticum alteri procurat, sive eligendo, sive præsentando, aut resignando, sed ex *confidentia*, id est pacto vel expresso, vel saltem tacito, ut alter vicissim illud beneficium procuratori aut tertio cuiuspiam resignet, vel certam pensionem ex eodem beneficio præstet. Verum hæc species commodè reduci potest ad illas tres mox recensitas; vel enim talis procuratio fit cum solo animo confidentiæ &c. & dici potest Simonia mentalis, vel fit cum pacto

quidem , sed ab una parte duntaxat adimpleto , & dicitur Simonia conventionalis : vel denique facta supponitur cum pacto ex parte utriusque jamiam adimpleto ; & dicitur Simonia confidentialis realis , ut bene advertit Henno *tr. in decalog. disp. 1. q. 5. art. 3. §. 2. concl. 2.*

§93. Porro Simonia ut sic solet communissime dividi in eam , quæ est *contra jus naturale & divinum*, & in illam , quæ est *contra jus humanum duntaxat*. Prior incurritur , dum res purè spiritualis pretio temporali emitur aut venditur : & hæc velut intrinsecè mala nullam prorsus admittit dispensationem , neque ulla consuetudine contraria reddi potest licita.

Posterior committitur , quando non datur quidem temporale pro spirituali aut vicissim , sed dum res una spiritualis vel huic annexa commutatur sine autoritate legitima cum alia spirituali , v. g. beneficium cum beneficio : vel res temporalis quidem , specialiter tamen ex motivo & virtute Religionis vendi prohibita ab Ecclesia datur pro temporali , ut si officium Ecclesiasticum extrinsecè duntaxat ad res Sacras Ordinatum , utputa Sacristæ , Thesaurarii , Oeconomi , Advocati Ecclesiæ &c. vendatur pro pecuniis &c. aliæ plures species hujus Simonix contra jus humanum possunt videri apud Babenstuber *tr. 5. disp. 2. art. 5. n. 38.* Herincx & alios.

¶ jam

¶ jam ad alteram partem ejusdem quæ-594  
 siti. Simonia ex suo genere est peccatum  
 mortale, ita ut ob parvitatem materiæ præ-  
 cise nunquam possit fieri veniale tantum.  
 Ratio prioris (cui Doctores communissime  
 subscribunt) colligitur tum ex illo *Act. 8.*  
 ubi D. Petrus Simoni Mago dixisse fertur :  
*pecunia tua tecum sit in perditionem.* Unde  
 & Sacri Canones passim graviter invehun-  
 tur in hoc vitium, dum illud appellant  
*execrabile vitium, piaculare flagitium, turpissi-  
 mum lucrum, simoniacam pestem, hæresin* &c.  
 uti videre licet ex c. *Reperiuntur* & c. *Qui-  
 cunque ac seqq. 1. q. 1.* item c. *Patet. 1. q. 7.*  
 & c. *Per tuas. de Simonia.* & alibi. Ex  
 quibus verbis quisque prudentum facile  
 colliget gravitatem hujus delicti. Ratio  
 autem posterioris (quam contra nonnullos  
 tenent Sylvius, Henno *cit. q. 5. art. 3. §. 1.*  
*conclus. 2.*) inde deducitur; nam levitas ma-  
 teriæ in hoc vitio peti non potest ex parte  
 pretii; quò enim vilius pretium datur, eo  
 magis vilipenditur res spiritualis, & irreve-  
 rentiæ culpa aggravatur. Neque etiam peti  
 valet ex parte rei sacræ seu spiritualis; hæc  
 enim, quantumvis modica, supponitur verè  
 spiritualis, & hoc ipsò toto genere supe-  
 rior quavis re profana seu temporali: at  
 hoc ipsò sit ei gravis injuria, dum pro re  
 temporali distrahitur: ergo &c. Atque  
 hinc rectè infert Henno *loc. cit. in fin.* eos

graviter peccare, qui Agnus Dei, Scapularia, Chordas, panem & alia ejusmodi benedicta carius vendunt propter benedictionem,

Quæres 3tio, an condemnandus sit simoniacus, qui dat aliquid temporale ex motivo quidem obtinendi spirituale (aut vice versa) at sine obligatione interveniente?

595. R. Quisquis alteri dat temporale quodcumque, sive per modum motivi, quô scilicet alterum movere vult, ut hujus intuitu sibi retribuat spirituale quid; sive per modum finis, aut pretii, modò detur animò alterum obligandi ad conferendum sibi aliquid spirituale, verè committit Simoniam. Ita hodie communissimè DD. Henno loc. cit. §. 3. conclus. un. de la Croix lib. 3. p. 1. n. 73. Babenstuber tr. 5. disp. 2. art. 5. n. 33. Pichler in Compend. Jur. Can. l. 5. tit. 3. n. 11. & 12. Cardenas & Viva ad proposit. 45. & 46. ab Innocent. XI. damnatas: idque liquet ex tenore propositionum quarum prior num. 45. ita sonat: *dare temporale pro spirituali non est Simonia, quando temporale non datur tanquam pretium, sed duntaxat tanquam motivum conferendi, vel efficiendi spirituale, vel etiam quando temporale sit solum gratuita compensatio pro spirituali, aut è contra.*

Posterior num. 46. ita habet: *Et id quoque locum habet, etiamsi temporale sit principale*

*capale motivum dandi spirituale; immò etiam si sit finis ipsius rei spiritualis, sic, ut illud pluris æstimetur, quàm res spiritualis. Ratio verò est: quia temporale aliquid dare ut motivum conferendi aut obtinendi spirituale, involvit pactum vel inchoatum, vel virtuale & tacitum, quo alter ad dandum spirituale obligetur. Similiter dare temporale ut finem rei spiritualis, est virtualiter saltem pacisci, & intendere temporale tanquam pretium, æquè vel pluris æstimatum, quàm spirituale: quod procul dubio culpa turpissimæ Simonix, & gravis erga res divinas injuriæ non vacat.*

Sed quid, ais, si temporale detur duntaxat per modum gratuitæ compensationis, eritne Simonia?

¶ Si hæc obligatio dandi temporale § 96. deducatur in pactum onerosum sub quocunque demum prætextu v. g. hoc aut simili modo: *si mihi contuleris hoc beneficium, obligo me ad dandos tibi ex gratitudine 100. aureos: aut dabo tibi liberaliter, amicitia causâ &c. beneficium, si te obliges ad dandos mihi liberaliter vel amicitia causâ 100. aureos. Vel si quis dicat: obligo me ad dandos 100. dugatos, non velut pretium, sed veluti motivum, ut hanc gratiam mihi recompenses, conferendo beneficium Ecclesiasticum. &c. &c. in his inquam & similibus casibus revera committitur Simonia. Ita Suarez,*

Laymann, Illfung tr. 5. disp. 3. num. 303.  
 Viva ubi *suprà* n. 2. de la Croix l. 3. p. 1.  
 n. 70. Ratio est: quia tametsi hujusmodi  
 contractus dicantur, vel potius simulentur  
 fieri ex sola gratitudinè vel liberalitate aut  
 amicitia &c. exercitè tamen & in rei veri-  
 tate vi horum imponitur obligatio nova  
 ad aliquid determinatè præstandum, & qui-  
 dem distincta à debito gratitudinis, utpote  
 quæ ex se nunquam obligat ad aliquid de-  
 terminatum. Quò fit, ut talis conventio  
 vel donatio non sit merè liberalis vel gra-  
 tuita, sed potius lusus & abusus termino-  
 rum, quò vitium Simonix palliatur:  
 quemadmodum si diceres Titio: *dono tibi*  
*Equum sub conditione, si mihi vicissim ex gra-*  
*titudine, amicitia causâ, vel liberalitate velis*  
*donare 100. florenos*, revera non donares,  
 sed venderes Equum. Ex quo liquet,  
 quàm meritò Innocentius XI. damnaverit  
 propositionem illam n. 45. proximè recen-  
 sitam in terminis.

Quæres 4tò, an ergo nunquam fas sit  
 pro spiritali aliquid temporale recipere,  
 aut exigere?

597. R. 1. Nunquam fas est aliquid recipere  
 aut exigere per modum pretii, motivi aut  
 debiti pro ipso bono spiritali; benè ta-  
 men 2. intuitu ejusdam boni spiritalis  
 præstiti aut præstandi v.g. administrandi  
 Sacramenti &c, licet aliquid recipere aut  
 exige-

exigere velut stipendium ad honestam & congruam sustentationem necessarium. Ratio prioris jam constat ex dictis n. 595. & 596. Ratio autem posterioris desumitur tum ex Scriptura Sacra 1. Cor. 9. ubi habetur : *qui in Sacratio operantur , quæ de Sacratio sunt, edunt : & qui altari deserviunt, cum altari participant ;* tum ex universali praxi Ecclesiæ ; tum denique ex ratione : quemadmodum enim nemo tenetur stipendiis suis militare, ita nec stipendiis suis sese sustentare , & totum se quasi impendere in obsequium alterius, Et his rationibus vel hoc titulô Pastores pro administratione Sacramentorum , pro exequiis, celebratione Missarum &c. Item Canonici pro præsentia in Choro , aliisque officiis divinis. Nec non Religiosi pro suis orationibus temporalia accipiunt , non velut pretium rei spiritualis, sed velut stipendium sustentationi ( quam quivis ipso suo labore exigere potest , etsi aliunde habeat , quô se sustentare posset ) necessarium. Videantur de hoc Pichler *ubi supra* n. 4. Reiffenstuel l. 5. decret. tit. 3. §. 10. n. 186. vel Henno in *decalog. disp.* 1. q. 5. art. 3. §. 5. per totum.

Quæres 2to , an nunquam liceat aliquid exigere vel recipere pro te temporali , annexa tamen rei spirituali ?

Ante

598. Ante responsionem notandum hic venit, triplici modo aliquid de se temporale posse annexi rei spirituali. 1. *antecedenter*, 2. *concomitanter*, & 3. *consequenter*. Antecedenter connexa dicitur, quando res temporalis præsupponitur & ordinatur ad aliquid spirituale: hoc modo Ecclesiæ, calices, patenæ, aliæque vasa sacra & paramenta Ecclesiastica ordinantur ad rem divinam peragendam, item Rosaria ad preces, jus præsentandi vel elegendi &c. ad beneficia & dignitates Ecclesiasticas &c. Concomitanter connexæ dicuntur, quæ ex intrinseca exigentia vel necessitate concurrere debent ad rem spirituales, ut labor corporis, & omnis actio, sine qua functio sacra spiritualis exerceri non valet, veluti est ablutio ad baptismum, consecratio seu oblatio ad SS. Missæ Sacrificium &c. Consequenter tandem connexa appellantur, quando aliquid temporale velut effectus præsupponit causam spirituales: hoc modo decimæ & beneficia Ecclesiastica, vel potius jus decimandi & fructus temporales percipendi de se sunt aliquid temporale: quia tamen supponunt officium spirituale (nam beneficium & fructus dantur propter officium) hinc dicuntur rei spirituali (officio scilicet) consequenter annexa. His bene perceptis & notatis

¶. ad



¶ ad quæsitum. Non licet aliquid ex- 599.  
gere aut recipere pro re temporali, rei spiri-  
tuali annexa concomitanter vel consequen-  
ter, quamdiu hæc connexio manet: immò  
verò ne quidem pro re antecedenter conne-  
xa licet aliquid accipere, si res temporalis  
cum spirituali in concreto sumatur, id est,  
ut connexa cum spirituali. Ita ex *communi*  
*DD.* tradit R. P. Pichler in *Compend. Juris*  
*Can. lib. 5. tit. 3. n. 5.*

Ratio est: quia quæ concomitanter vel  
consequentur connexa sunt rei spirituali,  
censentur res spirituales vel spiritualizatæ:  
immò & antecedenter connexa in concreto  
& in sensu composito sumpta, pertinent ad  
ordinem supernaturalem, propterea que ap-  
pellari solent *Sacramentalia pèrmanentia*: at-  
qui pro re spirituali nequaquam fas est re-  
cipere aliquid temporale per modum pretii  
æquivalentis: ergo &c. Hac de causa *Can.*  
*si quis objecerit. 7. caus. 1. q. 3.* dicitur quis-  
quis horum alterum vendit, sine quo nec alto-  
rum provenit ( uti est Ecclesia, vel jus deci-  
mandi &c. ) neutrum invenditum relinquit,  
moxque subditur: *nullus ergo emat Eccle-*  
*siam, vel prabendam, vel aliquid Ecclesiasti-*  
*cum.* Quin etiam *Jus Civile Instit. §. 8. &*  
*l. 6. §. 2. ff. de Rer. divis.* item *l. 83. §. 5. ff.*  
*de V. O.* Res sacras extra humanum com-  
mercium ponit, Dixi tamen, *nefas esse pro*  
*re antecedenter connexa in concreto, seu in sen-*  
*su*

*su composito sumpta, &c.* aliquid temporale exigere aut recipere &c. Unde

600. R. jam ad idem quæsitum 2dò. Res temporales antecedenter connexæ cuidam rei spirituali, id est, res consecrata vel benedicta in abstracto sumptæ, præcisè quoad materiam vel formam artificiosam, quam habuerunt ante omnem consecrationem vel benedictionem, licitè vendi possunt modò propter ipsam benedictionem, consecrationem vel ordinem, quem habent ad rem spirituales, pretium non augeatur. Ita cum S. Thoma 2. 2. q. 100. art. 4. Suarezio & *communi Theolog. ac Recent. Canon.* P. Pichler in *Compend. J. C. l. 5. tit. 3. n. 6.* Ratio est, quia antecedenter connexa de se habent valorem intrinsicum pretio æstimabilem quantum ad materiam & formam, quem valorem non amittunt ex eò, quòd consecrentur: neque etiam iste valor intrinsicus ita connexus est consecrationi, quin in morali hominum existimatione possit separari, ita, ut pretium non postuletur, neque etiam detur pro consecratione vel benedictione: Unde etiam continua praxi ac consuetudine, à nemine quantum scio improbata, passim videmus, numismata, imagines cereas, & rosaria benedicta vendi, nempe secundum materiam, labore, cura periculo itineris &c. sine quibus comparari vel asportari non potuissent, in pretium com-

computatis &c. Et certè contrarium nulli persuadebitur pro praxi, eò præsertim, quòd hæc praxis ab Ecclesia nunquam legatur reprobata.

Dices: Res temporales spiritualibus consequenter annexæ, uti sunt jus decimandi &c. vendi non possunt sine nota Simonix: ergo neque res antecederenter annexæ.

R. *Neg. conseq. & paritatem*: res enim <sup>601.</sup> *consequenter connexa* cum spiritualibus, v. g. beneficium Ecclesiasticum seu jus decimandi connexum officio &c. non supponunt aliquid pretio æstimabile, sicuti supponunt eæ, quæ sunt *antecederenter connexa*: Rursus ea, quæ spiritualibus consequenter sunt annexa, ipsis connectuntur, veluti quid accessorium principali, unde etiam auctoritate hominis privati talis connexio tolli non valet: è contra in antecederenter annexis temporale præsupponitur tanquam principale & pretio æstimabile, cui spirituale connectitur, velut quid accessorium, & in morali hominum existimatione, quotidiana praxi confirmata, separabile.

Quæres 6tò, an absque nota Simonix <sup>602.</sup> possit à Novitio vel Candidato aliquid postulari pro ingressu in Religionem?

R. Pro ipso ingressu in Religionem, id est, pro admissione in novitiatum, aut ad professionem religiosam absque Simonia nihil potest prætendi: nihilominus potest Mona-

Monasterium quantumvis dives recipere id, quod à Novitio ejusvè Parentibus gratis sibi offertur: immò quodvis Monasterium, præsertim inops, absque Simonix nota potest aliquid temporale prætere ab ingressuro titulò sustentationis, vel legitimæ, vel titulò dotis respectu Novitiæ. Ratio prioris ab omnibus recepti est: quia ingressus in Novitiatum ordinatur ad aliquid supernaturale, scilicet ad professionem ipsam, & ad servitium Deo exhibendum, &c. atqui pro re spirituali & supernaturali nil potest præteriri absque nota Simonix: ergo &c. Ratio autem posterioris est: quia onus sustentandi personam Religiosam, eidemque de omnibus necessariis providendi, est aliquid temporale, non spirituale, quemadmodum onus sustentandi uxorem vel liberos in matrimonio: ergo si pro hoc onere de jure potest præteriri dos vel legitima, &c. à sponsa; poterit pariter præteriri à Monasterio, præsertim inope vel non adeò divite, ut Novitius aut Novitia, ceu sponsa Christi, eandem conferat, &c. Ita cum Navarro, Sanchezio, Castropalao, & aliis, Babenstuber *tr. 5. disp. 2. art. 5. n. 34.* Salmanticenses *tom. 4. tr. 19. c. 2. pu. 4. n. 53.*

603. Dixi: à Monasterio, præsertim inope, præteriri posse &c. Communiter enim advertunt Doctores, quòd, tametsi in similibus casibus à Monasterio etiam bene

bene fundatis fortassis juxta probabiliorem sententiam evitetur labes Simoniae; nihilominus nonnunquam, & fortassis sæpius, quàm par est, à Monasteriis bene fundatis contrahatur turpis avaritiæ labes, si adeò fordidè inhient temporalibus, & ab ingressuris tam sollicitè amplas pasciscantur dotes, magis attendentes ad pecunias, quàm ad habilitatem personarum, immò pauperes, quantumvis talentis ac moribus bonis ditatos, omnino excludentes, eò quòd *dativo* careant, aut non videantur vocati aut vocatæ ad Religionem Spiritu *Columbae*, cujus *penna deargentata*, & *posteriora Ejus in pallore auri*. Videatur de hoc D. Bonaventura in *Apologia contra eos, qui Ordini Minorum adversantur* q. 18.

Quæres 7<sup>imò</sup>, an etiam summus Pontifex, & quinam alii incurrere possint Simoniae turpissimam labem?

¶ Summus Pontifex potest incurrere labem Simoniae contra jus naturale & divinum, non item contra jus humanum. Ratio hujus est: quia etiam Summus Pontifex subest legi naturali ac divino: ergo in has potest impingere. Juri autem humano seu Pontificio ceu Legislator non stringitur quoad vim directivam, nisi indirectè, veluti diximus in *tract. pralim. conf. 13. u. 352*. ergo Simoniam juri humano præcisè adversantem non contrahit, esto etiam quoad *R. P. Elbel. Pars II. de Fide &c. Y y* hoc

604.

hoc possit esse scandalo præsertim pusillis, Cæterum alii Prælati Summo Pontifice inferiores, utputa, Cardinales, Patriarchæ, Archi-Episcopi & Episcopi possunt incur-  
 rere labem Simonix, nedum contra jus naturale & divinum, sed etiam contra jus humanum, utpote cui pariter substant obligati secundum dicta *loc. cit. n. 355*. Et ratio est: quia hi vel maximè possunt dare & accipere spiritualia: ex altera verò parte non vacant passionibus & affectibus sinistris, quibus appeti solet pretium Simoniacum, proindeque nedum labem Simonix possunt incurrere, verum etiam pœnas contra Simoniacos statutas jure humano, uti bene advertit Filliucius *tr. 45. c. 12. n. 1. & 6*.

## §. II.

Proponuntur, & breviter resolvuntur casus practici circa Simoniam.

### CASUS PRIMUS.

**T**ltius Presbyter cuidam Comiti multis annis existit à servitiis sub spe assequenda quondam promotionis: dum verò nuper vacasset quadam pinguis Parochia: lucrandum sibi existimavit animum Comitissæ prius, quàm lucraretur beneficium anhelatum: accessit proin-  
*Ean.*

Eandem allegatis servitiis meritisque suis jam à longo tempore collectis, humiliter rogando, dignaretur apud Comitem ( cui jus præsentandi competiit ) intercedere , quatenus se potius ( Titium scilicet ) quam alium vellet præsentare. Comitissa auri cupida illico respondit: *Mi chare domine, jam plures sese insinuârunt apud me, è quibus unus promisit, se fore perpetuò gratum, alter centum taleros, tertius omnino centum dugatos mihi sponpondit: talium supplicationes velut magis ponderosa tam facile sperni non possunt nec debent. Cui Titius: jam video, ajebat, quòd sine auri pondere nec supplica quidquam valeat, neque merita: ergo & ego pro intercessione spondeo centum dugatos: procul dubio hi conjuncti meis meritis & obsequiis tanto tempore fideliter præstitis præponderabunt. Jam ad hanc speciem facti dubitare licet* 1. *an Titius sine nota Simonia potuerit servire Comiti, sub spe obtinendi ab eo aliquod beneficium, & in hunc finem postea sua merita allegare?* 2. *An ille, qui promisit, se perpetuò gratum fore non incurrerit Simoniam? An Titius & reliqui duo promittendo Comitissæ, pro intercessione argenti vel auri pondus non inciderint vitium Simonia?*

¶ ad primum quæsitum hujus casus. 605.  
Titius nullam commisit Simoniam ex eo, quòd præcisè sub spe ( ut fertur in casu ) serviverit Comiti. Ratio est, quia in hoc nullum intervenit pactum dandi vel obtinendi spi-

rituale pro temporali; nam spes nullum prorsus tribuit jus, immò sæpiùs, quàm forsitan par est, solet tales confundere. Neque etiam ex eo arguendus est alicujus Simoniam, quòd supplicando sua allegaverit merita; conveniens quippe est, ut ad beneficia Ecclesiastica præsententur & promoveantur illi, qui sunt magis digni: atqui merita præsertim spiritualia vel obsequia, quæ Titius tanto tempore Comiti præstitisse dicitur, eundem, cæteris saltem paribus, reddidère magis dignum: ergo hæc potuit justè allegare; id, quod & praxis receptissima confirmat, præsertim in concursibus, in quibus major dignitas non ex sola doctrina, sed & ex aliis etiam meritis in cura animarum collectis, solet attendi. Videatur de hoc Schmalzgrueber *lib. 5. tit. 3. n. 53. & seqq.* Reiffenstuel eodem *tit. à n. 89, & 105.* vel Pontas in *thesauro casuum, v. Simonia, casu. 11.*

606. R. ad 2dum, illum, qui promisit se perpetuò fore gratum pro intercessione, vel potius pro beneficio, nullam commisisse Simoniam, modò non antecederet sese obligaverit ad aliquid determinatè præstandum v. g. ad certam summam vel pensionem annuatim solvendam. Ratio est: quia ex hac suppositione nullum intervenit pactum, neque ulla intentio dandi temporale pro spirituali, sed solum monstrandi gratitudi-



tudinem de jure naturæ cuivis benefactori debitam. Fatendum nihilominus est, hujusmodi promissiones esse valde periculosas, eò quòd hoc tempore jamjam videatur invaluisse praxis, quòd ii, qui beneficia conferunt, per hujusmodi verba soleant concipere ac intelligere aliquam particularem obligationem in ordine ad recipiendum aliquid temporale: hac de causa illi, qui nihil tribuunt, communiter audiunt *ingrati*, &c. Quare non sine fundamento Cardenas in *crisi theolog. diff. 27. n. 67.* & alii plures Doctores existimant, per hæc verba: *Ego ero gratus* (scilicet pro beneficio Ecclesiastico) secundum modernam praxin committi veram Simoniam; quod & ego frequentius quidem, non tamen universaliter verificari existimo, & bene ponderandum relinquo illis, quorum interest, utpote e quorum intentione & animo hæc res multum dependet, prout hæctenus dicta pensanti patebit facile.

¶ jam ad 3tium quæsitum ejusdem casus. 607.  
Si Titius & alii duo supplicantes supponantur obtulisse argentum vel aurum pro sola intercessione aut favore Comitissæ impetrando &c, probabiliter excusari possent à vitio Simonix, Ita enim tenent multi DD. apud Dianam *part. 4. tr. 4. Resolut. 151.*

Ratio est: quia favor vel intercessio Comitissæ est quid merum temporale, & qui-

Y y 3

dem

dem pretio æstimabile : atqui, ubi datur temporale quid pro alio temporali præcisè, Simonia locum non habet, veluti constat ex dictis suprâ n. 591. Et liquet à pari; nam si Titius ab aliquo Advocato postulasset sibi fieri libellum supplicem Comiti porrigendum, eidemque solvisset mercedem debitam pro labore suscepto, in concipiendo vel etiam describendo libello, profectò propterea nemo condemnaret Titium alicujus Simonie : ergo probabiliter nec condemnari potest ex eo, quòd ( ut supponitur ) pro solo favore vel intercessione Comitissæ aurum obtulerit. Dixi: *probabiliter nec potest &c.*

608. Nam practicè loquendo longè verosimilius videtur, quòd huiusmodi offerentes committant veram Simoniam: enimverò per oblationem auri non ita præcisivè & speculativè intendunt solum favorem vel solam intercessionem, quin simul, & principaliter quidem, intendant impetrare beneficium, mediante oblatione; quod vel inde haud obscurè colligere fas est; quia pro solo favore, vel pro sola intercessione nunquam omnino darent vel dedissent tantam summam. Et certè, si Titius ( vel quisque alius ) Comiti obtulisset centum dugatos, simulque rogando postulasset illud beneficium sibi conferri, incurrisset Simoniam ex cap. tua nos. 34. de Simon. &c. *Et si quaestiones 18. eod. tit. idque propterea,*  
quia

quia prudenter præsumeretur , per oblationem hanc , velut motivum quoddam , principaliter intendisse beneficium : ergo id ipsum dicendum videtur , si oblato auri pondere supplicavit pro se per Comitissam. Neque dubitandum , quin & ipsa Comitissa velut auri cupida , summam hanc magis intuitu beneficii , quàm intercessionis suæ , intenderit. Unde Reiffenstuel *lib. 5. decret. tit. 3. §. 7. n. 122. & seqq.* Filliuc *tr. 45. c. 9. n. 17.* De-la Croix *l. 3. part. 1. n. 90.* Henno *tr. in decalog. disp. 1. q. 5. art. 3. §. 1.* Pichler in *Compènd. Jur. Can. l. 5. tit. n. 9.* referens S. Thomam *2. 2. q. 10. art. 2. ad 5.* absolute asserunt , in hoc casu committi Simoniam , eò quòd per pecuniam paretur via ad obtinendum spirituale &c. &c.

## CASUS SECUNDUS.

**S** Empronius jam pridem ambiêrat quendam *Canonicatum Ecclesiasticum* , at nescio quò fato ab aliis semper præventus finem suum assequi hætenus nunquam potuit : novissimè verò , dum quadam apertura ( uti vocant ) sese monstrasset , alium quendam corrivalem , ne rursus ab eodem præveniretur , pecuniis corrumpit , quatenus hac vice desisteret à postulatione beneficii unà simul adpromittens se in proxima apertura fideliter laboraturum , ut & ille *Canonicatum* assequeretur : tum verò ad *Patronum* vel

Collatorem sese conferens & jocum simulans, eundem allocutus fuit sequentibus verbis : jam à longo tempore Dominationem suam sollicitavi, & insuper Deos, Deasque imploravi pro impetrando Canoniatu, ast nunquam non sine effectu : hodie denuo supplex venio ; sed quid valeat ? spondeo centum dugatos, me iterum seroventurum, vel potius prateritum iri. Cui Collator : valeat, inquebat : si hac vice te prateriero, solvam tibi 100, : sin minus, tu mihi totidem prastabis : mox verò altera die Sempronio Canoniatum obtulit, à quo & 100. dugatos obtinuit. Quaritur jam 1. an Sempronius non commiserit Simoniam ex eo, quòd alterum competitorem pecuniis corruperit, ut à prætensione ejusdem beneficii abstineret ? 2. An non ex eo, quòd adpromiserit, se ad proximam vacaturam pro eodem laboraturum ? 3tiò denique an Simonia arguendus non sit ex eo, quòd sponderit, vel spondendo certaverit 100. dugatis ?

609. R. ad primum quæsitum, Sempronium non commisisse Simoniam ex eò, quòd competitorem corruperit pecuniis, quatenus is abstineret à prætensione ejusdem beneficii. Ratio est : quia hæc abstinentia, seu etiam dissimulatio à postulatione beneficii non erat quid spirituale : ergo pro hac sine nota Simonia potuit offerre aliquid temporale : neque dici valet propterea, quòd Sempronius hanc pecuniam expenderit

derit pro beneficio, vel pro hujus collatione; tum quia nec beneficium, neque hujus collatio ullatenus fuit in potestate competitoris; tum præsertim quia ab hoc non postularit, ut positivè quovis demum modo sibi cooperetur ad obtinendum illud, sed solum ut negativè sese habendo nihil prorsus prætenderet hac vice: atqui hæc dissimulatio dici nequit aliquid spirituale: ergo Sempronius dando pro hac pecuniam non incidit Simoniam,

¶. ad 2dum, Sempronium nec condemnandum esse Simonia ex eo, quòd Competitori adpromiserit, se ad proximam vacaturam pro eodem laboraturum. Ratio est: quia talis labor non est quid spirituale, sed potius temporale, munus scilicet à lingua vel ab obsequio: ergo dici non potest, quòd pro illo labore competitoris obtulerit aliquid spirituale.

Secus dicendum foret, si Sempronius prævidisset, se obtento canonicatu ipsò facto obtenturum jus suffragandi, & in compensationem alteri suo corrivali obtulisset suum suffragium in proxima vacatura; quia cum hoc jus suffragandi & ipsum suffragium in ordine ad Canonicatum sit aliquid spirituale vel certè spirituali annexum, illud offerendo pro alio beneficio temporali commisisset Simoniam saltem juris humani, juxta communem DD. Vide Reiffenstuel *lib. 5. decret. tit. 3. §. 8. n. 135*:

Y y 5

¶. jam

611. R. jam ad 3tium, Sempronium vi spon-  
sionis commisisse Simoniam conventiona-  
lem, immò & realem post numeratam sal-  
tem pecuniam. Ita Arsdeckin tom. 2. part.  
2. tr. 5. c. 12. §. 2. q. 1. quem sequitur de  
La Croix l. 3. p. 1. n. 80. Ratio liquet ex  
dictis : quia per hanc sponsonem reipsa nil  
aliud intendit, nisi efficaciter præmovere  
animum Collatoris vel Patroni ad Canoni-  
catum sibi potius, quàm alteri conferendum :  
vel, ut apertius, loquar, nil aliud, quàm  
emere ipsum Canonicatum : atqui certum  
& exploratum esse debet : hoc fieri non pos-  
se absque nota Simonix, prout constare  
potest ex proximè dictis n. 608. nec aliun-  
de videtur ulla ratio excusandi Sempronium  
ab hac nota : ergo &c.

### CASUS TERTIUS.

**Q**uidam Princeps ad preces & instantissi-  
mam recommendationem cujusdam Do-  
micellæ Cajo contulit Parochiam satis pinguem;  
quod dum alius quidam è Ministris Ejusdem  
Principis inaudiisset, Cajo in faciem exprobra-  
vit, quòd præsumpserit aspirare ad hanc Pa-  
rochiam, cum non adeò pridem quoddam cri-  
men commiserit ( neglectum scilicet cujusdam  
animæ ) quo se vel omni, vel certò tanto be-  
neficio prorsus reddidit indignum : addidit in-  
super, se rem hanc non dissimulaturum &c.

Cajus

*Cajus hac exprobratione non minus confusus, quam stupefactus, ) crediderat enim, nulli mortalium quidpiam constare de illo neglectu ) rogavit Ministrum, nollet de hoc delicto Principi vel ulli alteri quidpiam manifestare, ut verò os Ejus penitus obturaret, obtulit Ei notabilem summam. Queritur jam 1. an Princeps ob recommendationem instantissimam conferendo Parochiam, non inciderit labem Simonie? 2. An Cajus ad se redimendum ab illa vexa absque nota Simonie potuerit obturare os Ministri, obtrudendo marsupium?*

*R. ad primum quæsitum cum distinctio. 612. ne, Vel enim Princeps supponitur præcisè attendisse ad preces & recommendationem Domicellæ, proptereaque Parochiam contulisse? vel hanc contulisse ob dignitatem Personæ, licet ad preces & instantiam Domicellæ? si illud prius S. Thomas censuit, talem condemnandum esse Simonie, eò quòd præcisè propter favorem humanum contulerit Spirituale beneficium. Si verò hoc posterius, immunis erit à labe Simonie. Ita sanè Doctor Angelicus 2. 2. q. 100. art. 5. ad 3tium, ubi ait: *munus à lingua dicitur vel ipsa laus pertinens ad favorem humanum, qui sub pretio cadit; vel etiam preces, ex quibus acquiritur favor humanus, vel contrarium evitatur, & ideo, si aliquis ad hoc principaliter intendit, Simoniam committit.* ) Videtur autem ad hoc principaliter inten-*

*intendere, qui preces pro indigno porrectas exaudit. Unde ipsum factum est Simoniacum. Si autem preces pro digno porrigantur, ipsum factum non est Simoniacum; quin subest debita causa, ex qua illi, pro quo preces porriguntur, spirituale aliquid confertur. Tamen potest esse Simonia in intentione, si non attendatur ad dignitatem personæ, sed ad favorem humanum. Hactenus sanctus Doctor.*

Fatendum nihilominus est, quòd si Princeps intuitu hujuscemodi intercessionis conferat beneficium Ecclesiasticum, at, sine omni pacto vel onere aliquid temporale vel sibi vel suis rependendi &c. labem Simonix non incurrat. Et ita hodie tenent Laymann *lib. 4. tr. 10. cap. 8. n. 26.* Navarrus, Lessius, Victor, Cajetanus, Suarez & alii plures ab eo relati. Ratio est; quia ad Simoniam non sufficit, dare rem spirituales ex motivo rei temporalis v. g. propter amicitiam, consanguinitatem, preces, obsequia &c. sed opus est, ut detur pro re temporali tanquam pro pretio, id est, in compensationem illius velut ex justitiæ obligatione: ergo si nullum intervenit pactum, Princeps potest excusari à labe Simonix, licet potuerit graviter peccare nedum contra justitiam legalem, sed & commutativam cum onere restitutionis, si supponatur hoc beneficium contulisse indigno cum damno Ecclesiæ.

Prius-



Priùs quàm ad 2dum quæsitum hujus 613.  
 Casus directè respondeam notandum præ-  
 mitto cum Filliucio *tr. 45. c. 11. Reiffen-*  
*stuel lib. 5. decret. tit. 3. §. 13. n. 308.*  
 vexationem aliam esse ac dīci justam, aliam  
 injustam, utpote contra jus & æquitatem  
 factam. Rursus aliam fieri posse ab eo,  
 qui ad beneficium spirituale nedum obesse  
 sed & prodesse potest, utputa eligendo, seu  
 iuffragando, præsentando, aut conferendo  
 &c. aliam ab eo, qui quidem obesse potest,  
 v. g. denigrando aut injustè diffamando,  
 minime autem prodesse, utpote destitutus  
 omni jure ad illud conferendum &c. De-  
 nique 3tio, alia dicitur vera, quā quis mo-  
 lestatur circa jus ad rem, seu circa benefi-  
 cium spirituale, ad quod solum habet *jus*  
*ad rem*, utputa quia electus fuit, sed non-  
 dum confirmatus; vel quia præsentatus,  
 sed collationem aut certè investituram non-  
 dum affecutus &c. alia dicitur vexa, qua quis  
 molestatur post plenum *jus in re* seu in be-  
 neficio per investituram jamiam adeptum.  
 Hòc notato.

¶ jam ad alterum quæsitum hujus ca- 614.  
 sus. Si Minister Principis supponitur fuisse  
 talis, qui in ordine ad collationem Paro-  
 chiæ, vel potiùs ad installationem: (nam  
 collatio supponitur jam facta) prodesse  
 nihil potuit, utpote jure destitutus ad hunc  
 effectum, tametsi multum per omnem  
 mo-

modum potuisset obesse &c. Cajus absque nota Simoniae potuit eidem obturare os mediante marsupio. Ratio est: quia in tali casu non datur pecunia pro re spiritali acquirenda, sed eo fine duntaxat, ne alter injustè diffamando Cajum vexet, aut vexam comminatum exequatur: at hoc cuiusvis licet, cum quilibet habeat jus quæsitum in libertate & fama sua, vi cujus iniuriam quoquo modo honesto à se repellere potest: ergo &c. &c. Suarez *de Simon* c. 50. n. 23. Palao *part. 3. tr. 17. disp. 3. pu. 20. n. 4.* Reiffenstuel *lib. 5. decret. tit. 3. §. 13. o. 310.*

615. Dixi: Si Minister Principis supponeretur fuisse talis, qui *prodesse non potuit, sed tantum obesse*; Secus enim dicendum foret, si etiam de jure prodesse potuisset ad illud, velut habens jus eligendi, præsentandi, conferendi, vel confirmandi, &c. &c. à tali enim probabilius non licet redimere vexam injustam. Ita D. Thom. 2. 2. q. 10. art. 2. *ad 5um.* Pirrhing *de simon. n. 109.* Suarez *loc. cit. n. 18.* Reiffenstuel *cit. n. 314.* Ratio est: quia dum quis pecuniam dat alteri, ne sibi in ordine ad beneficium votum, collationem aut confirmationem &c. etiam injustè neget, hoc ipso temporale porrigit, ut spirituale obtineat, vel certè ut obtineat votum &c. in ordine ad beneficium: hoc autem non caret vitio Simoniae. Et licet
- Palao

Palao *loc. cit. n. 4.* probabile existimet, ne quidem in hoc casu Simoniam committi; eò quòd pecunia non detur tanquam pretium electionis aut voti, vel confirmationis &c. sed solum ad satiandum vel extinguendum pravum affectum Electoris &c. Filliucius tamen *tr. 24. c. 11. n. 7.* probabilius censet, in tali casu labem Simonie non evitari, ob rationes proximè datas, idque satis clarè colligi putat ex *c. Matthæus. c. sicut. tuis & c. de hoc. de Simonia.*

Dices adhuc: sed quid si Minister Principis Cajo intentasset vexam post adeptum jam jus plenum per ipsam investituram?

R. Supposito semel pleno jure in re, seu 616.  
in beneficio Ecclesiastico, fas est mediante pecunia redimere vexam injustam à quocunque demum intentatam. Ita communiter DD. nominatim Navarrus *Manual. c. 23. n. 102.* Abbas in *c. dilectus.* Pirrhing. *l. cit. n. 105.* Palao *l. cit. n. 1.*

Ratio est: quia talis non dat pecuniam pro ipso beneficio vel pro jure ad illud, utpote quod supponitur, jam plenariè adeptus, sed solum pro redimenda vexa injusta: atqui injustam vexam redimere pecuniis, cuilibet licet; cùm hæc sit quid merum temporale: ergo &c. Ex quo Reiffenstuel *l. 5. cit. 3. §. 13. n. 309.* sapienter infert, immunem esse à Simonia illum, qui dat, vel præstat temporale alicui, ne se injustè vexet

vexet diffamando, accusando, vel talia proponendo, ob quæ collatio beneficii jam actu pleno jure adepti de jure haberetur nulla, vel eo privari posset.

### §. III.

## Corollaria ex dictis inferenda.

617. **C**olliges ex hætenus dictis primò, in ordine ad discernendum, an quis commiserit Simoniam præsertim mentalem, attendendum esse principaliter (saltem pro foro conscientie) quo fine quis dederit temporale bonum v. g. hoc horologium, hanc picturam vel quodvis aliud honorarium pretio æstimabile?

Nam si fateatur se illud dedisse principaliter eo fine, ut in hujus recompensationem seu pretium vel quasi pretium obtineret aliquid spirituale vel spirituali annexum secundum dicta n. 598. quibuscunque demum verbis, vel quovis pallio usus fuerit, utputæ gratitudinis, gratuite oblationis vel recompensationis &c. condemnandus erit Simonie: è contra verò, si in foro conscientie & coram Deo sese examinando reperiatur, se illud temporale ex alio motivo & fine, vel titulo dedisse principaliter, esto minùs principaliter, secundariò, & quasi per accidens inde speraverit aliquid spirituale; immò

mò etsi spes assequendi spirituale fuerit aliquo modo causa impulsiva & excitativa ad dandum illud temporale, non debet condemnari Simonix; quia non dedit temporale bonum pro spirituali velut pretium. Ita Reiffenstuel *loc. cit.* §. 5. n. 100. & 101. referens pro eadem opinione Navarrum *manual. c. 23. n. 101.*

Colliges 2dò, Clericos, qui pro com- 618.  
petenti salario serviunt Episcopis, Præpositis vel Patronis Beneficiorum Ecclesiasticorum &c. Item 2. Studiosos ac Pedagogos, qui pro competenti salario instruunt juventutem &c. 3. Nec non Religiosos aut Laicos quoscunque, qui principaliter ex charitate &c. 4tò demum omnes illos, qui pro nullo vel certè in competenti salario serviunt eo fine, ut hac occasione suam probitatem, studium vel dexteritatem demonstrent in effectu, & sese probent dignos altiori promotione, ideòque sub spe aliquando obtinendi quoddam beneficium, non esse condemnandos Simonix. Ratio est: tum quia non præstant temporale velut mercem rei spiritualis, neque illud spirituale bonum affectant velut pretium quoddam laborum vel obsequiorum suorum; tum etiam, quia minimè culpanda est intentio vel conatus, quo quis nititur sese probare dignum promotione aut beneficio, dando specimina suorum  
*R. P. Elbel, Pars II. de Fide &c. Zz tol-*

talentorum, aut virtutum: quin immò plurimùm interest Ecclesiæ nôsse, quinam sint verè digni ad talia munia Ecclesiastica: at, quod non est culpandum vel improbandum, pariter non est puniendum pœna in Simoniacos de jure lata: ergo &c. Videatur Reiffenstuel *loc. cit.* à n. 103. Sporer *tr. 2. in decalog. c. 10. sect. 4. n. 45.*

619. Colliges 3tiò, non esse condemnandos Simonia, qui dant temporale pro spiritali, aut vice versa spirituale pro temporali titulò solius gratitudinis. Ita *ex communi DD.* Suarez *tom. 1. de Relig. lib. 4. c. 45. n. 4* Laymann *l. 4. tr. 10. c. 8, n. 8.* Ratio est: quia, quod præstatur gratuitò, non præstatur velut pretium, sed potius opponitur pretio. Insuper honestum ac laudabile est pro accepto beneficio vel obsequio honestò se gratum exhibere. Unde Episcopus vel Patronus conferentes beneficium Clerico in recognitionem obsequiorum &c. culpandi non sunt, neque Simonia, condemnandi. Immò & Capellanum Episcopo gratis & absque stipendio servientem; ut illum sibi reddat obligatum ex titulo gratitudinis, non tamen ex pacto, ad sibi conferendum beneficium Ecclesiasticum, à labe Simonia absolvendum censet Illung, *tr. 5. disp. 3. n. 303.* idque tametsi intentionem & spem suam supponatur Episcopo insinuasse.

Col.

Colliges 4to, absque vitio Simoniaë temporale emolumentum seu pretium recipi, immò & exigi posse à Doctoribus pro Doctrina Theologiae Scholasticae vel moralis, item 2. pro responso aut consilio nedum juridico, sed etiam morali. Ita Valentia tom. 3. disp. 6. q. 16. pu. 2. Illung. cit. n. 307. & 308, Laymann lib. 4. tr. 10. c. ult. n. 30. & 32. Ratio prioris est: quia instructio Theologica, esto de rebus supernaturalibus tractet, non tamen ordinatur ad felicitatem supernaturalem, sed potius ab instructore ordinatur ad illuminandum intellectum.

Nec refert, quòd forsàn discipulus vel Doctor aliquis ex privato affectu hanc suam doctrinam, aut studium ordinent ad finem altiorem; quia hæc particularis ordinatio non extrahit doctrinam ab ordine materiae pretio æstimabilis. Et dato etiam hoc, quòd non posset aliquid pro ipsa doctrina exigi per modum pretii: posset tamen à Doctore aliquid exigi per modum stipendii ad congruam sustentationem Ejusdem necessarii: quemadmodum Ministri Ecclesiæ ex eodem titulo possunt exigere congruum stipendium pro administratione Sacramentorum, vel Verbi divini. Ratio autem posterioris est: quia ejusmodi responsum nil est aliud, quàm quædam doctrinalis & doctoralis instructio, licet per

accidens conducat petentibus ad tranquillitatem conscientiae & affecurationem salutis &c. atqui pro tali instructione petere competens salarium, prorsus non apparet inhonestum aut Simoniacum, praesertim cum sine multo labore hujusmodi responsa saepe dari non possint : ergo &c.

621. Colliges 510, nedum Clericos saeculares, sed etiam Religiosos tam Superiores, quam subditos (quibus id nullo jure aut statuto particulari fuit interdictum, ut supponi debet) absque labe Simoniae posse pro Missis legendis aliquid exigere, & pacisci de stipendio congruo, haud equidem ut illud detur per modum pretii ob ipso SS. Missae Sacrificio, vel pro fructibus ejusdem, utpote inestimabilibus, aut pro labore intrinseco, utpote merum Spirituali, secundum dicta superius, sed praecise per modum stipendii vel justae sustentationis sibi debitae, esto hanc aliunde ex propriis mediis sibi procurare possent. Ita receptissima DD. opinio in sacris paginis fundata; *Dignus est enim operarius mercede sua Luc. 10. v. 7. & ad 1. Cor. 9. v. 7. quis militat suis stipendiis unquam? quis plantavit vineam, & de fructibus ejus non edit? quis pascit gregem, & de lacte gregis non manducat?* Similia habentur *can. Ex his 22. caus. 12. q. 1.* Et ratio est: quia ea, quae alicui de jure naturae debentur, non solum licite recipiuntur, sed etiam



etiam velut de jure debita exiguntur : atqui administrantibus spiritualia de jure naturæ debentur temporalia ad congruam sustentationem necessaria, ut patet ex textibus mox allegatis : ergo hæc etiam vi pacti possunt exigi ab iis, quibus spiritualia ministrantur. Videatur Laymann *ubi supra* §. 2. n. 15. vel Palao *de Simonia pu.* 4. n. 4.

Colliges 6tò, etiam à Religiosis in electionibus ad beneficia vel officia Ecclesiastica committi posse Simoniam; nam si unus Religiosus promittat alteri, quòd velit illum promovere ad prioratum, vel ad aliud quoddam beneficium curatum sub conditione & onere quasi, ut sibi suffragetur in ordine ad obtinendam Prælaturam, Præposituram, vel aliam dignitatem Ecclesiasticam, & iste propterea suum illi det suffragium, revera uterque incurrit Simoniam. Ita *ex communi DD.* Henno *ubi supra* §. 6. in *Respons. ad petes 4tò.* Ratio est: quia hoc modo votum non datur gratis, neque gratis obtinetur illud officium Ecclesiasticum : ergo committitur Simonia saltem juris Ecclesiastici : & si talis Prælatus promississet pecuniam, vel aliud emolumentum temporale, etiam incidisset Simoniam juris naturalis prout præter alios rectè docet R. D. de Nicollis *in sua Praxi Canon. V. Simonia* n. 33. Quod verò hic de Religio-

ligiosis dictum, idipsum intelliges velim de Canonicis sibi met sub præfato onere suffragantibus. Atque hinc non sine causa Reiffenstuel *lib. 5. decret. tit. 3. §. 8. n. 137.* scribit, revera multas electiones Episcoporum &c. esse ac fuisse nullas; quia plus quam certum est in hujusmodi electionibus intervenire similes conventiones ac promissiones, quibus vel temporale datur pro spirituali, vel spirituale pro spirituali adpromittitur; atqui in priori committitur Simonia juris naturalis, in posteriori verò Simonia juris Ecclesiastici cum nullitate actus, velut patet ex hæcenus dictis: ergo &c. Videatur Pirhing *lib. 5. decret. tit. 3. n. 87.* vel de la Croix *lib. 3. part. 1. n. 113.*

Sed quid, inquires, si uterque, vel alteruter saltem solum fictè promittat, ita, ut talis Abbas v. g. post suam electionem non promoveat alium, asserens, se non habuisse animum serium promittendi aut se obligandi ad talem promissionem?

623. R. Probabilius adhuc committi Simoniam. Ita Pontas *in dictionar. Casuum V. Simonia Cas. V.* citans S. Thomam 2. 2. q. 100. Idipsum tenet Pichler *in compend. Juris Can. l. 5. tit. 3. n. 13.* saltem in casu, quo alteruter seriò se obligavit. Ratio est: quia per talem promissionem quantumvis fictam Abbas supponitur procurasse & obtinuisse.

tinuisse suam dignitatem Ecclesiasticam, esto ex parte sua promissionem non adimpleat. eò quòd dicat, se non habuisse serium animum promittendi, de qua fìctione, cùm in foro fori nihil prorsus constet, procul dubio in eodem foro haberetur pro Simoniacò. Et certum omnino videtur, quòd etiam fìctè promittens habuerit animum obtinendi illam dignitatem per promissionem promotionis &c. immò vi hujus actus eam obtinuerit: atqui ad incurrendam labem Simoniae sufficit, per aliquid temporale velut causam ac motivum pertingere ad spirituale, neque opus est, ut opere ipso præstetur illud temporale. Nihilominus arbitror pro foro conscientiae mitius posse procedi cum tali poenitente; tum quia multi etiam graves Doctores tenent, per fìctam duntaxat promissionem non incurrì Simoniam; quemadmodum, per fìctam promissionem matrimonii non contrahuntur vera sponsalia; tum etiam, quia in hoc casu Simonia conventionalis mixta quidem supponitur, nondum tamen completa ex altera saltem parte: atqui propter Simoniam conventionalem mixtam, veluti mox dicetur *n. 627. & seqq.* ergo pro foro interno saltem mitius procedi potest ac debet.



# CONFERENTIA VIGESIMA

De

Pœnis Simoniacorum, & de  
Onere Restitutionis inde-con-  
tracto.

## S U M M A R I U M.

- 624. Tres duntaxat species Simonix à jure per-  
stringuntur pœnis canonicis.
- 625. Referuntur pœnæ ob Simoniacam collatio-  
nem ordinum.
- 626. Recensentur pœnæ ob ingressum Religionis  
Simoniacè obtentum.
- 627. Et pœnæ ob Simoniacam provisionem be-  
neficiorum Ecclesiasticorum.
- 628. Dictæ pœnæ nec ob Simoniam merè menta-  
lem, probabiliter nec ob conventionalem mix-  
tam incurruntur.
- 629. Excepta Simonia confidentiali mixta.
- 630. Per omnem verò Simoniam realem, quan-  
tumvis occultam, utrinque saltem ex parte  
completam dictæ pœnæ contrahuntur saltem per  
se loquendo.
- 631. Potestas à dictis pœnis absolvendi vel in iis  
de-

dispensandi, per se loquendo competit soli summo Pontifici.

632. An vel quantum restituere teneatur ille, qui simoniacè obtinuit quoddam beneficium Ecclesiasticum?

633. Pretium temporale simoniacè obtentum pariter est restituendum non quidem danti, sed Ecclesie &c.

634. Huic tamen obligationi probabiliter satisfat, ante sententiam Judicis illud restituendo ipsi danti.

635. An, vel cuinam restituendum sit pretium simoniacè obtentum ob ingressum Religionis, vel Collationem Ordinis?

636. Quid si Collator rei spiritualis intuitu talis pretii temporalis simul cessit bono, vel emolumento temporali?

637. Quomodo absque Simonie nota fieri possit aut debeat Resignatio vel Commutatio beneficiorum Ecclesiasticorum?

638. Quid nomine beneficiorum Ecclesiasticorum hic intelligatur?

639. Et quinam veniant nomine Superiorum, quorum auctoritate fieri debet resignatio &c.

640. Resolvitur Casus I. Cujusdam pœnitentis dubitantis, an beneficium, quod à suo Parente, simoniacè sibi impetratum inaudit, tuta conscientia retinere possit.

641. Quid si hoc audiisset ante elapsum triennium;

642. Utrum Episcopus cum tali possit dispensare, super inhabilitate, & nullitate provisionis?

643. Resolvitur Casus II. Cujusdam Simoniaci à S. Pœnitentia dispensati, dubitantis, an conditioni (liberè dimittendi suum beneficium) satisfecerit, illud dimittendo sub schemmate permutationis.

644. Item, an non inciderit easdem Censuras, ac pœnas eò quòd infra annum (uti debuisset vi Rescripti) fructus non restituerit?
645. A quonam talis possit absolvi aut dispensari datò, quòd re ipsa in easdem censuras ac pœnas reincidisset?
646. Et quos, vel quales fructus teneatur restituere?
647. Resolvitur Casus III. Cujusdam Parochi Emeriti, qui coram Episcopo simulaverat se gratis resignare beneficium suo ex fratre Nepoti, revera autem ex conventione privata resignavit sub conditione & onere annuæ pensionis.
648. Præcluditur quædam instantia contra hanc resolutionem.
649. Resignatio hæc fuit invalida.
650. Qui Simoniacè procuravit quoddam beneficium Ecclesiasticum, tenetur in Conscientia ante omnem Judicis sententiam illud dimittere.
651. Notabile practicum Simoniacis bene observandum.
652. Qui Simoniacè obtinuit beneficium per alterius procuracionem, sed contra suam voluntatem & protestationem &c. potest illud retinere;
653. Præsertim si ab illo altero in fraudem beneficiarii fuisset procuratum simoniacè.
654. Qui non committit culpam Simoniz, non fit obnoxius pœnis Simoniacorum.
655. Hac Ratione excusari possunt ac debent illi, qui ex ignorantia invincibili committunt Simoniam.
656. Quo non obstante tenentur dimittere beneficium per talem Simoniam procuratum?
657. Qui culpam simoniacè inducunt cum ignorantia

rantia pœnarum, censuras quidem non incur-  
runt, probabilissimè tamen reliquas pœnas in  
Simoniacos latas.

658. Licèt non desint è Doctoribus, qui taliter  
delinquentes etiam à reliquis pœnis absolvunt.

§. I.

Præmittuntur & breviter re-  
solvuntur quæsitæ scitu necessaria ad  
debitè resolvendos Casus practicos circa  
pœnas Simoniacorum, & onus restituen-  
di inde contrahi solitum.

**Q**Uæres primò, quænam pœnæ contra  
Simoniacos statuuntur in Jure?

Ante responsionem notandum est, tres 724.  
duntaxat dari species Simonix, quas Jura  
specialibus pœnis persequuntur. Prima est:  
quæ committitur in collatione Ordinum;  
2da, quæ ob ingressum Religionis; 3tia,  
(quæ cæteris duabus frequentior accidit)  
est illa, quæ in provisione beneficiorum,  
seu etiam officiorum Ecclesiasticorum sæ-  
piùs quàm par est committi assolet. Ta-  
met si autem jura contra Simoniam in aliis  
materiis v. g. circa venditionem Sacrarum  
Reliquiarum &c. commissam non statuerint  
speciales pœnas; possunt tamen, immò de-  
bent Simoniaci à Judicibus Ecclesiasticis  
puniri pœnis arbitrariis, qualitatè criminum  
commensuratis; cùm revera hoc crimen  
in

in quacunque materia sit valde abominabile, & hōc ipso pro viribus eliminandum, veluti Doctores communiter monent. Hoc prænotatō

625. R. jam ad quæsitum primò. Pœnæ ob Simoniacam collationem Ordinum à jure statutz sunt sequentes. Primò Excommunicatio Pontifici reservata, quæ tam ab ipso Ordinante, quàm ob Ordinato incurritur. 2dò. Suspendio, vi cujus Ordinans à collatione omnium Ordinum & exercitio munerum Pontificalium privatur: ordinatus verò à susceptione Ordinum, nec non ab Exercitio susceptorum. c. 37. & 45. de Simon. & Extravag. 2. eod. tit.

626. R. 2dò. Ob ingressum Religionis Simoniacè obtentum statuitur 1. Excommunicatio reservata tam in dantem, quàm accipientem temporale pro ipso ingressu: si verò accipiens supponatur integra communitas aut Capitulum, incurrit insuper suspensionem, & quidem, nisi occulta sit, pariter reservatam Pontifici, ab officio & executione juris capitularis, & administratione Jurisdictionis. 2. Infamia juris, consequenter & irregularitas 3. Simoniacè admissus debet transferri in arctius Monasterium, sed post sententiam Judicis primùm. c. 19. 25. 40. item Extrav. 1. inter comm. de Simonia.

R. 3tiò



¶ 3<sup>ti</sup>o Pœnæ ob Simoniacam provisionem beneficiorum, officiorum, Dignitatum & Prælaturarum Ecclesiasticarum &c. in jure statutæ leguntur sequentes. 1. Nullitas provisionis, si hæc facta sit per præsentationem, postulationem, electionem, si per institutionem, admissionem, confirmationem, vel liberam collationem, ita, ut ante omnem sententiam Judicis ne quidem in conscientia beneficium, vel fructus ex eo percepti retineri valeant. 2. Statuitur excommunicatio S. Pontifici reservata in omnes ad talem Simoniam cooperantes. 3. Inhabilitas Provisi ad idem beneficium de novo obtinendum. 4. item ad alia beneficia obtinenda. 5. Privatio beneficiorum prius obtentorum, ac depositio ab altaris ministerio : sed ultimæ duæ non incurruntur ante sententiam condemnatoriam, prout post Navarrum, Suarez, Reiffenstuel & alios advertit P. Pichler in *Compend. Jur. Can. l. 5. tit. 3. n. 21*. Hæc omnia habentur *Extrav. 2. inter Comm. de Sim. Can. ult. Caus. 1. q. 3. penult. de elect.* item *constit. Pii V. cum primum*. Quocirca specialiter observandum, hanc responsionem etiam extendendam atque intelligendam esse de Simonia juris Ecclesiastici per *c. 5. & 7. de rerum permut.* quia *Extravag. cit.* loquitur generaliter de Simonia circa provisionem beneficalem, & à Doctoribus intel,

intelligitur generaliter. Minimè tamen extendi debet ad Simoniam circa beneficia minùs stricte sumpta, uti sunt pensiones aut Vicariæ temporales &c. commissam.

Porro Simonia confidentialis vix non iisdem pœnis perstringitur à jure, cum hoc tamen discrimine, 1. quòd si Episcopus, vel Prælatus Episcopo superior, utputa Cardinalis, &c. sit reus, non incurrat excommunicationem, sed interdictum ab ingressu in Ecclesiam. 2. quòd inhabilitas ad alia beneficia & privatio prius jam habitorum incurrantur ipso factò, licet opus sit sententia declaratoria criminis. 3. quòd beneficium per Simoniam conventionalem nulliter resignatum vel collatum reservetur Summo Pontifici soli; item 4to, quòd fructus ex tali beneficio male percepti applicari debeant Cameræ Apostolicæ; quæ tamen ultimæ duæ pœnæ in Germania non habent locum propter Germaniæ concordata, videnda apud de la Croix *lib. 4. n. 503*. 5to denique illud speciale habet Simonia confidentialis, quòd memoratæ pœnæ incurrantur non solum per realem, sed etiam per Simoniam conventionalem mixtam, uti habetur in Bulla Pii V. *Intolerabilis* §. 3. Videantur de his Reiffenstuel *lib. 5. decret. tit. 3. n. 284. & 285.* vel Pichler in *Compend. Juris Can. cod. tit. n. 21.*

Quæ.

Quæres 2dò, an præfatæ pœnæ incurrantur ob quamlibet Simoniam, tam mentalem & conventionalem, quàm etiam realem?

1. primò. Ob Simoniam mentalem dun- 628.  
taxat nulla incurritur pœna Ecclesiastica, neque 2. probabiliter ob conventionalem (ante sententiam judicis) esto etiam hæc supponatur mixta cum reali, nisi sit Simonia confidentialis.

Ratio prioris partis inter DD. communiter recepta est: quia Ecclesia non judicat de internis: atqui Simonia mentalis potissimum dependet à voluntate interna secundum dicta superius: ergo &c. Idipsum satis clarè decisum legitur *c. 33. 34. & c. fin. de Simon.* Ratio autem 2dæ partis, quam contra D. Thom. Valentiam, Palao & alios plures tenent Navarrus in *manuali c. 23. n. 104. Lessius lib. 2. cap. 35. dubit. 27. Suarez lib. 4. de Simon. c. 56. n. 33. Engel de Simon. n. 34. Pichler & alii tenent*, est, quia nullibi in jure reperitur aliqua pœna clarè expressa contra aliquam Simoniam conventionalem mixtam, seu utrinque nondum completam: atqui non est in dubio asserenda pœna: quandoquidem juxta *c. in pœnis 49. de R. J. in 6tò: in pœnis benignior est interpretatio facienda. Et l. 42. ff. de pœnis: interpretatione legum pœna mollienda sunt potius, quàm asperanda.* Profectò etiam stylus

lus curiæ, teste Navarro & aliis, non censet, pœnas has fuisse incurfas, nisi Simonia realis utrinque completa fuerit, saltem ex parte: stylus autem curiæ habetur pro jure & lege juxta *communem DD.* ergo &c. Ea verò, quæ contra hæc objici solent, videri possunt soluta apud Reiffenstuel *lib. 5. tit. 3. §. 11. à n. 240.*

629. Dixi: *nisi sit Simonia confidentialis*; de hac enim speciale quid statuit Pius-V. Bulla *Intolerabilis*, mox citata §. 3. ubi declarat: *pœnas in eadem Bulla contentas incurri, licet ipsum confidentia crimen alterius tantum partis conscientia sit admissum*: quæ tamen constitutio, utpote odiosa extendi non debet ultra casum expressum. Quod si alia aliqua Bulla D. Pii de hac re edita sit, ea non videtur usu recepta, ait Lessius *loc. cit. n. 149*, eumque secutus Reiffenstuel, ubi *suprà n. 241.*

630. R. jam 2do ad idem quæsitum. Ob solam & omnem quantumvis occultam Simoniam realem, utrinque saltem ex parte completam in susceptione Ordinum, in ingressu Religionis, & in provisione beneficiorum Ecclesiasticorum commissam ipso jure & facto incurruntur pœnæ contra Simoniacos statutz. Ita Pichler ubi *suprà n. 18.* & alii Doctores proximè allegati. Ratio est: quia cum jura Simoniam perstringant pœnis, illæ verò pœnæ extendi non possunt.

possint ad Simoniam merè mentalem, neque ad conventionalem mixtam secundum dicta, sequitur evidenter, quòd saltem incurrantur propter Simoniam realem. Cæterùm quòd etiam propter talem Simoniam quantumvis occultam dictæ pœnæ incurrantur, habetur clarè decisum *Extrav. cum detestabile. de Simonia.*

Quæres 3tiò, quinam in prædictis pœnis dispensare, vel à censuris absolvere valeant?

*n.* Absolvere à censuris, & dispensare in pœnis Simonia per se loquendo solus Summus Pontifex potest, etsi rarissimè & non sine certis conditionibus dispensare soleat. Si tamen delictum sit occultum, & ad forum contentiosum non deductum, à censuris potest absolvere 1. Episcopus *juxta Trident. §. 24. de Refor. c. 6.* 2. item Religiosi mendicantes pro foro interno duntaxat. Porro Episcopus probabiliter potest dispensare cum eo, qui beneficium Simoniacè obtentum sponte, & ante sententiam condemnatoriam dimisit, veluti plures Doctores deducunt ex *can. 2. caus. 1. q. 3.* Item cum eo, qui per alienam Simoniam beneficium se infcio obtentum, vel potius procuratum dimisit, ad idem rursus obtinendum, *juxta cap. penult. de Elect.* Sed de his proximè plura *n. 642. & 645* Videri etiam possunt Pyrrhus Corradus *in prax. dispens. lib. 5. c. R. P. Elbel Pars II. de Fide &c.* Aaa 9, &

9. & 10. Pichler cit. n. 26. Reiffenstuel lib. 5. tit. 3. à. n. 341.

Quæres 4to: an vel quid teneatur restituere, qui Simoniacè beneficium Ecclesiasticum obtinuit?

632. R. Qui quaecunque demum beneficium Ecclesiasticum Simoniacè obtinuit, tenetur ante omnem iudicis sententiam sub gravi culpa restituere, vel potius dimittere nedum ipsum beneficium, sed etiam fructus ex illo perceptos. Ita unanimiter Doctores. Ratio est: quia omnis collatio, provisio vel acquisitio beneficii aut officii Ecclesiastici Simoniacè facta, est ipso jure irrita & nulla, ita, ut Simoniacè provisos nullam acquirat jus, nec faciat fructus suos, sed ad illorum omnium restitutionem sub animæ suæ periculo sit adstrictus, prout expressè statuitur cit. Extravag. cum detestabile. de Simon. Quocirca tamen illud discriminis est observandum, quòd si Simonia intervenerit *realis communis*, hæc pœna incurratur duntaxat, posteaquam Simonia utrinque saltem ex parte fuit completa, ut puta si is, qui v. g. 100. ducatos promissit, pro spiritali jam obtento, rependit v. g. 30. aut 50. &c. At verò, ubi Simonia fuit *confidentialis*, ne quidem necessum est, ut pretium jam sit solutum, veluti ex dictis n. 629. satis colligi potest, & expressè tradit Reiffenstuel lib. 5. decret. tit. 3. §. 12. n. 288. aliique plures.

Quæres

Quæres 5tò, An vel cuinam restitui debeat pretium temporale Simoniacè obtentum vel acceptum pro spiritali?

R. ad hoc quæsitum primò. Qui accepit pretium temporale pro beneficio Ecclesiastico, eò quòd ad hujus affecutionem cooperatus fuerit eligendo, vel præsentando, aut recommendando, &c. tenetur ante omnem judicis sententiam sub peccato mortali (si materia accepta supponatur gravis prout communiter esse solet) pretium illud restituere; idque secundò probabiliter non ipsi danti, sed Ecclesiæ, cujus est beneficium aut certè pauperibus. Utraque pars est communiter recepta inter DD. cui subscribunt S. Thomas 2. 2. q. 100. art. 6. in corpore. Lessius lib. 2. c. 35. dubit. 30. n. 169. Bonacina, Sylvester, Palao, & alii. Et ita quantum ad priorem partem deducitur tum ex arg. cap. De hoc de Simon. tum ex eo etiam, quia cum spiritalia hæc distribuenda sint gratis vi præcepti divini *Matth. 10.* consequens est; quòd aliquid exigens pro illa re spiritali, faciat injuriam contra justitiam respectu illius, à quo exigitur, consequenter nedum ex jure humano, sed etiam naturali ac divino tenetur ad restitutionem Simoniacè accepti. Nec evadis dicendo, te non exigere illud temporale pro ipso spiritali, sed solum pro emolumento temporali, quod beneficiario obveniet: nam &

temporale utpote spirituali *consequenter annexum* absque Simonia vendi non potest, secundum dicta superius n. 599. Hinc Alexander VII. volendo præcludere viam hujusmodi effugiis, jure meritissimò damnavit sequentem n. 22. propositionem: *Non est contra justitiam, beneficia Ecclesiastica non conferre gratis, quia Collator conferens illa beneficia Ecclesiastica pecunia interveniente, non exigit illam pro collatione beneficii, sed veluti pro emolumento temporali, quod tibi conferre non tenebatur.* De quo videri potest Viva in eand. proposit. n. 2.

Ratio autem posterioris rursus habetur decisa eod. cap. De hoc i. 1. proximè citat. Addidi: *aut certè pauperibus*: Enimverò Reiffenstuel cit. n. 295. post S. Thomam & Navarrum existimat, hujusmodi pretium Superioris arbitrio posse distribui pauperibus, quin immò consuetudine id jamjam introductum fuisse, asserere non verentur.

634. Dixi insuper, tale pretium *probabiliter non ipsi danti, sed Ecclesiæ esse restituendum, &c.* Nam plures magni etiam Nominis Doctores putant, hujusmodi pretium ante sententiam judicis nedum posse, sed etiam debere restitui danti, eò quòd ipse offerens nunquam voluerit transferre dominium pretii in alium, quàm in illum, à quo spirituale obtinuit: ergo cùm iste de jure non sit capax acceptandi idem dominium, omnino rationabili-



nabiliter asseritur, quòd maneat penes ipsum dantem, qui ante judicis sententiam neutiquam illo debet privari. Et ita tenent Sotus, Matthæus de Moya, Bannez & alii quos citat & sequitur Reiffenstuel, *ubi supra* n. 296.

R. jam 2dò ad idem quæsitum. Ante 635.  
sententiam judicis nulla est obligatio restituendi ea, quæ ob ingressum Religionis Simoniacè obtenta fuere. 2. Quæ verò fuerunt obtenta pro collatione Ordinum, aliorumvè Sacramentorum vel Sacramentalium vel quarumcunque tandem rerum spiritualium, sine damno aut incommodo seu detrimento ipsius conferentis (uti fieri posset pro dispensatione, absolutione, aut indulgentiis) jure divino ante omnem etiam sententiam judicis debent restitui. Ratio prioris desumitur ex *Extravag. Sanè de Simonia*, ubi S. Pontifex concedit, ut hujusmodi bona *contra canonicas Sanctiones recepta ad communem usum Monasteriorum possint retineri & applicari*. Ratio autem posterioris sequitur ex proximè dictis n. 633. quia Minister Christi jubetur administrare hujusmodi dona cœlestia *gratis*: ergo dum exigit pretium, facit injuriam solventi, quemadmodum famulus jussus à suo domino eleemosynam gratis dispensare, faceret injuriam illi, à quo intuitu eleemosynæ aliquid prætenderet, tenereturque ad hujus pretii refu-

A a 3                      sionem.

sionem. Videatur Lessius *lib. 2. de J. & J. c. 35. dubit: 28. n. 162.* Laymann *ubi supra J. 9. n. 79.* Pirrhing *de Simon. n. 175.*

636. Dixi tamen rursus: *quæ obtenta fuerunt sine damno aut incommodo conferentis, &c.* Nam casu quo dans spirituale sese privat commodo vel honore temporali (uti revera resignantes beneficia ordinariè debent facere) nonnulli autumant, obligationem restituendi non oriri ex jure naturali; (siquidem à parte rei nulla fit injuria seu injustitia illi, à quo temporale exigitur) sed ex humano duntaxat. Verùm quidquid sit de hoc, nihil prorsus juvat Simoniacum; cum enim ex jure humano, quo Simoniacus sit inhabilis nedum ad beneficii, sed etiam ad fructuum inde redundantium possessionem, consequens est, quòd ex jure humano saltem teneatur ad restitutionem talis pretii, quippe quod nec pro fructibus aut commodis beneficii, neque etiam pro ipso beneficio poterat acceptare tutà conscientia, uti bene observat R. P. Reiffenstuel *lib. 5. tit. 3. §. 12. n. 293.* Secus rursus dicendum foret, si dans spirituale sese privaret bono temporali revera pretio temporali æstimabili, prout fieri potest in temporalibus, quæ spiritualibus antecedenter connexa sunt secundum dicta *n. 600.* ut si vendat vel tribuat calicem consecratum &c. quo casu, si plus non accipiat, quàm illud temporale valet, nul-

nullam prorsus committit Simoniam, neque ad ullam restitutionem obligari potest, ut patet ex *dictis loc. prox. cit.*

Quæres adhuc 6to, quomodo ergo absque nota Simonia vel pœnis inde incurrendis fieri possit vel debeat beneficiorum resignatio vel permutatio?

R. Ut talis resignatio vel permutatio beneficiorum fiat sine labe Simonia, necessario fieri debet non auctoritate propria, sed auctoritate legitimi Superioris. Ita ex *communi DD. Pichler in Compend. J. C. de Sim. n. 14. in fine, & Henno noster tract. in decal. disp. 1. q. 5. §. 7. conclus. 1.* Ratio hujus petenda est ex jure *Can. cap. 5. & 7. de rerum permut. itemque cap. ult. de pactis*, ubi expressè prohibentur omne pactum privatum, & omnes conventiones propria auctoritate factæ circa beneficia Ecclesiastica: prohibentur, inquam, & quidem velut Simoniacæ, & nullius penitus momenti: ergo &c. Quocirca tamen pro meliori intellectu hujus resolutionis

Animadvertendum est primò, nomine beneficiorum hic intelligi nedum beneficia Ecclesiastica, sed etiam officia spiritualia temporalibus annexa, sive sint mobilia, sive immobilia, sive perpetua, sive ad certum tempus: immò verò, teste Henno *tr. in decalog. disp. 1. q. 5. §. 7. conclus. 1.* veniunt omnes actiones, ad provisiones beneficio-

rum pertinentes, uti sunt præsentatio, electio, confirmatio, &c. unde Simoniam incurrunt, qui dicunt v. g. *si eligendo dare velis votum Petro, ego illud dabo in proxima electione Paulo tuo cognato: si confirmes Joannem, ego præsentabo hunc tuum amicum &c. vel. si cefferis beneficium tenue cognato meo, ego præsentabo vel eligam fratrem tuum ad beneficium pingue &c.* Esto enim in his omnibus non interveniat Simonia juris divini, siquidem spirituale pro spirituali promittitur; Ecclesia tamen hæc omnia justissime prohibuit, propter occasionem & periculum Simoniae, in quantum de facile adhiberi possunt in ordine ad lucrum temporale. Unde cautè legendam existimo sententiam & opinionem illorum, qui asserunt, *Electores absque Simonia nota posse tractando convenire in electionem alicujus in Generalem aut Provincialem, ut postea tales eligantur in Diffinitores, Guardianos &c.* Nam si Electores isti supponantur coincidere votando in Generalem, v. g. sub onere quasi & conditione, ut ipsi eligentes vel eorum aliqui determinati vicissim eligantur in Diffinitores, planè non video, qua conscientia à labe Simoniae excusari valeant: licèt in hujusmodi electionibus intervenire possint tractatus merè consultorii, quibus Electores aliud non intendunt, nisi inquisitionem in merita & majorem dignitatem Eligendorum.

Animad-

Animadvertendum porrò est 2dò, no-<sup>639</sup>  
mine Superioris hìc non intelligi solum  
Summum Pontificem, sed etiam Episco-  
pum, immò & beneficii Collatorem, ubi  
consuetudo hoc introduxit. Et licèt Pius V.  
anno 1567. hanc auctoritatem summæ dun-  
taxat Sedi reservaverit, anno tamen sequenti  
per motum proprium: *Quanta Ecclesia &c.*  
videndum in *Bullario Cherub. tom. 2. constit.*  
*58. dicti Pontificis* idipsum revocavit. Ita  
in re Henno *loc. cit.* Videantur de hac ma-  
teria Busenbaum *lib. 4. de benefic. Ecclesiast.*  
*art. 5. apud de la Croix eod. lib. 4. n. 884.*  
vel ipse de la Croix *l. cit. à n. 952.* aut  
Leurenus *part. 3. q. 234.*

## §. II.

Proponuntur & breviter re-  
solvuntur Casus practici de Si-  
monia.

### CASUS PRIMUS.

**T**Itius beneficium quoddam satìs pinque  
quadriennio & amplius possederat paci-  
ficè, quo jamiam elapso Parens (nescio qua  
de causa) Eidem exprobraverat ingritudi-  
nem suam, tot, inquires, debui facere expen-  
sas, ut hanc Parochiam adipisceretur: soli  
Patrono quingentos solvi florenos, ut te

Aaa §

po-

potius, quàm alium præsentaret: nihil dicam de reliquis Schmirbalibus, quæ præterea debui facere illis, quorum vel suffragio vel ope indiguisti: & tu pro tot ac tantis beneficiis ne gratum quidem erga me animum monstras. *Titius rei novitate obstupefactus, illico E. g. rogavit Parentem suum, quatenus similia nulli mortalium unquam manifestaret, sanctè adpromittens, se quàm proximè omnes expensas refuturum. At paulò post multum consternatus venit ad Confessarium, dubitans & quærens, an hanc suam Parochiam à suo Parente inscio se sibi Simoniacè procuratam tutà conscientia retinere possit, an verò illam unàcum fructibus hætenus perceptis teneatur restituere?*

640. R. Titius bono jubeatur esse animo, & manere in sua possessione. Ratio est: quia supponitur hoc suum beneficium jam quadriennio pacificè & bona fide possedisse: at, qui etiam per triennium duntaxat aliquod beneficium cum titulò collorato pacificè possidet bona fide, deinceps non amplius potest desuper molestari, per *Regulam Cancellaria 36. de triennali &c.* uti tenent *Lessius de J. & J. lib. 2. c. 35. dubitat. 25. n. 140. Palao de Simon. pu. 25. n. 3. Suarez lib. 4. de Sim. c. 57. n. 9. & alii DD. communiter: ergo &c.* Nec refert, quòd dicta Regula requirat, ut beneficium *absque ingressu Simoniacò* fuerit obtentum; quia  
cum

cùm eadem regula in quantum favorabilis latè, in quantum verò odiosa stricte sit interpretanda *arg. cap. Odia de R. J. in 6to*; hinc prudenter omnino asseritur, dictam clausulam solum esse intelligendam de eo, qui culpabiliter & scienter aliquod beneficium Simoniacè obtinuit, aut certè ante triennium elapsum inaudiit, per alium idem beneficium Simoniacè fuisse exprobatum; non verò de illo, qui Simonix alterius penitus ignarus, beneficium obtentum bona fide per triennium pacificè jamiam possedit. Videatur Reiffenstuel *lib. 5. decret. tit. 3. §. 11. n. 278.*

At, quid, ais, si Titius à suo Parente ante elapsum triennium pacificæ possessionis jam intellexisset, suum beneficium præfato modò Simoniacè fuisse obtentum?

R. Hòc supposito fuisset obligatus post 641. adeptam hujusmodi notitiam beneficium dimittere, fructusque inde perceptos restituere. Ita *unanimes & certa DD. sententia.* Ratio patet ex hætenus dictis; omnis quippe provisio Simoniacè facta irrita est, & nulla, veluti clarè habetur decisum *c. Nobis fuit 27. &c. sicut tuis 33. de Simonia*, ubi dicitur: *secundum canonum statuta etiam parvuli, qui cupiditate Parentum Ecclesias per pecuniam sunt adepti, eas dimittere tenentur*: neque aliunde hic supponitur occurrere causa eximens ab hoc onere, sicut respectu Titii

Titii nostri intervenit possessio bonæ fidei per triennium continuata: ergo &c.

Dices adhuc: quid igitur Consilii capassendum foret, casu quo talis beneficiarius ante elapsum triennium certò resciret in provisione sui ad beneficium fuisse commissam Simoniam.

642. R. Recurrendum necessariò foret vel ad summum Pontificem, vel certè ad Episcopum, qui probabiliter dispensare potest cum tali, qui beneficium suum bona fide adiit, esto ad illud pervenerit per Simoniacam procuracionem tertii v. g. Parentis &c. modo tamen prius renuntiet suo beneficio. Ita Pontas in *dictionar. Casuum V. Simonia. Cas. 38.* post Sanctum Thomam 2. 2. q. 100. art. 6. *ad 7timum*, ubi ait Sanctus Doctor: *dispensare cum eo, qui est beneficiatus Simoniacè scienter solus Papa potest: in aliis autem casibus potest etiam Episcopus dispensare; ita tamen, quòd prius abrenuntiet, quod Simoniacè acquisivit, & tum dispensationem consequatur.* Idipsum satis clarè statuitur *c. si alicujus 59. de Elect.* nec non in *Concil. Trident. Ss. 24. de Reform. cap. 6.* Neque in tali casu abrenuntiatio iungitur in pœnam peccati, sed potius est effectus acquisitionis injustæ & ex jure irritæ veluti docet idem S. Doctor *loc. cit. ad 3tium.*



## CASUS SECUNDUS.

**S**empronius quandam Parochiam Simoniacè sibi procuravit : facti pœnitens totum casum velut occultum Consilio & opera Confessarii sui Romam ad S. Pœnitentiariam transcripsit, humillimè supplicans pro absolutione à censuris, & liberatione ab aliis pœnis propterea incurfis. Major Pœnitentiarius eidem Confessario rescripsit, ut Oratorem à censuris absolveret, ac in reliquis pœnis cum eodem misericorditer pro foro conscientia dispensaret, sed cum onere, ut 1. intra annum liberè dimittat hoc beneficium. 2. ut insuper fructus hactenus perceptos ex eodem beneficio intra ejusdem anni lapsum restituat, secus in easdem pœnas relapsurus. Sempronius ut mandatis Ecclesiæ moram gereret, intra ejusdem anni lapsum Parochiam suam dimiserat, ast, sub schemmate permutationis, ne scilicet ullatenus sese suspectum redderet de admissio crimine Simonia : fructus tamen beneficii ne quidem intra ejusdem anni lapsum restituit ; partim quia præviderat, hanc restitutionem sine nota, vel omnimoda manifestatione commissi criminis vix, aut ne vix quidem sibi fore possibilem ; partim insuper, quia pecuniis ex iisdem fructibus collectis opus habuit ad alios sumptus faciendos, licet cateroquin nunquam non haberet animum restituendi eosdem fructus, quàm  
pri-

*primum moraliter potuerit. Jam verò dubitat idem Sempronius 1. an satisfecerit primæ conditioni seu oneri sibi injuncto, dimittendo suum beneficium sub schemate permutationis? 2dò. An non reinciderit in easdem censuras & pœnas, eò quòd intra anni lapsum non restituerit fructus? Quid Confessarius sciscitanti respondebit?*

634. R. ad primum quæsitum. Sempronius satisfecit primæ conditioni, esto sub schemate permutationis dimiserit suam Parochiam. Ratio est: quia à S. Pœnitentia liberè dimittere censetur, qui illud dimittit non compulsus necessitate externa per sententiam scilicet Judicis, licet dimittens jam prius in conscientia fuerit obligatus: sic enim secundum jura jubetur liberè dimittere primum beneficium, qui aliud cum priori incompatible obtinuit, & re vera censetur illud prius liberè dimittere, dum illud velut incompatible cum priori & vacans ipso jure *per c. 28. & Extravag. Execrabilis Joan. 22, de præbend. nec non per Trid. SS. 7. c. 4. de Reform.* non expectata jussione vel compulsiva sententia Judicis aut Superioris Ecclesiastici illud dimittit ac cedit alteri: atqui Sempronius supponitur illud prius dimisisse ante omnem sententiam compulsivam Judicis Ecclesiastici: ergo huic conditioni satisfecit, præsertim cum nec à Jure communi, neque  
etiam

etiam à Sacra Pœnitentia unquam fuerit prohibitus quærere aliud beneficium licitò & honesto modo. Neque verò præsumendum est, quòd Major Pœnitentiarius voluerit Eum obligare ad dimissionem beneficii absque ullo prorsus schemate vel pallio, quo commissum crimen Simonie quodammodo obtegeret, sed potius illud dimittendo se ipsum non sine Scandalo ac famæ vel honoris proprii prostitutione diffamaret : non, inquam hoc præsumendum est de benignitate S. Matris Ecclesiæ, præsertim cùm pro foro interno duntaxat fuerit postulatum remedium ; in quo utique talia præscribi solent ac debent ; è quibus pœnitens publicè non confundatur aut prostituatur.

R. jam ad 2dum, Sempronium non re- 644.  
incidisse in easdem censuras & pœnas, eò quòd intra anni lapsum non restituerit. Ratio est : tum quia in primis dubitari posset, an restitutio fructuum à S. Pœnitentia fuerit Sempronio præcepta sub pœna reincidentie, si intra annum non restitueret illos ; nam supponi posset, quòd S. Pœnitentia voluerit obligare ad horum restitutionem secundum communem stylum Juris : at, de jure non constat, quòd fructus Simoniacè percepti sint sub pœna reincidentie restituendi intra annum. Tum præsertim, quia tametsi supponatur hoc fuisse

fuisse demandatum à S. Pœnitentiaria, minime tamen intelligendum est, quòd easdem pœnas deberet reincidere ob dilationem restitutionis etiam inculpabilem, aut certè graviter non culpabilem: atqui Sempronius differendo hanc restitutionem non commisit culpam gravem; partim quia rationabiliter timuit periculum diffamationis, ut dicitur; partim etiam quia eadem pecunia necessariò indiguit ad alios sumptus, proptereaque non imprudenter credit, illud mandatum Ecclesiæ non urgere cum tantis difficultatibus. Adde insuper, illam obligationem *restituendi intra annum* velut odiolam, esse strictè interpretandam, ideòque intelligendam non à die commissæ Simonix, neque etiam à die datæ, id est, concessæ Facultatis absolvendi in curia Romana, sed potius à die intimatæ hujus obligationis per Confessarium delegatum; nam mandata Ecclesiæ, sicut & leges supponunt necessariò intimationem, quâ supposita primùm incipiunt obligare, juxta communem DD. præsertim in Schola Scotistica: ergo ex hoc etiam titulo Sempronius excusari posset, si supponatur, quod à die intimatæ obligationis & absolutionis nondum fuerit elapsus integer annus.

Dices. Demus igitur, Sempronium, vel alium quemcunque Clericum ob non servatam conditionem in Rescripto S. Pœnitentia-

tentaria contentam denuo reincidisse in easdem censuras, quis illum velut relapsum absolvet aut liberabit à pœnis ?

R. A peccato & excommunicatione, 645. quamdiu delictum Simoniz supponitur occultum, potest absolvi nedum ab Episcopo, verum etiam à quolibet Confessario Mendicantium, utpote præditi potestate absolvendi à casibus summo Pontifici reservatis. Ita ex communi Doctorum Suarez lib. 4. de Simon. c. 61. item Castropalao de Simon. punct. fin. n. 2. At verò quantum ad pœnam inhabilitatis in ordine ad obtinendum idem beneficium probabilius non solum à nullo Mendicantium, sed ne quidem ab Episcopo dispensari potest juxta opinionem Palao de Sim. pu. ult. n. 3. Pirhing. de Sim. n. 173. Lessii l. 2. c. 35. dubit. 25. n. 140. & communiores aliorum : quia Episcopus in lege Superioris per se loquendo dispensare non valet, nisi id Eidem specialiter demandetur, aut concedatur : at, de tali concessione, nihil constat, nequidem ex Concilio Trid. quandoquidem hæc inhabilitas ad idem beneficium primum post Consilium Tridentinum fuerit introducta : ergo &c. Oppositum tamen nedum Lessius & Palao cit. n. 4. sed insuper Henriquez, Krimer, & alii censent hodieum probabile. Illud nihilominus certum mihi videtur, hujus-  
R. P. Elbel. Pars II. de Fide &c. Bbb mo-

modi Clericum Simoniacum semper manere obligatum ad restituendos fructus ex beneficio perceptos, quippe quos ex dispositione juris nec fecit, nec unquam facere potuit suos. Videatur Reiffenstuel *lib. 5. decret. tit. 3. §. 14. n. 338. & seqq.*

At, inquires, quosnam igitur fructus tenetur Sempronius restituere?

646. R. Fructus vi beneficii Simoniacè obtenti perceptos, id est, illos omnes, ac solos, quos ex beneficio percepit, non autem tenetur restituere fructus illos, quos percepit intuitu laborum aut functionum Parochialium, utputa ratione Concionum, administrationis Sacramentorum, vel exequiarum &c. & quidquid demum intuitu stolæ, uti vocant, obtinuit. Ratio est: quia hujusmodi fructus aut proventus non penduntur Clerico velut fructus aut redditus ipsius beneficii, sed velut stipendia alicujus officii Clericalis, propterea que hujusmodi fructus annumerari solent bonis quasi patrimonialibus Clericorum, ita, ut juxta receptissimam Doctorum sententiam, videndam apud Busenbaum & de la Croix *lib. 4. n. 1355.* à Clericis possint liberè expendi in profanos usus. 2dò Neque tenetur restituere fructus ex beneficio perceptos post absolutionem à S. Pœnitentiaria impetratam; cum enim ab hac Eidem fuerit indultum aliquot tempus permanentiæ (non enim

enim *immediatè*, sed *intra annum* jussus fuit dimittere beneficium Simoniacè obtentum) pariter censeri debet indultum, ut interea fructus ex eodem beneficio redundantes percipere valeat. Insuper 3. aliqui DD. volunt, quòd talis non teneatur restituere fructus illos, quibus necessariò indiguit ad suam sustentationem eo tempore, quò Simoniacè possedit suum beneficium; verùm hæc opinio ab aliis meritò reputatur non satis probabilis, neque satis tuta; quandoquidem Sacri Canones *suprà n. 627.* allegati absolutè dicant, quòd Simoniacus fructus beneficii *non faciat suos*. Secus dicendum foret de illo, qui beneficium bona fide possedit, proptereaque & bona fide fructus consumpsit, nec inde factus fuit ditior; quia talis possessor non tenetur amplius ad ullam restitutionem juxta *communem Doctorum*, quam tradidimus *de Restitut. Conferent. 2da n. 31.* itémque à *n. 51.*

## CASUS TERTIUS.

**C**Ajus Parochus atate grandævus & plenus meritis statuit tandem suo ex fratre Nepoti (à quo jam pridem fuerat precibus sollicitatus) resignare suum beneficium, sed cum certis conditionibus & oneribus, scilicet primò, ut idem Nepos quoad dies vita

Bbb 2

præ-

praberet sibi sustentationem congruam. & 2. insuper ut annuatim sibi ex beneficio rependeret 100. taleros : hoc ubi nepos sanctè adpromisit, Cajus in manus Episcopi Parochiam suam liberè & gratis (uti asseveraverat vel verius loquendo finxerat) resignavit, unà tamen simul humillimè supplicando, quatenus Episcopus eandem Parochiam suo ex fratre Nepoti, velut homini capacissimo & aliunde bene merito Parochianisque gratissimo conferret; quod Episcopus tum intuitu meritorum à Cajo collectorum, tum etiam intuitu Nepotis velut hominis insigniter talentati præstitis, nihil tamen prorsus sciens, immò ne quidem somnians de pacto, quò Cajus & Nepos prius inter se convenerant. Jam ad hanc facti speciem quaritur primò, an Cajus revera commiserit Simoniam? 2dò Quid de valore hujus resignationis vel collationis tenendum?

647. R. Ad primum quæsitum, Cajum commisisse Simoniam, probabilius tamen non contra jus divinum (uti vult Henno) sed contra jus humanum duntaxat. Ratio est: quia jus ad pensionem annuam, seu, quod idem est, ad percipiendos certos fructus ex alieno beneficio (puta præter sustentationem 100. taleros in nostro casu) esto de se sit aliquid temporale, est tamen hodie auctoritate Ecclesiæ aliquid suo modo spiritualizatum, velut consequenter annexum spiri-  
ritua.



rituali, scilicet beneficio Ecclesiastico: ergo non fuit datum spirituale pro temporali, sed potius spirituale pro spirituali. Et certè, si in hoc casu interveniret Simonia juris divini, ne quidem Summus Pontifex dispensare posset, ut licitè fieret hujusmodi resignatio sub conditione seu onere annuæ pensionis: at, hoc est contra omnes: ergo probabilius in hoc casu non intercedit Simonia juris divini: quòd autem Simonia juris humani interveniat, nemo inficias ibit, ni fallor: enimverò *cap. ult. de pactis, & cap. 5. Rer. permut. expressè velut simoniacè* interdiciuntur omnes conventiones privatæ circa beneficia Ecclesiastica, aut Præbendas, &c. Videatur *Filliucius tr. 42. c. 9. n. 3. vel Bassæus v. Pensio n. 9. aut Reiffenstuel l. 5. decret. tit. 3. §. 8. n. 151.*

Nec dici valet, quòd in hoc casu nullum interveniat pactum Simoniacum, sed quòd Cajus duntaxat suum beneficium, è quo annuatim v. g. mille florenos perceperat, resignaverit suo Nepoti, reservato sibi jure ad 100. taleros ex eodem beneficio annuatim percipiendos, &c.

Contra enim est, quòd jus ad percipiendos fructus sit inseparabile à beneficio in tantum, ut non, nisi auctoritate Summi Pontificis vel Episcopi in certis circumstantiis, minimè verò auctoritate privata paciscantium separari valeat ab illo: ergo Cajus vo-

lens resignare beneficium, debuit pariter resignare jus ad percipiendos ex eo fructus, ita, ut siquidem aliquid sibi reservet ignorante vel dissentiente Resignatario, dici mereatur fur: sin autem aliquid sibi reservet auctoritate privata ipso etiam consentiente, dici debeat Simoniacus ob rationes proximè allegatas, uti bene ait Henno §, 7.

649. R. Jam ad alterum quæsitum, hanc resignationem fuisse nullam & invalidam. Ita Filliucius *loc. prox. cit. c. 9. n. 16.* Idipsum tenet de la Croix *l. 4. n. 958.* ubi ait, resignantem propria auctoritate sub præfata conditione pensionis (sicut reipsa Cajus sub hac conditione non auctoritate Episcopi, sed propria resignavit) præter nullitatem resignationis insuper amittere titulum; & pro eadem opinione allegat Rotam, Rebuffum, Garziam & alios. Ratio autem est: quia secundum dicta hæc resignatio fuit Simoniacæ, & quidem non merè pensionalis, sed & beneficalis, utpote in qua non de solo jure pensionis, sed etiam de beneficio transferendo actum fuit: ergo juxta *communem DD.* videndam apud Bassæum *loc. cit.* & Filliucium *cit. c. 9. n. 7.* post se trahit pœnas Simoniacorum: atqui inter reliquas Simoniacorum pœnas etiam numeratur nullitas actûs, & inhabilitas ad idem saltem beneficium obtinendum: ergo hæc resignatio nulla fuit. Similiter nulla fuit collatio facta  
ab

ab Episcopo, utpote facta subiecto de jure incapaci & inhabili juxta hætenus dicta, præsertim *n. 627*. Profectò neque præsumendum est, quòd Episcopus unquam intenderit tali conferre Parochiam tam pinguem.

§. III.

Corollaria ex dictis inferenda.

**C**olliges ex hætenus dictis primò, *Eum, 650.* qui beneficium simoniacè obtinuit, aut omnino sive per se sive per alium quempiam procuravit, illud retinere non posse tutâ conscientia, sed teneri ante omnem sententiam Judicis nedum ipsum beneficium, sed etiam fructus inde perceptos (in sensu jam explicato *num. 646.*) restituere. Ratio liquet ex dictis; quia talis de jure nec in ipsum beneficium, neque etiam in fructus inde redundantes unquam obtinuit jus, quin potius ad illud obtinendum perpetuam inhabilitatem incurrit secundum dicta. *n. 627*. Idque verum est, tametsi simonia supponatur occultissimè commissa, ita, ut de hac nemini præter Deum & soli delinquenti, vel fortassis complici etiam constet. Nihilominus beneficia priùs ritè obtenta tutâ conscientia retinere potest, & insuper alia justò titulo acquirere, fructusque

illorum percipere valet, donec simonia nuper commissâ publicè innotescat, & ad forum contentiosum deducatur, ac proin per sententiam condemnatoriam vel declarativam Judicis aliud statuatur. Ita Reiffenstuel *lib. 5. decret. tit. 3. §. 11. num. 271.* Ex quibus ulterius

651. Colliges 2dò, quàm sapienter & meritò idem R. P. Reiffenstuel *§. 12. num. 294.*
- „Scribat sequentiâ: videantigitur, suâque  
 „conscientiam examinent illi, qui benefi-  
 „cium aliquod contulerunt vel resignârunt,  
 „vel ad illud præsentârunt, elegerunt, aut  
 „postulârunt, recommendârunt &c. An  
 „propterea simoniacè exegerint vel recepe-  
 „rint temporalia; & si quis reum se inve-  
 „nit, illico restitutionem facere non omit-  
 „tat: secus enim in continuo statu disgra-  
 „tiæ & æternæ damnationis periculo versa-  
 „bitur, nisi aliquem habeat titulum à restitui-  
 „tione excusantem, qualis certè non est ri-  
 „sus & contemptus hujus tam certæ doctri-  
 „næ, nec crassa vel affectata ignorantia,  
 „multò minùs stolidâ pertinaciâ, quâ non-  
 „nulli vermen conscientiæ sopire cupien-  
 „tes, vel nolentes intelligere, ut bene agant,  
 „mentem & aures à rationibus doctrinæ  
 „sibi contrariæ avertunt, ac simpliciter, &  
 „sine ullo fundamento dicunt: *non credo:*  
 „*non teneor credere &c.* Tales, utinam  
 „non in æternum sentire cogèrentur, quod  
 modo

., modò credere nolunt. Hactenus vix non in terminis laudatus Doctor.

Dices fortassis: pro meo beneficio mihi impetrando tertius quidam nedum verbo, sed opere etiam, immò auro & argento laboravit, ast, me invito & contradicente: tenebörne illud dimittere, an verò fas mihi est illud protinus retinere.

¶ Si scivisti, illud beneficium stante 652.  
etiam, & non obstante tua contradictione, tibi fuisse simoniacè procuratum, probabilius neque acceptare licuit, neque etiam retinere; hóc quippe modo videreris quodammodo ratihabere & approbare simoniam commissam. At verò, si simoniacæ procurationi contradicendo te opposuisti, & nihilominus te ignorante beneficium simoniacè fuit exprobatum, tu velut immunis à culpa, pariter eris immunis ab omni pœna, ita, ut tutò possis illud retinere. Ita communis Doctorum sententia, satis declarata cap. sicut tuis 33. de simon. sequentibus omnino verbis; quoniam ex eo, quòd contra prohibitionem & voluntatem tuam (à qua postmodum minimè recessisti, aliquis te penitus ignorante promisit pecuniam & exolvit, nihil tibi debet ad pœnam vel ad culpam imputari. Videatur de hoc Lessius lib. 2. de J. & J. 6. 35. dubit. 25, n. 143.

Quod verò mox dictum fuit de contradicente simul & ignorante, suum benefi- 653.

Bbb 5

cium

cium reipsa per tertium simoniacè sibi fuisse impetratum, id ipsum à fortiori dicendum foret, casu quo alius quidam in fraudem quasi, eò scilicet fine, ut hòc modo te ab assecutione beneficii impediret, dedisset pro eodem beneficio, non aliter, quàm simoniacè impetrando, pecuniam. Nam in hoc casu provisio beneficii valida foret & provisos licitè illud retinet, esto ex pòst facto resciat, simoniam ab alio fuisse commissam, prout clarè statuitur *cap. Nobis fuit. 27. de simon.* idque omnino sapienter; quia non est indulgendum malitiis hominum; & non debet aliquis alterius odio præggravari. *ca. Non debet 22. de R. J. in 6to.* Ita communis & certa sententia DD.

654. Colliges 3tiò, causas & titulos, qui excusant à culpa simoniæ pariter excusare à pœnis in simoniacos latis de jure. Unde qui temporale dant pro spirituali vel vicissim, sed omnino gratis sine ullo explicito vel implicito pacto &c. vel qui aliquid rependunt præcisè ex gratitudine ad satisfaciendum obligationi antidotali &c. à pœnis simoniacorum eximendi sunt. Ratio est: quia ubi nulla præcessit culpa, ibi nulla infligi debet pœna; nam: *sine culpa, nisi causa subsit, non est aliquis puniendus*, ut dicitur *cap. sine culpa 23. de R. J. in 6to.* atqui in casibus mox recensitis nulla committitur culpa: ergo &c.

Colli-

Colliges Insuper 4tò , neque illos subji- 655.  
ciendos esse simoniacorum pœnis . qui re-  
vera simoniam committunt , sed ex igno-  
rantia invincibili & inculpabili (qualis meò  
quidem judicio revera frequenter commit-  
titur à communi plebe vel à Simplicioribus  
circa res spirituales ) esto fortassis non ita  
frequenter à Clericis circa beneficia spiritua-  
lia vel officia Ecclesiastica.

Ratio autem hujus resolutionis est eadem,  
quæ proximè fuit data ; ubi enim interve-  
nit ignorantia invincibilis, ibi culpa locum  
non habet secundum communissimam Do-  
ctorum insinuatam *de actibus hum. part. 2.*  
*confer. 2. n. 38.* at, ubi culpa locum non  
habet, ibi nec pœna, secundum proximè  
dicta : ergo ignorantia inculpabilis, seu in-  
vincibilis excusat à pœnis simoniæ.

Bene est, inquires fortassis : Ego Simo-  
niacè obtinui meum beneficium , procu-  
rando illud per pecunias , ast non scivi ,  
in hoc casu Simoniam committi , quin  
potius persuasum mihi habui . modernam  
praxin id ferre : ergo possum illud pro-  
tinus salvâ conscientia retinere ac possi-  
dere.

*R. Transmisso antecedente.* Cujus suppo- 656.  
situm foret pessimum , *neg. consequ.* Enim-  
verò nullitas provisionis & inhabilitas ad  
idem beneficium non sunt pœnæ , sed sta-  
tuuntur per SS. Canones in detestationem  
crimi-

criminis ad præcludenda majora mala, ne scilicet ad hujusmodi beneficia quærat aditus etiam ab indignis, quos non capacitas, non merita, nec animarum zelus, sed mammona iniquitatis, vel etiam iniquitas Mammonis, id est, divitiarum promoveret. Illud tamen solatii causâ tibi insinua-verim, quodd si revera ex invincibili ignorantia Simoniacæ labis hoc attentaveris, & post agnitum errorem beneficio obtento renuntiaveris, ab Episcopo probabiliter dispensari valeas & habilitari ad idem beneficium, secundum dicta superius n. 642. Num autem Episcopus sit dispensaturus, tu videris.

657. Dixi insuper eos, qui *ex ignorantia invincibili & inculpabili Simoniam* committunt, esse eximendos à pœnis &c. Major quippe controversia movetur inter Doctores, an etiam illi, qui scienter, vel certè cum dubio practico, & hõc ipso culpabiliter Simoniam committunt, & solum ignorant pœnas à jure statutas, an inquam, tales nihilominus incurrant pœnas Simoniacorum?

Quocirca omnes quidem Doctores fatentur, ab iis non incurri censuras, utpote latas in contumaces duntaxat, hi verò contumaces dici nequeunt: ergo &c. At verò reliquas pœnas Simoniacorum etiamnum à talibus incurri, communissima sanè

&



& probabilissima fert sententia Doctorum, videnda apud Azorium *part. 1. l. 1. c. 15. q. 1. & 2.* Herincx noster *part. 2. tr. 10. disp. 5. p. 3. n. 28. & 29.* Laymann *lib. 1. tr. 4. c. 20. n. 6.* & alios passim.

Ratio hujus est : quia ignorantia solius pœnæ non excusat à culpa, quæ est causa inductiva pœnæ, immò verò, quisquis scienter aliquam legem prævaricatur, ipso facto sese implicite saltem censetur subicere pœnis à jure statutis in prævaricatores, proptereaque DEUS, licet misericors & justissimus, nihilominus in inferno affligit diversis pœnarum generibus peccatores, esto peccantes ignoraverint se hoc vel illud pœnarum genus incursum : erga pariter Simoniaci scienter & culpabiliter tales conturbentur & statutis à jure pœnis affiendi sunt, quantumvis supponantur illas ignorasse.

His tamen non obstantibus R. P. Pichler *in compend. J. Can. jam sæpius cit. lib. 5. tit. 3. n. 22.* hodieum probabile existimat, ab iis, qui solas etiam pœnas Simoniacæ ignorarunt, eas non incurri; eò quod pœnæ à jure statutæ non incurrantur ab ignorantibus jus, veluti DD. communiter tradunt, nominatim Krimer & Sanchez, videndi apud eundem Pichler *lib. 4. Compend. tit. 7. n. 4.* Et hanc ob causam mulier ignorans virum, cum quo peccat, esse

esse conjugatum, non incurrit impedimen-  
tum criminis &c. Non ausim huic opi-  
nioni suam denegare probabilitatem, pro-  
ptereaque insinuandam duxi; quippe qua  
fortassis Confessario aliquando posset ser-  
vire; præsertim in casu, ubi ex parte pœ-  
nitentis animadverteret magnam difficulta-  
tem, & inde subsecuturum animæ pericu-  
lum, casu quo ad sectandam priorem opi-  
nionem, quam ego nedum tutiorem (ut  
de se liquet) sed & longè probabiliorem  
censeo, adigeretur. Et hæc tum in pri-  
mum Decalogi præceptum, tum etiam de  
Fide, Spe, & Charitate dicta velim, non  
tam dogmatizando, quàm subjiciendo, ea,  
qua par est, cum humilitate judicio sanctæ  
Matris Ecclesiæ Romanæ. Faxit benignif-  
simus Deus, ut, dum hæc legendo revol-  
vimus, in nobis jugiter augeatur Fides,  
firmetur Spes, & inflammetur Charitas  
ad animarum salutem, & majorem gloriam  
Illius, qui omnium actionum nostra-  
rum esse debet Scopus & ul-  
timus

FINIS.



IN-



# INDEX ALPHABETICUS

Rerum & Materiarum  
in hoc opusculo contentarum

NB. Littera C. Conferentiam, n. verò  
cum cifra numerum marginalem denotat.

## A.

**A**bsolvere ab excommunicatione & aliis pœnis  
hæreticorum, quinam valeant c. 5. n. 144.  
Quid sit Absolutio in foro in- & externo, & quæ  
differentia inter Absolutionem in foro Sacramenta-  
li, & non Sacramentali. Ibidem n. 145. An ab  
his pœnis Episcopi Germaniæ valeant absolvere.  
ibid. n. 146. Et quidnam circa hoc valeant Præla-  
ti Regulares respectu suorum subditorum aliique  
Confessarii privilegiati c. 5. n. 148. & seqq. An  
vel à quonam absolvi valeant relapsi in hæresin ibi.  
n. 159. An fas sit negare absolutionem illi, qui de  
hæresi est suspectus n. 160. An hæretici materia-  
les tantum ad Fidem Catholicam conversi possint  
vel

## *Index Alphabeticus*

vel debeant absolvi c. 5. n. 165. An quivis Confessarius in Germania absolvere valeat hæretico etiam formales ad gremium S. Matris Ecclesiæ revertentes. c. 5. n. 166. & seqq.

*Absolvere* à censuris & pœnis ob simoniam incursis, quinam valeant c. 20. n. 631. item num. 645

*Adoratio*, quid sit, & quotuplex c. 14. n. 422 & 423. Qualis adoratio debeat Deo, Christo, SS. Eucharistiæ Sacramento, Humanitati Christi, B. Virgini & reliquis Sanctis nec non Sanctorum Imaginibus & Reliquiis c. 14. num. 424. & seqq. Qualis cultus exhiberi possit singularibus Dei amicis nondum canonizatis. ibidem n. 441. Qualis cultus SS. Cruci, aut Sanguini Christi exhibendus c. 14. n. 447. & seqq.

*Actus misericordiæ*, qui & quot dentur. c. 9. n. 268. & 269.

*Apostasia* quid sit, & quotuplex. c. 3. num. 86. Quas pœnas incurrant Apostatæ à fide. ibid. n. 153. Et quasnam incurrunt Apostatæ à Religione. ibid. n. 153. A quonam hi absolvi possint vel debeant c. 3. n. 155.

*Ars Cabalistica*, an licitè exerceatur. c. 16. n. 502.

*Artificialium usus*, in ordine ad procurandos effectus extraordinarios, an permittendus. c. 16. n. 518.

*Astrologia judiciaria* quid, & an toleranda c. 16. n. 486.

*As.*

*Attentio* quid sit, & quod duplex, & quænam necessaria ad veram orationem. c. 13. n. 418.

**B.**

*Beneficia Ecclesiastica*, quomodo sine nota simoniæ impetrari possint vel debeant. C. 19. n. 605. Quomodo absque nota simoniæ fieri possit vel debeat beneficiorum resignatio c. 20. n. 637. Quid nomine beneficiorum Ecclesiasticorum in puncto simoniæ intelligatur. ibidem n. 638. Quinam veniant nomine Superiorum, quorum auctoritate talis resignatio fieri debet. c. 20. n. 639.

*Biblia Sacra*, legentes, an, vel quinam peccent. c. 4. n. 136.

*Bona temporalia*, quot modis sint annexa spiritualibus. c. 19. n. 598.

*Bonorum* triplex genus distinguitur in ordine ad regulandam charitatem c. 7. n. 209. 211. & 230. Alia Bona dicuntur necessaria ad naturam vel statum, & alia superflua: & quænam illa? c. 9. u. 275.

**C.**

*Charitas Theologica* quid? c. 7. n. 199. Quod duplex? ibid. 200. quid amor intensivè, & quid appetitivè summus. c. 7. n. 201. Quomodo teneamur diligere Deum super omnia, ibi. n. 202. quoties, & quando hoc præceptum per se obliget. num. 202. & 204. An huic satisfieri possit per actum implicitum & virtuales amoris, c. 7. n. 205. Quomodo Rudiores ad actum supernaturalem charitatis practicè excitari possint vel debeant. ibid. n. 206.

*R. P. Elbel, Pars II. de Fide &c.* Ccc Quo-

Quomodô teneamur diligere proximum, & quisnam nomine proximi intelligendus sit. c. 7. num. 208. Qualis ordo charitatis sit observandus tum respectu diversorum bonorum, tum etiam diversarum necessitatum. ibid. à num. 210. Quomodo, vel quando teneamur succurrere proximo in necessitate spiritali constituto ibid. n. 213. item n. 219. 222. & seqq. rursus n. 228. Quam ob causam charitas habitualis seu gratia sanctificans perdat. ibid. n. 214. An vel quomodo contra charitatem peccet, qui proximum innocentem vita privat ut sibi paret mortem c. 7. à n. 215. Contra charitatem Dei quomodo peccari possit. c. 7. n. 226. Qualis ordo dilectionis servandus sit inter ipsos proximos, nec non inter bona naturalia, & supernaturalia. ibid. in 230. & 231. Contra ordinem charitatis agitur, præferendo creaturas irrationales rationalibus c. 7. n. 232.

*Charitatis signa* alia dicuntur communia seu generalia, alia specialia c. 8. n. 234. Quænam ex his etiam inimicis sint exhibenda. ibid. n. 235. & seqq. An fas sit negare veniam proximo deprecanti. ibid. n. 251. An insuper teneamur proximum diligere actu interno. c. 8. n. 243.

*Chirurgus*, an teneatur gratis succurrere aut mederi pauperibus, c. 9. n. 293.

*Communicatio fidelium cum infidelibus*, quæ, vel quando aut in quibus circumstantiis sit licita. c. 4. n. 105. Quænam sit cum Judæis permessa ibid. n. 107. Quænam cum hæreticis. c. 4. n. 108. & seqq.

*Con-*

*Rerum & materialium in hoc opusculo &c.*

*Concionator* volens è suggestu corrigere populum quidnam observare debeat. c. 10. n. 320

*Contentio* quid sit, & quale peccatum. c. 11. n. 339. & 340.

*Controversia* hisce temporibus ab hæreticis excitari solitæ, an à fidelibus licitè legantur. c. 4. n. 133.

*Conversis* ad veram fidem, an debita sit sustentatio ex hac ipsa causa. c. 9. n. 290.

*Cooperari* ad peccatum alterius, an, vel quando fas sit. c. 12. n. 361. 369. item n. 384. & seqq. An ex metu mortis liceat adjuvare furem vel latronem in asportanda cista furtiva. c. 12. n. 386. An vel quando fas sit proximo præbere ansam, vel etiam materiam peccandi. c. 12. n. 387. & 388.

*Correctio fraterna* quid & quomodo cadat sub præceptum c. 20. n. 296. 297. & 315. Utrum hoc præceptum æqualiter obliget Superiores & subditos. ibid. n. 299. item n. 309. & seqq. Qualis modus observari debeat circa correctionem fraternam, ibi. n. 300. An etiam Superiores Religiosorum vel alii Religiosi teneantur servare ordinem corrigendi à Christo Domino præscriptum, c. 10. n. 302. item n. 313. & 317. Utrum ancilla Dominam. Uxor Maritum &c. teneantur fraternè corrigere. ibidem à n. 310. An subditus teneantur supplere fraternam correctionem, casu quo advertit eam à Superiore non adhiberi &c. n. 319. An hoc præceptum obliget in casu, ubi de delicto certo non constat, vel non apparet certa spes emendationis C. 10. n. 321. & 322.

## *Index Alphabeticus.*

*Cultus latriæ*, Hyperdulæ & Dulæ, quid sint. C. 14. n. 423. Qualis cultus debeat Deo, Christo, SS. Eucharistiæ Sacramento. Humanitati Christi, Sanctissimo Nomini Jesu. B. Virgini, Sanctis, Sanctorumque Reliquiis & imaginibus. c. 14. n. n. 424. & seqq. Qualis cultus debeat hominibus in fama Sanctitatis defunctis, nondum tamen beatificatis aut canonizatis. ibidem 441. & seqq. Qualis cultus S. Cruci Christi. n. 447. Quid si locò veræ expōnatur falsa seu supposititia Crucis particula, aut apocrypæ Sanctorum Reliquiæ. c. 14. n. 446. Quomodo colendus sit Sacratissimus Christi Sanguis, hinc inde in diversis Ecclesiis reservatus. ibidem n. 448. Quid de Reliquiis Sanctorum nondum approbatis, vel ab Ecclesia recognitis, c. 14. n. 449. & seqq. Qualis cultus debeat ceris Papalibus. ibid. n. 453.

*Cyngaros* consulere. eorumvè divinationibus se accommodare an liceat. c. 16. n. 511.

## D.

*Damon* ex Energumenis, an licitè consulatur. & quid de ejus respōsis tenendum sit. c. 15. n. 479. & 480.

*Desperatio* quid sit. c. 6. n. 180. Quid tenendum de illis. qui idèd liberius peccant, eò quòd credant se certò certius damnatum iri, vel qui dicunt, se non amplius posse ab hoc vel illo vitio abstinere. c. 6. à n. 182. Quid de eo, qui desperat de sanitate, propterea que non amplius vult sumere medicinam. c. 6. n. 185. Vel qui idèd facilius con-



consentiunt in peccatum, eò quod sibi persuadent, pœnitentiam à Confessario propterea parum, vel nihil omnino augmentatum iri. c. 6. n. 187. Quomodo peccet, qui ex desperatione alium provocat ad duellum. C. 6. n. 188. Quomodo hujusmodi homines desperabundi à Confessario sint tractandi. ibid. n. 191. Quomodo ad actum spei adjuvandi aut erigendi. ibidem. n. 193. An licité desperaret ille, qui ex certa revelatione scit se damnatum iri. c. 6. num. 198. An detur parvitas materiæ in peccato desperationis. ibidem n. 197.

*Devotio* quid sit, c. 13. n. 394. Quænam principaliter devotionem impediant. ibid. n. 415.

*Discordia* quid sit, & quale peccatum. c. 11. n. 336. & 337.

*Dispensare* in irregularitate ob hæresin incurfa, quinam valeant. c. 5. n. 151. Et quinam valeant dispensare in pœna inhabilitatis &c. ob simoniam incurfa. c. 20. n. 631.

*Dissimulare* fidem, an, vel quando liceat? Et quænam sit differentia inter dissimulationem & negationem fidei. c. 3. n. 49. & 50. item n. 64. 67. ac seqq.

*Distractioes* inter orandum, an, vel quando sint peccaminosæ. c. 13. n. 419. & 420.

*Divinatio* quid sit, & quotuplex. c. 16. n. 481. Quot dentur species divinationis cum pacto expresso, & quot cum pacto implicito ibid. n. 483. & 484. Quale, & quàm grave peccatum sit divinatio. ibidem n. 485. Quid tenendum de divinationibus ex Astrologia, Physiognomia, somniis, aut

## *Index Alphabeticus.*

fortibus petita. c. 16. à n. 486.. Quid de divinatione ex arte Cabalistica tenendum.. ibid. à n. 502. Quid de divinationibus ex inspectionibus aquarum, speculorum &c. ibidem n. 505. & seqq.. Quid denique de divinatione vel etiam consultatione Cyngarorum tenendum sit? c. 16. n. 511.

*Divites*, an, vel quando teneantur dare eleemosynam. c. 9. n. 275. item n. 292.

*Dubitans* de aliqua veritate fidei, an habendus sit pro hæretico. c. 3. n. 85.

*Dulia* quid sit? c. 14. num. 423. Vide *Cultus Dulia*.

## **E.**

*Eleemosyna* quid sit, & quotuplex. c. 9. n. 271. An vel quando cadat sub præceptum. ibid. n. 272. Quinam eleemosynam dare possint vel non, ibidem n. 273. Quomodo teneamur sublevare indigentiam proximi in necessitate constituti. c. 9. n. 276. & seqq. item 287. & 295. An fictus pauper licite petat eleemosynam, & an revera aquirat dominium illius. c. 9. n. 283. & 284. An quæstus eleemosynarius justè valeat prohiberi. ibid. 288. An peccent, qui conversis ad fidem Catholicam non subministrant media sustentationi necessaria. c. 9. n. 290. An Medici, Chyrurgi & Pharmacopolæ teneantur pauperibus gratis succurrere, vel administrare ea, quibus indigent. c. 9. n. 293. & 294. An extremè indigenti teneamur gratis succurrere per eleemosynam. ibid. n. 281. An vel quænam dentur causæ excusantes ab eleemosyna, cap 9. n. 279.

*Fides*

**F.**

*Fides* ut sit quid? & quid, vel quotuplex sit Fides Divina. c. 1. n. 7. & 8. Quodnam sit objectum materiale & formale fidei Divinæ. ibid. n. 9. & 10. Quæ, & quanta sit necessitas fidei Divinæ supernaturalis, ibidem n. 11. & 12. Quid sit fides explicita, & quid implicita. n. 15. Quomodo utraque hæc sit necessaria ad salutem. c. 1. n. 16. & 17. Quænam fidei mysteria quivis fidelium teneatur scire & credere necessitate præcepti. ibidem n. 18. Quomodo quivis respectivè teneatur hujusmodi mysteria scire ibid. n. 20. & 21. An peccet fidelis, qui non discit memoriter symbolum fidei, & orationem Dominicam, c. 1. n. 22. Quandonam vel quomodo omnes adulti teneantur assentiri mysteriis fidei sibi sufficienter propositis, c. 1. n. 23. Et quando hæc mysteria censerī debeant satis fuisse proposita. ibid. n. 24. Quid de pueris ac puellis quoad hoc tenendum sit, ibid. n. 25. An vel quoties præceptum fidei obliget per se, & quoties obliget per accidens. c. 1. n. 26. An huic præcepto satisfieri possit ex eo, quod quis in genere duntaxat credat, quidquid à Deo revelatum fuit. c. 1. n. 37. Quandam unusquisque fidelium debeat adhibere diligentiam in addiscendis fidei mysteriis. ibid. n. 38. Fidem exterius profiteri, an, vel quando teneamur. c. 2. n. 44. & seqq. Vide *Professio externa fidei*. Fidem veram nunquam licet negare. c. 2. n. 52. Quandonam quis verbis aut factis, vel etiam signis censeatur negare veram fidem. c. 1. n. 58. & seqq. item à n. 71. Ccc 4 Fra.

## *Index Alphabeticus.*

*Fraterna correctio* quid & quomodo, vel quando obliget. c. 10. n. 296. Vid *Correctio fraterna*.

## H.

*Hæresis* quid c. 3. n. 81.. Quid hæresis formalis, & quid materialis. ibi. n. 82. Quæ vel quanta pertinacia requiratur ad formalem hæresin, ibidem n. 83. An ille, qui protestatur se velle amplecti fidem Lutheranam, habendus sit pro hæretico ibid. n. 88. Quid censendum de illo, qui negat, S. Pontificem è Cathedra loquentem, esse infallibilem, vel esse supra Concilium œcumenicum. c. 3. n. 95. & 102. ac seqq. Quid de eo, qui de aliqua veritate fidei dubitat. ibid. n. 85. Quomodo tractandi sint, qui petunt instrui in Fide Catholica. c. 3. n. 91.

*Hæreticus* aut infidelis, an in sua secta licitè perseveret, tametsi judicet, Fidem Catholicam esse verosimiliorem. c. 1. n. 29. Quid Confessario sit observandum, vel quomodo procedendum sit cum talibus, præsertim in articulo mortis jamjam constitutis. ibidem n. 30. & seqq. item n. 41. An hodie dentur hæretici materiales. c. 3. n. 97. & 98.

*Hæreticorum pœna*, quæ & quot. c. 5. à n. 137. Vide *Pœna hæreticorum*. An de hæresi suspectus justè privari possit beneficio absolutionis. C. 5. n. 161. Quomodo inter hæresin formalem & materiale distinguendum sit, & qualiter hæresis debeat exterius fuisse manifestata, ut propter eam pœnæ incurrantur. c. 5. n. 163. & 164. Hæretici ad Fidem conversi, an in Germania absolvi possint,  
aut

aut debeant. c. 5. n. 165. Vide *absolvere ab hæresi*.

*Hyperdulia Cultus* quid sit. c. 14. n. 423. Vide *Cultus hyperdulia*.

I.

*Idololatria* propriè dicta quid sit, & quotuplex c. 15. n. 461. & 462. undenam suam traxerit originem. ibid. n. 463. An illi, qui cultum idololatricum in Theatris repræsentant, vel qui Sanctorum imagines colunt, vel qui SS. Eucharistiæ Sacramentum adorant dici mereantur Idololatræ. c. 15. à n. 476. An sine nota idololatriæ fas sit alloqui dæmonem in Energumētis, ejusdemvè responsis fidem adhibere. c. 15. n. 449. & 480.

*Ignorantia* an vel quæ excuset à pœnis in simoniacos de jure statutis. c. 20. n. 657.

*Infideles* seu hæretici an ab infidelitate sint excusandi, dum adhærent suæ sectæ, esto judicent Fidem Catholicam esse verosimiliorem. c. 1. n. 29. Quomodo à Confessario sint tractandi præsertim in articulo mortis. ibid. n. 31. & seqq. An in loco sacro sepeliendi? ibidem n. 36.

*Infidelitas* quid sit, & quotuplex. c. 3. n. 76. & 77. Quale & quàm grave peccatum sit. ibid. n. 84. Sitnè habendus infidelis, qui dicit, se velle amplecti Fidem Lutheranam. c. 3. n. 88. Vel qui dicit, se credere id, quod sui Parentes credunt, cum tamen unus ex his sit Catholicus alter A catholicus, ibid. n. 93. An sit infidelibus accensendus, qui negat omnes consodales Sanctæ Ursulæ fuisse Virgines,

## *Index Alphabeticus.*

nes ibidem n. 94. Vel qui pertinaciter asserit, se hoc nunquam crediturum, tametsi S. Pontifex è Cathedra idipsum declareret. c. 3. num. 95. Sintnè habendi pro infidelibus illi, qui decisiones à S. Pontifice è Cathedra factas nolunt recipere in eo sensu, quem S. Pontifex intendit. c. 3. n. 100. Vel qui negant, summum Pontificem esse supra Concilium. ibi. n. 102. Ob peccatum infidelitatis amittitur fides. ibid. n. 103. Quomodo infideles sint instruendi, priùs quàm ad professionem fidei admittantur.

*Inimicos* diligere, an vel quantum teneamur. e. 8. n. 233. item n. 244. An unquam fas sit inimicum odisse ibid. n. 239.. Quid si pœnitens dicat, se non posse ignoscere, aut certè non posse oblivisci injuriæ. c. 8. n. 263. An inimicus licitè excludatur ab oratione communi. ibid. n. 266. Undenam dimetienda sit gravitas vel levitas peccati inimicitiae. c. 8. n. 267. Quomodo Confessario procedendum sit cum iis, quos novit mutuà inimicitia implexos. c. 8. n. n. 260. & seqq.

*Injuria* propriè talis quid sit, & quomodo differat ab offensa. c. 8. n. 242.

*Invidia* quomodo differat ab odio. c. 11. num. 352.

*Irregularitas* an, vel quando incurratur ob hæresin. c. 5. n. 142. Quinam in eadem dispensare valeant. ibidem n. 51.

*Irreligiositas* quid sit. c. 18. n. 555.

*Judaismus* in quo consistat. c. 3. n. 80.

L.

*Latria* seu cultus latriæ quid sit. c. 14. n. 423.  
Quinam debeat. ibidem n. 424. & seqq.

*Liber hæreticus* quid sit, & quinam veniant nomine imprimentium, defendentium, fautorum &c. c. 4. à n. 114. Librorum prohibitorum triplex classis insinuat. ibid. n. 117. & 118. Quænam pœnæ ob horum lectionem incurrantur. n. 119. An vel qualiter istæ pœnæ incurrantur in nostris partibus, Germaniæ scilicet. c. 4. n. 120. An Uxor Catholica teneatur denunciare Maritum hæresi infectum. ibidem num. 121. An Bibliopega peccet compingendo libros hæreticos, vel tales penes se retinendo ad aliquod tempus. c. 4. n. 124. & 125. Utrum Catholico liceat acceptare libros hæreticos in compensationem debitorum. ibi. n. 126. An ob evitandum infamiæ periculum Catholico permittendum, ut librum hæreticum prælegat acatholico. c. 4. n. 127. & 128. An ob similem causam licuerit ancillæ Catholicæ comitari Rusticum Lutheranum emigrantem in aliam Provinciam acatholicam. ibidem n. 129. & 130. Utrum omnis, qui librum acatholicum vel hæreticum legit, incurrat censuram. ibid. n. 131. Quid agendum, dum quis legendo reperit nonnullas hæreses in libro, cujus Authorem ignorat. c. 4. n. 132. An fas sit cuivis legere controversias huius temporis ibidem n. 133. Quid si in eodem volumine reperiat compactus liber hæreticus cum Catholico. c. 4. n. 134.

*Lectio* librorum hæreticorum an ab Ecclesia iuste pro-

## *Index Alphabeticus.*

prohibeatur fidelibus c. 4. n. 112. Quid ad hanc censuram incurrendam ( latam scilicet in legentes librum hæreticum ) necessarium sit. n. 113. & seqq. Legens librum perniciosum quemcunque , an vel qualiter peccet. c. 4. n. 135. Et quid de legentibus Sacra Biblia. c. 4. n. 136.

*Locus sacer* quis dicatur. c. 18. n. 566. Quando vel quomodo censeatur pollui, aut indignè violari. Ibidem n. 575.

## M.

*Magia* ut sic, quid sit. c. 17. n. 520. Quid & quotuplex sit magia superstitiosa ibi. n. 521. & 522. Quidnam, vel quantum magi aut sagæ valeant 1. circa Elementa? 2. circa corpora humana? & 3. in animas hominum. c. 17. à n. 523. An per magiam homo excitari valeat ad amorem lascivum ibi. n. 537. Et quid Confessario agendum sit cum tali pœnitente. c. 17. n. 538. An per artem magicam fur cogi possit ad restitutionem ablatorum. c. 17. n. 540. An sine nota magiæ vel superstitionis fas sit repercutere Sagam aut magum, vel etiam torquere animalia intoxicata eo fine, ut cessent ab ulteriori infestatione c. 17. n. 541. item n. 553. An liceat alia signa contraria ponere, ut magus aut Saga cesset à maleficio, præsertim in casu, quo dubitatur, an tale signum non sit superstitiosum. c. 17. n. 542. & 543. Quid agendum cum pœnitente, qui se profitetur magum &c, an fas sit ab eo prætereendere probam artis magicæ. c. 17. n. 544. & 545. item n. 551. De quibus Sagæ vel  
Magi



Magi specialiter sint examinandi. c. 17. n. 547. Quomodo ad frugem meliorem sint reducendi ibi, n. 548. Magorum opera: an dici mereantur vera miracula. c. 17. n. 549. & 550.

*Maleficium* quid sit c. 17. n. 529. Quid phyltrum & veneficium ibi. n. 530. & 537. quænam remedia sint adhibenda contra maleficia. ibidem n. 551. An fas sit solvere maleficium per aliud maleficium. c. 17. n. 532. Quid, si dubitetur, an à Mago vel Saga solvi possit sine novo maleficio. ibi. à n. 533. An is, qui maleficium vel phyltrum amoris posuit, teneatur illud rursus auferre. ibidem n. 539. An ad se liberandum à maleficio vel infestatione fas sit, Sagam repercutere, vel etiam signa contraria apponere, præsertim si dubitetur, an hæc non sint superstitiosa. c. 17. n. 541. & seqq. item n. 545. & 553. An fas sit vertere scopam prope vel retro portam cubiculi, aut projicere pulvinar, eo fine, ne Saga possit egredi è cubiculo &c. c. 17. n. 552.

*Medici*, an teneantur gratis succurrere pauperibus. c. 9. n. 274.

## N.

*Necessitas* proximi: quæ dicatur extrema, quæ gravis, & quænam communis. c. 9. n. 274. An, quando, vel quomodo consanguineis, vel aliis in necessitate constitutis, per eleemosynam teneamur succurrere. ibidem à n. 276. An vel quænam causæ excusent à largitione eleemosynæ. ibidem n. 279. An teneamur proximo in extrema necessitate consti.

## *Index Alphabeticus*

tuto succurrere gratis, an verò sufficiat necessitatem sublevare cum onere recompensationis. c. 9. n. 281.

*Negare* veram fidem an unquam fas sit. c. 2. n. 52. quandonam verbis, vel signis vel etiam factis quis censeatur veram fidem negare ibi. n. 53. & seqq. item à n. 71. an ille, qui tempore persecutionis aufugit, censeatur per hoc negare veram fidem c. 2. n. 74.

## O.

*Occidere* injustum stupratorem ob conservandum pudicitiae bonum, an fas sit. c. 7. n. 220.

*Odium* DEI quàm sit grave peccatum. c. 7. n. 227. fitne aliquando licitum odisse inimicum. c. 8. n. 239. item n. 249. & seqq. Quid sit odium & quoduplex c. 11. à n. 326. An vel quando fas sit, sibi mer, vel etiam proximo malum velle. c. 11. n. 330. & seqq. item n. 341. & 343. Quomodo à Confessario tractandi sint illi, qui in continuo odio vivunt ibidem n. 348. & n. 353. quomodo peccent, qui aliis malè volunt vel imprecantur. c. 11. à n. 349. Quænam sit differentia inter odium & inimicitiam: ibidem n. 352.

*Offensa* quid sit. c. 8. n. 242. Ad quid teneatur, qui alium offendit. ibi n. 244. & 245. Quid si duo mutuo sese offendisse supponantur. ibidem d. 246. An offensus teneatur acceptare reconciliationem, ibi n. 247. & n. 255. Quid si offensus nolit amplius dare veniam, vel admittere reconciliationem. c. 8. n. 256.

## *Opera*

*Rerum & materiarum in hoc opusculo &c.*

---

*Opera* misericordiæ quæ, & quot c. 9. n. 270.

*Oratio* propriè dicta quid, c. 13. n. 395. quinam actus, vel quænam conditiones ad hanc sint necessariae. ibi. n. 396. quid sit oratio vocalis, & quid mentalis. ibidem n. 397. Quis orandus. c. 13. n. 398. item n. 410. Quinam utiliter orare possint, aut debeant. c. 13. n. 399. & n. 400. Pro quibus orandum sit. ibi. n. n. 401. An liceat quempiam positivè excludere ab oratione communi. ibidem n. 408. Quid sit orandum seu postulandum à DEO. c. 14. à n. 402. an liceat postulare rem indifferentem. ibi, n. 404. item n. 410. An, vel quomodo peccet, qui ex desperatione non ampliùs vult orare. ibidem n. 405. vel qui preces debitas nimium differt n. 407. vel qui orando rem malam postulat. c. 13. n. 412. Quid causæ subsit, cur non raro videamur incassum orare. ibi. n. 416. Qualis intentio & attentio necessaria sit ad veram orationem. ibidem n. 417. & 418. An oratio fusa pro pluribus sit minoris efficaciae. c. 13. n. 421.

*Ordo charitatis* qualis sit observandus circa dilectionem tum sui ipsius, tum etiam respectu proximi. c. 7. n. 210. Qualis ordo dilectionis porro sit observandus inter ipsos proximos. ibidem n. 229.

**P.**

*Paganismus* quid sit. c. 3. n. 79.

*Parentibus* quàm gravis incumbat obligatio instruendi proles suas in rebus ad salutem necessariis. c. 1. n. 39.

*Pasto.*

## *Index Alphabeticus*

*Pastoribus* item animarum quanta incumbat obligatio, tum sciendi ea, quæ ad salutem sunt necessaria, tum alios etiam sibi subiectos in iisdem instruendi. c. 1. n. 19. & 40.

*Pauperibus*, an, quinam vel quando teneantur mediante Eleemosyna succurrere. c. 9. n. 276. & seqq. an pauper ficticius aquirat dominium Eleemosynæ, an verò teneatur eandem restituere Domino, à quo recepit. c. 9. n. 283, Vide *Eleemosyna*.

*Pecunia* ope dæmonis obtentæ, an licitè expendantur. c. 17. n. 554.

*Persona Sacra* quid, vel quinam hujus nomine intelligantur. c. 18. n. 560.

*Pertinacia* ad formalem hæresin necessaria, in quo consistat. c. 3. n. 83.

*Pharmacopola* an teneantur gratis dare medicamina pauperibus infirmis. c. 9. n. 294.

*Pœna* hæreticorum quæ, & quot c. 5. n. 137. Quid ad has incurrendas requiratur. ibi. 138. & seqq. An pœnæ civiles & Canonicae etiam in nostra Germania ab hæreticis æqualiter incurrantur tam à Clericis, quàm à Laicis. c. 5. n. 140. & 141. seqq.

*Pœna* Simoniacorum quot, & quæ. c. 20. n. 624. & seqq. Quinam ab his pœnis absolvere, vel in iisdem respectivè dispensare valeant. Ibidem n. 631.

*Pralati Regulares* an, vel quantum valeant circa suos subditos in hæresin vel Apostasiam prolapsos. c. 5. n. 155.

*Præ-*

*Rerum & materialium in hoc opusculo &c.*

*Præsumptionis peccatum quid sit.* c. 6. n. 181. Quinam censendi sint præsumptuosi. Ibi n. 194. & 195. An in peccato præsumptionis detur parvitas materiæ. c. 6. n. 197.

*Professio fidei externa*, atque quando vel à quibus facienda sit. c. 2. n. 44. item n. 51. 61. & 71. An à privato homine interrogatus teneatur fidem suam exterius profiteri. c. 2. n. 72.

*Proximus* noster quomodo sit diligendus. c. 7. n. 207. Quando vel quomodo teneamur eidem in necessitate constituto succurrere. ibi n. 213. 218. 222. Rursus. n. 228. Qualis ordo dilectionis sit servandus inter ipsos proximos. c. 7. n. 229. & seqq. Quomodo vel quando teneamur proximo dare Eleemosynam. c. 9. n. 276. & seqq. An vel quomodo fas sit proximo malum velle. c. 11. n. 330. & seqq. item n. 341. & à n. 349.

*Pueris atque puellis* quandonam vera fides censeri debeat fuisse satis proposita. c. 1. n. 25. Quidnam Confessario observandum sit vel agendum, casu quo dubitat, an tales præcepto fidei unquam satisfecerint. c. 1. n. 43.

R.

*Relapsus* in hæresin quisnam censeatur, & à quò vel quibus absolvi valeat. c. 5. n. 157. & seqq.

*Religionis* nomine quid intelligatur. c. 13. n. 390. Quid sit Virtus Religionis, quodnam hujus objectum, & qui vel quot dentur actus Religionis. c. 13. n. 391. 392. & 393. Religionis virtus an inter morales sit præstantissima. ibi. n. 413.

*R. P. Elbel, Pars II. de Fide &c.*

D d d A a

## *Index Alphabeticus.*

An etiam aliarum virtutum actus imperare soleat. c. 13. n. 414.

*Religiosi* Superiores an justè possint præcipere, ut frater fratrem delinquentem immediatè denuntiet Superiori sine omni correctione fraterna præmissa, c. 10. à n. 302. item n. 314. Quid Superiori Religioso agendum sit, casu quo animadvertit, subditum fuisse ab alio sibi delatum prætermissa omni correctione fraterna. ibi n. 305. Quænam cautelæ sint observandæ Religioso volenti alium deferre ad Superiorem. c. 10. n. 312. Quid si Religiosus dubitet, an teneatur suum confratrem denunciare, ibid. n. 313. Religiosi an possint committere Simoniam, suscipiendo Novitium intuitu bonorum temporalium. c. 19. n. 602. An, vel quando in electionibus ad officia vel beneficia Ecclesiastica Simoniam incurrunt. ibi n. 622.

*Reliquiæ* Sanctorum, an à fidelibus licitè colantur. c. 14. n. 435. & seqq. Quid si exponantur publicæ venerationi Reliquiæ falsæ, aut nondum approbatæ seu authentizatæ. ibid. n. 449.

*Res Sacra* quid sit, vel quid hujus nomine intelligatur. c. 18. n. 568.

*Resignatio* beneficiorum Ecclesiasticorum: quomodo fieri possit, aut debeat absque nota Simonia, c. 20. n. 637. item n. 649.

## **S.**

*Sacrilegium* quid sit, & quotuplex. c. 18. n. 561. & 562. Quid sit Sacrilegium personale, quid locale, & quid reale, & quot modis vel actibus hæc incur-

III. Cujusdam Civis, qui putans se domum  
locare honestæ Matronæ, paulò post inau-  
diit, se eam locasse Meretrici. 449.

*Conferentia XIII.*

De Virtute Religionis in genere, & de Oratione.  
464.

C A S U S.

- I. De quadam persona, quæ orando sæpius à  
DEO postulavit, ne supposito etiam lapsu  
in fornicationem evaderet prægnans, vel dif-  
famaretur coram Mundo. 480.
- II. De alio quodam, qui preces vi confœdera-  
tionis debitas pro defuncto ad aliquod tem-  
pus distulit, eò quòd ab eodem olim fuerit  
offensus 483.
- III. Cujusdam desponsatæ, quæ DEUM cœ-  
litésque implorare consueverat, ne sponsus  
mutatò animo Monachum induens à sponsa-  
libus resili-ret, 488.

*Conferentia XIV.*

De Adoratione, cultûque Sanctorum & SS.  
Reliquiarum 498

C A S U S.

- I. De quodam acatholico converso, qui nul-  
lum Sanctum invocare voluit. 523.
- II. Cujusdam Personæ, quæ certas quasdam  
)() ( 2 Reco-



Recolas seu Reliquias de venerabili Abbatissa  
Maria Joanna de Roveredo in multa vene-  
ratione habere solet. § 26.

III. De quodam Famulo, qui Domino suo  
quandam cistulam Sacris Reliquiis refertam  
abstulit. § 30

### *Conferentia XV.*

De Superstitione in Genere, nec non de Ido-  
latria in Specie. § 39

## C A S U S.

I. De quodam Religioso Confectore & Com-  
mendatore Schedularum Lucanarum, seu  
immaculatæ conceptionis. § 49.

II. Cujusdam militis, assueti ante solis ortum  
dicere certam orationem eo fine, ut sese  
redderet per 24. horas invulnerabilem. § 55.

III. Cujusdam pœnitentis, dubitantis an liceat  
uti virga Coryli in ordine ad detegenda ma-  
leficia. § 60.

### *Conferentia XVI.*

De Divinatione, & vana observantia. § 69.

## C A S U S.

I. Cujusdam Cabalistæ, qui per hanc artem  
assue-





III. De quodam Malefactore condemnato ad patibulum, qui Judices paulò ante suam mortem provocavit ad vallem Josaphat, seu ad extremum judicium. 309.

*Conferentia IX.*

De Eleemosyna.

323.

C A S U S.

I. De quadam fœmina, quæ, ut liberius posset indulgere genio suo ficto sub Schemmate paupertatis hinc inde collegit, vel potius expræcticavit eleemosynas. 339.

II. De quodam Libertino, qui amplum patrimonium suum non quidem in pauperes, sed in comessationes & computationes dissipavit. 344.

III. Cujusdam pauperculæ multum conquerentis, vel potius murmurantis contra constitutionem nuper editam de mendicitate publica omnino sublata seu prohibita. 346.

*Conferentia X.*

De Correctione Fraterna.

356


C A S U S.

I. Cujusdam famulæ, referentis suspectum lascivum consortium filiæ familias cum suo proco. 370.

II. De quodam Marito, gravato Uxore & famulo vitis multum deditis. 374.



III. De



III. De quodam Religioso, dubitante, an teneatur suum Confratrem immediatè denunciare suo Superiori, prætermiffa omni correctione fraterna. 378.

*Conferentia XI.*

De odio aliisque vitiis Charitati oppositis. 390

C A S U S.

I. Cujusdam Uxoratae, quæ dum advertit Maritum suum gravissimè affligi doloribus Calculi & podagræ eidem sincerissimè exoptavit majorem intensiorem dolorum 407

II. Cujusdam Ancillæ, afferentis, se summo-pere averfari immò odisse famulum quendam condomefticum. 409.

III. De quodam Professore affueto impugnare sententias sui Collegæ, esto illas agnoverit veriffimas. 413.

*Conferentia XII.*

De Scandalo. 422.

C A S U S.

I. Cujusdam Uxoratae, quæ se, suàsque proles de rebus à Maritò furtivè hinc inde ablati sustentare solet. 440.

II. De quodam libidinoso milite, affueto coram aliis passim proferre verba impudica 445.

III.

incurrantur. *ibid.* n. 563. & seqq. Quantum peccatum sit Sacrilegium. c. 18. n. 571. & 572. An vel quomodo committatur Sacrilegium locale ratione effusæ humani Sanguinis vel Seminis. *ibi.* n. 575. & 578. An obstrictus voto castitatis peccando contra hanc virtutem committat Sacrilegium. c. 18. n. 584. & 585. An Novitius Peccando contra castitatem committat Sacrilegium in Confessione necessario explicandum. *ibi.* n. 586. An auferens rem non sacram è loco Sacro Sacrilegii crimen incurrat. *ibi.* n. 587. An Sacrilegium possit committi omittendo actum &c. c. 18. n. 588.

*Saga* vel Magi quid aut quantum valeant 1. in Elementa. 2. in corpora. & 3. in animas hominum c. 17. n. 523. & seqq. An *Sagæ* reipsa ope dæmonis soleant transferri per aëra de loco in locum c. 17. à n. 526. An fas sit *Sagam* repercutere ad declinandam vexam injustam seu intoxicationem &c. *ibi.* n. 542. Quid si *Saga* propter talem repercussionem à dæmone intoxicaretur, vel aliò modo affligeretur. c. 17. n. 553. Quomodo *Sagæ* à Confessario sint examinandæ. *ibid.* n. 538. & 547. An pecuniæ à *Saga* vel mago ope dæmonis obtentæ licitè expendantur. c. 17. n. 554.

*Sancti*, an à fidelibus licitè invocentur. c. 14. n. 431. & seqq. Quid si cum fama Sanctitatis defunctus supponatur nondum beatificatus aut canonizatus. *ibi.* n. 441. & seqq. Quid de Sanguine Christi, nec non de Sanctorum Reliquiis censendum sit. c. 14. à n. 448.

## *Index Alphabeticus.*

*Sanguinis* humani transplantatio an licitè fiat in ordine ad recuperandam sanitatem. c. 16. n. 517.

*Scandalum* quid sit, & quotuplex. c. 12. n. 354 & seq. Quàm grave peccatum sit. ibi n. 357. An fas sit facere malum, ob evitandum scandalum. n. 359. An propterea intermitteri debeant opera de consilio, vel de præcepto. ibid. n. 360. item n. 378 & 380. An & quando fas sit cooperari peccato alterius. c. 12. n. 361. item n. 383. rursus. n. 386. & seqq. An absque nota scandali liceat postulare opus, quod alter prævidetur non præstiturus sine peccato. ibid. n. 365. & seqq. Sitnè aliquando licitum suadere minus malum ad evitandum majus. c. 12. n. 369. Quomodo peccent peccato scandali 1. fœminæ utentes vestitu lascivo. ibi n. 371. & 382. Quomodo coram aliis turpia seu lasciva effutientes. ibid. n. 372. & 385. Quomodo sollicitantes ad concubitum. c. 12. n. 374. & 377. vel domum meretrici locantes. ibid. n. 375. Sitnè aliquando licitum proximo præbere materiam vel ansam peccandi. c. 12. n. 387. Ad quid teneatur ille, qui proximum scandalizavit. c. 12. n. 389.

*Schedula lucana* (uti vocantur) an absque nota superstitionis possint applicari pro felici partis expeditione. c. 15. à n. 465.

*Schisma* quid sit, & quid esse Schismaticum c. 3. n. 87. Quibus pœnis Schismatici fiant obnoxii. c. 5. n. 143.

*Seditio* quid sit & quale peccatum. c. 11. n. 338.

*Seput-*

*Sepultura Ecclesiastica*, an concedenda sit hæretico, de quo dubitatur, fueritne ante mortem absolutus à censura. c. 1. n. 36.

*Signa charitatis*, quænam dicantur communia, & quænam ex his proximo etiam inimico teneamur exhibere. ibid. à n. 235.

*Simoniam* quid sit. c. 19. n. 589. Quotuplex sit hujus pretium, & quot Simoniarum species, ibi à n. 591. An absque nota Simonie liceat dare temporale pro spirituali per modum motivi, aut per modum gratuitæ compensationis, ibid. à n. 594. Quinam possint Simonie notam incurrere. c. 19. n. 604. Quot modis Simonia committi possit aut soleat. ibid. n. 605, & seqq. Quot species Simonie pœnis Ecclesiasticis perstringantur. c. 20. n. 624. Quænam sint illæ pœnæ in particulari. c. 20. n. 625. & seqq.

*Sollicitare* fæminam ad concubitum quàm grande peccatum. c. 12. n. 372. Quid si animo ficto duntaxat id fiat, ad explorandum scilicet, sitne res ipsa meretrix, nec ne. c. 12. n. 377.

*Somniorum* genus quotuplex. c. 16. n. 489. An fas sit divinare ex somniis. ibi n. 490. Unde colligendum, sitne somnium à Deo, vel à dæmone, vel à natura causatum. c. 16. n. 491.

*Sortes* quid sint, & quotuplex eorum genus. c. 16. n. 492. An, vel quando fas sit uti sortibus. ibid. n. 493.

*Spes Theologica* quid sit. c. 6. n. 169. Quotuplex. ibi n. 170. Quodnam sit objectum materiale & formale illius. ibid. n. 171, & 172. Quo-

## *Index Alphabeticus.*

modo sit ad salutem necessaria. c. 6. n. 173. Præceptum spei an affirmativum sit, vel verò negativum ibi n. 174. & 175. An, vel quoties obligemur ad actum spei. c. 6. n. 176. & 177. An etiam teneamur ad actum timoris. ibi n. 178. Virtuti Spei quænam vitia opponantur. c. 6. n. 179. quò modo homines rudiores practicè sint excitandi ad actum spei. ibi n. 193. An adhuc sperare posset ille, cui damnationis revelatio fuisset facta. c. 6. n. 198.

*Suadere* minus malum ad impediendum majus, an fas sit. c. 12. n. 366. & seqq.

*Superior Religiosus* an justè præcipiat, ut frater fratrem immediatè sibi denuntiet, prætermissa omni correctione fraterna. c. 10. n. 302. Vide *Correctio fraterna*, vel *Religiosi Superiores*.

*Superstitio* quid, & quòtuplex. c. 15. n. 454. & 455. quid sit *Superstitio cultûs indebiti*, *cultûs superflui*, & *cultûs falsi*, ibi n. 456. & seqq. Quomodo hi cultus sint peccaminosi ex genere suo. ibid. n. 459. Quæ & quot sint Species Superstitionis rei indebitæ, seu falsi Numinis. c. 15. n. 460. Sitne superstitiosum uti Schedulis lucanis pro felici expeditione partûs. ibi n. 464. & seqq. An sine Superstitionis nota quispiam reddi possit invulnerabilis per certam orationem, vel per SS. Eucharistiæ Sacramentum, vel per certas herbas. c. 15. n. 467. 468. & 469. An per applicationem cujusdam Virgæ detegi possint maleficia, vel etiam thesauri in visceribus terræ latentes. c. 15. à n. 470. Quibus in casibus committi soleat cultus superfluus & incongruus, & in quibus non. c. 15. n. 474.



fiasticum multis annis existit à servitiis cui-  
dam Comiti.

706.

II. De alio quodam Clerico , aspirante ad  
quoddam Beneficium , & pecuniis corrup-  
pente alium Corrivalem , quatenus is absti-  
neret à petitione ejusdem.

711.

III. De alio Clerico , qui ob recommendatio-  
nem & preces cujusdam Domicellæ obtinuit  
insignem Parochiam.

714.

### *Conferentia XX.*

De pœnis Simoniacorum , & de onere restitu-  
tionis inde contracto.

## C A S U S.

I. Cujusdam pœnitentis , dubitantis , an bene-  
ficium , quod à suo Parente simoniace sibi  
procuratum inaudiit , tutâ conscientia retine-  
re possit.

745.


II. Cujusdam Simoniaci à S. Pœnitentiaria di-  
spensati , dubitantis , an conditioni (*liberè di-  
mittendi beneficium* ) satisfecerit , illud di-  
mittendo sub schemate permutationis.

749.

III. Cu-

III. Cujusdam Parochi Emeriti, qui coram Episcopo simulaverat, se gratis resignare beneficium suo ex fratre Nepoti, revera autem ex conventione privata resignavit sub conditione, & onere annuæ pensionis.

755.



CON-



assueverat explorare, essetne evasurus ex sua infirmitate vel non, 594

II. De quodam Juvene, qui dum in nocte Sancti Andreæ in quodam profluente conatus fuit, perspicere formam futuræ Conjugis, in idem flumen præceps prolapsus fuit. 598.

III. De quadam Conjugata, quæ caligis sui Mariti clam insuerat quendam fasciculum herbarum eo fine, ut à lusu excessivo deinceps averteretur. 601.

### Conferentia XVII

De Magia & maleficio.

613

### C A S U S.

I. De quodam lascivo Juvene, qui ope diaboli nisus fuit puellam in suam trahere sententiam. 632.

II. Cujusdam pœnitentis, qui ad recuperandam pecuniam furtivè sibi subtractam ab Ariolo jussus fuit infigere clavum cistulæ, è qua pecunia fuit sublata. 635.

III. De quodam puero decenni, qui D. Parocho suo ingenuè fassus fuit, se à Cacodæmone didicisse artem magicam. 640.



*Conferentia XVIII.*

*De Tentatione DEI, & Sacrilegio.* 653.

C A S U S.

- I. De quodam Prædicatore Evangelico, qui ex Zelo indiscreto Hæreticis convertendis promisit miraculum à DEO impetrandum. 668.
- II. De quodam lascivo homine, assueto in Ecclesia diebus festivis oculos lascivè pascere, sponsam ad turpia sollicitare &c. 672.
- III. Cujusdam Custodis Ecclesiæ dubitantis, an Ecclesia sibi concredita non fuerit polluta, eò quòd una mulier ab altera rixando percussa sanguinem è naribus in ea effuderit. 676

*Conferentia XIX.*

*De Simonia.* 686.

C A S U S.

- I. De quodam Capellano, qui intuitu ulterioris promotionis ad beneficium Ecclesiasti-

n. 474. & seqq. Alii plures casus, in quibus superstitio committi solet, breviter recensentur. c. 16. n. 502. & seqq.

T.

*Tentatio* ut sic seu in genere quid sit, & quid tentatio DEI in specie. c. 18. n. 556. & 557. Tentatio DEI alia implicita dicitur & alia explicita seu formalis. ibi n. 558. Utraque ex suo genere mortaliter mala. ibid. n. 559. Quinam in particulari censentur tentare Deum. c. 18. n. 581. & seqq.

*Turpia* seu etiam lasciva componentes, scribes, pingentes aut repræsentantes, quomodo peccent peccato scandalii. c. 12. n. 385.

V.

*Vana Observantia* quid sit, quot hujus species dentur, & quomodo differat à divinatione c. 16. n. 494. & seqq. Undenam colligenda sit vanitas Observantiæ. ibi n. 500. Quid agendum, casu quo dubitatur, num aliquod medium habeat virtutem ex natura sua in ordine ad effectum intentum, c. 16. n. 501. Varii casus de vana observantia breviter recensentur. ibi à n. 502. Quid de oratione Sancti Christophori, de responsis seu divinationibus Cingarorum, & quid de pulvere Sympatico tenendum sit. c. 16. à n. 510.

*Vendere* res indifferentes, quibus proximus bene vel malè uti potest, an liceat. c. 12. n. 383. Quid si dubitetur, sitne emens illa re abusus nec ne ibid. n. 384.

*Vene-*

*Index Alphabeticus Rerum & mate. &c.*

*Veneficium* quid sit. c. 17. n. 530. Quenam remedia contra veneficia sint adhibenda. ibidem n. 531. & seqq. rursus. n. 546.


*Verba lasciva* seu impudica coram aliis proferentes, qualiter peccent. c. 12. n. 372. An & qualiter hujusmodi homines teneantur exprimere numerum personarum scandalizatarum. ibid. n. 373.

*Virgæ* usus in ordine ad detegenda maleficia, an sit permittendus: & quid de usu virgæ avelanæ seu etiam Coryli in ordine ad investigandos thesauros. c. 15. n. 470. & seqq.

*Virtus* ut sic, quid sit, & quotuplex. c. 1. n. 1. & 2. quid sit virtus Theologica & quotuplex. ibi n. 3. & 4. quas ob causas virtutes Theologicæ deperire soleant. c. 1. n. 5.

*Vitia* Charitatis opposita, quæ & quot. c. 11. n. 324.

Laus DEO semper.



MAG. 005246



